

الموتى يتحدثون أيضًا



الكتاب الأول

والله جثث رأى أضر

د. محمد الشيخ

طبيب شرعي



تشكيل للنشر والتوزيع

مكتبة فريق (متميزون).

لتحويل الكتب النادرة الى صيغة نصية

قام بالتحويل لهذا الكتاب:



كلمة مهمة:

هذا العمل هو بمثابة خدمة حصرية للمكفوفين، من منطلق حرص الجميع على تقديم ما أمكن من دعم للإنسان الكفيف، الذي يحتاج أكثر من غيره للدعم الاجتماعي والعلمي والتقني بحيث تعينه خدماتنا هذه على ممارسة حياته باستقلالية وراحة، وتعزز لديه الثقة بالنفس والاندماج بالمجتمع بشكل طبيعي. وبسبب شح الخدمات المتوفرة للمكفوفين حرصنا على توفير خدمات نوعية تساعد الكفيف في المجالات التعليمية العلمية والثقافية وذلك بتسخير ما يتوفر من تقنيات خاصة لتحويل الكتب الي نصوص تكون بين أيديهم بشكل مجاني، ويمكن لبرامج القراءة الخاصة بالمكفوفين قراءتها.

مع تحيات:

فريق (متميزون)

انضم الى الجروب

انضم الى القناة

سلسلة والموتى يتحدثون أيضا
العدد الأول

للجثث رأي آخر

د. محمد الشيخ

طبيب شرعي

إهداء..

إلى أبي، ذاك الراحل النبيل الذي كان يهدئ روع الياسمين في الدار، فيغار القرنفل، ويتسارع الفل إلى مصرعه عند قدميه..

ذاك الذي كان في بياض القطن موسم الزهر، لا همَّ له سوى سعادتني..

ذاك الذي كان في شموخ الليل موسم الفيض، أعظم هزائمه أن يتفرق ماء عذباً فراتاً.

هذه سلسلة كتبي الأولى حبيبي، أهديتها كلها لك لتقرَّ عينك.

سميتها "والموتى يتحدثون أيضاً"، ترى هل تُعجبك؟

فوحدي أعلم أن للموتى آذان أيضاً، والمقابر لا تنام.

فقط أريدك أن تعلم يا حبيبي أن وجودك كان جنتي الخالدة، وأن رحيلك كان فجيعتي المؤكدة، وأني هنا لك وحدك أحكي، وأنه لك أساساً خلقت الحكايات.

محمد

∞ ∞ ∞ ∞ ∞

مقدمة..

عندنا في "مشرحة زينهم" حيث الموت ليس فجائيًا كالأمطار، هو يطل عليك من منصات التشريح، من الملابس المتناثرة، من النوافذ الباكية، من العظام المحطمة، من الطرقات المختقة بالدم، من الحوائط النابضة بالقهر، من النسوة المنتحبات المنتشحات بالسواد..

الموت هنا ليس فجائيًا أبدًا، بل الحياة هنا هي التي تأتي فجأة!

ويعلم الجميع هنا أن الموت حق والحياة باطلة، وأن الإنسان مهما عاش لا يعيش إلا ليموت، ومهما تحدث وصرخ فمصيره إلى سكوت، ومهما ملأ الحياة فرحًا فلا بد أن يأتي يوم وتشهق المأساة في كل البيوت، ونعلم أن الموت صديق طيب مترفع، على الأقل هو يرفع عنك ضرر الحياة، وأنت ونصيبك في الآخرة.

في حياة الناس تكاثر الحكايات، وفي حياتنا تتناسل الجثث، الموت مقيم داخلنا، على أسنة مشارطنا، في برودة أيدينا، مفاجأتنا، تهكمنا المر، فوضويتنا الدائمة، نعمل ونحن نعلم أن كلاً منا ميت سيلقى حتفه حتمًا بين جثتين.

عشنا أعمارنا على وجع، عابري موتى، مسافرين دائمًا، وفي انتظار راحة السفر الأخير.

كلنا استثناء..

يستحيل أن نجد آخر يشبهنا، فنحن أيضًا كالموت، لا نأتي - أبدًا - مرتين.

حسنًا، مساء الفرح على الأموات جميعًا.

مساء غير المساءات.

مساء الحكايات الآثمة التي لا تُكتب إلا ليلاً، ولا تُقرأ إلا ليلاً.

على مدار عشر سنوات من استنطاق الجثث، هناك جثث تحب البوح وكشف أسرارها، وهناك جثث تفضل الصمت مؤمنة أن دورها انتهى في هذه الحياة، وأن أي طبق شهوي للبوح لا يخلو من توابل الرياء، وأن الصمت عند الموت ه أكثر حديثنا صدقًا.

حسنًا، لهم ما أرادوا.

ومساء الورد عليهم جميعًا.

ومساء الورد عليكم أنتم أيها القراء.

مساء الورد يا رسالات حب بيضاء قادمة من السماء.

مساء الغموض عليكم، مساء الجنون.

كم وددت وأنا أتذكر هذا الكم الكبير من الجثث الآن أن أرسل إليكم أحد الأرواح
لتوشوش في آذانكم أنني أحبكم، دون أن تنهروها تمامًا.
هنا مشرحة زينهم.

ومساء الجنون عليكم، مساء الرعب، مساء طلتكم الرائعة وأنا أضع كتابي الأول بين
أيديكم فوجدتكم على مقعد الذهول المقابل لحكاياتي، مساء الحب الأول يوم تعثر
قدري بكم وبالكتابة، ففكرت أن أقيم!

∞ ∞ ∞ ∞ ∞

الحكاية الأولى

دي قصة افتتاح الكتاب، وحببت أفتحه بحاجة حصلت بعيد عن المشرحة.

القصة دي الحمد لله إنه نجاني منها، ويمكن القصة دي ليها كل الفضل إني أعرف أي دجال أو مشعوذ بمنتهى السهولة، وكمان ليها الفضل إني أكون أنا، محمد اللي مسح من قاموسه أي معنى للخوف.

أحمد كان صديقي أيام الجامعة وما زال، كلية طب طنطا.

كنت في الوقت دا مشهور جداً في الجامعة برئيس أسرة المستقبل وأمين منتدى ماجيك دكتورز والرحلات والهلس والمسخرة، وكمان زادت شعبيتي لما رفضت إني أكون أمين إتحاد الطلاب لأنه منصب مسيس وغير محايد ولا صاحب رأي.

في الوقت ده ناس حاولت تقرب مني بدافع الحب أو الإعجاب أو الاستطلاع، ويمكن الكره.

اللي بيكرهك هو كمان هيقرب منك، مش شرط كل اللي يقرب منك يكون بيحبك، فيه ناس يقرب منك بخبث عشان تسرق ضوءك ونجاحك، وناس يقرب منك بحقد لأن ضوءك كشف عيوبه، وناس يقرب منك عشان تعيش عمرها كله بهدف إثبات عدم شرعية نجاحك، في وسط كل الناس اللي اتعرفت في الوقت دا كان أحمد، وأحمد شخص لذيذ جداً وطيب، ومقبول على المستوى العام، فيه بعض العيوب لكن كلنا فينا عيوب، اتصاحب عليا جداً جداً، بقي يجي بيتي وأروح بيته، وأنا بحب أصحابي جداً.

فجأ اتغير حاله تماماً، كنا في آخر سنة امتياز، حاله اتقلب، بعد تماماً عن كل الناس، تحت عينه بقي اسود يشكل مرعب والولد بقي شكله أقرب للشبح، مبيجيش الكلية أساساً ولو روحته ميرضاش يقابلني.

رحت تاني وتالت وخامس من غير ما أقابله، في يوم وأصريت إني أقابله بأس شكل ومارضيتش أمشي، وانفعلت جداً على أهله وقتلتهم: شوفوا ابنكو ماله وكان عندهم برود. لكن أنا كنت أعرف من حكايات أحمد إنهم عيلة مفككة وكل واحد في حاله، لكن كنت متعجب جداً جداً ازاي يسيبوا ابنهم يوصل للمرحلة دي، وإيه وصله اكدت، لكن زعيفي تقريباً لم الناس في الشارع، ووقتها كنت مندفع جداً فتقريباً بقت شبه فضيحة عندهم وبقي كل الشارع يبسأل هو فيه إيه؟

تاني يوم احمد اتصل بيا وزعق معايا جداً، وهددني لو رححت عندهم تاني، فرديت بعنف وقولتله: أنا عشان العيش والملح مش هسيبك تضيع نفسك لحد ما اعرف فيه إيه، قالي بغرابة شديدة وبلهجة كلها غل: وأنا هعرف أنا هعمل فيك إيه!

وخذ عندك بقا.

أول يوم أوضتي بدون سبب ولعت وكل هدومي اتحرقت ولحقنا البيت بالعافية، بعدها بدأ حالي يتغير تمامًا، كسل رهيب، مش بتحرك تقريبًا، عدم رغبة إطلاقًا في الأكل أو الشرب، ضعف عام وصداع، كل دا كان تفسيره بالنسب لي عادي دور تعب وإرهاق، اللي مكانش ليه تفسير بالنسبة لي حاجة ثانية تمامًا، وغريبة جدًا.

أنا كان دايمًا ليا أوضة لوحدي فوق خالص في آخر دور في عمارتنا منفصلة تمامًا عن الكل عشان أعيش براحتي، عمار عارف كدا، والسباعي دا أنتيم عمار وجاري، العمارة في العمارة كل ما أطلع أوضتي لأقيه قاعد على الكمبيوتر بتاعي!

فكان بيحصل معايا التالي:

أجيب مثلاً قنوات مسيحية زي قناة أجابي مثلاً وأصرح قدامها من (10) الصبح أبص في الساعة الأقيها سنة المغرب! إزاي أنا معرفش!

(8) ساعات فاتوا بلمح البصر وأنا صاحي ومش عارف أنا بشوف إيه أساسًا!

في أعياد الأخوة المسيحيين أجيب القديس وأسرح تمامًا لكان ساعة لحد ميخلص معرفش عدوا إزاي ولا فاهم بيقلوا إيه!

أنزل ألف بالعربية في الشوارع وفجأة أفوق وأنا قاعد جوه كنيسة من الكنائس في طنطا، أنا بطبيعتي عندي يعني شبه انتماء ديني كده، أو بمعنى ثاني أحب الصالحين ولست منهم، يمكن بسبب حفظي القرآن كاملاً في سن صغيرة أوى.

قلقت جدًا، مقلقتش من التعب، لكن قلقت من موضوع المسيحية والكنائس ده. وكنت وقتها، أه قلبي جامد شوية ومخافش، لكن كنت بقلق زي أي حد لما يحصل حاجة مش فاهمها ولا مستوعبها. رحت لشيخ عندنا فضيلة الشيخ (عبد العزيز رسلان) قالي: معمول ليك سحر، إداني آيات وأدعية قالي: تقولها قبل النوم على وضوء وتنام هتعرف الحقيقة.

قلتها فعلاً ونمت، أنا بطبيعتي مبلمش إطلاقًا، وكانت من المرات النادرة اللي حلمت فيها، وكان أبشع حلم شوفته في حياتي.

أرض قدرة أشبه بالخرابات كل شيء فيها مرعب ومقزز، كل أشكال القاذورات في كل مكان، ورائحة عفن قاتلة في كل مكان، موتى يتم تعذيبهم، معلقين من أعناقهم بخطاطيف حديدية ويتم تقطيع لحمهم بسيوف، ناس عايشة في زيت مغلي صرختها تقفل ودنك، ناس بينداس على رأسها من كائنات ضخمة فتنحطم الجمجمة تمامًا وتتساوى بالأرض. وينتشر الدم وأجزاء المخ في كل مكان، أشكال رهيبية من العذاب لكل الموجودين، آلاف الأشكال، وأنا في مكان فوق بتفرج وفي حالة رعب مهولة، وكل شوية حراس يجيبو واحد عندي في المكان العالي ويرموه في الأرض ياخذ دوره من العذاب.

وفجأة لقيتهم جايين أحمد، وعاوزين يرموه من عندي، وكان نفس الشكل اللي شوفته فيه آخر مرة، نفس الشكل تمامًا مع إضافة بسيطة، إن ريحته كريهة بشكل لا يوصف، وقفت أتحايل عليهم ميرمهوش، قالولي: إزاي وهو اللي أذاك! بصيت

لأحمد قولته: أذيتني ازاي؟ سكت، ردوا قالولي: عملك سحر بجن مسيحي ونقشه على صليب. كنت مذهول بس مش فاهم حاجة، قلت لأحمد إنت عملت كده؟ سكت، قولتهم: طيب لو أنا سامحته هتسيبوه، قالوا: هنسيبه هنا، لكن لو فضل في طريقه مش هنسيبه هناك، إنت تقدر تلحقه وتلحق غيره.

صحيت فجأة من النوم مذهول على موبايلي بيرن باستماتة، وصوت آذان الفجر (الله أكبر) وأنا أو من بالقدريات جداً، لقيت أحمد بيتصل، ودي المرة الـ 14 اللي يتصل فيها باستماتة مكونتش قادر أرد من حالة عدم الاستيعاب اللي أنا فيها، حالة ذهول، من اللي شفته واللي صحيت عليه، تماكنت أعصابي رديت.

- ألو

- بكاء بنحيب رهيب على الطرف الآخر مع كلام منقطع كل اللي فهمته منه شكراً إنك سامحتني أنا محتاجك جنبي أوى.

- أنا جايلك حالاً.

أحمد كان ساكن في بلد تابعة لطنطا تبعد عنى (15) كيلو، نزلت بهدوم البيت، كنت ماشي بالعربية على سرعة (150) في طريق داخلي كله مطبات. وكأني رايح أنقذ حد بيموت، وصلت عند البيت لقيته واقف على الباب ببكاء، خلى هدومه كأنه واقف في مطر شديد بقاله ساعتين وعينه كأنها دم مش عين.

أخفته في العربية وبعدت. لا أنا بتكلم ولا هو بيبطل بكاء، قطعت الصمت وقولته: تعالى نصلي الفجر، ازداد بكأوه، وقالى: مش هينفع! فضلت ماشي على طريق استاد طنطا لحد ما وصلت لأراضي شاسعة مزروعة، ركنت، كان النور بدأ يطلع.

نزلت قعدت قدام العربية، على الارض وناديتله، جه قعد وكان بدأ يتماسك من الدموع، قولته: احكيلى يا أحمد مد إيدك في جيبه وطلع كيس أصفر إداهولي وقالى: إديه للشيوخ عبد العزيز يقرأ عليه ويحرقه.

رديت باستغراب وذهول، إنت تعرف الشيخ عبد العزيز منين؟ قالى: أنا كنت بعرف كل حاجة بتعملها في لحظتها، فتحت الكيس لقيت جواه صليب خشب عليه رموز وأرقام، فهمت، مرضيتش أرح فيه أكثر، واضح إنه كان منتهي، قولته: إيه اللي وصلك لكده يا أحمد؟

أخذ نفس عميبيبيبيبي وبدأ يحكيلى:

اللي جاي ده لازم تفهموه كويس جداً، لازم تعرفوا اللي بيقولوا: عليهم روحانيين، ومعاهم جن مسلم، وبتوع ربنا بيعملوا إيه عشان يوصلوا إنهم يبقى عندهم خدمة من الجن، لازم تعرفوا إن أي حد يقول: على نفسه روحانى، ده دجال وكافر.

أحمد كان مع ناس أصحابه من بلده، الناس دول قالوله: ده فيه شيخ روحانى اسمه (الشيخ جابر) بيعرف كل حاجة في الدنيا وممكن يقولك: إيه اللي هيحصلك قدام! وعاوزين نروحله، فضل يضحك ويتريق وقرروا يروحوا من باب الفضول والهزار.

جابر ده ساكن في بيت عبارة عن غرفة واحدة ومكان للقعدة كبير، من دور واحد، سقفه خشب مبنى في أرض زراعية تبعد عن العمران حوالي (12 كيلو) يعني منطقة مقطوعة تماماً، أخذوا عربية واحدة زميلهم وراحوا، كانوا أربعة، ثلاثة مؤمنين تماماً إن ده رجل روحاني، وبيعرف الغيب والرابع اللي هو أحمد شايف إن كل ده كذب وتهريج. خبطوا على الباب ودخلوا. نادى جابر على كل واحد منهم باسمه واسم أمه، وقدهم قدامه، أحمد بقا في حالة ذهول. بدأ يخاف، وجابر بدأ يتكلم مع واحد واحد، ويقول: على مشاكل في حياته بمنتهى الدقة، لحد ما جه دور احمد، لقاه بيقوله: إنت بقى مش مصدق إنى أعرف كل شيء، وبدأ يحكى لأحمد أدق أسرار الشخصية، أدق أسرار، أحمد بدأ يعرق ويخاف وعاوز يمشي، جابر جابله عصير برتقان وقاله: اشرب بس واقعد، شرب ويا ريته ما شرب. من لحظة ما شرب العصير وجابر أصبح ليه سلطة مطلقة عليه، مشيوا من عنده وأحمد شبه متخدر، مش واعي للي حواليه ومش شايف قدامه غير عيون جابر المرعبة والسواد اللي تحتها. بعدها بدأت سيطرة جابر عليه، بقى يستدعيه من غير أي وسيلة اتصال، أحمد يقوم فجأة من مكانه كان حد بيحركه يمشي (12 كيلو على رجله لحد ما يوصل لجابر، فيز عقله إنه اتأخر! بدأ جابر يتكلم معاه. إداله كتاب تعاويذ نسخة أصلية، وبدأ يعلمه طقوس معينة، أجبره ميروحش الكلية ويبعد عن أي شيء يخص الدين.

أحمد زي المتخدر بقى يعمل كل اللي ينطلب منه وينفذ تعليمات جابر ويقول: تعاويذ الكتاب، ولكن مكانش فيه أي حاجة بتحصل ولا التعاويذ بتعمل شيء.

راح لجابر كالعادة لما استدعاه وسأل جابر ليه التعاويذ مبتعملش أي حاجة، جابر قاله مش هتعمل إلا لما أديك الإذن وتدخل الخلوة، قاله: يعني إيه؟ رد جابر قاله: لازم تسلم نفسك ليا تماماً، لازم تعاهدني عهد إنك خاضع تماماً ليا وتنفذ أمري بدون مناقشة. وأي مخالفة مصيرها الموت، بعد تردد ولأنه مسلوب الإرادة، أحمد قاله: أعاهدك، رد جابر بكل ثقة، اسجدلي.

أحمد أخذ عشر ثواني واقف، بعدين سجد تحت رجل جابر، وجابر حط رجله على راس أحمد وضغط عليها، أحمد بيقسم إنه لما رفع راسه كان وش جابر وش شيطان أسود وعنيه بالارزوة تماماً للخارج ورقبته وصدرة من فوق أحمر دم، بيقول: كان منظره مرعب، مرعب، لدرجة إن أحمد بقى يخاف ويترعب منه، وينفذ أوامره دون لحظة تفكير، وبعضها أوامر جنسية قذرة لا داعي لذكرها، بعد فترة قال: لأحمد، قول: لأهلك إنك رايح مكان لمدة (10-15) يوم وتجيلي يوم (15) في الشهر العربي، فسأله ليس معاه، قاله لأ، متجيبش أي شيء.

يوم (14) أحمد راح ليه، قاله إنت هتدخل الخلوة النهارده بالليل، هتدخل الأوضة دي مقفولة عليك وضلمة تماماً، مش هتخرج من بابها إلا بعد (11) يوم بالعدد. أنا هاجي افتحك، هتاخذ بس معاك تمر. هديهولك، (99) تمر، كل يوم (9) تمرات فقط لا غير وإزاتين ميه، كل يوم كوباية فقط لا غير، قاله والحمام؟ قاله تعمله في أي ركن في الأوضة وممنوع تغتسل بأي مية بعد الحمام طول مدة الـ (11) يوم، وكل يوم استمناء في هدومك، وإداله أية قصيرة جدا في القرآن، وقاله: طول

الوقت وإنت صاحي تقرأ الآية دي، لكن بالمقلوب، طلب منه يعكس كلماتها، وعلمه يقولها ازاي، وقاله في آخر ليلة هيطهرلك الخدمة، اوعى تخاف، هيحاولو يخوفوك، اوعى تخاف لحد ما يظهرلك الروحاني الملاك، هيعلمك كل شيء، وأي حاجة يطلبها تقول: موافق، وأنا هاجي أفتحلك بالليل، أخذ جابر من أحمد موبايله قفله، واداله التمر والميه ودخله الأوضة اللي كانت ضلمة كحل من غير أي شباك، وقفل عليه بمفتاح وقفل وساب جابر البيت ومشى.

نكمل... والكلام لأحمد:

قالي: بدأت أعمل اللي قالهولي بالظبط حرفيا. وأقول: الآية بالمقلوب، وأكل التمرات، وأشرب كوباية ومفيش أي غسل بعد الحمام وأقوم وأنام لحد ما ريحتي وريحة الأوضة أصبحت لا تطاق وكنت برجع التمر اللي باكله فإزاد الموضوع سوءا وقذارة، ومستني آخر ليلة بفارغ الصبر، ومعرفش أصلا فات أد إيه! وأنا في اليوم الكام؟ لحد ما وصلتلتها. أنا أكثر حاجة بخاف منها التعابين، بترعب منها.

وبيقول: قاعد في ركن الأوضة كاره نفسي وفجأة الأوضة كلها نورت نور عالي جداً. ولقيت تعبان بحجم مهوول بيزحف ناحيتي صوت فحيح، كنت هاصرخ، افتكرت كلام جابر اوعى تخاف. فضلت قاعد مكاني بتنفض وبحاول مركزش معاه، لحد ما وصل عندي وحرك راسه على رجلي. وأنا قلبي هيقف، لكن فضلت متماسك، وفجأة اختفى، والأوضة نورت أكثر من الأول بكتير جداً، وظهر في آخرها راجل جميل جداً جداً. بلامح ملانكية. وجه بريء. ودقن بيضاء رائعة، ووجه كالقمر، وقالي: السلام عليكم، رديت عليه السلام، قالي: أنا أخوك الملاك الروحاني طهطائيل، وأنت نلت خدمتنا ببركة سيدك جابر، وقد حددت لك خمس أفراد للخدمة، وسنتفق على إشارة بيننا عندما تحتاج أحدهم أرسله لك، بيقولي: بيتكلم بالعربية الفصحى بصوت هادي ومؤثر جداً. خلاني فعلا اتأثرت بيه، وإدي لاحمد خاتم قاله: البسه وعندما تحتاج أحد لف الخاتم في إصبعك سيأتي إليك وينفذ أوامرك ولن يراه غيرك، ولكن بشرط أن نأخذ منك العهد أولاً.

أحمد قاله: عهد إيه؟ قاله: من اليوم إنت لست أحمدًا، أنت اسمك (الشيخ صابر) ومطلوب منك أشياء تنفذها، أسقطنا عنك فريضة الصلاة، فلا تصلي أبداً، وإن اضطررت للصلاة أمام أحد فصلي بدون وضوء، وأسقطنا عنك فريضة الصوم فلا تصوم أبداً، وأحللنا لك جميع النساء حتى محارمك فيجوز لك التمتع بأي منهن، ومطلوب منك إفساد أي علاقة زوجية ما استطعت لأنها ليست شرعية ومبنية على قوانين باطلة، فهل وافقت، افتكر أحمد كلام جابر وقاله: وافقت، قاله: هناك طلب أخير تنفذه الآن فإن نفذته بدأنا خدمتك وأخذت العهد، أحمد قاله: إيه هو؟ أحمد سأله إيه الطلب؟ إداله مصحف وطلب منه يقطع ورقه ويدوس عليه بالشبشب. وعمل كده.

قاله: الآن نحن معك، اطلب تجاب، هل تود زيارة أي مكان، اختار أي مكان في العالم.

أحمد قاله: المغرب، قاله: قم ثم تحرك ثلاث خطوات، قام اتحرك لقي نفسه في المغرب في قلب الدار البيضاء، وشايف كل شيء فيها والناس مش شايفاه، وطلب منه يرجع ثلاث خطوات رجعم فرجع للأوضة تانى، قاله: الآن أنت من أصحاب الخطوة وهذا أقل شيء.

انظر إلى أعلى، بص أحمد لقي السما كلها مضيئة ومكتوب عليها حروف كثير لكن مش واضحة، سأله إيه ده؟ قاله: اللوح المحفوظ، وبعد فترة سأعلمك قراءة الغيب من عليه.

الخاتم معك لو احتجتني، سأذهب الآن، ومشى.

أحمد بيقول: قعدت ليلتها في شعور غريب، على أد ما أنا كاره نفسي، على أد ما أنا كنت موهوم وحاسس إلى ملكت الدنيا كلها وبقي معايا خدم يخدموني في أي شيء.

عرفتوا بياخدوا الخدمة ازاي اللي بتقولوا: عليهم شيوخ روحانيين؟

دول كفره اشتروا دنيتهم بأخرتهم.

اقرأوا الآية دي بكل جوارحك، بكل قلوبكم، وأنتوا تعرفو مين الملاك الروحاني اللي ظهر ليه.

بسم الله الرحمن الرحيم

{وَ تَبِعُوا مَا تَتَّبِعُوا لَوْ لَشَّيَاطِينُ عَلَىٰ مُلْكِكُمْ سُلَيْمٌ مِّنْ وَمَا كَفَرَ سُلَيْمٌ مِّنْ
وَلَكِنَّ لَشَّيَاطِينُ كَفَرُوا يُعَلِّمُونَ النَّاسَ لَسِحْرٍ وَمَا أَنزَلَ عَلَىٰ
لِلْمَلَائِكَةِ نِبَائِلَ هَارُوتَ وَمَارُوتَ وَمَا يُعَلِّمَانِ مِنْ أَحَدٍ حَتَّىٰ يَقُولَا إِنَّمَا
نَحْنُ فِتْنَةٌ فَلَا تَكْفُرَا فَيَتَعَلَّمُونَ مِنْهُمَا مَا يُفَرِّقُونَ بِهِ بَيْنَ لِمَرَّةٍ
وَزَوْجَةٍ وَمَا هُمْ بِضَآئِرِينَ بِهِ مِنْ أَحَدٍ إِلَّا بِإِذْنِ اللَّهِ وَيَتَعَلَّمُونَ مَا
يَضُرُّهُمْ وَلَا يَنْفَعُهُمْ وَلَقَدْ عَلَّمُوا لَمَنْ شَاءَ تَرَاهُ مَا لَهُ فِي لِيَأْخِرَةَ
مِنْ خَلْقٍ وَلَيْدِيَسَ مَا شَرَوْا بِهِ أَنْفُسَهُمْ لَوْ كَانُوا يَعْلَمُونَ
[سُورَةُ الْبَقَرَةِ: 102]

صدق الله العظيم

عرفتوا مين؟

عرفتوا مصيرهم؟

ولبئس ما شروا به أنفسهم لو كانوا يعلمون.

الصبح جابر فتح الباب، أحمد كان خارج ريحته وريحة ملابسه لا تطاق، جابر خلاه اغتسل وإداله لبس من عنده، وقعد معاه فضل يعلمه يؤذي الناس إزاي.

من يومها وأحمد بقا يتقن في أذى الناس اللي ضايقوه في حياته. كلها باستخدام كتاب السحر والخاتم وتعليمات جابر، يحرق لده بيته، يدمر لده حياته، يجنن لده مراته، كم

أذى هو نفسه مش فاكر عدده، لحد ما رححت عند البيت وزعقت فقررت يا ذينبي أنا كمان.

أحمد رغم كل ده كان حاسس إنه ضعيف وإنسان قذر وحقير واكتشف إنه لا ملك الدنيا ولا شيء وبدأ يكره القصة كلها ويكره جابر.

واجه جابر وقاله: أنا عاوز أبطل القصة دي، وأرجع لحياتي وخذ الخاتم، جابر هدده وقاله: إنت عارف مين اللي معايا، لو طلعت من القصة دي أو قاتلتها لحد هقتلك هتكون نهايتك عندي، وده العهد.

كل الأحداث دي دارت لحد يوم الحلم بتاعي اللي إحنا فيه، سألتته طيب إنت حكيتلي دلوقتي ومعملش ليك أي شيء ليه؟

قالي: عشان جابر مات من كام ساعة.

مات إزاي؟ رد أحمد مات ومرمى هناك زي الكلب، قولتله: إنت شفته؟ قال: لا لكن الجن عرفني وأنا لقيتها فرصتي أخلص من كل شيء لأنه مش هيقدر يا ذينبي.

في اللحظة دي بقيت حاسس إنى مش واعي أو بحلم، أو هو إيه اللي بتقوله ده، وخاصة إنى كنت طول الحكاية بقول: ده مريض نفسي وبيهزى، قولتله: تعالى نروح نشوفه، وأنا متوقع إنه هيرفض لأن مفيش حاجة كده، إلا إنه قالي: بكل هدوء يلا، بس أنا مش هدخل، قولتله: مش هتدخل ليه؟ قالي: عشان هو هتلاقي شكله زي الشيطان، وأنا بخاف من الشكل ده، بقى عندي يقين إنه مريض نفسي.

ركبت العربية واتحرك معايا يوصفلي الطريق، ولقيت في الأرض بيت نسخة طبق الأصل من اللي أحمد وصفه. أول ما قربت منه رائحة لا تطاق، لا تطاق، ووقتها مكوناتش اتعودت أبدا على الروائح دي.

دخلت، تماسكت، وصورت بموبايلي، شفت المنظر اللي قدامكو ده، بالظبط.

بعد الموقف ده خرجت ورجعت البيت، أخذت أحمد معايا، رححت للشيخ عبد العزيز، قرأ عليا وعليه، روحنا وشاف كل واحد منا رؤيا.

أحمد شاف إنه نجا من العذاب وشاف جابر بيتعذب.

أنا شفت إنى مطلوب منى أرجع حقوق المظلومين.

صحيت من النوم على اتصال واحدة صديقتي اسمها علياء بتقولي: إنها هتقدم في الطب الشرعي لأنهم طالبين عدد 4 أطباء شرعيين وعاوزاني أقدم معاها.

اشترطت إنها تجمعلي ورق التقديم، روحنا بعدها بأسبوع عملنا اختبارات متتالية، كنا حوالي (16000) طبيب، ومطلوب منهم عدد محدود جدا فقط لا غير.

الجميع كان معاه واسطة قاتلة حتى علياء، وأنا كان معايا الرؤيا اللي شفتها لا غير، ورفضت أي واسطة.

وكننت الاسم الأول بين الناجحين!

من يومها، لا يوجد في قاموسي كلمة رعب، وما يخافه الناس بجنون، هو بالنسبة
لمحمد، كوميديا، كل الكوميديا.

∞ ∞ ∞ ∞ ∞

الحكاية الثانية

القصة دي عارف إن معظم الناس مش هتصدق، أنا نفسي لو كانت القصة دي اتحكّت لي ما كنتش أصدقها بسهولة، ولو كانت حصلت ليا وحدي كان ممكن أعتبر نفسي في حلم، أو بتخيل أشياء من التوتر والضغط النفسي، أو يمكن أكون واخد حبايه الفيل الأزرق، لكن بما إن كان فيه غيري شخصين حضروا القصة بكل تفاصيلها فكان لازم أصدق، ولحد النهارده كل ما نتجمع إحنا الثلاثة بنفكر أحداثها بنفس الذهول، نبدأ...

المكان: مشرحة زينهم.

الزمان: سبتمبر 2016.

التوقيت: العاشرة والنصف ليلا.

في الأول لازم تعرفو سيستيم الشغل عندنا بيكون إزاي، بيكون فيه بلاغ بحالة جنائية، بتتحرك الشرطة فوراً تعالين، بعدين تستدعي النيابة تعالين، بعدين بيعتولنا الجثة المشرحة ومعها قرار تشريح، وأحياناً بتيجي الجثة من غير قرار وتفضل في التلاجة لحد القرار ما ييجي، والقرار ده بيوصل مع موظف نيابة، أو أمين شرطة، وأحياناً مع الأهالي. والجثة بتيجي في سيارة إسعاف وفي حالات نادرة جداً بتيجي في سيارة الأهالي، الجثة لما بتوصل بيستقبلها فني التشريح الموجود في أوضة ملحقة بمبنى المشرحة من الخارج، يدخلها ويسجل بياناتها، ولو معها قرار تشريح بيستدعي الطبيب النوبتجي عشان يشتغلها، وفني التشريح في اليوم ده كان اسمه (شعبان) وده الديب هربان منه تماماً.

في الوقت ده أنا كنت هسافر أمريكا بعد أيام، في مهمة رسمية فالريس قال: لازم أخلص القضايا اللي معايا قبل ما أسافر عشان متأخرش القضايا عندنا (الريس بتاعنا إحنا اللي قال، الريس الثاني مبيقولش بيعمل على طول). فقررت إني مش هشتغل أي قضايا تان عشان أخلص اللي معايا، ووقتها الريس كان مصر إني أبات في المكتب بتاعه؛ لأن كان فيه اجتماعات ومؤتمرات كل يوم الصبح خاصة بالعلاقات العامة، والإعلام للطب الشرعي مع جهات أجنبية وأنا بالمناسبة مدير العلاقات العامة والإعلام، وكان مصر على كده خاصة إنه عارف كويس إن أنا لو روحت نمت في البيت يوم السبت؛ على وعد إني هاجي الصبح بدري فبتصل بيه التلات بالليل أقوله: (صباح الخير)

وبالتالي أنا الشخص الوحيد (الحي) اللي متواجد في مبنى مشرحة زينهم الست أوار مع حوالي (300) جثة و (5000) عينة أعضاء من جنث.

الساعة تسعة بالليل قاعد في المكتب بكتب القضايا وزهقان، اتصلت بشعبولا قولتله: لو جت حالة اتصل بيا أنا هنزل أشتغلها عشان زهقان.

الساعة عشرة ونص بالليل تقريبا اتصل بيا شعبان: أيوه يا ريس (ودي كلمة بتتقال عندنا للي فوقك عشان محدش يفهمني غلط)، فيه حالة جت.

- سألته ظروفها إيه يا شعبان؟

- قالي: بنت سورية أختها بتقول إنها منتحرة بس أختها حلوة أوى يا ريس.

الديب هريان منه.

- طيب يا شعبان، جهزها وأنا نازل.

هنا بقي لازم تفهمو المشرحة مبنية ازاي عشان تفهمو اللي هقوله.

المشرحة ليها مدخل واحد بس من داخل المبنى، بيدخل منه العاملين فيها، أما الجثث بتدخل عن طريق باب خلفي. الباب ده حديد مصفح، وفيه فتحة تسمح بدخول الجثة بس، وممنوع مخلوق يدخل جوه، وفيه شباك حديد بنتكلم منه مع أي حد موجود لو حبيننا نتكلم، فيه جوه قاعتين تشريح كبار كل قاعة فيها ترايبزتين تشريح، جنبهم التلاجات اللي متقسمة على هيئة أدراج هحاول أنزلكم صورة ليها. كل درج من دول بيتفتح ويتحط فيه الجثة، آخر المشرحة فيه غرفة صغيرة فيها واحد اسمه الشيخ (سعيد وزوجته) وده هو اللي بيقوم بعملية الغسل والتكفين بعد التشريح، الغرفة دي ليها باب صغير جدا. ومعزولة بباب حديد عن المشرحة عشان لو حد من الأهالي حب يحضر الغسل، بعدين بتتسلم الجثة للأهل من نفس الفتحة اللي دخلت منها، عاوزكوا تتخيلوا الشكل كويس.

هاتلي يا شعبان أختها، شعبان نده عليها، جت ووقفت عند الشباك الحديد، قالها الدكتور عاوز يتكلم معاكى، مردتتش.

بدأت كلامي كالمعتاد، البقاء لله هو إيه اللي حصل؟

- قالت بكل برود: انتحرت.

البنت كانت جميلة جدا. الجمال اللي يبهرك، وأنا راجل بيقدر الجمال الصراحة، وفي نفس الوقت باردة جدا، مفيش أي إيموشنز في تعابير وشها، لكن جمالها خلاني أركز معاها الصراحة.

كانت لابسة شيميز مقلم أبيض في أسود، طرحة على الاستايل السوري لونها تريكو، وجينز أزرق.

وهنا عاوزكو تعرفو إن الطبيب الشرعي حياته كلها الملاحظة والتفاصيل، لدرجة بتشغل كل حياته، فيلاحظ أي حاجة مهما كانت صغيرة أو ملهاش لازمة، ودايما مؤمنين إن الشيطان يكمن في التفاصيل.

المهم، قولتلها انتحرت ازاي؟

- دبحت نفسها.

- بسهولة كده؟

- آه.

- غريبة، وانتى كنتى فين؟

- مكونتش موجودة.

- وايه عرفك إنها دبحت نفسها؟ ما يمكن حد دبحها؟

- لا أنا عارفة إنها دبحت نفسها. هي قالتلي: إنها هتعمل كده.

(البننت بتتكلم ببرود رهيب غير طبيعي، مفيش أي تعابير ظاهرة على وجهها إطلاق حاجة غريبة جدا، لا ابتسام، ولا دموع، لا حزن، ولا فرح، حاجة كده كأنه ميت بس بيتحرك وبيتكلم).

- فين السكنينة اللي دبحت بيها نفسها؟

- الشرطة أخذوها.

لسه أنا في حالة حيرة بين جمال البننت، وبرودها، وقولتها: انتى جيبتيها هنا ليه وازاى؛ قالت: أنا جيبتيها عشان تغسلوها وتكفونها وشيلتها حطيتها في عربيتي وجيبتيها هنا. - بس انتى هدمك معلهاش دم؟!!

- لما نزلتها طلعت غيرت هدومي.

- بدأت أشك وقولتها: فين عربيتك؟

- وديتها مغسلة.

ردود باردة ومستقرة لأقصى درجة ممكنة.

قولتها: طيب بصي يا ماما دي لازم تتشرح، وعشان تتشرح لازم قرار من النيابة، والنيابة تعالين. قالتلي: ما النيابة عاينت وأنا أدبت للأستاذ قرار النيابة، شعبان ادهولي، قرينه بسرعة صحيح ومختوم، قولتها: والشرطة مجابتهاش هي ليه ما دام النيابة عاينت وكل شيء؟ قالتلي: هما مشيو عشان بيعتو إسعاف فأنا جيبتيها وجيت.

قولتها ماشي، هنشرح ونشوف

ردت بنفس البرود، وكأنها بتديني أمر، أنا مش عاوزاها تتشرح.

قولتها: ده مش بمزاجك، مرديتش. اتفضلي اقعدى وأنا هناديلك لو احتجتلك.

شعبان ادالها باسبور البننت بعد ما أخذ البيانات، وطلب منها تصويره في أي مكتبة وتجيبه.

- البت دي مش مريحانى يا شعبان.

- بس حق الله فرس يا ريس.

الديب هربان منه تماما.

- قولتله: طيب يلا نشتغل.

لبسنا الجوانتيات، جاب البننت، حطها ع التراييزة، بسم الله.

بشيل الغطا من عليها.

أعا ||||| دي هي البننت اللي بره؟؟؟

شعبان: آه صحيح شبه الفرس يا ريس.

نسخة طبق الأصل من البننت اللي بره بس اللبس مختلف، مش قصة إخوات، لا، ده توأم متطابق حاجة كده زي حسام و ابراهيم.

(بدأت الريكوردينج)

«الجثة لأنثى في بدايات العقد الثالث من العمر، متوسطة القامة والبنية، ترتدي تي شيرت أبيض اللون، وبنطال جينز أسود اللون، وحمالة صدر بيضاء اللون، وسليب داخلي حريمي أسود اللون، وطرحة سوداء، حافية القدمين، والملابس جميعها عليها آثار دماء وخالية من القطوع والتمزقات المشتبهة، والجثة في حالة بداية التيبس الرمي، وعلامات التحلل لم تظهر بعد، وقد تبينا (نمل) يخرج من الأنف والأذن (النمل) ده بنشوفه في حالة جثة اترمت في شارع. أو مكان فيه نمل كتير أوى لمدة يوم ولا اتنين خاصة لو طفل لقيط، لكن البننت دي ميتة من ساعات، وهدومها معلهاش تراب عليها دم بس ومفيش أي شيء يدل على كده» نكمل:

وقد تبينا بها من الإصابات الحيوية الحديثة ما يلي:

- جرح ذبحي مستوي متباعد الحواف، يشمل مقدم العنق على شكل حرف 5 بطول كلي قرابة (20 سم).

- جرح مستوي متباعد الحواف بطول (4 سم) بباطن أعلى اليد اليمنى، أسفل أصابع البنصر والوسطى، مستعرض الشكل على غرار الجروح الدفاعية.

صورت صورتين.

شعبان، الجثة دي مش انتحار والبت اللي بره دي مش مريحانى، ناديهالي ثاني كده.

طلع شعبان دور على البننت ملقهاش إطلاقا، وأنا قاعد ألف حوالين الجثة ومش مرتاح جرح الـ (5) ده غريب، وشوفته مرتين، المرة الأولى في صور كانت بتوثق حادثة سفاح بني مزار اللي حصلت في بداية القرن ده، والثانية شفتها في حالة في مشرحة واشنطن دي سي، وكانت لجثة واحد من عبدة الشيطان، وكانت حاجة غريبة عليا جدا، ويومها لما سألت الطبيب الشرعي هناك، قالي: إن حرف الـ (S) ده بيرمزو بيه لـ (Satan) أو الشيطان وده معبودهم.

أنا مش مرتاح يا شعبولا.

بقولك إيه: دخل الجثة دي الثلجة، واستنى لما تيجي مذكرة النيابة نشتغلها، ومحدش يشتغلها غيري، وخلي الفايل ده معاك اللي فيه قرار التشريح على ما تيجي المذكرة وعرفني.

شال الجثة حطها في أحد الأدرج ساعدته عشان كان لوحده، قلعت الجوانتي، وطلعت المكتب.

نمت الساعة واحدة.

الساعة اتنين ونص بالليل عشر اتصالات على موبايلي من شعبان، طبعا الموب سايلنت ومبردش.

باب المكتب بيخبط بغياء.

صحيت، ببص في الساعة شفت الميسدات وقلت فيه كارثة تحت.

فتحت لقيت شعبان.

فيه إيه؟ بالراحة يا لطح.

لقيت شعبان وشه أحمر على غير طبيعته، شعبان أساسا وشه ملهوش لون، ولا طعم ولا ريحة، حاجة كده شبه الكائنات الفضائية، وبتعتبره في المشرحة واحد من أقرب السلالات للجنس البشري وفقا لنظرية التطور.

قالي: أنا مش لاقى الجثة بتاعة البنت السورية!! قولتله: تلاقيها مستخبية هنا ولا هنا، وبدأ صوتي يعلا، خاصة إن كله عارف إن أنا تقتلني ممكن أسامحك، لكن تصحيني من النوم لا.

- أنت بتستظرف يا شعبان??

- شعبان بصوت مهزوز والله ما لاقيتها.

امممم، هيا ليلة باينة من أولها، قدامي.

نزلت معاه طول الطريق بيحكيلي إنه بعد ما حطها في الدرج قفل باب المشرحة، وطلع قعد في الأوضة بتاعته مع الشيخ سعيد ومفتاح الباب في جيبه، ومن شوية جه أمين شرطة من مباحث العبور بجثة تانية خالص، فسألته فين مذكرة الجثة اللي جت من عندكو من شوية، قالي: أنا الموجود من الساعة (8 المغرب) ومفيش أي جثة عندنا، راح شعبان بسخرية يفتح الدرج عشان يصور الجثة وورقة البيانات اللي بنحطها على أيديها ملقاش الجثة، دور في أدرج المشرحة درج درج ملقيهاش، اتصل بيا وبعدين طلعتي.

سألته، فين الشيخ سعيد؟

- قالي: نايم في الأوضة، قولتله: يا حمار هتلاقيه فكرنا خلصنا ونقلها أوضة الغسل، رد ببلاهة الشيخ سعيد نايم جنبي من زمان.

دخلت المشرحة قولتله: ناديلي الشيخ سعيد.

الشيخ سعيد جاى بيتاوب. داخل بيقول: لا يا ريس أنا نايم من الساعة عشرة أساسا. مشوفتش جنث أصلا!!

- أصلاً!! طيب أنت بتمشي، وأنت نايم أساساً يا شيخ سعيد.

تعالى بس نشوفها.

رحنا أوضة الغسل مفيش أي جثث، فجأة الشيخ سعيد بيقول: إيه ده؟ إيه ده؟ المية والدم اللي على ترايبزة الغسل دي منين؟ أنا آخر جثة مغسلها العصر وماسح ومنشف كل حاجة مكاني، مين جاب المية والدم ده هنا؟

امممم، يا حلوة.

الجثة فين يا ولاد الكلب.

حالة زهول مسيطرة علينا إحنا الثلاثة، الناس دي شغالة في المشرحة من (30 سنة) أول مرة تحصل حاجة زي كده ومستحيل يتوجه ليهم اتهام بشيء لأن أمانتهم تفوق الحدود بمرة!!!!!!، وفي مبالغ بملايين وإغرات مهولة عشان محدش دماغه تروح بعيد.

بنبص لبعض مبتكلمش، شعبان على وشه ابتسامة بلهاء كالعادة، وبيبصلي بطرف عنيه.

الشيخ سعيد اللي مضايقه بس الميه اللي جت ع الترايبزة بعد ما مسحها.

وأنا كل اللي مسيطر على تفكيري مكوناتو تقولولي يا بقر لما أصحى كده مش هعرف أنا.

اعملي قهوة يا شعبان، وهاتلي ملف القضية.

راح يعمل قهوة وأنا قعدت في أوضة الدفاتر على كرسي، وممدد على كرسي ثاني والشيخ سعيد لسه بيمسح الترايبزة، شعبان جاب القهوة، فتح درج من جنبي طلع الملف، الملف فيه الورق الأبيض بتاعي عليه كتابتي وقرار التشريح مش موجود فيه.

نعم؟

قلبت الورق ورقة ورقة ملقيتهوش، وقتها أنا حسيت إنى بحلم فعلياً، أو ده شيء محصلش. فتحت الدفتر اللي بنسجل فيه الحالات:

- الساعة (10: 25) حالة باسم (سارة أحمد جاسم البوريني) سورية الجنسية. جواز سفر رقم (٠٣ - ٢٤ - 25467L) رقم القضية (32112) لسنة (2016) إداري بين قوسين " انتحار ".

دى البيانات اللي مسجلها شعبان بخط إيدته، قمت فتحت الأدراج كلها ملقيتهاش.

طلعت قعدت في المكتب مش فاهم هو فيه إيه؟

الساعة (9) اتصلت بالنيابة، صباح الخير، د. محمد الشيخ، عاوز أعرف بيانات عن القضية رقم (32112/2016) إداري، رد بسخرية يا دكتور 32 ألف إيه إحنا لسه موصلناش عشرين ألف!

شكرا!!!!!!

قفلت وأحبه يابو سوسو. لحد النهارده القضية دي مكتوبة في الدفتر، وجنبها اسمي متحوط عليها بخط أحمر وعلامة إكس. قرار التشريح اختفى، بالتواصل مع السفارة مفيش جواز بالرقم ده ولا الاسم ده، لا حد جه سأل عليها، ولا ظهر عنها أي معلومة لحد النهارده، ولا نيابة ولا شرطة العبور تعرف أي حاجة عن الجثة دي.

المذهل إن معايا صورة الجثة دي لحد النهارده.

فكرة الشك في شعبان أو الشيخ سعيد أنا بقولكم ده شيء مستحيل بمعنى الكلمة. يعنى حاجة بحكم مواقف سنين مستحيل حد يفكر فيها. اتعرضوا قبل كده لإغرائات أموال بعشرات الملايين وإغرائات بالجنس، وكل حاجة ممكن تتخيلوها عشان يتلاعبو ورفضوا وبلغوا فوراً. وبعدين لو عاوزين يتلاعبو وإن أختها عاوزة تغسلها بس كان بمنتهى الهدوء مبلغونيش أساساً إن فيه جثة، وغسلوها وادوها لها ولو حصل مسائلة هينكروا تماماً إن فيه حد جه، ده غير إن دماغهم أساساً لا تستوعب إنها تفكر في حاجة بالشكل ده. الشيخ سعيد متدين جدا وغلبان وطيب لحد الغباء، وشعبان الديب هربان منه. فكرت كثير إن حد يكون غفل شعبان ودخل أخذ الجثة لكن كنت بقف قدام الأسئلة دي.

مين زور قرار تشريح بختم النسر وبمنتهى الدقة اللي لا تثير أي شكوك؟

مين زور جوازين سفر بتوع البنات وأختها بمنتهى الدقة اللي لا تثير أي شكوك؟

مين يقدر يدخل المشرحة اللي ملهاش غير باب واحد مقفول بإحكام، ومجرد فتحه بيعمل صوت صرير يجيب من على بعد كيلو، وكان مؤكد شعبان سمعه وهو في الأوضة اللي جنبه مباشرة وبابها مفتوح!

هل اللي دخل كان عنده الوقت إنه ياخذ الجثة، يغسلها بمنتهى الهدوء في أوضة الشيخ سعيد ويخرج من فتحة الجثث بمنتهى السهولة!!

مين أخذ قرار التشريح؟

الأخت كانت اختفت فين؟

مين البنات دي أساساً؟

فين أهلها؟ أو أي حد يعرفها؟

جه منين النمل؟

مين عمل جرح الـ...؟

مبلاقيش أي إجابات وببسيطر عليا شكل البنات البارد بدون انفعالات، وهي بتقولي بصوت معدني مش عاوزاها تتشرح!!

احذر

الصفحات التالية تحتوي على صور قد لا تناسب الصغار وضعيفي القلوب.. لذا
وجب التنويه!

∞ ∞ ∞ ∞ ∞

الحكاية الثالثة

ربما على مدار عملي كله، كنت أترك القضايا ومشاكلها دائما عند باب المشرحة، لم يحدث يوما أن يشغلني التفكير في قضية خارج أسوار مشرحة زينهم الزرقاء، التفكير يكون إما في المكتب أو قاعة التشريح. وحدها التقارير تكتب في البيت بعد أن أكون قد حسمت أمر القضية تماما.

نادر جدا جدا وبعده أقل من أصابع اليد الواحدة أن يرافك طيف جثة في بيتك، أن يظهر وجهها في نومك، أن تحيط روحها بك أينما ذهبت.

أما هذه القضية فهي استثناء، استثناء ليس لأنها فقط رافقتني أرواح جثتها نوما وصحوا، روحا وطيقا، على مدار أيام؛ بل لأن الأمر تعدي مجرد الأحلام والإلهام والطيف إلى روح تلامسك عيانا بيانا؛ بل وتحاول الاعتداء عليك.

هل سمعت قبل ذلك عن جثة تجبر محقق على أن لا يبوح بسرها؟ كانت مأساة، مورس فيها كل أنواع السحر السفلي والدجل والتلبيس والشعوذة وسحر السيمياء، ولكن حتما من كان الله معه، فمن عليه!

المكان: مشرحة زينهم.

الزمان: يناير 2017.

التوقيت: الثانية عشرة والنصف ليلا.

انتو كمان اقرروا القصة ليلا عشان يوصل معناها، اطفو النور، اقلو الستائر، واستمتعوا.

الحادية عشرة ليلا دارت هذه المكالمة.

- ألووو، ازيك يا شعبولا، مراتك ولدت ولا لسه؟

- ازيك يا معالي الرئيس. لا لسه بتولد والله.

- طيب يا شعبولا ربنا يقومهاك بالسلامة، مش عاوز حاجة طيب، مش عاوزني أجيلك؟

- أنا في المشرحة يا ريس.

- مراتك وحدها يا مجنون مشرحة، منزلتش حد مكانك ليه يابني، أنت سايب؟

- يا ريس أمي معاها وأنا مباحبش المرقعة وتقعد تصوتلي وهي بنت كلب كهينة فكنت هطلقها وأجي خليني هنا أحسن. وبعدين ما تولد ولا تتنيل أنا مبيشغلنيش الكلام ده

- طيب إيه اللي عندك ومين شغال؟

- دكتور عمرو واتصلت بيه كذا مرة مردش. وعندى حالة أم وابنها وبناتها.

- طيب استنى هو معايا على الويتنج أهه، خليك معايا.

- إيه يا مورو ازيك؟

- ازيك يا حبي بقولك إيه.

- فيه حالة بولادها وعاوزنى أروح أشتغلها بذلك.

- أنا نفسي أفهم هو ليه الـ *** اللي هناك دول مبيخبوش عنك أي حاجة؟

- والله أنا اللي متصل، عنيا يا عمور هلبس وأنزل.

- حبيبي، سلام.

- سلام

- إيه يا شعبولاً، أنا جاي أنا هشتغلهم.

- تمام يا ريس في انتظارك.

ويجي قافل على طول شعبان مبيستتاش، مبيحبش المرقعة بتاعة سلام سلا سلا سلام اتفضل اتفضل اتفضل سلام.

لبست ونزلت. الجو برد جدا ومطر، اضطريت أمشي بالراحة، الطريق من التجمع للمشرحة تقريبا أخذ ساعة إلا ربع، على ما وصلت تقريبا كانت (12:30).

دخلت، شعبولاً بيسمع على الموبايل مطربة اسمها شفيقة ومندمج.

دخلت، قولتله: فين الزباين؟ قالي: ست كبيرة وتلت زعازيع صغيرين.

قولتله إنت يابني مش قايل واد وبننت؟

قالي: مش عارف والله أنا دخلت أطلعهم لقيتهم تلت عيال، قولتله إنت عارف يا شعبان أنا لو مش بحبك؛ كان زمانك دلوقتي في حلايب وشلاتين أقسم بالله. وبدأت أزعق يعني إيه مدخل جثث بورق مش عارف عددهم، سكت وبدأ يتمسكن. والله يا ريس أصل أنا مراتي بتولد ودماعي مش فيا، ومشغول جامد مش مركز، أهأاا مش دي اللي مبيحبش المرقعة وتولد ولا تتنيل ميشغلکش، قال: أه أصلها بنت كلب كهينة.

تنتهي كل محادثة بيننا كالعادة بإني مقدرش أمسك نفسي من الضحك، مأساة شعبان إنك مستحيل تبقى عارف هو بيهزر ولا بيتكلم جد، فرحان ولا زعلان. مستحيل، لأن وشه مش بالمقاييس البشرية بتاعتنا اللي ببيان عليها، وشه جلدة كاوتش محفور فيها أماكن أعضاء الحس لجوه مش لبره، وصوته معدني ثابت طول الوقت.

بصيت على الحالات، الست شكلها غريب، مزرقة بشكل أوفر، عليها حتت أسمنت، ملامح وشها أسفكسيا خنق، الملاية اللي اتخنقت بيها ملفوفة حوالين رقبتها، إحساسى بيقولى إنها هتحتاج شغل، مش حالة منتهية، لأ، واحنا بنوصل بعد فترة

لدرجة من الإحساس بالجنث بتخليك من لحظة ما تشوفها تعرف منهية ولا لا، هتعبك ولا لا فيها التكة ولا لأ. ودي فيها، وفيها كثير.

طيب، هطلع أغير هدومي وأشرب قهوة على ما تجهز كل جثة على ترابيزة ورن عليا.

طلعت المكتب في الدور الثاني، عملت قهوة أمريكان، شربتها وأنا بتابع قنوات الأخبار، غيرت لبسي، واستنيت شعبان يرن.

الباب بيخط شعبان مش قولتلك يابني رن عليا. أصل امي اتصلت بيا يا ريس وقالتي: نوبية تعبانة والنزيف مش راضي يقف وشكلها هتموت واتصلت بهشام ييجي مكاني لقيته في الفيوم، طيب طلعت الجنث. قالي: آه الأربعة على الترابيزات، من المرات النادرة الي شوف شعبان هه مضايق سنة كده. طب خد مفتاح العربية أهه واطلع على مراتك ولو فيه حاجة كلمني. يا ريس وأنت هتفضل لوحذك هنا ازاى؟ ومين هيدخل جنث؟ ومين هيكتب ورق؟ قولتله ملكش دعوة، امسك المفتاح، يا ريس أنا هشوف تاكسي طيب، امسك وفيه فلوس في الدرج اللي فوق الفتيس على طول خد منه اللي أنت عاوزه.

مشي وهو بيبرطم، عملت قهوة ثاني، خاصة بعد ما عرفت إن السهرة صباحي، نزلت ماشي في كوريدور المشرحة، إحساس إنك معاهم لوحذك برضه إحساس ثاني، حوالي (300 جثة) حواليك في كل مكان. خدني التفكير، يا ترى الـ (300) دول مين فيهم كان كويس ومين وحش؟ مين دلوقتي في الجنة ومين في النار؟ مين مبسوط وسعيد ونفسه القيامة تقوم؟ ومين مرعوب وخايف ونفسه متقومش؟ وهل ممكن يبقى فيه كويسين وتكون نهايتهم تشريح؟ طب ما أنا شفت ناس كثير على ترابيزة التشريح كأنهم البدر ليلة التمام، وشفنت جنث متحللتش في الأرض بعد دفنها بسنين، إذا مش مقياس التشريح من عدمه، بالعكس، ده ممكن ليه مقابل عند ربنا، ده ممكن يغفر بيه ذنوب كثير جدا زي مثلا البنت اللي كان عندها (8 سنين) في براءة وردة واغتصبت وانقطعت حنت وهي صاحبة، هل نهايتها بعد كل العذاب اللي شافته ده، تتشرح؟ يبقى أكيد ربنا عنده مقابل لده، مؤكد، آلاف الأسئلة اللي ما تجيش أبدا غير وأنت وحدك وفي مكان فيه رهبة زي ده. رهبة الموت، الحقيقة الوحيدة على الأرض دي. الحاجة الوحيدة اللي بيتشابه فيها كل الجنسيات والأشكال والألوان، مصير واحد.

دخلت القاعة الأولى فيها جثة ولد وبنت، دخلت القاعة الثانية، فيها جثة الست وطفل رضيع معاها.

طيب هبدأ بالست، إيديها طالعة خارج الترابيزة بشكل غريب، لبست جوانتي، دخلت إيديها جنب جسمها، لفيت بس عشان أجيب المشروط والأدوات، حسيت حركة ورايا، بيص لقيت إيديها الثانية هي اللي خارج الترابيزة، دايمًا بنتعامل هنا مع أي شيء بالمنطق إلى أن يثبت العكس، واضح إن لما رجعت إيديها اللي كانت متخشبة جنب جسمها،

الإيد الثانية اترقت فنزلت من الناحية الثانية خاصة إن الجثة مليانة شوية، بهدوء رحت دخلت الإيد الثانية، ورجعت أجيب الأدوات، جيبتها وبلف، أحبييه!!

رجلها الشمال خارج الترابيزة تماما، وده بقى لا علم ولا منطق ولا أي شيء، أولا: لأن الرجل متخشبة وثابتة تماما على الترابيزة، ثانيا: لأن الترابيزة ليها جوانب عشان الدم ميخرجش بره والجوانب دي متقدرش الرجل تنزحلق من عليها بسهولة، فيه جثث إحنا بنبقى عارفين إن فيه شيء ما ورائي رافض التشريح، بشكل أو بآخر، البعض بيقول قرين والبعض بيقول روح، والبعض بينسبها للجن، ولكن المحصلة إن فيه رفض للتشريح موجود، وبالتالي بيحاول إنه يبعدك بعدة طرق بالتدريج، والطرق دي تقريبا كلها معروفة لينا، الأول هيخوفك بحركات خايبة، بعدين هيبدأ يزعجك بأصوات وأشياء ممكن تبوظ، ولو أنت ضعيف ممكن توصل لدرجة إنه يأذيك، وكده رسالتها الأولى وصلت ولازم يكون ردك قوي عشان تحسم الأمر، جبت الأدوات حطيتها كلها على الترابيزة، جبت قطعة قماش أبيض طويلة دخلت رجلا وربطت الرجلين في بعض، بعنف، كده أنت رديت على الرسالة الأولى ووصلتلك إنك مبتخافش، هتبدأ القصة الثانية، المشارط هتقطع كل ما تلمس جثتها، منشار كهرباني هيبوط، جيفت هيتي أي شيء من ده، وده اللي حصل، وبيكون ردك في الوقت ده هو البرود المتناهي والإصرار على إنك تكمل، يتكسر مشروط تجيب الثاني، يتكسر الثاني. تروح تجيب الثالث، يتكسر الثالث فبكل هدوء كده وبرود تروح تجيب علبة المشارط كلها تحطهاها في حجرها. وتطلع واحد ورا واحد، كده بتوصل الرسالة الثانية إن متحاوليش، بتبدأ بقى شيء من الإزعاج الشبيه باللمس ودي حاجة روحية خالصة. طول ما ربنا معاك بيقين مستحيل شيء ينتصر عليك، إبليس نفسه، أعتى الجن وأكثرهم إجراها قال لربنا، بكل ثقة، "لأغوينهم أجمعين" وبعدين افنكر حدوده، فكمل بسرعة، { إلا عبادك منهم المخلصين } ده أقواهم وأكثرهم إجراما، فرد ربنا عليه: { إن عبادي ليس لك عليهم سلطان إلا من اتبعك من الغاوين (*) } وإن جهنم لموعدهم أجمعين، ورد في أية ثانية، { إنه ليس له سلطان على الذين آمنوا وعلى ربهم يتوكلون (*) } إنما سلطانه على الذين يتولونه والذين هم به مشركون { صدق الله العظيم، ومن أصدق من الله قيلا، ومن أصدق من الله حديثا، لكل الديانات السماوية بوجه كلامي. لو ربنا معاك مين عليك، اوعي تلجأ لساحر أو دجال لا في كنيسة ولا في مسجد، الجأ لخالق الساحر والدجال والجن اللي معاهم.

المهم، فشلت كل محاولاتها فبتستسلم تماما، لكن اللي حصل ميعديش كده، ده بيديك انطباع إن الست دي كان ليها نشاط في الاتجاه ده. وإن القصة مش هتنتهي بانتهاء التشريح، كلنا عارفين إن ما دام حظك وقعك في جثة من دول يبقى هتعاني كام يوم لحد ما تنتصر، لأنهم رغم ضعفهم بيحاولوا كثير، ومبيستسلموش بسهولة أبدا.

قريت مذكرة النيابة بسرعة، التفاصيل باختصار بتقول إن (هدي) دي واحدة مطلقة. ومعاها ولد شاب وبننت، وإن ليها أخ راح يزورها لقاها لسه والدة طفل صغير رضيع رغم إنها منفصلة عن جوزها من سنين، فانتقم منها بخنقها بداعي الشرف، طيب والوالد باقي المذكرة بتقول التالي: «إن ابنها الكبير راح للمباحث وكان في

حالة هيسثيريا ولم يكن متزن وقال: إن خاله قتل أمه، وحط عليها أسمنت ومايه في حفرة عملها في البيت ولما الابن وصل البيت هرب، وإنه لما لقي أمه اتقتلت خاف على أخته والطفل الرضيع فقرر يقتلهم وينتحر، وإنه فعلا أخذ حبوب اسمها حبوب الغلة. وبعدها بشوية مات في القسم المباحث راجعت كاميرا محل في المنطقة لقيت أخوها اللي اسمه (صلاح) خارج من البيت في زمن الجريمة وإن ليها أخ ثاني اسمه (زكريا) عايش في بلد ثانية ولم يتواجد إطلاقا، وإن الابن كان جوه البيت أساسا قبل الجريمة بتلت ساعات ومخرجش. راحوا يقبضوا على الخال بعد (5 ساعات تقريبا) من الجريمة. لقيوه ميت بالمنظر اللي هنتشوفوه تحت، وإن هما بيحاولو نقله للمشرحة، يعني إيه بيحاولو نقله مش فاهم، وإيه العك ده كله؟

يعني خال قتل أخته وحاول يحطها في حفرة، والابن قتل أخته والطفل الرضيع وبعدين انتحر!! طب راح القسم ليه يعني؟ خايف على العدالة أوى، والعم كمان مات، وإيه بيحاولو ينقلوه مش فاهم، طيب خيلنا ناخذها واحدة واحدة.

بدأت الريكوردنج.

الجثة لأنثى في العقد الخامس من العمر، متوسطة القامة، ضخمة البنية، يغلب على جلدها اللون الأزرق، عليها بعض القطع الإسمنتية، ترتدي قميص نوم حريمي وردي اللون دون ملابس داخلية، ويظهر عليها عدم اهتمام تماما بالنظافة الشخصية، مع وجود آثار وضع منذ يومان تقريبا، الجثة في حالة تيبس رمي، والرسوب الدموي بلون قاتم في الظهر وخلفية الساقين، وعلى وجهها تبدو ملامح أسفكسيا شديدة، مع وجود ملاءة سرير ملتقة حول عنقها ومربوطة بإحكام. بإجراء الصفة التشريحية تبينا الأعضاء الداخلية في بدايات تعفن!!!! (والكلمة دي هتبقى مشكلة بعدين) ورائحة مقيته، بالرقبة تبينا آثار الانسكابات الدموية التي تؤكد وفاتها بسبب الخنق برفع الملاءة حول العنق، تبينا آثار حز عميق جدا موضعها وصل إلى العضلات الداخلية للعنق؛ حتى ضغطت بعنف على المجرى العلوي للقصبه الهوائية والبلعوم مما أدى إلى بروز اللسان خارج الفم، وهذا يشير إلى أن القوة المستخدمة في الخنق كبيرة جدا تتجاوز ثلاثة أفراد كونها بملاءة قماشية.

على جسدها بعض الرموز والأوشام بلون أخضر وبعض الجمل غير المفهومة، وكذلك جدول صغير على الظهر يحتوي على أرقام غير مرتبة. تُعزى الوفاة إلى اسفكسيا الخنق، ووفقا للمظاهر التحليلية فقد مضى على الوفاة قرابة ٢٤ ساعة تقريبا».

ركزت شوية مع الرقبة وأنا بوصفها ويشيل الملاية وبفتح عليها بالمشرط، أخذت تقريبا تلت دقائق، برجع عشان ألقى نظرة عامة أخيرة، لقيت رجليها الاتنين مفكوكين، وخارج الترايبزة، والقماشة البيضاء اختفت.

ضحكت، قلناها خلاص انتي حرة هسيبك بأشياءك بره كده من غير خياطة لحد ما يبجي شعبان وهو يتعامل معاكي، تدري ليش؟ لأن شعبان مبيحبش المرقعة وإنتي بتتمرقعي. سيبتها ونقلت على جثة الرضيع.

الساعة اتنين وربع تقريبا، الجثث جاية من العياط جيزة، حبيبي مفتش مباحث هناك. قلت أكلمه قبل ما أكمل، خرجت من القاعة، كلمته كان صاحي، احكي يا شهرزاد.

- قال: والله يا دكتور أنا ما فاهم حاجة ودماعي هنشت من ساعتها، ليه بس؟ قالي: دلوقتي فيه محل في وش البيت، الكاميرا اللي فيه جابت الست وهي داخله البيت الساعة ثلاثة العصر، قولتله: ثلاثة العصر امتي؟ قالي: من عشر ساعات. قولتله: هي مين؟ دي بقالها أكثر من يوم مينة!! قالي: أقسم بالله الفيديو قدامي أهه داخله البيت. ثلاثة العصر وابنها كان جوه البيت من بدري. وأخوها جه بعد ساعة تقريبا والكاميرا جايها بمنتهى الوضوح، قعد معاهم نص ساعة وبعدين الابن خرج اشترى حاجة من المحل اللي في وشهم ده. ودخل وبعد نص ساعة ثانية الخال مشي والابن كان بيوصله

لعربيته ومشى هو كمان ركب عربيته ومشى، وكل ده متصور كانت الساعة خمسة تقريبا. الابن راح القسم من الموال الغريب بناءه ده ومات. رحنا نشوف مين خاله ونجيبه، لقينا ليه اتنين أحوال. واحد مسافر بره من (12 سنة) ولا شافهم ولا شافوه والثاني وصلنا لبيته واناكدنا إن هو اللي كان موجود من عربيته، لقينا على الأرض ميت ومتحضر ورائحة لا تطاق كأن بقاله اسبوع ومليان دود وحشرات بتطير، ولازق في الأرض لا حد قادر يستحمل يقرب منه، واللي يقرب منه مش قادر يحركه!! امممم، وانتوا اتاكدتوا يا باشا إن هو اللي كان عند أخته؟ ما يمكن حد شبهه؟ يا دكتور كل جيرانه شايفينه وهو نازل، وشايفينه وهو خارج وهو راجع، وبيركن عربيته وطلع بيته وشاور للناس، واتكلم مع واحد، وبعدين خلي عشرين شاهد بيكذبوا، الكاميرا كمان هتكذب؟

امممممم، هيا ليلة سودا وعمرو خلع منها ولبسني فيها، عمرو مين يا دكتور؟ لا يا حبيبي متشغلش بالك، هشتغل كده وهبقي أبعتك لو فيه جديد، سلام، سلام.

دخلت القاعة لقيت إيديها الشمال كمان بقت الترايزه مع منظر بطنها مفتوحة والجمجمة منشورة الموضوع زاد بشاعة، كل ده برضه لسه في إطار العادي لحد دلوقتي، بصيئتها، قولتها والله لو لعبتي باليه مائي حتى لسه هلبس جوانتي تاني؛ لقيت اتصال من مباحث العياط، ألو ازيك يا دكتور؟ ازيك يا أحمد بيه؟ قال: أنا كنت عاوز أعرف بس أي معلومات تساعدنا في قضية الست وولادها. قولتله: أنا لسه قافل مع محمود بيه حالا ومتكلم معاه، قالي: محمود بيه مين؟ عنتر؟ قولتله أه، قالي: محمود بيه قاعد قدامي بقاله (٤ ساعات) وهو اللي قالي: أكلمك، نعم اديهولي، هو أنا يا ريس مش لسه قافل معاك؟ قالي: أنت بنتكلم جد ولا بتهزر؟! أنا مكلمتكش من تلت شهور، عشان كده قلت لأحمد يكلمك عشان محروج أكلمك فتقول مبيتصلش غير عشان شغل، اللي جه في بالي تماما إني كلمت حد تاني، بس مين تاني ليه نفس الاسم وعارف كل البيانات، قولتله بتردد يمكن كلمت حد تاني طب قولي يا باشا إيه اللي عندكو، ودارت نفس المكالمة بنفس الحروف بنفس الردود اللي المفروض إنها تمت من خمس دقائق، بالحرف، كنت عاوز أقفل بسرعة. قفلت، فتحت سجل المكالمات، لقيت آخر مكالمة صادرة مني لشعبان وبعدها مكلمتش حد، شديت كرسي وقعدت في الكوريدور.

قربت كثير عن سحر السيميا، وسحر التايلات، ومحاولة إبهامك سواء بالسمع أو بالرؤية لأشياء محصلتش، ولكن إنه يوهمك بشيء حقيقي لكن يحصل بعد دقائق، ده شي. جديد، لكن مش ده اللي خلاني أقعد: اللي خلاني أقعد إن الميت لا حول له ولا قوة، ولو فيه أي اعتراض أو انتقام عن طريق القرين بيكون موجه للميت نفسه، تمام زي قصة البنات الخمسة اللي فانت، يصرخوا أو يتحركوا، حاجة خاصة بجتهم. وكانت نفس القصة هنا في حركة الإيديين والرجلين، لحد ما حصلت المكاملة دي. الموضوع تعدي مرحلة القرين. في حد في الخارج عايش هو اللي بيحرك الأحداث بإيديه زي عرايس الماريونيت، وده على أد ما ممكن يضايق حد ويزعجه ويخوفه، على أد ما بيفرحني أنا لأن ما دام فيه حد حي في قصة غامضة يبقى هتعرف الحقيقة كلها، كل الحقيقة.

صوت سارينة عربيتي بره، غالبا شعبان جه، اتحركت بهدوء ناحية الباب المصفح أفتحه. لن أنسى هذا المنظر ما حبيت. في آخر الكوريدور (٣ قطط سوداء صغيرة) أمامها قطة سوداء يبلغ حجمها عشر أضعاف القطة العادية. عيونهم كلهم مضيئة ومليانة حقد ومتأهبين للهجوم، مريت بموقف مماثل قبل كده، لكن كان مع قطة واحدة، واللي علمني قالي: تقدم أوعى تخاف أو تتراجع، كمل طريقك زي مانت ماشي، كملت بمنتهى الهدوء بنفس الخطوات، وهما بيزدادوا تأهب وكأنهم بيستعدوا للانقضاض، عيني ثابتة في عين القطة الكبيرة، وأول ما خلاص هلمسها برجلي اختقوا، كملت، فتحت الباب، لقيت شعبولا بيقلوني إن مراته بقت كويسة وأد إيه هي كهينة بنت كلب لكن مكو نتش فايقله

دخل وقفل الباب، شكرني، بص في الأرض، إيه ده، نقط دم في الأرض مكان القطط بالضبط، قالي: إيه ده يا ريس؟ قولتله: متشغلش بالك. تعالى المعمعة جوه.

شعبان دخل القاعة ببلاهة اللامتأهية، بص لقي الست راسها جلد لها متشال والجمجمة مفتوحة، وبطنها مفتوح من تحت الدقن لحد الحوض، القلب والرئتين والكليتين والرحم بره، ورجليها مفتوحين تماما وكل رجل نازلة على جنب من جوانب الترابيزة، شعبان بصلي، وبص تاني على رجليها، وقالي: هو أنا لا مؤاخذه جيت في وقت مش مناسب ولا حاجة؟

ضحكنا، مرضيتش أحكيه، خليته يكتشف بنفسه، قولتله خيط دي بس بسرعة الأول. لبس وبدأ يخيظ الراس، وأنا قاعد بتفرج، طلغ الرجلين على الترابيزة. وهو بيستغرب نزلوا ازاى دول؟ ولسه بيحط إبرة الخياطة في جلد بطنها من تحت، وجت رجليها منطوية خابطاه في منطقة حساسة ضربة قوية جدا، جداااااااااااا .

شعبان بينحني للأسفل وهو بيقل، يا بنت الكلاااااااب، آاااا، وصراخ متواصل وأنا ضحك متواصل مش قادر أقوم، وفي وسط صراخه، بيقل بجدية تامة وصوت متقطع ومش طالع وهو بيكلم نفسه، كويس إن الولية ولدت، أنا بالسلامة كده خلاص هسحلمها بقا عشان تستر عليا، مع إنها كهينة بنت كلب.

وأنا في هستيري يا ضحك متواصل.

لحد ما بدأ يفوق، ومن غير ولا كلمة راح جاب حبل محترم، وكثفها، وخيظها،
وبعدين مدها على رجليها.

أنا لسه بضحك بدموع.

شعبان رايح يجيب علبة مشارط من الأوضة اللي جوه عشان المشارط قربت
تخلص، سمعته بيقول هششش، هششش، وبعدين رجع بالمشارط، بقوله أنت بتهش
مين؟ قالي: دول قطط، قولتله بزعيق قطط ازاي يا شعبان في المشرحة، قالي: يا
ريس متقلفش ده دول من اللي بيظهروا ويختفوا دول، شعبان من فرط بلاهته أنا
أعتقد إن الجن بيترعب منه. لأنه واصل لمرحلة إنه مش بس ممكن يهش جن، لأ،
ممكن يمسك في خناقه.

طيب يلا يا شعبولا هات الرضيع ده الأول نشتغله بسرعة.

(شغل الريكوردينج)

«الجنة لرضيع ذكر يبلغ من العمر قرابة يومين، متوسط القامة والبنية وفقا لسنه،
عار الملابس، الحبل السري مقطوع قطع غير طبي وعنيف، تظهر على جسده آثار
تعذيب عبارة عن سحجات، وكدمات، وإهمال نظافته الشخصية، وآثار احمرار
بالوجه والجسم، وتبيننا بالظهر جدول آخر يشبه الموجود بالأم؛ ولكن بأرقام مختلفة.
بإجراء الصفة التشريحية تبيننا الوفاة ناتجة عن صدمات عصبية مع إهمال غذائي تام
أدى إلى الوفاة».

أخذت عينات (DNA) عشان نعرف بعدين ابن مين الرضيع اللي للأسف مرضعش
من لحظة ما اتولد كان مسالم تماما، ولم تظهر منه أي مظاهر ما - وراثية غير
معتادة.

خيظ يا شعبان.

شعبان بيخيظ، بالنسبة لي القصة شبه منتهية، منتهية في نقطتين رئيسيتين، الأولى:
إن دي وفيات لها علاقة بالسحر الأسود أو السفلي، تفاصيلها لسه مش معروفة لكن
هنتضح مع الوقت، النقطة الثانية: إن فيه حد كان شريك ليهم لسه عايش وبيدير
اللعبة من الخارج وبيقاتل لعدم إظهار الحقائق.

بدأنا جثة الشاب...

رحنا القاعة الثانية اللي فيها جثة الولد والبننت.

الجثة لشاب في نهاية العقد الثاني من العمر، متوسط القامة والبنية، يرتدي جلبابا
أبيض اللون متسخ بشدة، وملابس داخلية بيضاء اللون مع آثار احمرار خفيف
بالوجه والأنف، وخلو عموم الجسد من أي إصابات أخرى ظاهرة، كما تبيننا أن
العينين مفتوحتان بشكل مبالغ فيه دون وجود سبب واضح، مع وجود عتامة بيضاء
على القرنيتين، وتبيننا آثار محاولة انتحار قديمة فاشلة عن طريق قطع شرايين
اليدين، كما تبيننا آثار وشم بالكفتين والصدر وأعلى الظهر بنقوش غريبة غير

مفهومة، مع جدول يشبه ذلك الموجود على ظهر الطفل والرضيع بأرقام أيضا مختلفة.

بإجراء الفحص الكيميائي تبينا الوفاة ناتجة عن تسمم بمركب عضوي فوسفوري الموجود في أقراص حفظ القمح وهو ما أدى إلى الوفاة.

غريب شكل الولد، عمري ما شفت جثة لسه طازة ومبرقة عينيها بالشكل ده، وإيه موضوع الجداول اللي على ظهر كل واحد فيهم دي؟ لسه القصة غامضة وغير مفهومة حتى الآن، ولكن لاحظت إن مفيش أشياء غريبة بدأت تحصل.

سألت شعبان، قولتله مش ملاحظ إن العملية هديت؟

قالي: وهو بيبص بحسرة على أشياءه، آه كله من بنت الـ *** اللي هناك دي.

وبنلف مع بعض نبص عليها من إزاز الباب بين القاعتين، شاهدنا بأم أعيننا الحبل اللي شعبان رابطها بيه بيترمي في الهوا بين الترابيزتين، اتحركنا بسرعة فتحنا الباب لقينا الأخت بدون حبل والحبل مرمي على الأرض ورجليها الاتنين خارج الترابيزة!!

ووشها مستقر مكانه مترحزحش

شعبان على وشه ابتسامه عريضة بلهاء، وهو بيقولي: شوف وشها بريء ازاى كأنها معملتش حاجة، الظاهر مش مراتي بس اللي كهينة بنت كلب.

قولتله سيبها بقا خالص، نخلص ونرجع نشوف الدنيا إيه.

روحنا نشوف جثة البنت، جثة البنت عادية جدا. مفيش أي مظاهر عنف أو اعتداء أو أي أشياء غريبة، مفيش وشم ولا تعاويد، البنت عذراء، بالتشريح فيه آثار حمى روماتيزمية قديمة في القلب، وسبب الوفاة جلطة في القلب، وفاة طبيعية جدا بدون أي مظاهر غريبة، وده شيء في وسط المدعكة دي أكثر غرابة من إنها تكون ماتت بأي سبب ثاني.

خيط يا شعبان.

خيط وبدأ نقل الجثث لأدراج، الست أرفته فعلا على ما نقلها وعرف يدخلها، الساعة عدت خمسة الفجر، غيرت هدومي، وقولتله فيه جثة ثانية تبع القضية دي، أول متيجي عرفني.

ركبت عربيتي، ومشيت.

طول الطريق بفكر، المطر قوي جدا، الشوارع خالية تماما، بفتكر شعبان وأضحك، أنا ساكن في شارع التسعين الشمالي، وأنا عند نادي بترو سبورت كدا لقيت راجل عجوز بيحاول يعدي الطريق، لافف وشه تماما بكوفية، والمطر صعب، وقفت على ما يعدي ونورتله الطريق، عدي الطريق بمنتهى الهدوء لحد ما بقى قريب من الشباك بناعي، شكله راجل عجوز ضهره منحنى، فتحت الشباك على أساس إنني أشوفه رايح فين دلوقتي في الجو ده أوصلله، فضل يقرب ببطء لحد ما شفته

بوضوح، أو شفت عنيه بس، عينين متركرة عليا وفيها كم حقد وكره أنا مقابلتهوش في حياتي كلها، عين مركزة لدرجة إن أنا حسيت بطاقة سلبية رهيبه جابتلي صداع، إيدي بنتحرك ببطء على سلاحي الشخصي، لحد ما لف وشه ومشي، لا أنا اتكلمت ولا هو اتكلم، بس أنا عندي صداع رهيب، رهيبيب.

كملت الطريق بصداع لا يوصف، كنت لوحدي في البيت، ركنت وطلعت، دخلت، فتحت المية الباردة وحطيت راسي تحتها (5 دقائق) لحد ما الصداع بدأ يفك، يا ساتر إيه ده!! يا دوب رفعت راسي وبنشف وشي بإيدي لقيت حد حاط إيده على كتفي، بحاول ألف أشوف مين، لكن قوة إيده مثبتاني في مكاني، هو قدر يهاجمني في الحمام، في المنطقة اللي عارف إنني مش هقول فيها أذكار، وأنا من كتر الصداع نسيت ذكر الدخول، فضلت هادي، شديت الفوطة، نشفت وشي وشعري، لحد ما ساب كتفي، لفيت بسرعة لقيتيه ورايا واختقي في لحظة، نفس الرجل العجوز بنفس العينين اللي مليانه كره لكن المرة دي شفت وشه، شفته بوضوح. شعره الأصلع، وشه اللي مليون حفر وعلامة شيطانية غريبة على جبينه تشبه زاوية قائمة قاطعها حرف (S)، قعدت شوية في الريسبيشن، قلت بعض الأذكار، قمت أخذت شاور، صليت الفجر، لسه الصداع ماثر على دماغي ومخلي تفكيري بالكامل مشوش، مش هعرف أفكر دلوقتي، نمت.

صحيت العصر تقريبا، وكده بدري بالمناسبة.

لقت شعبولاً متصل 3 مرات. كلمته، إيه يا أم السعد؟ إيه الأخبار عندك؟ قالي: دنا شفت ليلة سودا في المشرحة امبارح!

قلته: ليه؟ قالي: يا ريس دخلت استحما بعد ما أنت مشيت وشدوا الشورت بتاعي وجريوا وطول الليل بجري وراهم في المشرحة عريان.

مشكلتي الأزلية مع شعبان إن مستحيل تعرف هو بيهزر ولا بيتكلم بجد.

سألته عن الجثة، قال: جت من الصبح، قولته: حلوة؟ قال متشوقش وحش.

تعالى شوف بعينك.

قمت متحمس، أكلت باتيه وشربت قهوة، لبست ونزلت.

دخلت قابلني شعبولاً، شكله مرهق

واضح إنه فعلا كان بيجري طول الليل.

قولته: يلا على السريع عشان همشي بدري.

دخل يطلع الجثة، الشيخ سعيد بيعمل قهوة، قعدت أفكر في القضية، الجثة هنتشرح دي المفروض إنها جثة الخال، اللي المفروض قتل أخته ورجع بيته بعربيته وبقا لأقوال اليهود، وإن الشرطة راحت تقبض عليه بعد الواقعة ب خمس ساعات لقيتيه زي ما هنشوف تحت.

ريحته مقبلة مالية المشرحة وشعبان بينقل الجثة، خلصت القهوة بسرعة ورحت القاعة. ولقيت الجثة بالمنظر ده.

الجثة منقولة في كيس جنث أسود برائحة بشعة متعفنة تماما. محاطة بالديدان والحشرات من كل جانب، يدها قريبة من وجهها، الوجه يبدو بلامح مرعبة، الجثة تقريبا مضي على وفاتها وفقا لمظاهر التحلل قرابة ٢٠ يوم، بالتشريح كل الأعضاء متحللة، العظام كلها خالية من الكسور. عينات السموم والمخدرات سلبية، الملابس خالية من القطوع والتمزقات المشتبها، ويتعذر الجزم بسبب واضح للوفاة، يعني الجثة اللي كنت بانى عليها كل الأمل، طلعت فشك.

وازاي بقا المحروس ده قتل واحدة امبارح، وروح بيته وبعد خمس ساعات لقيوه كده!!

فيه حاجات ممكن أتقبلها بشكل أو آخر، زي جثة تتعفن بمعدل سريع جدا، أو جثة لا تتحلل بعد فترة طويلة جدا، وده أنا بعتبره من علامات حسن وسوء الخاتمة (والكلام ده على مسئوليتي أنا الشخصية، لأن العلم لا يعترف بيه)، لكن أنا بتقبل ده بحدود، أتقبل مثلا إن الجثة تتحلل أو تتعفن بسرعة، تمام زي جثة الست، ولكن لا أتقبل أبدا إن الديدان والحشرات توصل للحجم ده في خلال ساعات.

صحيح، هو انتوا فكرتو قبل كده هي الديدان والحشرات اللي بتحلل الجثة دي بتيجي منين؟

معظمكوا طبعاً هيقول من الأرض، طيب، معني كده إنني لو حطيت جثة في غرفة مغلقة كلها سيراميك من الأرض للسقف مش هتتحلل ولا هيظهر ديدان؟؟ لا طبعاً، بعد كام يوم هتظهر الحشرات والديدان وهتبدأ تكبر بنفس المعدل، لأن أصل الديدان والحشرات دي بيبقى بكتيريا الجهاز الهضمي للإنسان، ودي بكتيريا متعايشة ومفيدة موجودة بشكل طبيعي جوه الجهاز الهضمي لكن بعد الوفاة بتبدأ تهاجم الجسم والأعضاء وتحللها، وتتغذى عليها وتكبر جدا في الحجم يوم عن يوم، لدرجة إن فيه باب كامل في الطب الشرعي عن تحديد زمن وفاة الجثة من طول الديدان الموجودة عليها، وبالتالي يستحيل إن الراجل ده يكون كان عايش امبارح ولا من عشر أيام فاتوا، ممكن أتقبل لو تعفن، لكن متقبلش أبدا حجم الديدان والحشرات دي، والقصة بالنسبة لي منتهية.

مبقاش فيه أمل مؤقتا غير في شغل المباحث، وأنا عارف إنهم هناك بنوع شغل بجد ومش عيال ميشو.

كلمت محمود بيه، واتفقنا هنتقابل عندي في المكتب ثاني يوم بكل الأوراق والمعلومات المتاحة، ونتناقش. طول الليل أشياء غريبة بتحصل معايا، ومحاولات مستميتة متعود عليها على إجباري على الاستسلام، بس هو مين.

روحت ونمت، رحت الشغل ثاني يوم على المعاد، جه محمود بيه، مع رئيسه خالد بيه، بالمناسبة، هو مدير أمن دلوقتي ويستحق.

فرشنا الملاية، وبدأنا نتكلم.

اتكرر نفس الكلام اللي اتقالي قبل كده، أنكرت باستماتة القصة كلها لعدة أسباب:

- الأم ماتت مخنوقة بقوة أكثر من 3 أفراد أو بقوة غير طبيعية.

- الطفل الرضيع ميت من إهمال وتعذيب على مدار يومين، مش زي ما الأخ قال: إنه قتله.

- البنت وفاتها طبيعية مش زي ما الأخ قال: إنه قتلها.

- الخال ده متوفي من عشرين يوم تقريبا ويستحيل يكون متواجد وقت الواقعة

سألت عن الخال الغائب.

- قالوا: إنه سافر دولة أفريقية من زمان جداا ومجاش، وإنهم بعنوله عن طريق السفارة مقدرتش توصل ليه، وعن طريق الجوازات عرفوا إنه رجع مصر من سنة ومظهرش لحد دلوقت.

في نفس الوقت جه تليفون لمحمود بيه إن الخال الثاني ده ظهر، وبيقول إنه عرف عن طريق أحد الجيران اللي كان متواصل معاه، وإنه أصلا رجع مصر من سنة، لكن كان فيه قطعة من عشر سنين أو أكثر بينه وبين إخواته، ولا شافهم ولا شافوه.

محمود بيه قالهم: يجيبون على المشرحة يحاول يتعرف على الجثث، واستأذنا هيشوفوا نتيجة قضية ثانية في المعمل بتاعة مخدرات وهيابلوا الخال ده تحت يتعرف على الجثث، طلبت الاحتفاظ بنسخة من كل الأوراق والمحاضر والتحقيقات، سلموا ومشياو قعدت أقلب في الورق، كل الكلام متكرر. فضلت أفرا كل الأقوال، بعد ساعة تقريبا لقبت قيد عائلي بتاع الأسرة دي.

ولقبت فيه حاجة لفنت نظري جدا!!!، الخال الميت والخال اللي المفروض هيجي تحت توأم، توأم!!! بنفس تاريخ الميلاد، بدأت حاجات تتفتح، يبقى الخال ده قتل أخوه من عشرين يوم، واستغل وجه الشبه بينهم بإنه يظهر قدام الناس كأنه أخوه ولسه عايش، وراح قتل الاخت. لسه الحنة دي غامضة، بس ده تفسير منطقي جداا، قمت وفتت. طلعت موبايلي اتصلت بشعبان، قالي: الراجل موجود على الشباك هو ومحمود بيه وخالد بيه ولسه مدخلش، قولتله استنى متخليش حد يدخل، أنا جاي حالا، نزلت جري. خلصت الكوري دور ووقفت على باب الأوضة. ولقيته في وشيء بصيقله وسرحت، هو، نفس عينين الغل والحقد والكراه، نفس العلامة الشيطانية اللي في جبينه زاوية قائمة متقاطعة مع (حرف S) شيطاني مقرز، مستحيل أخطئ فيه، وهو يحاول يتجنب نظراتي ليه ويبص في حنة ثانية، خالد بيه بهزار، أنت تعرفه ولا إيه يا دكتور؟ قولتله ده حبيبي حبيبي من أيام التجمع.

وفجأة الراجل اندفع بكل قوته يجري خارج مبنى المشرحة. الكل واقف في حالة ذهول! محمود بيه بدأ يجري وراه، فتحت الباب وخرجت، الأمن على أول المشرحة شاف. قطع عليه الطريق، جري على أقرب عمود إنارة ليه، وفضل يخطب دماغه في الحديد بهيستيريا لحد ما وقع على الأرض فاقد الوعي.

كل الأحداث دي حصلت في عشر ثواني تقريبا، وقفنا حواليه في ذهول، محدش فاهم أي شيء، لكن أنا بدأت أفهم، ومش عاوزه يموت، شفت النبض، ضعيف لكن لسه موجود. إسعاف بسرعة وانتقل بحراسة على أقرب مستشفى.

رجعت قدام الشباك، سألوني فيه إيه؟ قولتلهم معرفش، دايما الجزء الما ورائي ده بحتفظ بيه لنفسه لأسباب خاصة، ولأن مش كثير اللي بيصدقوا ويؤمنوا بيه، وأنا مبحبش الجدل في حاجة مؤمن بيها، قلت: أنا شفت الورق فعرفت إنه توأم لأخوه الميت، توقعت السيناريو اللي ممكن يكون حصل في الجريمة، ولما شافني بركز في ملامحه، جري، حسن إنه انكشف، وبعدين عمل اللي شوفتوه ده، كنت أنا المرة دي اللي بحكي وأنا اللي مش عارف أجيب عيني في عين حد. سبيبتهم واقفين ومحدش فاهم حاجة، رجعت المكتب. قعدت، رجعت رaaaaااا لورا، يا ربي، أنا هخلص من الأرف ده امتي؟! كفااااااا بقی، عاوز راحة أعصاب شوية، قبل ما أقوم من المكتب كنت حجزت سفيرة لإحدى الدول بعد إسبوع وأجازة، كان لازم أفصل بأي شكل، نزلت ركبت عربيتي ومشيت من غير ولا كلمة، رجعت، أخذت شاور، أكلت ونمت، صحيت بالليل، نزلت، رحى المشرحة أشوف نتائج العينات بتاعة (DNA) الطفل الرضيع ابن الست فعلا، أما أبوه هو ابنها، الست كانت حامل من ابنها. كنت متوقع شيء غير طبيعي، متفاجئتش أوى، رحى المستشفى اللي الأخ فيها، قابلت الدكتور وريته الكارنيه، قال: إنه عنده شرح في الجمجمة ونزيف في المخ وإنه بيفوق وبيتكلم عادي، وإن هنسني يومين بالعلاج وبعدها نشوف هل فيه تدخل جراحي ولا لا، اتحركت للعيادة المركزية، حاطينه في غرفة منفصلة عليها حارس. أمين شرطة، كلمت محمود بيه اللي بدأ استغرابه مني يزيد ودخلته، لقيته نايم، أو فاقد الوعي، قربت في هدوء، صورت العلامة اللي في جبينه، فتح عينه بعد نور الفلاش. لقاني في وشه، قالي: بصوت ضعيف، اتأخرت ليه؟ شديت كرسي وقعدت، وقولتله: احكي، وبدأ يحكي.

الكلام طالع بصعوبة بس حسيته حس إن اللي قدامه قوى ومش هيسيبه ولا هيستسلم وهو مكانش فيه أي قدرة على المقاومة، ومكانش قدامه غير الاستسلام.

وحكى قصته، تظاهرت بإنى باعمل تحويل للموبايل عشان محدش يتصل، وسمعتة. قال: إنه كان فيه خلاف بينه وبين أخته وأخوه، وإن أخته وأخوه كانوا بيشتغلوا بالسحر والأعمال، وإنه لما طالب بميراثه عشان يبعد عنهم رفضوا وعملوه أعمال كانت هتجننه، ساب كل شيء وراح الصعيد وانقطع عنهم تماما من أكثر من عشر سنين، ومن الصعيد سافر للسودان مع واحد يعرفه عشان يشتروا جمال وإبل يبيعوا في مصر.

وبعدين استقر في السودان. ومنها لدولة أفريقية أخرى، من عمالقة السحر السفلي والأسود في العالم، وهناك اتعلم كل شيء؛ بل وتفوق، وادوله أعلى وسام عندهم وهو العلامة اللي على جبينه واللي اعتبروه بها حاجة اسمها قطب من الأقطاب، يعني من قيادات الطريقة دي السحر، وهي طريقة بتمزج بين سحر السيمياء اللي هو يخليك تشوف رؤيا العين زي القطط كده، أو تحس إحساس تام زي الإيد اللي

كانت على كتفي. او تتوهم شيء زي المكالمة اللي حصلت، وكلها أشياء في الحقيقة غير موجودة، وببمزجوا السيبيا اللي بيسموه سحر الخداع بسحر سفلي أسود قاتل، ممزوج بنوع من التتويم المغناطيسي، سحر سيء وبشع وقاتل لأبعد الحدود، ولو معندكش إيمان يقدر يعمل فيك أي شيء أيا كان لحد إنك تقتل أو تنتحر.

وإنه بعد ما امتلك الطاقة الرهيبة دي، قرر يرجع مصر من سنة عشان ينتقم من إخوانه، في الأول باستخدام السيبيا أقام علاقة بين اخته وابنها وكل منهم متخيل إن اللي معاه شخص آخر، لحد ما حملت، واستنى على ما يقرب معاد ولادتها، ومن عشرين يوم راح جنن أخوه اللي هو التوأم بتاعه وقتله وبيحط بخور أفريقي في البيت يمنع ريحة التعفن تماما، وبقي يستخدم سحر السيبيا إنه يظهر قدام الناس كأنه أخوه، بل ويتكلم معاهم كمان ويطلع وينزل قدامهم، لحد ما أخته ولدت، لبس لبس أخوه وغطى وشه بداعي البرد، وركب عربية أخوه، وراح لأخته البيت. دخل وبالسببيا ظهرلهم كأنه الأخ الميت، وفضل قاعد مكانه لحد ما سيطر على البيت بالكامل، شل حركة الأم، وبالتتويم المغناطيسي وطاقة سحرية خلى الابن يخنق أمه بملاية السرير، وبقوة جن، كان مقرر إنه يأخذ الرضيع معاه، لأنه بالنسبة له من أبناء الشيطان وهي قدر يملك بيه طاقة أكبر لما يقدمه كقربان، لكنه اكتشف إن الأم كانت بتعذبه ومبتاكلهوش عشان يموت وإنه بيطلع في الروح، البننت بنتها كانت مريضة أساسا ومبتنكرتش ومن هول اللي شافته جاتلها جلطة وماتت لأنها مش متعودة على كده، عمرها ما اشتركت معاهم في سحر، لكن هما كانوا يستاهلوا، خليت الابن حفر حفرة وحط أمه فيها وحط عليها شوية أسمنت ومية، وبالسببيا والتتويم خليته بلع قرص من الاقراص اللي بيحفظوا بيها القمح، وخليته راح القسم قال كل اللي قاله وهو غير واعى، حاولت ألبس كله في بعضه وقمت عشان الحق أكمل المخطط، وأروح أخذ جثة أخويا أرميها في أي مكان ويبقى هو المتهم وهرب وكده أبقى خلصت من الجميع، لكن اتأخرت والشرطة جت بسرعة، ملحقتش أنقل جثته، هربت من فوق السطح.

اممم، طيب وإيه اللي خلاك تظهر، كان لازم أظهر عشان أبعد كل الشكوك عني، لأن كده بوجود الخمس جثث لازم فيه قاتل سادس وكده كده كانوا هيعرفو إلي دخلت مصر من سنة، وهيشكوا فيا، فبدأت أبعد أي حد إنه يوصل للسر وأولهم أنت، وكمان ظهرت عشان أبرأ نفسي وأبقى عارف أي أخبار جديدة عشان أتصرف لإني مبعرفش أوصل منك لحاجة، وأنا مفيش أي شيء يديني.

كنت بماطل في الأسئلة قدر الإمكان لإني كنت بعثت من البداية رسالة على الواتس لمحمود بيه إن لما أتصل بيه يفتح ويسجل المكالمة وميتكلمش خالص، وطول كلامه محمود مقراش الرسالة وأنا قاعد أمط في الكلام وسايب السؤال الأخير لحد ما محمود يقرأها.

سألته، طيب ما هما كمان كانوا شغالين في السحر ازاى قدرت تنتصر على الجن اللي معاهم؟

رد قال: بقولك أنا قطب من الأقطاب معايا ملوك ومردة وما دام اللي معاك أقوى كل
الباقيين يخضعوا ليه، محمود قرأ الرسالة وبعث علامة ،

اتصلت، فتح، وبعدين سألته سؤال مباشر، يعني إنت اللي قتلت أختك وسممت أبنها،
وأخوك وأقنعت ابن أختك يروح يقول كده وخططت لده كله، صح؟

رد قال آه، وكان نفسي أعمل أكثر من كده كثير، بس الموت جزاء يستاهلوه.

قفلت المكالمة، مينفعش كلمة زيادة تتقال في التسجيل، مينفعش توصل التحقيقات أي
كلمة عن سحر أو جن وإلا تبقى القضية باظت، لأن دي أشياء غير معترف بها، لا
علما ولا قانونا.

قولته وإنت هتعمل إيه دلوقت وإنت متكلبش هنا ومفيش جن هينفعك، قال: متقلقش
أخف بس وأعرف أتصرف، بصيت لملامحه لآخر مرة، حسيت إن أنا قدام شيطان،
قدام المسيح الدجال بعلامة الكفر على جبينه.

قمت من غير ولا كلمة، خرجت.

كلمت محمود، قالي: كويس أوي، أنا في لحظة أخذت إذن تسجيل من النيابة
بالتليفون وسجلت، بس إنت عرفت كل ده ازاي؟؟ قولته: بعدين، بس الراجل ده
هيهرب منكوا قالي: ليه يا عم هو أنا سوسن!!

قولته هفكرك. رجعت الشغل، كتبت التقارير، بنفس الداتا اللي فوق، كتبت بإهمال
في الوصف، لأنني عارف إن ما دام المتهم وصل للمرتبة دي من السحر، مش
هيتعاقب، ومسألة هروبه مسألة وقت، كنت عارف إن أنا بس اللي عرفت التفاصيل
دي، وأنا بس اللي هعرفها لآخر العمر، لكن اديتلهم التسجيل عشان يقفلوا قضيتهم،
كتبت كل شيء، خلصت وقعت وختمت وقمت مشيت.

بعد رجوعي من الأجازة عرفت إنه هرب أثناء ترحيله لمحكمة، مرضيتش أكلم
سوسن قصدي محمود بيه عشان محرجهوش.

لحد النهارده القضية مفتوحة والمتهم الهارب محكوم عليه غيابيا بالاعدام، ومش
هيالقوه.

مستعد دلوقتي لسيل الأسئلة والاستفسارات والهجوم وو إن القصة خيالية ووهمية
ووو، ومقابل كل شيء بمرح زي كل مرة، لأنه لا يعنيني أي شيء غير إنني
أحكيلكوا وأعرفكوا عدي قدرتهم وصلت لفن، ومدي قذارتهم وصلت لفين، وإن
بعضكم هياخذ من كلامي العبرة والعظة وبس، وده المهم.

باقي حاجتين

الناس اللي هنا في الجروب وقريبين مني عارفين كم المعاناة اللي شفتها عشان
القصة دي تظهر ليكوا، وإنها بتتكتب من فترة، وكل شوية تقف كتابتها لسبب معين
غامض ومفاجئ، في حين أي قصة ثانية بتتكتب في تلت أربع ساعات، لكن دي

بالذات كان فيه قوة غريبة مصرة على عدم نشرها، لكني عانددت كالعادة وأصريت على النشر، والكتابة رغم كل اللي بيحصل من أيام، لأن الكلب لسه حي وبيقاوم. الحاجة الثانية، هو لما كل الناس بتقول ونعم بالله، والله خير حافظا، وإن الدجالين ملعونين وكفرة، مين اللي بيروح لدجالين.

آخر إحصائية للمركز القومي للبحوث الجنائية بتقول: « إن المصريين بيصرفوا سنويا 10 مليار جنيه على قراءة الغيب وفك السحر والعلاج من الجان، وإن هناك دجال لكل 240 مواطنا، وإن فيه 200 ألف شخص في مصر يدعون القدرة على معالجة الأمراض بواسطة تحضير الأرواح، وإن العالم العربي فيه مليون وربع دجال يمارسون الشعوذة والسحر » يعني باختصار ناس مننا بتروح لهم عشان تؤذي ناس، فالمصابين بيروح لهم عشان يعالجهم، أو ينتقموا من التانيين، وهما بياخدوا فلوس من دول ومن دول، واللي راح يعمل حاجة عندهم كافر، واللي راح يتعالج كافر، وهما رأس الكفر.

انصحوا اللي حواليكوا ووعوهم، أوعوا تستهينوا بحاجة زي قراءة الفجان، أو الكف، أو أي شيء زي ده يخرجكم من الدين كله، ساعتها تبقوا في أيديهم زي العجينة يشكلوكوا الخدمة مصالحهم بالشكل اللي عاوزينه، أوعوا تستهينوا، ربنا هو الحصن بتاعنا منهم. طول ما احنا بنحترم تعاليمه وباعدين عنهم مستحيل هنتأذي، لكن لو بكل إرادتنا روحناهم، ربنا بيسحب ضمان الحصن والحماية، ومنكو ليهم بقا انتو زيهم، خارج الملة.

استعينوا بالله، بالله وبس، وبس، وخليكوا بعيد عن العالم ده، حتى لو كان عندك فضول، أنا للأسف اتحطيت في مواقف بحكم شغلي كان لازم أقرأ وأعرف عشان أفهم وأقاوم، وبحاول أعلمكوا اللي اتعلمته.

ده عالم قدر قبيح كافر يتقرب للشيطان بكل أشكال الذنوب والكبائر، عالم عنده قدرات مستحيل تتخيلوها أو عقلكوا يستوعبها، ولكن المحصلة في النهاية إنهم بيموتوا كفرة مطاردين ورغم كل الأموال اللي جمعوها تلاقهم في فقر مزري مش لاقين حتى ياكلوا.

الحكاية الرابعة

لا أجمل من حالات موت تثير داخلك كل هذه الرغبة العارمة للكتابة بعد كل هذا الصمت، فتعتاد الجلوس ليلاً على طاولة "ستاربكس" لم تقربها منذ زمن تشرب فنجان قهوتك المر كحياتك، وتستدعي قلمك، صديقك، هذا المجنون، الأكثر بوحاً، الأكثر جرحاً، هذا الذي يكتب بلغة غير اللغات، بأبجدية حملت سفاحاً بحرف تاسع وعشرين لم يعرف له أب حتى اللحظة، هذا الذي نوصيه لا يكفي طهارتها التمرغ سبعا في صالونات خبثهم لتتدنس، لنكتب إذا يا صديقي، لنكتب كتاب موتى وكأنه امرأة أعادت لك كل هذا الشغف بعد طول انتظار.

وماذا يستحق الكتابة غير الموت، وهي وما تبقى من وطن!!؟

في غياب الشمس تعلموا أن تتضجوا في المطر.

وفي بهو الحياة الفاخر، تعلموا الاستعداد دوماً لحالة موت كضيف مفاجئ.

استعدوا له كما لو كان حبكم الأول، لا تقاموه أبداً، حين يطرق بابكم استسلموا له بكل ارتياح ولا مبالاة، الموت أكثر عبثية من أن تأخذه على محمل الجد.

يقول الموت: آو، فأجيبوا دوماً "نعم" حتى لو أجابت الحياة "لا"

الموت لا يختار عمراً معيناً لينسج قصته، إنه يباغتنا في الوقت الذي نحتاجه الأكثر، ونتوقعه الأقل، تحت أي عمر وفي أي طقس، قبل الخمسين وبعد الخمسين وفي الخمسين، قبل المطر، وبعد المطر، وتحت المطر.

الموت مفاجئ جداً، هو ضربة قدر صاعقة ستصيبك، ستصيبك، ولا تفسير لها خارج اللوح المحفوظ، وهو غادر جداً، لا أحد يدري لماذا هاجم هذا المكان بالذات، لينتقي هذا الشخص بالذات، وفي هذا التوقيت بالذات، ولا أحد عاد من الموت ليخبرنا على سره الكبير، ربما لأجل هذا أكتب هنا، لأن من عايش حالة موت وجب عليه أن يقص على الناس عجائبه، ويصف لنا سحره، ويحذرنا خطورته، لوجه الله، ووجه الأدب.

اقتحموا سادتي اقتحموا، فاجئوه ببرودكم حين يفاجئكم بحرارته.

هل الجثث تنتقم!!؟ طيب، الحكاية المرة دي هتكون غير، هتبقى نهاية برده لمجموعة أفراد فيه رابط بينهم، لكن مش صادمة، دي صاعقة! صاعقة بشكل لم تشهده المشرحة من قبل ولن تشهده بعد، وأخطر ما فيها إن محمود لم يعان من أي مشاكل متعلقة بالجن والسحر والقوى الخفية طيلة حياته، إلى أن جاء يوم وفاته، الخطورة كلها تكمن في أنه كان عايش طبيعى جداً، تمام زي أي واحد فينا، بدون أي إشارات أو أشياء غير طبيعية وفجأة جاءت الصعقة، صعقة بكل معنى الكلمة، أنا وأنت وأنتي ممكن نكون كدة، أو نتعرض للانتقام مميت بدون أدنى سبب، وتكون نهايتنا صاعقة، ومشابهة تماماً للي عمله محمود لكن المرعب إن الموضوع مبقاش

يقف عند الموت، مش قصة موت وبس، ده فيه بقايا حياة بعد الموت، ممكن تأخذ ساعات، وممكن سنين، أو بالأدق سلاسل انتقامية متتالية استمرت حتى بعد الموت، او عوا حد يموت زعلان منكم.

الزمان: مايو ٢٠١٧

المكان: مشرحة زينهم

التوقيت: التاسعة ليلا

النهارده القصة مش بس مختلفة، لأ ومخيفة، مخيفة فعلا..

أسرة مصرية عادية جداً مات الأب والام فجأة من عشر سنوات؛ أثر تسرب غاز في شقتهم، وتركها منزلًا بدائياً مكون من أربعة طوابق تم تقسيمه بين الأبناء كالتالي:

- الدور العلوي: يقطن به محمود وهو في الثانية والأربعين من العمر ولم يتزوج لانشغاله بمصاريف زواج شقيقه وشقيقته فأهمل نفسه حتى ضاع به العمر دون رفيق.

الدور الثالث: يقطن به يحيى شقيق محمود رفقة زوجته سحر وابنتها أمجد.

- الدور الثاني: يقطن به عصام شقيق محمود الأصغر المسافر للخارج وزوجته منى وابنتها هند.

أما الدور الارضي: فيقطن به شيماء شقيقة محمود المطلقة بعد ست سنوات زواج لأنها عاجزة عن الخلفة

وكانت هذه الحياة التقليدية مأساة محمود اليومية المتكررة.

محمود يبصحي يومياً على كم خناق ومشاجرات بين إخوته لا ينتهي، وكل ما يحاول يتدخل بالصلح يتلقى سيل رهيب من الإهانات من إخوته وزوجاتهم، مرة عاتب زوجة أخوه إن صوته عالي وهي بتشتم زوجة أخوه الأخرى، وطلب منها بأدب توطي صوتها علشان الجيران والفضايح فطالبته بوقاحة بعدم التدخل وقامت بالبصق في وجهه أمام أخوه الذي لم يحرك ساكناً.

محمود يعمل ميكانيكي سيارات، يعود ليلاً من ورشته، لا زوجة ولا أبناء، فيشتري بكل ما اكتسبه فاكهة وطعام ويمر يوزعها على بيت إخوته، فيأخذوها منه من على الباب ويقفلوا الباب بسرعة بحجة أنهم نايمين، حتى أخته كانت تعامله بمنتهى الجفاء والاحتقار، ولو لقيته نازل على السلم تقفل الباب بسرعة عشان ميدخلش عندها، أما وهو طالع فأكيد جايب حاجات، تستناه تاخدها منه على الباب وتقفل بسرعة في وشه لأنها عاوزة تنام، كل اللي كان بيحلم بيه محمود لا زوجة ولا أبناء، خلاص هو نذر عمره لاخواته بعد وفاة أبوه وأمه، لكن كأى كائن بشري، كل اللي كان بيحلم بيه شوية تقدير، شوية حب، مواقف كثير عملها محمود مع اخواته وأسرهم بكل الحب واتقابلت بمنتهى الإهانة، لدرجة إن ولاد أخواته الأطفال بقبوا يشتموه ويهينوه بكل الألفاظ اللي لسة حتى ميعرفوش معناها، ولكن بيسمعوها من أهاليهم.

فكرت كثير في قصة محمود وليه كانوا بيعاملوه كدة، بحثت ودورت وراه، ملقتيش غير سبب واحد، إن معظم قلوبنا كبشر للأسف ملونة، أسود وأزرق ورمادي، كل واحد ليه لون، والقلوب دي مبتقدرش تستوعب أبداً إن فيه قلوب بيضا زي الثلج، دي حاجة أكبر من قدرتهم على الاستيعاب، فيفسروا أي موقف إنساني نبيل بأي تفسير آخر قدر، قلوب عاملة زي المنشور الثلاثي اللي كنا بناخده في حصة العلوم، بيجي عليها شعاع الضوء الأبيض الواضح النقي، فتحوله لألوان قوس قزح المختلفة، أحمر الكره، أصفر الحقد، بنفسجي الحسد وهكذا، لكن عمره ما يستوعب إن دة فعلا كان ضوء أبيض نقي شفاف وأحنا اللي بكل صفاتنا السيئة اللي حولناه لأشكال تانية وشوفناه زي بس ما عاوزين نشوف، وباللون اللي يناسبنا، ويليق بينا، وقل لي لون قلبك، أقل لك موديل ضميرك!!

محمود مكانش ليه غير صاحب واحد بس، عم حسني، ودة كان صديق والده، راجل عجوز وحيد مراته توفت وملهوش أولاد، لكن زي ما بيقول إن محمود كان ابنه اللي مخلفهوش، عم حسني فضل يحكي لي أكثر من ست ساعات عن محمود وكم الطيبة اللي كانت فيه، وكم الإهانات والصدمات اللي اخدها من اخواته، بيقول: إن محمود كان بيدخل عنده ينهار من البكاء بسبب إهانات اخواته ليه، ويخرج يقابل اخواته بابتسامة عريضة ناسي كل شيء، عم حسني ضغط عليه كثير يسبب البيت ويبعد عنهم ويتجوز لكن محمود مش عاوز يسبب بيت ابوه وأمه اللي اتربي فيه، كمان خايف يسبب اخواته وحدهم رغم كل اللي بيعملوه معاه، عصام أخوه ومراته اخدوا منه عربيته بالعافية وخلوه باعها ليهم بيع وشراء بدون مقابل، حتى الحاجة الوحيدة اللي اخدها من ميراث أبوه وأمه (عقد الذهب) كان بتاع أمه وكان بيعه جدا، أخته سرقته منه وقالته: أنها مشافتهوش رغم إنه شافها لابسها في يوم، وبعد كدة بقيت لابسها باستمرار بكل بجاحة، يحيي أخوه مكانش ليه دور مؤثر، لكن كان يكفي محمود منه نظرات الاحتقار والإهانة اللي كان بيقابله بيها في كل مكان لحد ما جه يوم المأساة

محمود راجع البيت بالليل بعد شغله، فات اشترى فاكهة واكل وحلويات للأطفال، دخل البيت سمع كالعادة خناقة جديده، المرة دي أخته طرف أول، قصاد زوجتي أخواته الاتنين كطرف تاني محمود ساب الحاجة اللي في ايده على الأرض واتدخل بينهم كالعادة، حاول يهدي أخته، فدفعته بعنف وبصقت عليه وقالته: بتكلمني أنا بدال ما تضربهم، حاول يهدي مراتات أخواته ويقول عيب انهالوا عليه الاتنين ضرب بالشباشب لمدة خمس دقائق وبعدها سحر أخذت حديدة جنب الباب وضربته على أيده، كل دة حصل قدام أخوه يحيي اللي واقف يتفرج على الباب وولع سيجارة، محمود فضل واقف والشباشب نازلة عليه مع اقذع أنواع الشتائم وهو في حالة صدمة مهولة مش بينطق وعينه مليانة بالدموع ومش بتنزّل عن أخوه اللي بيشرّب سيجارة باستمتاع وبيشاهد الموقف، محمود جر رجليه لحد ما وصل شفته، دخل وقفل الباب ومخرجش تاني من يومها.

خمس أيام مخرجش من باب الشقة، عم حسني قلقان عليه جدا، لكن الراجل العجوز ميقدرش يطلع السلم (٤ ادوار) يشوف محمود، ولأنه سمع خناقة اخر مرة كان

معتقد إن محمود متأثر وقاعد في بيته كام يوم على ما يبقي كويس، الإخوة اللي تحت كانوا بيتابعوا كل يوم يشوفوا محمود فتح الورشة ولا لأ: عشان مستغربين أنه مبقاش يعدي عليهم حاجة بالليل ودي حاجة مضايقاتهم لكن مفكروش لحظة يطلعوا يخبطوا عليه خمس أيام لحد أما الريحة بدأت تطلع والجيران بلغوا جت الشرطة كسرت الباب، لقت محمود ميت، وتم نقله لمشرحة زينهم وبدأت بعدها الخمس أيام المأساة في تاريخ الحارة الشعبية دي اللي مستحل هينسوها لآخر يوم في عمرهم..

- شعبان

جاي في الكوريدور بيغني: أنا مش عارفني، أنا تهت مني أنا مش أنا، لا دي ملامحي ولا شكل شكلي ولا دة أنا.

- هو أنت كان شكلك إيه وأنت صغير يا شعبان؟

- بص يا معالي الرئيس: أنا كنت حنة بتاعة سودا كدة وصغيرة بس العيال كلهم كانوا بيخافوا مني، عشان شكلي رعب

- طيب وأنت أمك لما كانت بتتيمك كانت بتخوفك بأيه؟

- لأ، أنا اللي كنت بنيمها يا ريس، بس لما كانت بتتيم حنان أختي كانن بتغنيها، نامي نامي يا حنان، لاجيبك ودان شعبان، فالبت كانت بتنام على طول.

- اممم، طيب وأي الأخبار عندنا تحت؟

مفيش حاجة غير جثة الفرحان اللي لسة جاي من شوية وقاعد يضحك ويضحك الميتين وعامللي فيها عادل إمام وسط الجثث تحت.

امممم، ومين معاك تحت؟

مفيش غير الحاخام حزين بس؟

مين الحاخام حزين؟

الشيخ سعيد، أصل أنا قالب عليه اليومين دول.

اليومين دول!! عمل معاك إيه تاني؟

مفيش أنا كنت اديته ثلاث حبايات بيحبوا إسها على إنهم فياجرا، وقتلته اسمهم النملة المتوحشة، وقتلته جابين من برا ولازم ياخذهم مع بعض وبقاله ثلاث أيام مطلعش من الحمام لحد ما بقي الحاخام حزين مش الشيخ سعيد.

هو إنت بتعمل فيه كدا إيه يا شعبان؟

والله ما أعرف يا معالي الرئيس. هو رجل مصطنع كده، خبؤ، أول ما أشوفه أحس إنني لازم أعمل فيه حاجة.

عارف لو اشتكاك رسمي هرفدك يا شعبان؟

عادي والله يا معالي الرئيس، بس هو ميقدرش يعملها، لأنه عارف أنا هعمل فيه إيه!

وهتعمل فيه إيه بقا؟؟

لا هخليه نافع لا نملة متوحشة ولا سور الصين العظيم عشان بقي ياخذ باله من شغله ويجوز ليه يغسل جنث الستات والرجالة عادي بدون محرم.

طيب يلا جهز الحالة اللي تحت، وأنا جاي أهه.

أو امرك يا معالي الرئيس.

طلع في الكوريدور وبيكمل غنا: واتدحرج وأجري، يا شيخ سعيد، وتعالى على حجرى، يا شيخ سعيد.

فضلت أشرب فنجان قهوة وأكمل كتابة قضية على أنغام أسطورية وصوت السيدة ماجدة الرومي يطهر أذني من دنس صوت شعبان.

“ما نفعها الأساور، والورد والمرايا *** ومخمل الستائر، يراقص الزوايا”

في دخلة شعبولاً تاني جاي يقولي إن الجثة جاهزة، هي مين دي يا معالي الرئيس الولية اللي بتصوت اللي إنت بتسمعها دي؟

انتفضت من على المكتب بانفعال مفتعل، وقفت الأغنية، وعليت صوتي جداً قولتله بص، ملعون أبو المشرحة علي الشيخ سعيد عليك يا شعبان، إنما دي متجيبش سيرتها على لسانك تاني، فاهم؟

الواد اتخض، قالي: ماشي يا معالي الرئيس وجه ماشي، وسامح الشيخ سعيد ببسألته هو الرئيس بيزعق ليه؟ وهو بيقوله أصلي شتمت الولية اللي بتغني وشكلها قريبة الرئيس باين.

خلصت القهوة لبست بدلة الحرب ونزلت، الشيخ سعيد مقابلني هفتان يا عيني وأصفر ومش قادر يقف.

سألته مالك يا شيخ سعيد؟ قال: مفيش يا ريس شعبان اداني مقويات وقالي: إنها ممتازة: بس جابتلي إسهال ومغص بقالي كام يوم وشعبان بيقولي: أكيد طلع عندك حساسية منها.

شعبان جاي جري عشان يحلق الكلام، وبيقول أكيد حساسية، صح يا معالي الرئيس، قولتله: يمكن. قالي: وهو بيشاور بصباعه علي الشيخ سعيد أصل الأشكال دي يا ريس مش متعودة على الحاجات النضيفة، دخلنا القاعة وهو بيقول: دنا جاييله النملة المتوحشة من آخر الدنيا والله.

بصيت علي الأخ محمود وهو نائم متعفن وواضح السعادة الطاغية على وجهه وضحكته، ورائحته نفاذة، على غير العادة، لدرجة إني قلت لشعبولاً هات بخور، فراح يجيب عود بخور وأنا بتأمل محمود اللي فاتح بؤه كأنه بيضحك بهيستيريا وسنانه كلها باينة، شعبان دخل ماسك البخور وبيدور على مكان جنب الجثة يحطه فيه مش لاقى، فضل يدور يمين وشمال وبعدين بص لمحمود وقاله: لا مؤاخذه وجه حاطط عود البخور في فلجة بين أسنانه.

بدأنا (الريكوردينج)

(الجثة لذكر في الأربعينات من العمر متوسط القامة والبنية، يرتدي تي شيرت مقلم ويبدو عليه مظاهر التعفن الرمي المتقدم المتمثلة في اسوداد البشرة، وتفلسها واخضرار البطن وانفجارها على الجهة اليمنى السفلية وانتفاخها، وبروز العينين وبدء ظهور الديدان بما يفيد مرور قرابة خمسة أيام صيفية على الوفاة، عدا ذلك لم نشاهد أية إصابات خارجية ظاهرة، وبإجراء الصفة التشريحية تبيناً أن الوفاة حالة مرضية بالقلب نتجت عن جلطة بشرايين القلب ربما بعد حالة صدمة أو حزن شديد).

تمام كده القصة منتهية، حالة وفاة ليس بها أي شبهة جنائية، ومفيش أي شئ غريب غير ضحكة محمود وصوت الضحك الهستيرى اللي شعبان بيقول عليه بيطلع من التلاجة، وكان حالة محمود اللي اتحرمت من ضحكة سعيدة طول حياتها طلبت معاها كوميديا بعد الموت، تم التشريح والخياطة، الجثة رجعت التلاجة الكبيرة. صوت الضحك كان مسموع للجميع، ضحك شرير متقطع بأصوات متقطعة، عم حسني حاول يجيب أخو محمود بالعافية يستلم جثة أخوه، رفض، كانوا مشغولين بالخانق أثناء الاستيلاء على محتويات شقة محمود، جه وحاول معايا كثير يستلمها، رفضت مخالفة القانون، وفضلت الجثة في التلاجة وبدأت بعدها الهستيريا.

حريق غير معلوم السبب في نفس يوم الوفاة أدى إلى تقحم منزل العائلة بالكامل لكن محدش اتصاب، لأن الحريق بدأ من شقة محمود فجربوا كلهم على الشارع لكن الحريق مفيش حد كان قادر يسيطر عليه وحرق البيت بالكامل، وبالتالي اتفرقوا كل أسرة أصبحت مقيمة يا إما في شقة مؤجرة، يا إما عند حد من قرايبهم، وبمجرد شروق شمس اليوم التالي بدأت سلسلة انتقام محمود.

اليوم الأول:

مني مرات عصام اللي مسافرة برة وهند بنتها كانوا عند أخت مني، قاموا مذعورين من النوم في حالة هستيريا وبيقولوا إن محمود ظهر لهم بالليل لكن في شكل غريب، ليه رعيون حمرا دم ومرعبة وبيضحك بهيستيريا وكان في أوضة معدنية وسط مجموعة كبيرة من الجثث، وقالهم: إنه هيننقم منهم وإنه هياخذ حياتهم جزاء اللي عملوه. مني قامت من النوم مذعورة، اتصلت بجوزها عصام في إحدي الدول العربية، المرعب إنها لقيت عصام في نفس الحالة الهستيريا. إنه شاف نفس اللي شفوه بالظبط. وقالها إنه مرعوب وهيرجع مصر في أسرع وقت. وطلب منها تروح بيت أبوها وأمها لحد مبيجي. مني قامت لمت حاجتها الباقية اللي كانت شنطة صغيرة فيها اللي لحقت تاخده قبل الحريق، حطت الشنطة على كتها وأخذت بنتها على أيدها ونزلت. ركبت أتوبيس نقل عام، وصلت عند المحطة اللي فيها بيت أبوها وأمها، وقفت عند باب الباص شائلة بنتها علي إيد والشنطة بإيديها الثانية بتسند علي الباب، والباص بيتحرك ببطء، رجلها اتزحلق، الشنطة شبكت في باب الباص من ناحية ولفت علي رقبته من الناحية الثانية، ومني في الشارع والباص بيتحرك مسافة (200 متر) ساحب مني من رقبته وبنتها مخبوظة في الأرض في راسها،

وكل الشهود في المحضر أجمعوا إن مني طول فترة السحب كانت بتصرخ وتقول: لا يا محمود، ارحمني يا محمود، لحد ما سكنت أنفاسها وماتت، بنتها تم نقلها لأحد المستشفيات وماتت فور دخولها من نزيف داخلي بالرأس والبطن، الجثث تم نقلها للمشرحة في نفس اليوم، مكوناش نعرف وقتها علاقتها بمحمود، اتصلوا بيا نزلت العصر أشتغلهم، كل شئ طبيعي في المشرحة باستثناء أصوات الضحك من التلاجة الكبيرة اللي كانت بتزيد جداً وقت كل حادث بيحصل علي مدار الأيام الخمسة، وبدأت أنا وشعبولا نشغل جثة الست وبنتها، مشوفتش لسة الورق.

إيه يا شعبولا قصة الست دي وبنتها؟

دي يا ريس أمين الشرطة بيقول إنها كانت نازلة من الاتوبيس شايلة بنتها والشنطة بتاعتها شبكت في الباب وعلقتها من رقبتها والباص ماشي، وبيقول إنها كانت بتصرخ وتقول أغنية بوسي ومحمود الليثي: محمود إيه ده يا محمود، هي الناس دي بتبصلي كدا ليه، محمود إيه ده يا محمود هي الناس دي عاوزة مني بقا إيه!

قولته باستفسار: ومحمود بقا قالها إيه؟

بدأ يقلد محمود الليثي وهو بيغني، وبيقول:

قالها: تعالي جنبني، يا روح قلبي، تعالي.

قولته: طيب جهزهم يا شعبان وخلي يومك يعدّي عشان أنا منمتش. بدأنا نشغل جثة البنت واضح إنها مشنوقة بايد الشنطة فعلياً، وواضح إنها اتسحلت على الأرض مسافة طويلة، وإن سبب الوفاة اسفكسيا الشنق، والبنت الصغيرة واضح انها اتصدمت على الأرض بعنف عملها نزيف في المخ ونزيف بالبطن، وده سبب الوفاة. طيب يلا خيِّط يا شعبولا الجثث، وبقلع علشان أمشي فضل عليا شعبان إني أستني عشان يوريلي حاجة لما يخلص، خلص خياطة، وبعدين حط الجثة على شيزلونج، وقال: شوف بقا الحركة دي، فضل يزق الشيزلونج في اتجاه التلاجة الكبيرة وبمجرد ما وصل عندها الضحك يزيد جداً ووش البنت يزرق جداً، يبعد عنها الضحك يهدا تماماً ووش البنت يرجع عادي، يقرب تاني منها يحصل نفس الشئ، وأنا مش فاهم شئ، ولا يخطر ببالي لحظة أساساً إن دي ليها علاقة بجثة الفرحان بتاع امبارح، فبقول لشعبان طيب ليه بتعمل كده؟ قالي: علشان اللي فرحان اللي بيضحك ده اسمه محمود، ودي كانت وهي بتموت بتغيله إيه ده يا محمود، ففرحان بيها بقا.

بصيته باحتقار وسبيته وخرجت ومش في دماغي، وهو عمال يلعب بالشيزلونج زي العيال الصغيرة ويقربه من التلاجة ويبعده، بركب العربية لمحت عم حسني واقف قدام المشرحة ناديت عليها سألته إنت لسة ما أخذتوش الجثة؟ قال: داننوا جالكم النهاردة مرات أخوه وبنت أخوه، والبيت بتاعهم كله ولع، ومش هيهدا محمود ولا روحه إلا لما ياخذ كل حقه منهم، بدأت أربط اللي حصل جوه بكلام الرجل، قولته اركب، ركب جنبني وفضل يحكي لي كل اللي حكيته فوق، بدأت اتعاطف مع محمود بشكل غير طبيعي، في نفس لوقت مش فاهم إيه اللي بيحصل، وازاي

محمود ليه القدرة دي علي الانتقام!! وهل الأرواح ليها قدرة على الانتقام أساساً!! وازاي؟ ولحد امتي؟ وهل هيكتفي محمود باللي حصل؟ عم حسني نزل في موقف السيدة عائشة بعد ما أخذت رقمه وروحت وأنا مشغول جداً بالتفكير في الشئ اللي أول مرة يحصل ده، جثة بتظهر لناس في نومهم وتهدهم بموتهم ويموتوا بعدها بشوية وبطريقة بشعة.

روحت نمت، صحيت الساعة ثلاثة الفجر على اتصالات متتالية من زفت الطين، ودار الحوار التالي:

عاوز إيه يا زفت، أنا مش قولتك هنام.

صفحة 70

مانتا نمت شوية حلوين أهه يا ريس وغلط عليك النوم الكثير ده.

إنت مال أهلك، عاوز إيه دلوقت؟

أصل محمود قاعد يضحك على آخره فقولت أعرفك.

***، أقسم بالله يا شعبان لمعرفك إنك تصلي ركعتين استخارة قبل متفكر تتصل بيا بعد كده، ماشي!!

والله يا ريس ما بهزر، هو قاعد يضحك قلت ليكون عاوز حاجة ولا حد من الميتين بيزغزغه دخلت قعدت أسأله عاوز إيه مبيردش، قولتله طب والله لقابل للريس إنك عامل شغب.

قفلت في وشه عشان أنفجر من الضحك من غير ما يسمع، بيهدهم الجثة إنه هيقولي، وبيتكلم بمنتهي الجدية.

ساعة كمان وفضل يتصل مردش عليه، لحد عشر اتصالات، رديت عليه.

نعم

فيه جثة يا معالي الريس قريبة محمود.

بدأت أنتبه وأنا بسأله ظروفها إيه؟

قالي: واحدة اسمها سحر مرات أخو محمود اسمه يحيي، كانت نائمة عند جارتهم هي وابنها وصحيت مفزوعة من النوم وبتصرخ، وبتقول: محمود جالي الأوضة ماسك حديدة في إيده عاوز يضربني ويموتني، جابولها دكتور وادالها منوم ومهدئ ونامت، جم يبصوا وبيقولوا مفيش أي آثار اعتداء ولا أي شئ في المكان، عشان لما أقولك يا ريس محمود عاوز حاجة تبقي تصدقني، هو محمود ده بلطجي يعني ومحدث قادر عليه يا ريس ولا إيه؟

بدأت أصحح وقولتله أنا جاي دلوقت.

نزلت ركبت عربيتي ورحت دخلت وأنا سامع صوت ضحك محمود العادي اللي بقاله يومين، الجثتين كل جثة علي شيزلونج في الكوريدور، قولتله اعلمي قهوة

بسرعة، راح يعمل بصيت عليه لحد ما طلع وزى العيال الصغيرة بقيت اعمل زيه بالظبط، أقرب الشيزلونج من التلاجة الكبيرة الضحك يزيد أبعد يقل، وأجرب كذا مرة وأنا خايف بيحي فجأة يشوفني ويعلم عليا، لحد ما جه، شربت القهوة وقولتله يلا دخل الجنتين علي الترابيزات جوه، وهو ماشي قدامي قالي: باقتراح وهو فرحان، تيجي يا ريس نقرب الجثث من التلاجة الكبيرة ونشوف الضحك هيزيد ولا لا، زعقت بصوت عالي: هو احنا مش هنبطل لعب العيال ده يا شعبان؟ جثث إيه اللي توديتها عند التلاجة يا تافه إنت، مشي بامتعاوض ودخل الجثث القاعة.

بدأنا بجثة سحر، دي حالة ست واكله علقه موت مفيش مكان في وشها سليم، علقه موت بكل معني الكلمة وبأدوات لا يمكن تحديدها علي وجه الدقة، لكن المؤكد إنها أدوات غير حادة، يعني أشبه بخشبة أو حديدة ثقيلة وعريضة، ومن عنف الضرب عمل كسور بالجمجمة ونزيف بالمخ أدي إلي الوفاة، الغريب إن الدكتور اللي فضلت في البيت فترة بعد ما سحر نامت بالمنوم، والشهود والجيران أجمعوا إن مفيش مخلوق دخل أوضة سحر وابنها، وإن الدكتور شافها بنفسه وخرج وقفل عليهم الباب وبعد نص ساعة داخل يبص عليها قبل ميمشي لقي الوضع ده لدرجة إن الدكتور نفسه أغمي عليه.

جثة الطفل أمجد (8 سنوات) تلقي نفس الضربات لكن على ايده وجسمه بنفس العنف والقوة لكن سبب الوفاة شئ تاني مذهل، ضربة على الرأس كأنها ضربة شاكوش اخترقت العظام والمخ وعملت فيه تهتك ونزيف ووفاة فورية.

الموضوع بدأ يزيد ويزداد عنف، ومبقاش فيه حد فاهم شئ، كان مفهوم الأول إن حد يموت مظلوم ويتكفل الزمن والقدر بأخذ حقه هو المفهوم السائد، أما مفهوم إن روح موجودة في تلاجة موتي بتضحك وبتنتقم من كل اللي أدوها وبتزداد ضحكاتها بشكل هيسثيري، ده اللي شئ غريب ومرعب.

اتصلت الصبح بعم حسني، لقيته مبسوط وعنده علم باللي حصل وبيؤكد إن لسة فيه انتقامات في الطريق. وإن محمود مش هيهده! إلا لما ينتقم منهم كلهم، لدرجة إنني شكيت في عم حسني نفسه، وخليته جه المشرحة، وتأكدت إنه راجل طيب وليس له أي علاقات شعوذة أو دجل.

عم حسني قالي: إن يحيي أخو محمود خاف جداً جداً من سلسلة الانتقامات اللي حصلت، وحس إن محمود فعلياً بينتقم منهم خاصة إنه قعد يصرخ الفجر ويقول إن محمود عاوز يخلع عنيه، وجري راح على دجال مشهور جداً بإحدي مناطق القاهرة.

المغرب لقيت عم حسني بيتصل بيا وبيضحك وبيقول إنه عنده خبرين ممتازين، الأول إن يحيي مات، وإنه كان عند دجال اسمه (الشيخ سباط) وإن الدجال قاله: إن محمود بينتقم منكم، وإن فيه اتنين من الجن تابعين لروح محمود سكنوا جسد يحيي، وإنه بيحاول يخرجهم ومصرين على الخروج من عين يحيي، ويحيي زاد رعبه خاصة إن محمود هدهده بخلع عنيه، وبدأ الدجال يقول طلاس وتعاويذ ويحاول وفجأة انفجرت عينين يحيي ومات وإنه في طريقه للمشرحة.

أما الخبر الثاني إن عصام أخو محمود اللي مسافر في إحدي الدول العربية كان في المطار عشان يبجي مصر، ولما عرف اللي حصل لإخواته ومراته وبنته خاف يرجع مصر وطلع من المطار راجع لمحل إقامته وتعرض لحادث سير مع سيارة نقل ضخمة. دهست العربية اللي كان فيها وجثته انقطعت (100 حنة) وإن أحد سكان المنطقة اللي مسافر مع عصام في نفس البلد العربية اتصل بالجيران وبلغهم باللي حصل وإن الجثة هتتبع لمصر.

عم حسني قالي: إنه رايح المشرحة عشان يشمت في يحيي، فضلت في المشرحة مستتي لحد ما جت جثة يحيي، شعبان المجنون عاوز يروّح عشان مراته اللي بتولد زي الأرائن كل شهرين ونص حامل وتعبانة، وأنا حلفت ما هو متحرك إلا ما أنا أمشي، جثة يحيي أنا بعترها أغرب جثة شفنها في حياتي على الإطلاق، جثة فيها العينان منفجرتان تماماً وكان تم خلعهم بسكينة كبيرة جداً، منظر عجيب ومرعب. هتشوفوه في الصور، ومفيش أي سبب لحدوث ده، مفيش أي مبرر قادر أقوله في التقرير، تم ضبط الدجال وأعوانه ولا زالت التحقيقات مستمرة.

بعدها بيوم وصلت جثة عصام، أو بمعنى أدق بقايا جثة عصام، اللي برضه هتشوفوا أجزاء منها في الصور، واللي انقطعت جثته لقرابة (30 حنة) ولم يتبق من الأسرة كلها إلا الأخت، شيماء، اللي فهمت القصة بسرعة، وجريت علي عم حسني ينقذها من بطش محمود وانتقامه، وحلفته بالعيش والملح تقضل عنده في بيته، وإنه الوحيد اللي يقدر ينقذها من محمود، أخذها وجه بيها علي المشرحة وخلص إجراءات استلام جثث محمود وعصام ويحيي وولادهم، الجثث تزداد ازرقاقاً، ومحمود يزداد ضحكا، حتي وقت الغسل، محمود يضحك وفتحة فمه تزداد اتساعاً وشعبان يقول للشيخ سعيد إنت بتزغزغه وأنا هقول للريس، والشيخ سعيد يغسل حنة ويدخل الحمام عشان الإسهال ويتوضأ ويبجي يكمل وشعبان يقوله شفيتم.

خلص تغسيل الجثث وخرجت مع بعض في مشهد غريب، يستدعي تفكير رأسي عميق، جثة محمود الضاحكة تقود الجثث الزرقاء خلفها، هم كانوا سبب في موته وهو قتلهم كلهم، ودلوقت هو القائد اللي نعشه قدام بيضحك وهما وراه في حالة يرثي لها، قبل ميمشوا اتكلمت كلمتين مع عم حسني، سألته إذا كان كده خلاص ومحمود هيسامح أخته وتنتهي القصة كلها.

قالي: وهو بالمناسبة كان راجل عجوز يقارب الثمانين، لكن مثقف وقارئ ومؤمن وواعي جداً - قالي: جملة مفهمتهاش وقتها، قال: "يا طيب، عندما يأتي الطوفان كل سيدفع ثمن ما ارتكب، وبنفس الطريقة". قال: كده ومشي، مفهمتهاش، يمكن الطوفان هو انتقام محمود، واللي ارتكبه إهانة وجرح وإيذاء وحتى موت محمود، لكن إيه بنفس الطريقة مش فاهم.

مشيوا بقيت الساعة 4 الفجر، قولت لشعبان والشيخ سعيد إني هطلع أنام في الاستراحة فوق، وبدأت أجمع الورق وطالع وسامع شعبان بيقول للشيخ سعيد كأنه دكتور ببسأل مريض في حزم، إنت دلوقتي بتدخل الحمام كام مرة في اليوم؟ وقفت في الكوريدور أسمع. الشيخ سعيد قاله: يبجي عشر مرات، شعبان قاله: بلهجة

الطبيب الواصل، امم، بدأت تتحسن، بكرة هجيبك حباية اسمها الهدوء العجيب هتريحك على الآخر، ساعتها انفجرت من الضحك، سمعوني وطلعوا، شعبان بيقولي هو محمود يمشي هتضحك إنت يا ريس، قعدت أخطر الشيخ سعيد مياخدش منه أي دوا وإنه بيضحك عليه، وبعدين شعبان التفت للشيخ سعيد وقاله: عارف يا شيخ سعيد الشياطين لما بتشوفك داخل الحمام بتقول إيه؟ رد الشيخ سعيد بالطيبة المعتادة بتاعته وقاله: بتقول إيه يا شعبان؟ قاله: بتبص كده وأول ما بتلاقيك إنت اللي داخل بتقول: اللهم إني أعوذ بك من الخبث والخبائث.

طلعت نمت، الساعة تسعة الصبح صحيت على اتصالات كثير، نزلت لقيت تحت جثة شيماء، وليها منظر غريب، كانت نائمة والعقد اللي لابساها بتاع أمها لف على رقبتها وخفها، وشكل العقد مرسوم بدقة عجيبة على رقبتها، هتشوفه في الصور، حتى الدلاية اللي في النص، بتجيلنا حالات كثير سبب الوفاة التقاف حاجة على رقبتها وهي نائمة، لكن قد تكون ايشارب أو شئ مماثل، لكن أول مرة أشوف السبب عقد مجوهرات، دي جديدة.

عم حسني مجاش، لأنه كان بيتحقق معاه لأنها ماتت في بيته، طلع بعدها بكام يوم، شيماء جه حد من ولاد أعمامها استلمها ودفنها، بعدها كلمت عم حسني واتقتت أقابله عشان يحكي لي أكثر عن واحدة من أغرب الحاجات اللي قابلتها في عمري كله. جالي المكتب، فضل يحكي، لفت نظري لحاجات غريبة جدا عمري ما فكرت فيها!

عصام ومراته وبنته ماتوا في حوادث عربيات لأن أكثر حاجة أثرت في نفس يحيي منهم كانت الاستيلاء على عربيته اللي جابها بشقاه، سحر وابنها ماتوا بعلقة موت بحديدة، لأنها تعدت يوم موت محمود عليه بحديدة، ودي أكثر حاجة أثرت في محمود، أخوه يحيي اللي كان بيقتل محمود بنظرات الاحتقار والاهانة اتخلعت عنيه الاتنين اللي كان بيص لمحمود بيهم، شيماء أخته اللي سرقت منه عُقد أمه الغالي جداً عليه ماتت مخنوقة بيه، افتكرت فوراً "يا طبييت، عندما يأتي الطوفان كل سيدفع ثمن ما ارتكب، وبنفس الطريقة".

بصيت تاني باستغراب لعم حسني، وتأكدت للمرة الثانية إنه برى من أي علاقات ما-ورائية.

القصة دي فضلت شاغلاني لمدة طويلة جداً، هل محمود كان ليه علاقة بجنية عاشقة ليه وهي كانت السبب إنه لم يتزوج؟ وهي اللي انتقمت ليه؟ ولا فيه شئ غريب حدث أثناء وجود محمود ميت في شقته؟ ولا فيه حد بينتقم لمحمود بقوة ما-ورائية؟ ولا ده تسلسل قدرتي بحت تم بشكل طبيعي دون تدخل؟ وإيه سر ضحك محمود وازرقاق الجثث؟ رحى يوم أنا وعم حسني لقبر محمود وإخواته، الضحك توقف، لكن بمجرد وقوفك أمام القبر تحس بانقباض رهيب، وطاقة سلبية مهولة وإحساس متقدش تقف فيه أكثر من ثواني، القضية دي اتحفظت بسبب غرابتها وعدم وجود منهم وعدم وجود أي تفسير منطقية لثلاث أرباع أحداثها، لكن المؤكد إن القضية دي هتفضل مفتوحة جوه عقلي لحد آخر عمري، وهتفضل: أسألها دائماً مفتوحة، وبدون أجوبة، هل الروح المقهورة تملك القدرة على الانتقام لنفسها؟ وهل الروح في حالات القهر

الشديد تظل معلقة حتى تأخذ حقها؟ وهل على قدر القهر يكون الانتقام؟ وهل يصل انتقام روح لهذه الدرجة من القوة والبشاعة؟ وهل تشعر الروح بما تم وتفرح مع كل عملية انتقام جديدة؟ وهل يصل فرحها لدرجة الضحك؟ هل يضحك الأموات أيضاً؟! هذا ما لا يصدقه الأحياء.

متزعلوش حد أبداً، ولا تزعلوا من حد، أي واحد فينا يموت مقهور وارد جداً إنه يكون زي محمود وبنفس نهايته، وأي حد فينا يتسبب في موت حد مقهور وارد جداً إنه يكون زي إخوان محمود وليه نفس النهاية، عيشوا في حالة هدوء ولا مبالاة، لا تزعلوا من حد ولا تخلوا حد يزعل منكم، الموت محيط بينا في كل مكان، وكل وقت، لا يقبل الرشوة من الأغنياء، ولا يهاب الملوك وأصحاب المناصب، ولا تُغلق دونه أبواب القصور والدور، الحياة بسيطة وقصيرة، والموت مفاجئ، وانتقام القدر للأرواح مبيرحمش.

∞ ∞ ∞ ∞ ∞

الحكاية الخامسة

تمطر بغزارة هنا عند المشرحة الآن، المنظر بديع، ينقصه وجودكم، مباحث هو المطر، تماماً كالموت.

يحب الموتى أول زخة مطر في الشتاء على سقف المشرحة، وعلى سقف قبورهم، تواسي أوجاعهم، يحبون هودج السحب البيضاء التي تُتذّر بالمطر الأول، كقُبلة أولي، كموعِد أول، يباغتهم المطر كأنه يد حبيبة تلامسهم للمرة الأولى، ينتفضون لقطراته المنتسارعة، يفرحون بمجيئه جداً، وكأنه سحائب رحمة أنت لتبشرهم بموعِد في الجنة.

المطر عندي هو الشقيق التوأم للموت؛ كل هذا المطر وكل هذه الجثث ذاهبون رغباً عنهما صوب عروق الأرض، أحب كلاهما، وكلاهما رغم برودتهما يشعلان نار قلبي الصغير.

أثناء غيابي موتاً علي قيد الحياة، وانشغالي بصيف البعد باذخ الألم، نضجت الغيوم، واستوى الحزن، وأن للشوق أن يهطل، وأن للموت أن يقول كلمته.

المطر دموع الموت!

يسعدني الآن أن أقف تحت كل هذا المطر وأعترف، أني أحبها.

حسناً. جاء شتاء جديد إذاً، ولا زال بيني وبينها طقس رمادي يشبه هذا المطر، ولا زلتُ أشتهيها قبل المطر، وبعد المطر، وتحت المطر.

جاء شتاء جديد إذاً، ومعه ذلك السؤال المخيف: "ماذا تراكِ تفعلين بباطن الأرض تحت المطر من دوني؟". وفي المساء أترتجف لذكري نوافذ قبرك؟ أيقظ رذاذ طيفي حينيك؟ كيف أنت يا ميم؟ أما زال عندك ذياك الوفاء للمطر!!

صفحة 81

يسعدني أيضاً أن أعترف تحت كل هذا المطر أنني أحب الموتى كسماء سابعة تحتضر ست سماوات وأرض، مساء الحب عليهم، مساء شوقي إلي الموت، مساءهم سكر، وعطور فرنسية أخاذ، وأكثر.

∞ ∞ ∞ ∞ ∞

الزمان: يناير 2015.

المكان: مشرحة زينهم.

التوقيت: الثانية والنصق ليلاً.

الجو برد جداً على غير عادة الأيام اللي فاتت، اتصال من مباحث المجتمعات العمرانية الجديدة يقولوا إن في أثناء الحفر لإنشاء بعض العمارات السكنية اللودر

والله يا ريس أنا مكونتش هروح داحنا كنا قاعدين بالليل وبقول لمحمود عاوز أكشف عند دكتور قلب وأذن وحنجرة، قالي: إن ابن ال*** ده قريبه وإنه غسله ودنه قبل كده وإداله علاج كمان، وهو جنب المشرحة بخطوتين، روحته، فلما خرملني ودني الأولي، حسين إن هوا ساقع بيخش في دماغي بس هوا خفيف كده، قولتله إيه ده؟ قالي، ده من المية بس هتفك دلوقتي، وبدأ يغسل الثانية، دي بقا حسيت إن صاروخ هوا داخل في دماغي، تقريباً دي بحري والثانية قبلي باين، ولقيت ال**** بيقولني: ايه ده؟ داننا ودنك غريبة الشكل عموماً أنا هديك علاج يظبطلك الأخرام، انتطرت من مكاني وقولتله: إخرالام؟ هي عجلة كاوتش يا ابن ال***، وجيت مكتفه ومحمود بيشدني وجيت واخذ منه الحقنة وداببها في ودانه الاتنين خرمتهمله، وجيت رازعه على قفاه وفاكله حبل حصانين وجيت مجريهم في الشارع وماشي، ومن ساعتها مش سامع كويس خالص.

بصوت واطي، لا أنا زعلت والله، دنا هصرفك إعانة يا شعبان.

ربنا يخليك يا لينا يا معالي الرئيس.

أها، ما إنت سمعت أهه.

هه، بتقول إيه ياريس؟

بز عيق، بقولك: إني هطلع ميتينك لو ودنك مطلعش فيها حاجة.

جيبته وجبت منظار الأذن وبصيت، أقسم بالله، واحدة بسيطة وواحدة فيهم فيها خرم، وخرم حمدي النقاز في ماتش الأهلي.

الواد ده سامع ازاي! الله يخرب بيتك يا شعبان.

بز عيق، دول خرمين كبار فعلاً يا شعبان دول عاوزين علاج قوي وممكن جراحة!

أمال لو شفت الخرمين اللي أنا عاملهمله يا معالي الرئيس.

هنشوفك طبليتين حلوين في جثة تحت ونركبهملك. هجيب د. أمجد يركبهملك.

ده ابن *** غبي

بز عيق والله ابن ال*** الغبي هو اللي يروح لدكتور بيطري يا شعبان، عموماً، بيقولك جاي 8 جثث، هياكل عظمية، 7 أطفال وحد كبير دخلهم على طول ونشتغلهم نشوف إيه الحوار ده.

تمام يا معالي الرئيس.

مشي وأنا كل ما أفكر "خرمته زي ما خرمني" أموت من الضحك.

بعد ساعتين تقريباً جه قال: إن الجثث جت تحت، كل جثة في كيس وحطهم في التلاجة الكبيرة وجاهزين. قولتله طيب طلعي (4 أطفال) على الأربع ترايبزات على ما أغير هدومي وأجي.

شربت أمريكان كوفي ولبست ونزلت، هياكل عظمية شكلها قدييم جداً، بفحص العظام تبين أنها تعود لألوف السنين، أما السن بتاع الجثة وقت وفاتها بنحدهه عموماً من الأسنان، وكمان فيه عملية تعظم بتحصل في العضم عند سن معين، يعني نهايات العظام بتكون غضاريف وعند سن معين بتتحول لعظم، ودي بنستخدمها في تحديد السن بدقة للجثث المجهولة، يعني علي سبيل المثال ضرس العقل عند (18 سنة) بيطلع، تعظم عظام اليد عند (18) تعظم الترقوة عند (22) تعظم القدم عند (16) تعظم الجزء السفلي من عظمة القص عند (60)، وبنستخدم كمان التحام عظام الجمجمة عن طريق حاجة اسمها التداريز، أوك، عموماً هو علم كبير جداً بنحدد منه السن بمنتهي الدقة، وفي الأحياء بنحدداهم بالأشعة طبعا، العظام دي أثرية ولكن دول مش أطفال. دول كلهم بين 35 إلى 40 سنة، دول أقزام!! كمان من شكل العضم بتاع الحوض وحاجات معينة مش هشغلوكوا بيها بنحدد جنس صاحب الهيكل العظمي وهل هو رجل أم امرأة. ودول كلهم سنات، شعبولا بيقول: على فكرة يا ريس دول نتي، رديت بز عيق، نعم، يعني إيه ده؟ نتي يا ريس جمع نتاية، قصدي إنهم نسوان يعني، وإنت عرفت منين يا شعبان إنهم سنات؟ قال: بص يا ريس للجمجمة دي كده، بص وتخيل وشها كده، تخيل، هتلاقيا كهيئة كلب.

أخذت من كل جثة كده أكثر عظمة محافظة على نفسها، وحرزتها، واديتها لحد يطلعها فوق عشان ال (DNA) لأن لو سيبتهم تحت ممكن ألاقي شعبان عامل عليهم شوربة: لأن قبل كده لما كنا بنشرح أنا ومحمود جثة متعفنة مليانة ديدان وحشرات بتطير وهو واقف مستمتع إننا أرفانين وبيشرب شاي، فجت حشرة من حشرات التعفن طيارة في كوباية الشاي بتاعته، بصيلها وبص عليا وأنا مركز معاه مستتي رد فعله، جه ماسكها بإيده ومغطسها في الشاي وقال: النبي (ص) قال: غطسها ثلاث مرات، وكمل شرب، فده إنسان لا يمكن توقع أفعاله.

طب يلا لمّ دول كل واحدة في كيسها وهات الثلاثة الباقيين، هه بتقول إيه يا ريس؟ بز عيق لمّ دول كل واحدة في كيسها وهالات الثلاثة التانيين يابو خرم.

جاب الثلاثة التانيين نفس الوضع بالظبط، أقزام، عضم أثري، السن من (35) إلى (40)، ونتي..

خلصنا كده السبع هياكل عظمية وكله تمام زي الفل، هات بقا أبو جلد بني ده أما نشوف، وبدأ الرعب.

حطه علي التراييزة وبمجرد ما فتح سوستة الكيس النور قطع، ضلمة كحل، لكن أنا شوفت وشه، ملفوف في بطانية وملاية، لكن وشه باين، شيطان غريب، لو قلت لحد أوصفلي الشيطان مش هيلقي وصف أفضل من ده، فم مفتوح بأسنان تشبه الفار، شعر في مناطق ومناطق، عيون مقفولة لكن شيطانية الرسم، حاجة كده أول متشوفها قلبك يتقبض، الطبيعي في الحالة دي بمجرد ما النور يقطع، بعد عشر ثواني تقريباً بيشتغل المحول الاحتياطي لأن مينفعش الكهرباء تفصل عن التلاجات أبداً، فات دقيقة مشتغلش، مشكلة كبيرة جداً والمشرحة ضلمة كحل، قلعت الجوانتي،

طلعت موبايلي من جيبي، بنور الفلاش، الموبايل كان شحنه (80%) تقريبا،
وبمجرد ما شغلت الفلاش جابلي (battery empty).
وقفل.

حاجة كانت أول مرة تحصل إطلاقا في الموبايل ده، برضه أخذت الأمر مصادفة
وعادي جداً، هنعمل إيه يا شعبولا، مردش عليا، بز عييق: شعباان، مردش عليا،
أكيد طلع يجيب كشاف ولا حاجة، بدأت أتحرك مش شايف أي شئ، بحاول ألمس
أي حاجة بإيدي أعرف أنا فين، أيدي جت علي حاجة لزجة، حاولت أعرف إيه ده،
أيدي جت في عين الجثة، بقول لنفسي كويس إنها مجاتش في بؤك جتك الأرف، بس
في إحساس غريب، ضغطت عليها ببطء، كانت طرية بشكل مذهل بالنسبة لجثة
هيكل عظمي، كأني بضغط علي كيس لبن مثلا، لحد ما سمعت صوت غريب،
فاكرين أزايز الكولا الزجاجية زمان لما كنا بنفتح الغطا بتاعها؟ نفس الصوت
بالظبط. فرقة بسيطة، وخذ عندك بقا، شوفت لما تفضل قاعد كتير على وضع معين
وتيجي تقوم فتلاقي رجلك منمّلة بشكل متقدرش تقف عليها. تخيل لما جسمك كله
يحصله نفس الشكل ده في نفس اللحظة، جسمك بالكامل حتى عضلات وشك، حتى
فروة راسك. بشكل غريب عمره ما حصلي أبداً في حياتي، ولا حصل لحد، لدرجة
إني فكرت فعلياً إن ده الموت، انتشاهدت، وغمضت عيني ومستعد تماماً، وأنا رجلي
بتتهار، رجلي مش قادرة تشيلني حاولت أسند بإيدي على طرف الترابيزة أيدي
نفسها لا بتتحرك ولا فيها باور تسند، قعدت على الأرض. عضلات ضهري كلها
تتميل مش قادر أصلب ضهري أساساً، نمت على الأرض، جسمي كأن فيه رعشة،
بيتنفض كأنه محموم، وأنا مش مستوعب إيه اللي بيحصل ده.

أذكار معينة قولتها بصعوبة بالغة، جسمي بدأ يهدأ، شوية لحد ما هدي تماماً، عيني
كمان بدأت تتعود على الضلمة، وشففت خيال حد واقف جنب الترابيزة، ضلمة أه لكن
عيني بدأت تاخذ عليها وشففت خيال واحد طويل، ومش انعكاس لأي شئ لأن مفيش
أي ضوء، وكمان أيديه بتتحرك، فكرته شعبان، وأنا مش قادر أتحرك ويقسم في
سري 100 يمين إني هرفده، بدأ جسمي يتظبط، سندات ووقفت وفجأة النور جه،
شففت الخيال ده بقي بلون أحمر ولكنه اختفي في جزء من الثانية.

مركزتش أوي، اتحركت أشوف ال*** ده راح فين، لقيته واقف عند الأوضة
الأخيرة شايل بتاع كده معرفش اسمه تقريباً (كلوب) ليه شعلة بيعملوا عليه شاي،
بقوله إنت كنت فين؟ قالي: لما موبايلك فصل حسست ومشيت كنت بحاول أجيب
حاجة تنور، سيكت متكلمتش، وده مبدأ عندنا على فكرة اتربينا عليه في زينهم، إن
اللي يشوف حاجة لوحده ميقولهاش أبداً إلا بعد القصة كلها ما تنتهي. قعد يقولي إنه
حافظ المشرحة بالملي وإنه يمشيها مغمض وإنه وإنه، لكن مكونتش مركز معاه
إطلاقاً، كل تركيزي مع اللي حصلي جوه ده، واللي لسة جسمي بيوجعني منه،
وأصبحت على يقين إن قطع الكهربا مكانش صدفة وإن الجثة دي هنشوف معاها
العجب.

قولته طيب قبل أي حاجة تعالي نشوف المحول الاحتياطي مشتغلش ليه؟ رحنا لقينا سلك الكهربا الداخلى للمحول متقم تمااا، تمااااا، مستحيل هتلاقي مهندس صاحي دلوقت، الساعة تلاتة ونص الفجر والمهندسين بييجو الشغل (الساعة 9)، قلت لشعبان ربنا يسترها بقا للصبح والكهربا منقطعش تاني، بس أقولك حاجة، أنا مش متفائل وشكلها هتقلب ضلمة، رد باللامبالاة المعتادة، كفاية علينا نورك والله يا معالي الرئيس، مكوونتش فايقله خالص، رجعنا للقاعة نكمل جثة الشيطان اللي جوه.

شعبان دخل قبلي وأنا واقف على الباب بحاول أتني أيدي وأفردها عشان وجعاني جدًّا لقيت شعبولا بيقول، إيه ده، أنت قفلت الكيس تاني ليه يا ريس؟ يا حلاوة. بيبقي مكانش خيال اللي شوفته، دخلت وشعبان بيلبس جوانتي وبيص على الكيس السوستة مقفولة تماماً، طيب علي البركة، قبل ما تبدأ بقا يا شعبان هات البتاع اللي كان معاك ده عشان نور بيه، قال: النور مش هيقطع يا ريس متقلقش، قولته: هاته احتياطي، جايه، قولته: ولعة كده، ليه شعلة زي شعلة البوتوجاز بالطبط، قولته سيبه بقا يدفينا وافتح يلا، فتح السوستة بكل ثقة وبيبط. وكل ما يفتح حته يشيل البطانية من عليها، وأنا واقف مستني الأكشن اللي هيحصل، وصل لنصها مفيش حاجة، وصل لآخرها وبمجرد ما شال إيده جه النور قاطع والكلوب ده انطفأ، وبدأت سيمفونية الصوت والضوء في معبد الكرنك، تلاوات بصوت واطي، غريبة جدًّا، تشبه تلاوات الكهنة في الأفلام التاريخية القديمة، والغريب إنها مش صوت شخص واحد، ده مجموعة أصوات لأشخاص بتردد غريب، الصوت قوي لكن تردده غريب متقدرش تحدد هو جاي منين، جاي من كل مكان حواليك، كأننا متحاوطين بمجموعة عاملانا عيد ميلاد وبتغنيننا (happy death day to you).

وأنا في مرحلة الذهول لسة في أول ثواني لقيت شعبان بيحرك إيده زي المايسترو، وبيحاول يغني معاهم ويظبط اللحن، بصينا لبعض واتفقنا في الضحك.

بدأوا يتترفزوا والصوت بدأ يعلي، المشكلة إن شعبان وهو بيفتح الكيس أنا شوفت أشياء غريبة جدًّا، أولاً: الجسم نفس لون الوجه البني الغامق اللي تحسه لزوج كده، شبه جلد الشمواه، ثانياً: وده مهم إن البطن حمرًا تمامًا كأنها نسيج حي، بطن واحد عايش لكن حمرًا، الثالثة بقي ودي الأهم إن الزبون إيده على بطنه ولايس دبله حديثة الشكل جدًّا.

شعبان فضل يحسس لحد ما جه، حاول يولع الكلوب، مرة اتنين تلاتة عشرة مش راضي. كررت أذكار لحد ما ولع أخيراً، بمجرد ما ولع الصوت وقف، ولقينا الشيخ سعيد جاي بكشاف بيحاول يفتح كلام مع شعبان لأنهم متخانقين مع بعض عشان اتريق على وذن شعبان. وبصوت عالي بيقول انتوا بتغنوا والنور قاطع؟ أنا سامعكوا من أوضتي بتغنوا، رد شعبان بعنف قاله: متغنيش انت علينا وأطلع دلوقتي بدل ما هاجي أحلقك دقنك، أنا وداني مخرومة ومش طايق نفسي.

طلع الشيخ سعيد، الكيس لسة مفتوح لكن لقينا الجثة متغطية بالبطانية، شعبولا شالها، بصيت علي العين مباشرة، عين داخلة لجوه وعين لسة مكانها، الوضع هدي، واضح إنه استسلم، والنور رجع في لحظتها، كل ده وأنا مش قادر أقف من وجع

رجلي، وتفكيري كله لسة مشغول باللي حصل، فجأة قلت لنفسي طب ليه لأ، بقوله إيه يا شعبولا، أنا مش مرتاح للعين دي، وشاورتله علي العين اللي لسه مكانها، وقولتله اضغط عليها كده، حط ايده عليها وبيضغط وهو بيقول إيه ده، هي طرية ليه كده، عليا النعمة أطري من مراتي، وأنا قاعد أقوله: كمان لحد ما سمعت ال (truck) وفجأة شفت منظر ما تخيلته في حياتي، مكوناتش مستوعب إن أنا من شوية كان منظري عامل كده، شعبان شعره واقف، بيتنفض، إيده علي ودنه، ركبته بتخبط في بعضها كأنها بتسقف، بيقول: كلام مش مفهوم، حاول يسند جه واقع علي الأرض، اتخضيت عليه بجد وحسيت إني غلطت بجد، جريت عليه، مش قادر ياخذ نفسه، فضلت أعمله انعاش للقلب كده، وعاوز أعمله انعاش تنفس، وفي الحالة دي لازم أديله قبلة الحياه، وده مستحيل، الواد بدأ يزرق، بضغط علي القلب، وكل ما أبص في وشه، أتعود بالله، بدأ جسمه يهدي، شوية بقي طبيعي تماماً، لكن مش قادر يقوم، سندته حط ظهره علي الحيطه، بدأ يفوق خلاص، بص لجثة الراجل، وقاله: يا ابن ***، دنا هفرمك إنت كمان بس اصبر.

أنا رجعتلي هيسستيريا الضحك وبحاول أتماسك مش قادر، وبحاول أفهم شعبان إني معرفش إيه اللي حصل ليه، وهو مصمم إني كنت عارف عشان قاعد أقوله: اضغط كمان، قعدت جنبه على الأرض، فضلنا نضحك بهيسستيريا، بحاول أفتح الموبايل فتح والشحن (80%)، قمت صوّرت، بلهجة جدية بقول: قوم يا شعبان يلا كفاية تهريج خلينا نخلص، قام وعينه كلها شرار وهو بيبص للجثة.

بص على بطنه الحمرا تماماً، مكانش أخذ باله منها قبل كده، بصلها أوي باستغرب وقال: وهو بيكلم نفسه هي حمرا كدا ليه؟ وبص للجثة وقاله: بجدية تماماً هي دي بطنك ولا **** يا ابن ال ***!

ساعتها أنا فعلياً انهزت من الضحك ميقيتش قادر أقف، شعبان بيحاول لمدة ساعة يقلعه الدبلة مبتقلعش، لدرجة إننا حاولنا نشدها ببينة، من كتر الضغط عضم الصباع انكسر والدبلة متقلعتش، الدبلة استايل حديث جداً، وكأنها محفورة بليزر، بدأنا التشریح، الجلد سميك وقوي جداً، يشبه جلد الموميوات الفرعونية لأنني شفتها قبل كده، بمجرد فتح الصدر ريحة بشعة، تحت الجلد العظام فقط لا غير مفيش أي عضو جوه، المذهل جلد البطن الحي وسط كل النسيج الميت ده، شئ لا يصدق عقل، حاجة خرافية غير مفهومة وليس لها أي تفسير، حتي الأطباء الأجانب لما عرضتها عليهم في مؤتمر في ميامي بيتش (جامعة ميامي بيتش بالمناسبة، اسألوا muna karim) ذهلوا من الصور واتضايقوا جداً لما عرفوا إن الجثة اندفنت بعد التشریح، وإن دي كانت ممكن تبقي جثة القرن، ويتعمل عليها مليون دراسة، ومهما حاولت تشرح لهم عن القانون وإجبار الدفن في القانون المصري خلال فترة وممنوع نيش القبور و، و، مبيستوعبوش أبداً وبيعتقدوا إننا ضيعنا علي البشرية سبق علمي مذهل ويمكن يكون الأهم في العالم، لدرجة إن أثناء النقاش طبية شرعية أمريكية من أصل بولندي بكت فعلياً، علي السبق اللي ضاع، ولكن فعلياً مكانش بايدينا حاجة وعرضت عليهم كل الخطابات والمحاولات اللي عملناها لتحويل الجثمان للبحث العلمي الأثري، لكن تم الرفض بحجة ان الآثار عايشين في مية البطيخ وميهمش أي

جثة. عاوزين التواييت والذي منه كمان المحضر فيه (8جثث) مع بعض يبقي لازم يندفنوا مع بعض.

المهم نكمل، كسر قديم ملتحم بشكل معيب بالقرب من رأس عظمة الفخذ اليسري، بمحاولة فتح الرقبة بالمشروط عمل أزيز معدني غريب وفيه حشرة سوداء أشبه بالصراصير الطاشرة طارت من قم الجثة وخرجت من القاعة ودوخنا عليها بعد كده ولفينا المشرحة ملقيناهاش أبداً رغم إن مفيش خرم إبرة تطلع منه، العظم والأسنان محتفظين بنضارتهم كأنهم عظام حديثة الوفاة، حتى الأسنان محتفظة بطبقة المينا البيضاء وده شئ غير طبيعي، ولكن عظام الجمجمة ببيان عليها مدة الوفاة اللي تقريبا أثرية، من آلاف السنين. رجعت للعين، عاوز أشوف إيه المادة اللي جواها اللي عاملة زي اللبن أو الجيلي دي وغير مفهومة، فتحت الجفنين بصعوبة، مفيش شئ، مع صوت زي تقريغ الهوا من كاوتش عربية مخروم، أمال أنا كنت بضغط على إيه؟ مش عارف، فين طيب اللي كان شعان بيضغط عليه وكان أطري من مراته!! مش عارفة، بس مش ده اللي هيبهرني يعني مع جملة اللي حصل. نشرنا الجمجمة بصعوبة رهيبية، فاضية تماماً، قلعت الجوانتي وبكتب شوية حاجات وشعبان بيلعب بالمشروط في ودن الجثة عاوز يخرمله الطبله مش لاقياها. أخذت عينة عضم عشان (DNA) عشان نبدأ بقاء، في مرحلة التخييط اللي واضح إنها هتستمر بلا نهاية، مفيش إبرة راضية تدخل في الجلد إطلاقاً، اتكسر أكثر من خمس إبر خياطة عالية جداً، شعبان مُصّر يخيّطه، جاب مسمار صلب وربط فيه خيوط كتان ومستحيل يخرم الجلد، آخر ما زهقنا لفيناه بأكياس تغليف تضم الجلد على بعضه.

النور بدأ يطلع.

فضلت قاعد مع شعبان قدام المشرحة بره للصبح، بنرش مية عشان ربنا يرزق وعشان حاسس بالذنب الرهيب من اللي عملته فيه، وعاوز أعتزفله ومش عارف، لحد ما قولتله: أنا حصل معايا اللي حصل معاك بس كنت مفكر ظغن اللي حصلي ده حاجة طارئة عندي أنا هبوط ولا حاجة وقلت أخليك تجرب وفضلت اعتذرله، زعل جدا، قولتله: أنت زعلت ببقى أنا غلطان إني قولتلك أساساً، قالي: لا والله أنا زعلت عشان لو كنت قولتلي قبلها كنا جيبنا الشيخ سعيد يضغط عليها عشان نضحك شوية لأنني عاوز أخرمه عشان ببيتريق عليا، فضلنا نتكلم إن الحاجات الجنونية دي لو حصلت في آخر 5 سنين (100مرة) مثلاً في (100جثة) من بين (30الف جثة) اتشرحو في الخمس سنين دول بمعدل على الأقل (6000جثة) سنوياً، يعني بنسبة (33) من مية في المية (33,0%) ففيه (80) منهم معايا انا وشعبان، والباقي مع أي دكتور وفني آخر، وان الكيمياء بتاعتنا مع بعض هي سبب كل الكوارث، وفجأة قام وقف وقالي: إيه ده؟ أنا من ساعة ما وقعت بقيت بسمع كويس، قولتله: عرفت بقا يا شعبان أنا خليك تضغط عليه؟ لأنني ببص لقدام ولحاجات أنت متشوفهاش، بس راسي، قولتله: تصدق إن وانت بتموت جوه كنت هبوسك من بؤك، رد عليا رد صقعي، قالي: يا لهوي اوعى تكون عملت كده، أنا أصلي بأرف، قولتله: قوم يلعن أبو شكلك.

هات يلا قرار التشريح، بيحط إيده في جيبه يطلعه طلعت معاه الحشرة كانت في جيبه وطارت بعيد، بصينا لبعض وسكتنا، حسينا الموضوع زاد أوي المرة دي.

كلمت عمرو بيه اللي معاه القضية في المباحث دردشت معاه، وبسألته اشمعني الهيكل الكبير اللي لفينه. في بطانية، قال: والله أنا ما كنت موجود بس قالولي: كل ما عسكري بييجي يحطه في كيس يرجع للظابط يقوله: ده بيعمل صوت، بيعت حد ثاني يرجع يقوله: ده بيتحرك والعساكر خافت، فجابو بطانية بملاية كده قديمة لفوها عليه وزقوه جواها، قولته باستنكار: بيعمل صوت وبيتحرك؟ ايه التهريج ده، ما تخلو رجالتكو تسترجل شويه يا عمرو بيه، هو في حاجة كده أصلاً! قاللي: والله مسخرتهم كلهم، قال: بيعمل صوت قال: قولته: على رأيك، بعدين سألتته إنت مخليتش الآثار تبص عليهم ليه؟ قال: كلمناهم قالوا ما دام مش في توأبيت يبقو مش أثرين ولا ليهم أي لازمة، تمام يباشا، هشوف وهكلمك ثاني، قال: بيتحرك وبيعمل صوت قال: ناقص يقولولك: بيغني وقفلت.

بعدها اكتشفنا إن النور كان قاطع في المشرحة بس مش المنطقة كلها، رغم إن كل المنطقة على خط كهرباء واحد، الصبح المهندس اكتشف إن سلك المحول وهو أفضل وأمن نوع سلوك كهربا على مستوى العالم عمره الافتراضي (25 سنة) متركب من (3شهور). اتفحم بشكل كامل بدون وجود أي ماس كهربى وبمجرد تغييره اشتغل فوراً، موبايلي لما ييفصل عمره ما بييجيب كلمة (battery empty). إطلاقاً. مش في السيستيم بتاعه أساساً، عينات ال (DNA) لجنت القزمات السبعة ولجثة الموكوس ده طلعت غريبة بشكل غير طبيعي، المعروف إن الإنسان اي خلية ليه بيبقي فيها (46كروموسوم) وباختصار الكروموسوم ده خيوط مكونة من (DNA) حواليه بروتين جوه نواة الخلية، يعني أي نواة لخلية انسان بيبقي جواها (46) خيوط من دول. (44) خيوط منهم بيحددوا الصفات الجسدية زي لون العينين، والشعر، والبشرة، والطول، والجسم، والتكوين العضلي، وكل الحاجات دي، وخیطین بس هما اللي بيحددوا جنس الشخص هل ذكر أو انثى عن طريق خيطين واحد اسمه (x) وواحد اسمه (y) الذكر بيكون فيه واحد الخيطين دول (X) وده صفاته أنثوية شوية والثاني (y) وده صفاته ذكورية بحتة، أما الأنثى بيكونوا الخيطين (x) يعني باختصار كده عشان نفهم بس.

تركيب كروموسات الذكر الطبيعي (XY) (44زائد)

وتركيب كروموسات الانثى الطبيعية (XX) (44زائد)

وبمجموع (46) في اي شخص، لكن جنت الاقزام السبعة كان تركيبهم الجيني (Xزائد44) بمجموع (45كروموسوم) بس ودي حالة خلل جيني اسمها متلازمة تيرنر (TURNER SYNDROME) ودي بتكون بنت لكن بسبب نقص واحد من الاثنين كروموسوم (x) الأنثوي فيها بتظهر عليها بعض الصفات الذكورية زي خشونة الصوت، والعضلات، وعدم نمو الأعضاء الجنسية الأنثوية، والأثناء، وزيادة الشعر في الجسد، ويتكون غالباً قزماً، يعني من الاخر أشبه بهند الضكر،

يعني ست مسترجلة، يعني مطلعوش ناس بيور أما الموكوس طلع تركيبه الجيني (XXY زائد44)

بمجموع (٤٧ كروموسوم). ودي حالة خلل وراثي برضه اسمها متلازمة كلاينفلتر (KLIENFILTER SYNDROME)

وده بيكون ذكر ولكن بسبب وجود كروموسوم (X) أنثوي زيادة بتظهر عليه بعض الصفات الأنثوية زي نمو الأتداء، وضعف العضلات، ورقة الصوت، وعدم وجود أي شعر في الجسد، وعدم نمو الأعضاء الجنسية الذكورية، يعني راحل منسون، سوسو يعني.

مين دول بقا؟ ومين جمعهم مع بعض؟ وكانوا بيعملوا إيه؟ وايه سبب وفاتهم المفاجيء؟ وايه جلد الرجل البني الشمواه ده؟ وايه اللي في عنيه؟ وايه تلاوات الكهنة اللي سمعناها بوضوح؟ وايه الدبلة اللي مستحيل تتخلع دي؟ وحديثة كده ازاى كأنها محفورة ليزر؟ إيه الحشرة دية اللي قدرت تطلع بره في جيب شعبان؟ مين كان عنده العلم في الوقت ده انه يجمع الحالات دي مع بعضها مع العلم مش اي قزمة تكون تيرنر، ده في ألف سبب تاني، ولا اي سوسو يكون كلاينفلتر، يعني أي اللي جامعهم هنا عارف كويس اوي هو جامع مين بالظبط، اسئلة اسئلة بدون اجابات، التقرير طلع بس بالوصف ده وتعذر فيه الجزم بسبب واضح للوفاة.

اللي عنده إجابة للأسئلة دي يقول، لأنني لحد النهاردة معرفتهاش، واوعده اللي هيقولي إجابات مقنعة هعزمه على عشا رومانسي على أضواء الشموع على النيل مع شعبان

اركنوا كل ده بقا على جنب، ونكمل..

الساعة عشرة الصبح جت إشارة أكثر غرابة، حمادة سواق اللودر اللي خيط الجثث راجل شاب عنده (38 سنة) وعایش هو مراته (منى) الحامل في الشهر الثامن في شقة صغيرة أوضة وصالة، مراته حملت بعد زواج 9 سنين، كانوا كويسين جدا وزى الفل، ولا يعانون من أي شيء، حمادة رجع بيته الساعة واحدة بلليل بعد يوم عمل شاق، نام هو مراته، أصحابه بيخبطوا عليه الساعة ثمانية ونص الصبح، مفتش، كسروا الباب لقيوا 3 مفاجآت قاسية.

- المفاجأة الأولى: كانت وفاة حمادة دون أي سبب واضح، جثة هامدة.

- المفاجأة الثانية: كانت وفاة منى مراته وفيه نزييف تحتها ممكن يكون إجهاض أو شيء

- المفاجأة الثالثة: الاكثر قسوة إن منى مكانتش حامل، لان إبنها مرمي بالحبل السري بتاعه وسطهم على السرير وميت، وواضح أن تم انتزاعه من الرحم بعنف.

هي قلبت مأساة ليه كده؟ الجثث جت وسط مأساة فعلية من الأهل والأصدقاء.

بدأنا بجثة الطفل اللي جاية في كيس اسود وواضح إنها تعرضت لعملية إجهاض متعمدة، وبعنف شديد أصابها بنزييف حاد وصدمة عصبية أدت لوفاتها.

جثة حمادة كانت شيء أول مرة أشوفه في عمري كله، مفيش سبب واضح للوفاة، لكن شفت فيه اللي عمري ما شفته ولا هشوفه، جروح طلسمية أشبه بالتعاويذ مالية جسمة، كأن حد مسك آلة حادة وساخنة جداً ونقشها على جسمه بكل هدوء، والملابس مفيش فيها أي خدش، منظر غريب ومذهل، خاصة أنه مفيش أي سبب آخر للوفاة، هتنزل صورة منه مفلترة ومعكوسة عشان الطلاسم.

شيء غريب، مذهل، محزن، ومفجع، متضايقوهمش، متحاولوش أبداً تسببوا أي أذى لأي حد منهم ولو من غير قصد، هما حواليكو في كل مكان، حواليك حالا وأنت بتقرأ، هما كثير، كثير جداً، ومتتوعين جداً، وبيتحركو بسرعة جداً، في كل مكان ممكن تلاقيهم، ممكن يكون اللي بيقرأ معاك دلوقت واحد من اللي عملوا كده في حمادة ومنى، أرجوكم، محدش يأذيهم أو يضايقهم، طول ما هما في أمان أنتو في أمان، خدوا بالكم من كل حركة في الضلمة بنتحركوها، ربنا يحفظكم.

∞ ∞ ∞ ∞ ∞ ∞

الحكاية السادسة

وربما يكون الموت، هو النعيم المقيم

الزمان: فبراير 2011

المكان: المحلة الكبرى.

التوقيت: الثالثة عصرًا.

إشارة بوفاة رجل في خمسينات العمر بطعنة سكين في القلب، وتخلص الواقعة في وجود مشاجرة بين شخصين، فتدخل المجنبي عليه في محاولة الفصل بينهما لكنه تلقى طعنة سكين في صدره أودت بحياته على الفور.

توجهت بصحبة المساعد لمشرفة مستشفى المحلة الكبرى، وجدت الجثمان مستلقي على ترابيزة التشريح لكن شغلني عدد الناس المنتظرين في الخارج، وفي حالة بكاء مرير.

رفعت الغطاء عن وجهه، وكأني أرى القمر ليلة التمام، وجه لا تستطيع إبعاد عينيك عنه، تفوح منه رائحة مسك زكية، ملأت القاعة كلها، ولأنك دائما بتكون القائد في مثل هذه الأوضاع فميفعش تهتز أبدأ وترتبك، بدأت أشغل بالي بحاجات تانية زي الأوراق لكن للأسف مش قادر أبعد عيني عن وجهه، افكرت حديث للرسول صلى الله عليه وسلم عن سيدنا طلحة بعد غزوة أحد وهو يقول: (من سره أن ينظر إلى أحد من أهل الجنة فلينظر إلى هذا، وأشار إلى طلحة) والله وكأني أنظر إلى أحد من أهل الجنة في نعيم مقيم، وجه كالبدن، لكن الفرق إنك مش قادر تبعد عينك عنه، مش قادر، ببص حواليا فوجئت بالمساعد كان اسمه حسن وعامل المشرفة في نفس الوضع، باصين ليه، شامين ريحته، وفي حالة سكون رهيب في القاعة، مكانش ينفج الحالة دي تعدي كده

صفحة 99

أبدأ، قلت لعامل المشرفة يدخل ليا حد من أهله، جابلي أخوه، وفضل يحكي عنه، اللي وصل من كلامه وعلق معايا من كوكتيل أعمال الخير شيء واحد بس، إن الرجل ده كان نادر حياته للصلح بين أي اتنين متخاصمين، أو بينهم شجار، أو حتى قضايا، وكان مخصص وقت كل يوم في محاولات الصلح دي، وجميعها كانت بتنتهي بصلح وعمره ما فشل وكان بيعمل ده خالصًا لوجه الله، وفي بعض الأحيان كان بيدفع فلوس بمبالغ كبيرة من معاه عشان بس ينهي مشكلة مادية بين اتنين، جميع الشهود بيقولوا: إنه لما وقع نطق الشهادتين ثلاث مرات وكان مبتسم ويحاول يحضن حد، لدرجة إنه كان مستلقي على ظهره على الأرض وفجأة انتقض جالسا وهو يقول: حبيبي حبيبي أخيرًا، ثم مات.

رجعت تاني للجنة، موضع الإصابة في القلب مباشر يخرج منها دم زكي الرائحة، يبدو من عموم جسده إنه مستعد للشهادة من حلق شعر العانة والإبط، وكانت أصابعه تأخذ علامة التشهد وتتييس ثم تنفك مرة بعد أخرى، ساعتين أشاهد وجهه وأتساءل أي هدوء واطمئنان، لا شيء يرعب هاتيك النوارس البيضاء، عند موتها، لأسباب بينها وبين ربها، وبسرح في هذه الدنيا الحقيرة، وازاي بنشترها على حساب نهاية زي دي، وحياة خالدة زي دي، ولولا ملل الناس بالخارج وسؤالهم المستمر عشان يلحقوا يصلوا عليه المغرب ماكنت مشيت، حضرت غسله وشاركت فيه، وصليت عليه، ومشيت. لأيام كنت بشوف وشه الهاديء الرزين المطمئن في كل مكان، من الحاجات اللي أثرت في حياتي جدًا، ولكن للأسف، يكد لك الشيطان وينسيك، ويشغلك بأشياء أخرى ويخرجك من هالة العبودية اللي كنت دخلت فيها، ويغرقك في الذنوب، لحد ما تلاقي حاجة تانية تصحيك، بعد ما تكون ضيعت فترة طويلة في ذنوب وحياة خادعة ملهاش ثلاثين لازمة.

للمرة لمليون هقولكم، والله العظيم كلنا عايشين بس في اختبار عشان اللحظة دي، عشان اليوم ده، {يَوْمَ تَجِدُ كُلُّ نَفْسٍ مَا عَمِلَتْ مِنْ خَيْرٍ مُّحْضَرًا وَمَا عَمِلَتْ مِنْ سُوءٍ تَوَدُّ لَوْ أَنَّ بَيْنَهَا وَبَيْنَهُ أَمَدًا بَعِيدًا وَيَحْذَرُكُمُ اللَّهُ نَفْسَهُ وَاللَّهُ رَؤُفٌ بِالْعِبَادِ}. [آل عمران: ثلاثون]

كل اللي إحنا عايشينه ده هو لحظة الحقيقة المطلقة، متأمنش أبدًا لنهايتك، ممكن تيجي في لحظة معصية رهيبية، وممكن تيجي في لحظة طاعة، متأمنش.

يفتكر دايمًا اللي ماتت مع راجل في الحمام في حالة زنا بعد تسرب الغاز من السخان والبانيو على أطرافه زجاجات الكحول والحشيش وازاي كان منظرها ورائحتها التي لا تطاق، ووشها المرعب اللي في ملامحه رعب الدنيا كله، وأفكر، هل المتعة اللي كانت فيها كانت تغنيها عن نهاية زي نهاية الراجل ده، طيب بعد النهاية، شعورها إيه دلوقت؟ وه أصبحت مخلدة في حياة أخرى أفضلت ليها بعد ما قدمت، متفتكروش النهاية بعيدة، موت الشباب حاليًا بقى أكثر من موت العجائز، امبارح موت شاب من يومين بس كان منزل حفلة تخرجه في الأكاديمية البحرية، والعمر كله لسه قدامه، منتخدعوش وأقسم أنني أول الراحلين.

الحكاية السابعة

مساء البنفسج على الذين كانوا نزلاء خفيفين على الحياة
كأنهم ضيوف، الذين جاءوا ورحلوا دون أن يزعجوا أحد بأنينهم!
مساء البنفسج على الذين آمنوا أن أجمل الرحلات وأسرعها هو الموت لأنك لن
تحتاج أن تسافر إلى المالديف على صهوة بوينج!!
مساء البنفسج على الذين أغلقت بوجوههم أبواب الحياة لأنهم لم يعرفوا كيف
يفرضون في جمالهم شعراً رخيصاً!
مساء البنفسج على الذين ماتوا في صمت فلم تقرأ روتانا على أرواحهم القرآن!
مساء البنفسج على الذين اختاروا ألا يدعون لأنفسهم بطول العمر خشية ان تنتسخ
قلوبهم.

الزمان: يوليو ألفان وخمسة عشر

المكان: مشرحة زينهم.

التوقيت: الحادية عشرة ليلاً

شعبان أيوه جااااااي. أوامرني يا رياسة.

طيب مبدئياً متحول للتحقيق عشان أيوة جاي بتاعة القهاوي دي متكررش. ثانيا
لبس الشغل مش لابسه ليه؟

- يا معالي الرئيس مش هقول.

- خلصنا الله فين لبس الشغل؟

- الشيخ سعيد غرقهولي مية بالخرطوم اللي بيغسل بيه يا ريس وأنا كنت جاي
أشكيه.

- أنتوا بتلعبوا بقا تحت؟ وغرقهولك ليه؟

- ليه وليه يا ريس إني قلت لمراته إنه باني عمارتين، ومعاها فلوس في البنك أد
دماغه، دماغ الشيخ سعيد يعني يا ريس.

- وهو فعلا معاها كده؟

- الشيخ سعيد؟؟ الشيخ سعيد معاها يشتري مشرحة لوحده ويشرح بنص التمن
ويشغلني عنده عشان يرفدني كل يوم يا ريس.

- وإننت قلت لمراته ليه كده يا شعبان؟

- عشان مش راضي يجيبلي عشا يا ريس، وأنا متغديتش وهمشي كمان ساعتين، و إنت عارف بقا إنها هناك مره كهينة بنت كلب هقولها: العشا هتقولي: منين؟ وازاي؟

- طيب، فيه جنتين جايبين دلوقت من السلام أول، دخلهم، على الترايبيزات وأنا نازل حالا.

وعرفهم تحت إن الكل متحول للتحقيق عشان تبطلوا هزار في الشغل.

- كله يا ريس؟

- كله يا شعبان.

- كله يا وليد.

اطلع بره يلاااا، وسامعه ماشي في الكوريدور بيقلد الأخت الرقيقة وهو بيقول: عاوزة اترقد مش عاوزة أتصور.

شربت قهوة ليست ونزلت.

إشارة بحالة انتحار طالب جامعي في الواحدة والعشرين من العمر، بتقول التحريات: إنه كان يعاني من بعض المشاكل النفسية وتردد مؤخرا على طبيب نفسي في نطاق القاهرة، وإن الحالة دي حصلتله بعد خطبة حبيبته وصديقتة الجامعية وجارته في نفس الوقت لشخص آخر، فقام بربط حبل في السقف ولفه حول عنقه ووقف على كرسي وانتحر شنقا، بالنسبة لأي طبيب شرعي حالة عادية جدا مفيش فيها شغل كتير بالمعني الحرفي، يعني مجرد فحص موضع الإصابة والتأكد من إنها حيوية يعني حصلت والشخص على قيد الحياة، كمان بتأكد إنها سبب الوفاة مع بعض العينات للبحث عن السموم والمخدرات والمهدئات والمنومات وجرعاتها لأن ممكن حد يتخدر الأول بعدين يتعلق، وهكذا.

محمود نايم مكانه بملامح شخص مرعوب فيه رعب الدنيا كله. وتفاصيل للملامح شيطانية يهودية مقرزة، وريحة بشعة استمرت حتى بعد خلع الملابس، ريحة طالعة من قلب الجثة نفسها رغم إنها لسه فريش، ملامح توحى بنهاية صاعقة.

(ريكوردينج)

«الجثة لذكر في بدايات العقد الثالث من العمر متوسط القامة والبنية يرتدي بنطال تريننج أسود اللون، وتي شيرت أبيض اللون، وملابس داخلية بيضاء اللون، والملابس جميعها خالية من القطوع والتمزقات والتلوثات المشتبهة، والرسوب الدموي بلون بنفسجي غامق بالرجلين، والجثة في حالة تيبس رمي والتعفن الرمي لم يتضح ظاهريا بعد، وبفحص العنق تبينا حزا عميقا محيطا بمقدم وجانبي العنق على مستوى الغضاريف الحنجرية، ويرتفع لأعلى في الخلفية، وأثار عقدة الحبل موجودة بمنتصف خلفية العنق من أعلى، والإصابة حيوية حديثة، كما تبينا أعلاها وأسفلها بعض السحجات الظفرية!!! عدا ذلك لم نتبين إصابات أخرى ظاهرة»

يللاا يا زفت، ايوه جا، احم، تمام يا معالي الرئيس.

بدأت أركز في موضوع السحجات الظفرية المحيطة بمكان الشنق دي. (سحجات ظفرية يعني خرابيش اتعملت بواسطة الأظافر) فهل المنتحر فعليا بعد ما اتحرك الكرسي من تحته الحبل مموت هوش على طول وكان بيحاول ينزعه بايده مثلا فخر بش نفسه، ده أقرب تحليل منطقي خاصة إن مفيش أي اصابات ثانية تشير إلى حدوث عنف جنائي أو مقاومة.

لحد كده الكلام عادي وطبيعي جدا.

بإجراء الصفة التشريحية تبينا جميع علامات الأسفكسيا الداخلية، وثبت فعليا أن الوفاة نتيجة أسفكسيا الشنق وما أحدثته من ضغط على المجاري الهوائية العليا للجهاز التنفسي، ومنع دخول الهواء مما أدى إلى توقف المراكز الحيوية بالمخ عن العمل ومن ثم حدوث الوفاة.

العينات اللي أخذناها كلها طلعت سلبية تماما للسموم والمخدرات، وكان بس فيها آثار مهدئ ضعيف كان الدكتور كاتبه للحالة قبل وفاتها، كمان من ضمن محتويات المعدة اللي كان فيها بقايا أكل عبارة عن تمر فقط لقينا شيء غريب جدا وهو عبارة عن ورقة سميقة مكتوب فيها شيء لكنها مبتلة تماما بعصارة المعدة وبقايا الطعام وبالتالي مش قادر أميز الشيء ده، منكرش أبدا إني حسيت برعشة غريبة لما مسكتها، وبرعشة أكبر لما حاولت أقرأها لكن محطيتش في بالي كالعادة. سيبتها تنشف وقلت هبقي اشوفها بعدين حطيتها في ظرف وضممتها للورق بتاعي وخلص، ووجود أشياء غريبة في المعدة هو شيء اعتيادي لأي طبيب شرعي بالمناسبة، فأحيانا تجد أوراق أو أشياء بلاستيكية وأحيانا لفافات مخدرات؛ بل في بعض الأحيان وجدت قفل معدني صغير ومفتاحه داخل معدة إحدى الجثث، خلصت الجثة بسرعة. شعبولا خيطها وبعدين غيرت هدومي وطلعت هخلص شوية حاجات وهبات هنا اليوم ده، مرت كل الأمور طبيعية تماما والجثة استلمها الأهل بتصريح الدفن ومشياوا.

بعدها بيوم جت مذكرة النيابة كسلت أقرأها وقلت هقراها وقت ما أجي أكتب التقرير على اعتبار إن الحالة منتهية تماما، ومرت أول (3 أيام) عادي جدا لحد ما بدأت السيمفونية تشغل.

ورقي بالكامل بيكون عندي في المكتب مع أي احراز مهمة والتلت أيام دول نمت فيهم يومين في المكتب، وكان كل الملاحظة الغربية فيهم هيا الخلل في درجة حرارة جسمي أنا سواء صيف أو شتاء يستحيل أنام غير في التكييف وفي درجة حرارة 20، حتى في أفسى أيام البرد، فكنت أقوم أحيانا، ورغم إني في الوقت ده كنت في عز أيام الحر فكنت أقوم أحيانا وأنا حاسس إني في (سيبيريا) وإن درجة حرارتي بالسالب وأطرافي متجمدة، أقفل التكييف وأنام وبعدها بدقايق أحس إني في (الرياض) مع سخونة رهيبه أشغله وهكذا عدة مرات، كمان كنت أحس إن نص جسمي بردان بشكل رهيب، والنص الثاني حران تماما، المهم، عدت الأيام الثلاثة زي أي أيام رغم غرابتها، لحد ما جه في نفس معاد جثة محمود وهو اسمه

بالمناسبة، جثة ثانية لبنت اسمها نور، وهو مش اسمها بالمناسبة، نور كمان جاية منتحرة ولحد الآن مفيش عندي أي رابط بينها وبين محمود على الإطلاق. الإشارة جت في نفس موعد إشارة محمود تقريبا.

- شعباااان، شعباااان.

- جاي المرة دي بمنتهي الهدوء والرزانة وبصوت منخفض، أيوه يا معالي الرئيس.

- إيه العقل ده، مالك يا شعبولاً؟

- حزين يا معالي الرئيس.

- حزين. جديدة دي، حزنك على نفسك؟

- يا معالي الرئيس يرضي مين العيشة اللي عايشينها دي؟ يرضي مين الوسط اللي احنا عايشين فيه ده؟ يرضي مين إن دي تبقي حياتنا؟ يرضي مين كل الغم ده!!! - رديت بتردد: وأنا تراني تأثرت بس لسه مش مستوعب إن شعبولا اللي بيتكلم، معلش يا شعبان ما هو ده نصيبنا، ومفيش غيرنا هيقدر يتعامل مع الجثث كده، أو يجيب حقوق الناس.

- شعبان بالنظرة إياها، جنت إيه يا معالي الرئيس. جثث إيه، الجثث دول حبابي ولادي، حنة مني كده. أنا بتكلم على الشيخ سعيد وهشام ومحمود، عالم خبوات يا ريس وأنا زهقت ومش لاقى حاجة جديدة أعملها فيهم. بقيت أناملهم في أدراج الجثث لما يبجو يطلعوها، هعملهم إيه ثاني، أنا تعبت. إنما الجثث، دول حنة مني، طب تصدق بالله يا ريس، أنا بلاقي الجثة داخلة من الباب وريحتها بتنهفك كده بحس قلبي هيطي من الفرحة، بيبقى نفسي أخداها في حضني واعيط من كثر ما أنا فرحان بمجبتها.

- طب بقولك إيه: أنا مش فاضي لدرس الصعابيات ده، فيه حالة جت دلوقتي بنت (21 سنة) منتحرة يلا جهازها بسرعة.

- لقيته طلع على المسرح وتقمص شخصية الأستاذ أحمد عبد العزيز في المال والبنون بنسخة طبق الأصل بنفس الحركات وبيقول: لااااااااااا.. جثة لااااااااااا، حنة مني لااااااااااا، حد من ولااااااااااا.

- ولااااااااااا.

- مشربش شاي أشرب أزوزة أنا يا ريس. هو إنت محدش يعرف يهزر معاك أبدا وسامعه كالعادة ماشي في الكوريدور بيقول: ولادي لااااااااااا عباس الضو بيقول: لا سلامة فراويلة بيقول: لااااااااااا.

غيرت هدومي شربت قهوة ونزلت، لقيته ماسك الشيخ سعيد في ركن ومعاه مقص وبيقنعه يخلقه دقنه ويعمله دوجلاس وسوالف، وإن ده هيديه هيبة أكثر، أول ما

شافني قاله: طيب يا شيخ سعيد تكمل كلامنا بعدين بقا عشان أقولك تبقى تقص قماش الكفن ازاي عشان ميهدرش معاك.

عملت نفسي مسمعتش، دخلت القاعة لقيت البنت جميلة جدا بريئة، وسامع دوشة وصراخ بره غير عادي، صعبت عليا البنت تماما إنها تنهي حياتها نهاية مأسوية بالمنظر ده، مش عارف ليه حسيت إنني مش قادر أصبر تيجي المذكرة أعرف السبب، حببت أسمع من حد من أهلها، قلت لشعبان شوقلي أبو البنت دي أو أقرب حد ليها بره مين وهاتهولي على الشباك، فرد ببلاهته المعتادة، نقول: مبروك يا ريس؟ قولتله: أخلص يا شعبان، راح على الشباك جابلي أبوها، خرجت ليه، واضح إنه راجل موظف بسيط الحياة واحدة منه كثير، وعاش في معاناة، لكنه في حالة غضب مكبوت وكلامه بالقطارة. حاولت أسأله كثير كل إجاباته مبتغيرش وبنفس الملامح الصارمة، بنتي وانتحرت، ومعرفش ليه، مفيش أي كلمة بيقولها: غير كدة، واحدة ست باين عليها الألم والوجع تقدمت وعاوزة تتكلم معايا، حاول الأب يرجعها باصرار، واضح إنها أم البنت، لكن أنا أصريت إنها تتكلم، وخليت شعبولا. دخلهالي جوه، وبدأت تحكي، نور من طفولتها بتحب ابن الجيران اللي اسمه محمود، من وهما عيال صغيرة، وكل يوم حبهم بيكبر..

جابوا نفس المجموع في الثانوي. دخلوا نفس الكلية مع بعض، محمود اتقدملها أكثر من مرة. أبوها كان بيرفض، وتحت الضغط الرهيب مننا والجيران كان بيتهرب ويقول: لما يخلصوا كلية، وفوجئنا من شهر، إنه قعدها من الكلية وجابلها عريس غني وعجوز. هي أد بناته، باعها له، وخطبها ليه، من يومها والبنت بنتهار، لا أكل ولا شرب، لا هي ولا محمود - الله يرحمه اللي اتبدل حاله، استني يا حاجة، هو محمود مات؟ ردت مات حبيب أمه بعد ما قفل على نفسه وحاله اتبدل وولع في بيته مرتين، وبعدها شنق نفسه زي بنتي بالطبط، وممرش ثلاث أيام شافت فيهم الويل غير لما شنقت نفسها زيه. سألتها شافت الويل ازاي، قالت: كان بيتهيأها حاجات وتقول: إنها بتشوف حد غريب ومرعب في كل مكان، وفيه مرة ضغط على كتفها وقالت: إنها حست بنار وفعلا لقينا كتفها محروق تماما، وبعد كام ساعة اختفى، وفضلت في رعب لحد ما قالت: هنام وفرحنا لأنها مكانتش نامت من زمان. بعد شوية فتحنا عليها الباب لقيناها مشنوقة ومتعلقة في السقف، هو ممكن محمود يكون عملها حاجة يا بيه؟ ليه بتقولي: كده يا حاجة؟ أصلهم بيقولوا: إن محمود قبل ما يموت بعد ما اتخطبت كان ليه في السكة دي، رديت قولتله: يا حاجة الموت ده بتاع ربنا، حتى لو عملها حاجة، هيا عمرها انتهى كده.

طلعتها، جوزها حاول يعتدي عليها عشان اتكلمت جيبتله الأمن، ودخلت تشتغل وشعبولا بيلبس الجوانتي وهو بيكلم نفسه وبيقول: أما قصة، عبرة صحيح، وقال: إيه يا أخويا؟ الواد ولسه هيكمل زعقت، شعباااان، أخلص.

كل ده مكانش خطر في بالي لحظة واحدة علاقة الجثة دي بالجثة اللي بقالها تلت أيام اطلاقا.

(بدأنا الريكوردينج)

الجثة لأثنى في أوائل العقد الثالث من العمر، متوسطة القامة والبنية، ترتدي بنطال تريننج أزرق اللون وتي شيرت أصفر اللون، وملابس داخلية وحمالة صدر سوداء اللون، والملابس جميعها خالية من القطوع والتمزقات والتلوثات المشتبهة، كما تبينها في حالة تيبس رمي والتعفن الرمي لم يتضح ظاهريا بعض، وقد تبينا الرسوب الدموي بلون بنفسجي غامق بالطرفين السفلين، وبفحص موضع الإصابة تبينا حزا عميقا محيط بالعنق على مستوى النتوء الحنجري، يشمل مقدم وجانبي العنق ويرتفع لأعلى والأجزاء الخلفية ويقبل فيها عمقه، كما تبينا سحجتان ظفريتان صغيرتان محيطتان بالحزء عند النقطة دي بس افكرت محمود. لأن دي مكانتش حاجة واردة اطلاقا، وفتت الريكوردنج، شعبان، الجثة اللي اشتغلناها سوا من تلت أيام دي كانت تبع قسم إيه؟ رد شعبان اللي ذاكترته زي كمبيوتر مايكروسوفت الرئيسي اللي بيدير العالم كله تقريبا وقال: بيانات القضية كلها، ودي مشكلة شعبان الرئيسية، هو عنده ذاكرة خرافية، لكن مستحيل يستغلها في إنه يربط حاجة ببعضها، حتى لو حظيتهاومله قدام بعض وقولتله: تستنتج إيه؟ يقولك: العب باليه، الولد من تلت أيام كان فعلا اسمه محمود، القضية تابعة لنفس المنطقة، ونفس العنوان، أصبح بما لا يدعوا مجال للشك إنهم المقصودين خلصت الجثة، سبب الوفاة واحد، اسفكسيا الشنق، المعدة المرة دي فارغة تماما من الأكل، مفيش فيها غير عصارة معدة وحاجة دائرية صغيرة بقطر 2 سم من نسيج غير معروف يحتوي على خيوط وأشياء غير واضحة وله رائحة كريهة، عينات السموم والمخدرات والمهدئات والمنومات كلها سلبية، خلصت الجثة وخطها شعبان وأنا مستعجل جدا فيه حاجات لازم أعرفها، أخذت الحاجة اللي كانت في المعدة دي في كيس، وطلعت بسرعة على المكتب وشعبان جاي ورايا جايب أكل في ايده بيتحايل عليا أكل معاه، وبيقنعني إن اللي عاملاه آه كهينة بنت كلب لكن نفسها في الأكل حلو.

كنا في عز الصيف، وأنا أه طول الوقت سايب التكيف شغال حتى لو مش في المكتبه ولكن درجة الحرارة بمجرد ما فتحت الباب، أنا متعرضتش ليها في حياتي رغم سفري الكثير جدا، يمكن للأسف لأنني مزورتنش المنطقة القطبية الشمالية، برد غير طبيعي يجمد كل حاجة فيك. شعبان أول ما دخل عمل أصوات غريبة ببؤه ومناخيره وهو في حالة لا وعي وطلع جري واقف بره.

أنا مكونتش فاهم، أخذت ملف القضية وحاجتها وأنا بتنفض من البرد وطلعت بره. دخلنا مكتب نسخ القضايا، وشعبان لسه يبحرك شفافية زي إسماعيل يس لما كان بيتخض، فتحت مذكرة النيابة، قلبت بسرعة الكلام وأنا بدور على التحريات لحد ما لقيت اللي بدور عليه، محمود لقيوا في غرفته 6 كتب متعلقة بالسحر والجن والأعمال السفلية وأنواع كثير من البخور وأشياء مشابهة، فتحت الظرف، طلعت الورقة اللي كانت نشفت ولزقت في جوانب الظرف، فصلتها بصعوبة وبصيت فيها، نفس رعشة أول مرة. الورقة مليانة رموز وأرقام ورسومات هندسية وفيه في نصها جملة هشيل منها كام كلمة لتكون تعويذة أو طلسم أو شيء مكتوب فيها:

” قسما بطارش الـ *** الـ *** الـ *** لتأتين إلى يا نور، وعلى طارش الانتقام ممن تسبب “.

رعشة غريبة وأنا بقرأ، لكن من حكم خبرتي أيقنت إنها عمل سحري سفلي، كنت بقرأ بصوت وشعبان واقف يقتعني بلذة طعم الأكل، دونت بياناتها، وشعبان ببسال ببلاهة هو مين الأطرش اللي بيحلفوا بيه ده يا ريس؟ قولتله: فريد الأطرش وانزل يلا يا شعبان دلوقتي، مش هاكل.

مشي يقلد فريد الأطرش وهو بيغني في الكوريدور ” يابو ضحكة جناان، مليانة جناان “.

احتفظت بيهم تاني وأنا مش قادر أفهم ولا أستوعب، ومش عاوز احظهم في المكتب، نزلت حظيتهم في شنطة العربية على مبيجي أمين المخزن الصبح وطلعت، الأوضة أصبحت عادية جداً، لكن عقلي مبقاش مبطل تفكير في القصة العجيبة دي.

الموضوع فضل شاغلني كام يوم وفي نفس الوقت الحاجات دي فضلت في العربية، لحسن الحظ إني فضلت فيهم بايت في المشرحة ومركبتش العربية لأن أحد الشيوخ الثقاق وأنا بحكيه قالي: إنه كان في منتهى الخطر إني أسوق العربية وهما فيها.

بعدها بيومين ثلاثة كلمت رئيس المباحث وهو صديق شخصي من المستوى الأول، سألته مكانش عنده أي شيء غير ملفت غير حاجة واحدة بس. إن من كام ساعة قبل المكالمة أبو نور مات نتيجة سقوط بلكونة منزل آيل للسقوط على رأسه وهو ماشي في الشارع، قفلت.

افتكرت الورقة وجملتها، الورقة دي لعنة، لازم التخلص منها، نزلت، جبت الحاجات من العربية، وقفت في شباك فاتح على المنور، حرقت الورقة، طلع منها دخان أسود كثيف رائحته مقبئة، مع رعشة في جسمي قوية وأنا بردد آية الكرسي، وحرقت أجزاء من الجسم الغريب في معدة نور والباقي المعمل مقدرش يحدد إيه ده، وكنت بسأل من بعيد لبعيد، لكن اطمأنت إن الدنيا استقرت.

السحر موجود، والأعمال موجودة وكتب السحر منتشرة، وناس كتير عندها، وناس كتير بتجرب بداعي الفضول، وأي حد ممكن يعمل حاجة زي دي ليك ويدمرلك حياتك في لحظة. اوعى تجرب أبدا الاتجاه ده. اوعى تدخل فيه باي شكل من الأشكال، مفيش حاجة اسمها سحر خير وسحر شر، كل الاتجاه ده كفر بين واضح، شرك بالله ونار خالدا كمان مفيش حاجة اسمها جن طيب وذن شيرير. الاستعانة بالجن كفر بين، ونار خالدة، اعرفوا معلومات عنهم آه، اعرفوا عن الدجالين والسحرة والكفرة عشان تكتشفوهم بسهولة. ولحظة ما تشكوا بس في حد ابعدوا عنه فوراً، اقطعوا أي صلة بيه أيا كانت. لكن أبدا أوعوا تجربوا أو تدخلوا بأي شكل في الاتجاه ده، لأنه خسارة دنيا وآخرة، وفي نهاية محمود ومظهره على ترابيزة التشريح والله كل العبرة والعظة.

بالمناسبة، محمود ونور وأبوها اندفنوا في تربتين متلاصقتين تماما.

∞ ∞ ∞ ∞ ∞

الحكاية الثامنة

مساء البنفسج على الموتى في جميع أنحاء بلادي.

مساؤها تلك الجميلة متوهجة بشعرها الأصفر تهبني القبلة الأولى وتسالني: متى يأتي الشقي للجنة؟

مساء القهوة المرة رفقتها، ما أحلاها.

مساء العيد كان دائماً مستولاً على بابها يسألها، كعكة.

مساء النمل كان في طريقها يناديها يا سكر.

ومساء البنفسج على جميع الراقيدين في سلام، تحت التراب أو داخل ثلاجات مشرحة زينهم

الزمان: أغسطس 2011

المكان: طنطا

التوقيت: اليوم السابق لمباشرة القضيتين.

طلب من نيابة مركز طنطا عن ما إذا كان فيه جدوى استخراج لجثمان المتوفين لإثبات أنهما لقيتا حتقهما أثناء الثورة من عدمه، وكانت الإجابة بوجود جدوى الاستخراج واستعدادنا لتنفيذ المهمة صباح باكر.

أيام ثورة يناير لم يكن هناك إطلاقاً أي شرطة أو قضاء بسبب الانهيار الأمني، وكان اللي بيموت وقتها أهله بيدفنوه على طول. بعد فترة جت حكومة الجنزوري والمجلس العسكري وقرروا إن فيه تعويض ومعاش دائم لأهل شهداء الثورة، فبدأوا الناس يطالبوا بإثبات حق أبناءهم وبالتالي كان لابد من استخراج الجثامين رغم مرور (7 شهور) على الوفاة لإثبات سبب الوفاة، خاصة إن جميع شهداء الثورة كانوا بطلقات نارية وبالتالي فأنا يا إما هبحث عن المقذوف الناري نفسه، يا إما هبحث عن آثار دخوله وخروجه من الجسم زي كسور العضم مثلاً أو ما شابه.

المهم.

- الجثة الأولى: لمحمد، وده طالب في الفرقة الثانية لكلية هندسة عنده (19 سنة) تعرض لإصابة نارية مباشرة في يمين الصدر يوم 28 يناير وتم نقله مباشرة إلى مستشفى الجامعة بطنطا، تواجد في المستشفى لمدة يومين حيث تم تركيب درنقتين خارجيتين بيمين الصدر لسحب النزيف من الرئة لكنه مات بعد يومين، ولم تفلح كل محاولات إنعاشه وخرج من المستشفى جثة عامدة بعد ما أنهى أهله التوقيع على الأوراق واستلموه من الثلجة المستشفى بعد (5 ساعات) من وفاته فعلاً قضاهم في المستشفى.

- الجثة الثانية: لعادل وده راجل عنده (41 سنة) عنده كشك صغير وتلقى إصابة نارية مباشرة في الرأس أثناء مشاركته في إحدى المظاهرات يوم (29 يناير) وتوفي في مكان الواقعة وتم نقله لمشرحة مستشفى الجامعة وأهله استلموه بعد يومين لأنهم مكانوش يعرفوا بوفاته.

ويوم الاستخراج ده بالنسبة لينا يبقى مش أحسن حاجة، بسبب الشمس والتراب والرائحة التي لا يمكن لبشر تحملها غير إنه مكلف مالياً جداً، لأنك محتاج بعده تقريباً إزاتين بيرفيوم (mont blank) تاخذ بيهم شاور عشان تتخلص من الرائحة اللي ماليه مناخيرك، رجعت الأوتيل اليوم ده. كنت مقيم في أوتيل بانوراما في طنطا، خلصت شويه حاجات ونمت على استعداد للاستخراج اليوم التالي، أثناء نومي ودي من نوار المرات اللي حلمت فيها أساساً شفت حلم غريب جداً هقوله: بعدين، لكني لم أعيره أي اهتمام..

في الصباح لبست وكلمت المساعد بتاعي (شبل) وده مشهور بإنه يفضل يكلم الجثث طول فترة التشريح، فمثلاً لو هيحرك إيد الجثة يقولها: لا مؤاخذه، أول بييجي يفتح

البطن والصدر مثلاً يوطي على وذن الجثة ويقولها: حاجة في وذنها، ومرة بعد مرة عرفت أنه ببسال الجثة يقولها: أشق؟! غير كذا واحنا في الطريق لأي مكان بيسمعني باقة من أجمل أغاني الأفراح من نوعية على العجلة، وشيكها، والفستان اللبني، ويا منجد على المرتبة عروستنا حلوة مؤدبة، واعمل حساب الشقلبة، ولما بيكون رايق بيغنيلي أغاني العروسة لعريسها، وهلبسله الكاكي وأوريله وراكي، ويتكل على الله هما كلهم غالباً بيضيعوا من الشغلانة دي والله، كما كلمت السائق ونسقت مع الشرطة والنيابة واتحركنا لمقابر طنطا.

رايحين في الطريق في عربيتي بمنتهى الروقان، وكاظم يشدوا من رائحته التحديات "أتداهم جميعاً، أن يخطوا لك مكتوب هوى، كمكاتيب غرامي، أو يجيئوك على كترتهم، بحروف كحرفي، وكلام ككلامي".

وإذا بشبل ممتعض قبوطي الصوت ويشدوا من رائحته "سيد يا سيد".

المقبرتين جنب بعض تقريباً يفصل بينهما حوالي (35 متر) بدأنا بمقبرة محمد، وقفنا على الباب أنا وعضو النيابة والتربي وشبل، في حين أن رئيس المباحث بيعمل كردون أمني حوالين المقبرة عشان يبعد أي حد من الأهل أو المتطفلين ومحدث يشوف عملية التشريح.

في حالة زي دي بقالها سبع شهور الجثمان هيخرج هيكل عظمي تحيط به بعض الأربطة أما باقي الجثة هتكون اتحللت تماماً، وفتت أراجع بعض الأوراق الطبية الصادرة عن مستشفى الجامعة لحين استعداد شبل والتربي، عضو النيابة بياخذ أقوال التربي عن معاد الدفن لو فاكر وفيه كام جثة جوه وما شابه، التربي أكد إن دي الجثة الوحيدة في القبر وأكد معاد الدفن في الدفتر بتاعه وقدم صورة من تصريح الدفن اللي بياخذه أثناء الدفن. أوك، المقبرة عليها لوحة رخامية مكتوب عليها اسم المتوفي، وهي على النظام المصري، الدفن فوق سطح الأرض، وأليها باب حديد

مغلق بقفل معدني ومحاط أطرافه بالأسمنت من بعيد واقف والد المتوفي في حالة شبه انهيار ومحاط بإخوته بيهوده ويبدو من طريقتهم معاهم وعتابه إنه كان رافض التشريح وإنهم أجبروه بشكل أو باخر، أصريت على إبعادهم شوية كمان مراعاة لشعوره، لبست جوانتي وبدأنا.

كالعادة التربّي بيفتح الباب وبدخل أنا أولاً أتأكد من صحة أقواله إن مفيش غير جثمان واحد، ومدة وفاته تنطبق مع المدة المذكورة من حيث التحلل، التربّي كسر الإسمنت وفتح القفل والباب. أنا شميت رائحة كأن فيه عطور ياسمين مدلوقة جوه لدرجة إن التربّي قال: "الله أكبر" بصوت عالي فنهره عضو النيابة بشدة، دخلت وأنا سعيد جداً مشغل كشاف الموبايل، {فروح وريحان وجنت نعيم} [الواقعة: 85]. رائحة الكفن نسخة طبق الأصل من رائحة العطر المستخدم في الحرم، الكفن ليس عليه ذرة تراب واحدة، رغم الأرض الترابية كل ده مش مهم، الأهم أن الكفن محتفظ بوضعيته وواضح بشكل مؤكد أن الجثمان داخله مش هيكل عظمي على الإطلاق، قربت فيه دماء طازجة على الكفن جهة الصدر، أصبح عندي يقين إن مش ده الجثمان المطلوب، وإنه مدفون من ساعات بصيت للوجه، شاب ملائكي نايم في هدوء بابتسامة خفيفة ورضا وقناعة، أخذت صورة، قبلت جبينه كنوع من التبرك وخرجت رائحة تملوني ما بين المسك والعود والياسمين وقفت قلت لعضو النيابة والمباحث مش دي الجثة، ده لسه مدفون، التربّي خاف وأقسم أيمان مغلظة إن هو ده وإن التربة منقحتش من وقتها، ودلل على كلامه بالأسمنت القديم جداً والتراب اللي على الباب من الخارج وكلامه منطقي جداً، ارتبكت أنا، أخذت عضو النيابة على جنب وكان صديق شخصي، قولتله: الجثة زي ما هي متحللتش، انصعق، قالي: طيب ما تتأكد من الإصابات اللي فيه. قلت أوك، دخلت أنا وشبل فتحت الكفن شفت الصدر اللي عليه دم لسه طازج ودافئ تماماً، لقيت موضع دخول المقذوف الناري ومكان الدرنتين تماماً في نفس الموضع اللي وصفته الأوراق الطبية بالضبط، ضغط على الصدر ببطء ازداد النزيف، لا إله إلا الله، بصيت على وشه الهادئ تاني واللي حسيته ابتدا يتضايق، أغلقت الكفن كما كان، وخرجت متأكد أن مش هو ده الجثمان، بصيت لوكيل النيابة وأنا بشاورله إن مش هو، جالي، وبدأ ينهز، قالي: الإصابات مش موجودة؟ قولتله: موجودة لكن حديثة جداً، من كام ساعة، وقف في حالة ذهول بعدها جاتني فكرة، ناديت الأب بعيد، جه هو وأخوه والراجل شبه منهار تماماً، طلبت إنه يكون لوحده، أخوه مشي في امتعاص، سألت الراجل بهدوء معك صورة لأبنك، قال: في انهيار اه، كان حاططها خلفية موبايله، بصينتها، اممم، هو الملاك اللي نايم جوه، حسيت إني في مشاعر مختلطة، ما بين السعادة والارتباك والقدسية والخوف من ربنا والرجاء فيه، احساس عجيب، كان نفسي أقول: للأب أبنك في الجنة لكن مينفعش، طلبت يرجع مكانه، ورجعت قولت: لوكيل النيابة هو الولد، قالي: وهو ابتدا يعرق ويهتز. هنعمل إيه؟ قولتله: مش عارف!! فضلت واقف أنا وهو، الناس بدأت تستغرب، قولتله: هتصرف، دخلت القبر تاني أنا وشبل، قعدت جوه ربع ساعة وبعدين خرجت، هحنقظ لنفسي بما حدث جوه، المهم إني خرجت كتبت إنه تم تشريح الجثمان بمعرفتي. قفلنا المقبرة. التربّي قفل بالأسمنت والقفل، قعدنا أنا وعضو النيابة في عربية وأخذنا الأب معنا بداعي إنهاء الإجراءات،

قولته: اللي حصل وإن ابنه في الجنة بإذن الله شهيد، وعضو النيابة طلب منه يقسم على مصحف إن المقبرة دي مش هتفتح ثاني أبدا لأي سبب أيا كان. أقسم وهو في حالة سعادة غامرة كأنه رجع عشرين سنة لورا. كأنه بيحتفل بميلاد ابنه مش بموته، وأقسم على حفظ السر،

ولما سألته عن أكثر حاجة محمد ابنه كان بيعملها في حياته، رد بكلمتين من يوميها وهما محور حياتي، قالي: كانت كل نيته لله، وكان بيتصدق حتى لو مش معاه جنيه. ونزلنا نشوف الجثة الثانية، مكوناتش أعرف إن حاجات زي دي ممكن تتجمع في يوم واحد وعلى مسافة كام متر من بعض

اتحركنا مع التربى لمقبرة عادل وواضح إن التربى بعد الصدمة الأولى مكانش قادر يتحرك أساسا، كان واضح تماما إنه مشافش حاجة شبيهة قبل كده، فكان شارد الذهن تماما، وصلنا لمقبرة عادل، اللي اسمه مكتوب عليها بدهان أبيض. واضح إن التربى منهار، عرفت منه إنه برضه مفيش غير جثمان واحد جوه، وبعدها استبعدته لانهياره، واتعمل الكردون الأمني، خلّيت شيل اللي مفيش على ملامحه أدنى اندهاش يكسر الأسمنت اللي پاين تماما إنه قديم ودايب. فتحنا الباب وفاجئتنا رائحة لا يمكن لبشر تحملها خارجة

من جوه كأنها إعصار. أنا اللي متعود على أسوأ روائح التعفن دون كمامة حتى كنت متضايق جدا جدا، وشبل ولا أي اندهاش، الناس والنيابة والمباحث بدأت تبعد لدرجة إن أقرب واحد ليا كان تقريبا على بعد (500) متر وحاطط عشر مناديل كلينيكس على مناخيره، وميصحش كطبيب شرعي تلبس كمامة، وإلا تبقى فرفور وميشو. كملت فتح الباب وبصيت جوه ضلمة كحل. نورت كشاف الموبائل، وشفنت ما لا يمكن لبشر تحمله، تعبان رمادي غامق طوله حوالي مترين واقف بعد الباب مباشرة ليه فحيح وحركة مقززة، وتعبان أسود غريب طوله مترين تقريبا موجود حوالي الكفن وعليه بشكل مقزز، فئران ميتة ومتعفنة، حشرات كثيرة جدا أشبه بالخناس لكن أكبر قليلا تتحرك في كل مكان، وقطة سوداء هي أقبح ما شاهدت في حياتي على الإطلاق. ميتة

ومنقخة وعنيها مبرقة جدا، أشبه بجابر كده والعياذ بالله، منظر لا يمكن لمخلوق تحمله، مستحيل، رائحة مستحيلة، الغريب تأكدت بنور الكشاف من منافذ القبر، مفيش أي فتحة، غير ثقب صغير في الأرض جنب الجدار الخلفي، يسمح بدخول تعبان اه، لكن يستحيل يدخل قطة مستحيل، المنظر بشع والتعبان واقف، حدفت عليه حاجة انسحب فعلا للخلف ونزل في الفتحة دي. التعبان الآخر بيتحرك ببطء مقزز على الكفن المتسخ بشدة. وكأنه لزج وبيسيب مكان حركته مادة سوداء لزجة بشعة، حدفت عليه حاجات مفيش أي فايده. عندنا قطعة معدنية طويلة ورفيعة في الأدوات بنستخدمها

في تحديد مسار الطلقات النارية داخل الجسم، حاولت أحركه بيها. مفيش فايده لزج وبيتحرك ببطء، والريحة لا تطاق، شبل جاب جذع شجرة وبعد استماتة قدرنا نحركه لركن القبر وبدأ يلتف حوالي القطة السوداء المقززة في منظر يثير الغثيان، مقدرناش ندخل من الريحة والمنظر البشع للحيوانات الميتة اللي جوه، سحبنا الجثمان من نهاية الكفن، طلعهنا بره، الكفن بشع، قذارة غير متناهية، ديدان

وحشرات تملأ كل مللي فيه. هنزلكو صورة ليه، فتحنا الكفن، الرائحة تضاعفت، وواضح إن الرائحة كان مصدرها الجثمان نفسه مش الحيوانات الميتة، الجثمان عبارة عن هيكل عظمي، لم أر في حياتي عظام زرقاء، زرقاء غامقة تثير داخلك كل أنواع الغثيان، الجمجمة متحطمة من آثار الطلق الناري. ومليئة بفضلات غريبة لحيوانات وجلد تعايين جاف، مكونتش قادر أكمل.

اكتفيت بمكان الإصابة بس، وكل همي احنا هندخل القرف ده تاني ازاي. قلت لشبل اقل الكفن ده، قفله وأول مرة أشوف شبل مشمئز ومدمع في حياته، وآخر مرة، بصيت جوه على المكان اللي هدخله فيه، لقيت الثعبان الأسود والقطة السوداء المتعفنة أصبحوا مكان ما كان الجثمان موجود. وكان الثعبان سحب جسم القطة لهناء، وأسفلهم كم ديدان غير طبيعي، مش بس تشوفها لا بتسمع صوتها، صوت حركتها وأزيزها المستمر، ربطنا أخر الكفن من عند الراس في جذع الشجرة، وبدأنا ندفعه بيه للدخل، نص ساعة على ما قدرنا ندخله، وبمجرد دخوله خرج الثعبان الآخر وبدأ يطلع عليه. وحيوانات وأنصاف حيوانات متعفنة تملأ القبر، وعيون حيوانات بس بدون أجسادها، وفي وسط ده كله، لقيت نصف حيوان ميت متعفن يبدو أنه لفار بيتحرك بجانبه لحد ما استقر جنب الكفن بالظبط!! فضلت واقف خمس ثواني في حالة ذهول أشاهد المنظر البشع، وخيالات باستمرار تتحرك على الجدران الداخلية رغم تثبيت إضاءة الموبايل، يا ربيسي، إيه ده!! إيه ده!! حالة من الرعب والاشمئزاز والغثيان أي حد ممكن يحس بيها لمجرد رؤية المنظر، ما بالك بروح عايشة جواه، وكل الحاجات دي جت منين؟؟ وإيه كم الديدان والحشرات دي؟ قفلت الباب وأنا في حالة لا يمكن وصفها على الإطلاق، خليت التربتي جه من بعيد جاب اسمنت وحطه وكان كل شوية يتقيا، أنا وشبل منطقاش ولا كلمة بعدها، كتبت في ورقة تم تشريح الجثمان بمعرفتي وحطيت توقيعي، اديتها للتربي يديها لعضو النيابة، مكونتش طابق أتكلم مع حد، خليت شبل جمع أدواته ورمى أي أداة استخدمناها في الحالة دي، اتحركنا، ركبنا عربيتنا ومشينا. صمت مطبق مني أنا وشبل، كانت أول مرة أخاف، مش أخاف من اللي شوفته، أخاف من ربنا، وأحس إن نهايتي هتبقى يا إما محمد يا إما عادل، والفرق صعب، صعب بجد، السواق بيحاول يفتح أي كلام، لا أنا ولا شبل بنرد عليه. افنكرت اللحم اللي حلمته، وكان فيه قطة سوداء مقرزة تحت شجرة بتصرخ صراخ القطط في رعب وكانها ذئب يعوي، وعلى الشجرة طائر أبيض سبحان الخلاق البديع كأجمل ما يكون هو والشجرة، كان حلم غريب مفهمتهوش وقتها رغم إنني بطبيعتي عدد أحلامي في حياتي لا يتجاوز أصابع اليدين. عملت كام اتصال، بكلمات مقتضبة، عرفت إن عادل كان عامل بمسجد ومفصول من عمله بسبب سجنه خمس سنين في قضية هنك عرض طفلين، داخل حمامات المسجد. استمرينا في الصمت المطبق، لحد ما ارتفع صوت شبل المبهج قائلاً: أول ما دخل، دخل على الأوضة، لبسها الموضة، واتكل على الله تاني ما دخل، دخل على السرير، لبسها الحرير، فأرد أنا والسواق في خشوع، واتكل على الله، اختاروا بين محمد وبين عادل. قراركم لسه بين إيديكم، بعدين مش هيبقي ليكم قرار. وبيوتكم اللي بنتبونها في حياتكم مش هي البيوت اللي عايشين فيها، بيوتكم الحقيقية هي قبوركم، فابنوها كما تريدون أن تكون.

∞ ∞ ∞ ∞ ∞

الحكاية التاسعة

أنا كل هذا يا أنت، نعم، يلزمك عمرا فوق عمرك لتدركين الفارق الشاسع بين أشخاص تصنع الحياة بكل طقوسها، ألوانها أفراسها، وأتراسها شخصياتهم، ورجل يصنع الموت منفردا شخصيته، الموت فنان مبتكر أسطوري، للموت خطة ينثرها في النفس لن يُعرف يوما سر طبختها. طبق شهى من البوح، من الحزن، الغموض، الإرباك، الثقة، الوسامة، الكبرياء، والرقى. طبق لا يخلو من بعض التوابل التواضع الحلو. والغرور الر، وأوجاع استثنائية رسمت عينان طاعنتان في الإغراء لرجل عشقته النساء لفرط ازدرائه للحياة حياة!

كيف أسميناها حياة؟! تلك التي في كل قبر لها جريمة وفي كل فرح فيها فجيعة؟ حياة؟!!!

أي حياة تلك التي كنا نحلم أن نموت من أجلها، وإذا بنا نموت على يديها، أحياة هي؟ تلك التي كلما أقبلنا عليها وانحنينا لنبوس ترابها، باغتتنا بسكين وذبحتنا كالنجاج تحت أقدامها؟

وها نحن جثة بعد أخرى نفرش أرضها بسجاد من أغبياء، كانت لهم قامة أحلامنا، وعنفوان غرورنا.

ربا من أجل هذا أنا هنا، ومن أجل هذا أحبكم.

أعدكم سأذكر الجميع عند موتي، فنحن عند الموت لا نتذكر إلا الوجوه السمحة التي منحت لنا القلب والجسد والروح بسخاء وغمضت الطرف عن الحماقات الصغيرة التي لا تغير كثيرا في نظام الأشياء، فالجمال عليكم، وروعة العشق، وحكايته.

أما أنتِ فالسلام عليكِ في أزلية عشقك الذي لا ينتهي، السلام عليكِ يوم ولدتي، ويوم مُتّي، ويوم تُبعثين حية، نامي في حفظ الله أيتها الجميلة، فالحب بعدك مستحيل والأنوثة مستحيلة.

∞ ∞ ∞ ∞ ∞

الزمان: نوفمبر 2014

المكان: مشرحة زينهم.

إشارة بموت دجال النقاب، إيه قصة دجال النقاب.

ده كان دجال بيقوم بعمل سحر على هيئة أعمال وإلقاءها في المقابر، أو دفنها داخلها.

ومعظم الأعمال كانت تخص العلاقات الجسدية لإفصال العلاقة بين الأزواج، أو جذب أنثى لرجل، بل وصل بيه الفجر إنه كان مجند واحدة ست مغسلة موتى وكانت

تضع له الأعمال في فم الموتى والعياذ بالله، ومن المعروف في حالة السحر الأسود القدر إن هذه الطريقة تزيد تماما من قوة العمل وضرره كما أنه لا يمكن فك السحر أبداً، وكانت نساء قد اشتكته من قبل بأنه مارس الجنس معهن بعد أن لجأن إليه وسيطر عليهن بقوى خفية، ولم يروا وجهه لأنه ظل مرتديا النقاب، وأفلت ن الاتهام لعدم وجود أدلة، مات من ساعات أثناء ممارسة الدجل والسحر بعد طعنة في الصدر من أحد الأزواج.

قاعد في المكتب لقيت شعبان معدّي في الكوريدور شايل عينات دم.

- شعباان.

- أيوه يا معالي الرئيس

- جاي جثة دلوقتي بس مبتظهرش على رجالة.

- طب وهما فين الرجالة يا ريس؟

- لأ مانا عرف، أنا بتكلم يعني إني مش هقدر أكون معاك في الحالة دي.

- دي ليها الشرف والله يا ريس إنك تشوفها، إنما تعتبرني زي اختها، أنا جوز النسوان اللي معايا جابوا أجلي من خناقاتهم مع بعض، أصلهم في بيت واحد كل واحدة في أوضة، أراضي دي وأجيب آخري الثانية تعمل فضيحة فأقول: للأولى إني رياح أستحمي، وأروح أراضي الثانية وأنا بموت الأولى تعرف تيجي على البابا تعملي فضيحة، فلأزم أروح أراضيا الثانية تيجي وهكذا لحد ما بقيت ببات هنا في المشرحة، وآخر ما زهقت قولتلهم: أنا كشفت وجالي عجز جنسي يا ولاد ميتين الكلب. ومن يوميا بقوا حبايب ومعادوش بيتخانقوا أبداً وبقوس منو على عسل، ومن يوميا وهما بيكلموني في البيت كأني اختهم، لما أرجع البيت مثلاً يقولولي: انتي جيتي يا بيضة، طب تصدق بالله، أول امبارح معدتي وجعنتي وترجيع كده لحد ما دخت كنت خايف اطلع حامل، فالجثة دي تعتبرني أختها.

- رنا ينتعك بالسلامة، بس بعد اللي إنت قلته ده كله اللي جاي راجل مش ست.

- راجل!!!! أمال مبيظهرش على رجالة ليه بروح أمه، سوسو ولا إيه؟

- ده دجال بس على طول لابس نقاب مبيقلعهوش ومحدث يعرف وشه شكله إيه خالص.

- قالي: عافه ابن الكلب، سمعت عنه، مش ده اللي من ***.

- أهأ، داننا عارفه بقا وشكلك ضايق منه، إنت متأكد إن اللي إنت قلت لمراتك كان مجرد كلام مش حقيقة.

- لا والله ده كلام بس.

- نفوق بس ونبقى نكشف ونشوف، عموماً اجهز يلا عشان جاية دلوقت وهنشتغلها على طول، إنت عارف ضيف زي ده لازم نكرمه، خده من الباب للترابيزة على

طول

- أوامر يا معالي الرئيس.

بعدين شي في الكوري دور وسامعه بيكلم نفسه وبيقول: قال حقيقي قال، وجه معلي صوته على الآخر عشان يسمعي وهو بيقول: أوديكي فين يا صحة.

يا دوب الماكينة عملت القهوة لقيته جاي بيقول: الأخ المنقب جه وع التراييزة، ليست ونزلت.

(ريكروينج)

” الجثة لذكر يرتدي جلباباً بني اللون، أسفله ملابس داخلية بيضاء اللون متسخة، وعلى رأسه شال أسود ملثف على هيئة نقاب يخفي جميع ملامح وجهه وعنقه عدي العينين ويرفع النقاب تبيناً، إيه الأرف ده. بقع صديدية متعفنة دائرية الشكل منتشرة بالوجه والعنق يغلب عليها اللون الأبيض ومخاطة بأثار تعفن في الجلد، يبدو أنه مرض جلدي أصابه منذ سنين حتى وصل لهذه المرحلة. كما توجد لحية قصيرة وبها أيضا ذات البقع الصديدية المتعفنة. وبفتح الفم تبيناه من الداخل ملئ بهذه البقع باللثة والحلق.

إيه الأرف ده، الرجل تعفت وهو على قيد الحياة، الجثة الوحيدة اللي ثبتة علميا وقريت عنها بالمنظر ده كانت جثة الكلب شارون رئيس وزراء إسرائيل السابق منفذ مذبحه (صبرا وشاتيلا) ياااا ربي، منظر مقزز لا يمكن لأحد أبا أن يطيل النظر إله، عشان كده كان طول عمره مخبي وشه.

كل ده رغم ندرته الشديدة قد يقع في نطاق المقبور، شعبان شال ملابسه برائحتها القذرة، لدرجة إن شعبان اللي كان متحمس لتسريحه بقي أرفان منه وعاوز نخلص، شفت مكان الطعنة كويس بيمين الصدر، واضح إنها طعنة مباشرة وبمطواة مش سكينه، فحصت العظام من الخارج بإيدي كلها سليمة مفيش فيها أي كسور، رحت أفحص الجمجمة، ولما قربت منه سمعت أنين واضح جداً كأن حدا بيتعذب! فضلت مركز، خلّيت شعبان سمعه، صوت أنين واضح جداً لكن بيطلع من الداخل. من جوه الرأس مش من الفم. كأن الخلايا نفسها اللي بتستغيث، بعد ما مسكت الرأس بقيت أرفان من الجوانتي، قلت لشعبان يجييلي جوانتي جلد مش الجوانتي الطبي العادي، خرج يجيبه، من أرفي من الرجل وريحته قلعت الجوانتي وخرجت وراه، جاب الجوانتي لبسته، وراجعين الأوضة، سمعنا خبطة رهيبه، تراييزة التشريح معدنية، استانلس ستيل، والخبطة كأن حاجة حديد ضخمة وقعت عليها، رحنا بسرعة وكل وكل توقعاتنا إن الجثة وقعت أو التراييزة اتكسرت، دخلنا ملقينا شئ أي شيء إطلاقاً، بصينا في القاعة الثانية مفيش، مفيش أي حاجة، استغربنا جداً حتى الشيخ سعيد يسأل إيه اللي وقع، ملقيش حاجة ومشي.

بدأنا تاني. حسيت شكل الإيد اليمين مش مريحني. بصيت عليها تاني لقيتها مكسورة. إزاي وأنا لسه شايفها حالا مش مكسورة ومسجل ده!! الإيد الشمال كمان مكسورة. الرجلين مكسورة من عند الساق. ضلعين مكسورين. أثناء التشريح جميع الكسور

غير حيوية. يعني حصلت كلها بعد الوفاة. يعني حصلت مو دقائق. إزاي ده حصل
رايه أصلا اللي حصل معرفش. القلب الطبيعي والمخ الطبيعي بيمرن لونه وردي
قالب على أحمر. فعلا أنا ما شفت في حياتي قلب بشري ومخ بشري بهذا اللون
الأسود. وليهم صورة بالمناسبة. الشيخ سعيد اللي ميعرفش أي حاجة بيقسم إن الأخ
أخذ مية في الغسل أد عشر جنث ولا زالت المية متيهة رغم إن جسمه نضف
غاضطر يكفنه ويسلمه لابن عمه وهو الوحيد اللي جه يستلمه. سواق عربية نقل
الموتى جاي بيرجع من الرائحة رغم كولوليا خمس خمسات بتاعة الشيخ سعيد.
والجنّة بتبقى مثبتة دايمًا على ترايزة جواه العربية بأربطة. جم يطلعوا الجنّة لغيرا
الرباط القطع والجنّة انقلبت على وشها في أرض العربية طول الطريق.

∞ ∞ ∞ ∞ ∞

الحكاية العاشرة

الزمان: أغسطس 2015.

المكان: مشرحة زينهم.

التوقيت: الحاية عشرة ليلاً. إشارة بوصول جثة رجل في الخامسة والأربعون من العمر مات خنقاً باستخدام منك تليفون. وقالت التحريات: إن المتوفي كان يعاني من حالة نفسية ويدعي وجود ملك جن يعيش داخله ويحدثه ويوجه له الأوامر ويعاقبه إذا لم ينفذها. وفي آخر يوم قال لأحد أفراد أسرته: إن الملك أمره بالانتحار وأنه سينفذ الأمر ثم وجدوه ليلاً في غرفة من غرف المنزل خنق نفسه بسلك تليفون. عن طريق لفة حول رقبته ثم قام بوضع عصا خشبية بين السلك والجلد ولفها حتى اختنق. وهي طريقة شائعة في الانتحار بدول الغرب الإفريقي.

يامجنووون

- (جاي وهو بياكل) أو مرني يا معالي الرئيس.

- بناكل إيه يا شعبولاً

- بطيخ يا معالي الرئيس.

والله لازم أجييلك. - ماشي لما أنزل.

- هتعجبك والله يا ريس. مش الشيخ سعيد عزمنا على (شوييس رمان).

- وأنا بقلب في ورق. معقول! ده اشمعنى كده!

- أصله غسل النهارده بيجي خمسين جثة وتقريباً حطلم مسك الرسول فعمل كلمة غير واضحة كتير وحلف أنه يعزمني انا وهشام وأحمد علي العشا، ورايح جايبلنا اتنين كيلو موز وشوييس رمان، وبيقول: أصل أنا نباتي.

- وانت عديتها عادي كدة؟

- لا طبعاً، قلت لمراته: أنه متجوز عليها واديتها رقم مراته الثانية، ووصفتلها البيت وزمانها عندهم دلوقت، أصله نباتي عشان كده اديتلها وهيا رايحة من القصب اللي جايبيته اتخن عود، عشان تعالجه بالأعشاب.

- الله يخرب بينك، هتموته، مين هيغسل الجثث دلوقت

- أنا ياريس متقلقش، وهجيبلهم مسك النبي وكفن الصحابة كمان.

- طيب يلا جهز المنتحرة خيلنا نقلبه

- على فكرة ياريس، جثة الواد دة شمال مش مظبوطة، من ساعة ما جه وهو مش على بعضه، وكل شوية أبرقله مفيش فائدة.

- طيب يلا جهزه أما نشوف

نزلت (ريكوردينج)

” الجثة لرجل في الخامسة والأربعين من العمر، متوسط القامة والبنية، يرتدي بنطالا رصاصي اللون، وتيشيرت رصاصي اللون بنقوش سوداء، وملابس داخلية زرقاء اللون والملابس جميعها خالية من القطوع والتمزقات والتلوثات المشتبهة، له لحية صغيرة قصيرة بمنطقة الذقن فقط، كما تبينا حزا بالعنق يعرض نص سنتيمتر، وطول كلي حوالي (٤٣سم) بوضعية مائلة محيط بالعنق بشكل كامل عدا جزء بأقصى اليسار.

اقلع الهدوم دي يا شعبول يلا

في دخلة الشيخ سعيد بشنطة هدومه

- شعبان بفرح: إيه يا شيخ سعيد اتطلقت ولا إيه؟

الشيخ سعيد: مين اللي قال لمراتي اني اتجوزت يا شعبان؟

- شعبان بذهول: اتجوزت!! هو أنت اتجوزت؟ تصدق أنك راجل مش كويس، دة مراتك تتحط على الجرح يطيب، اخص عليك يا شيخ سعيد اخص

- الشيخ سعيد ماشي وهو بيعرج: ماشي يا شعبان، بس لو عرفت إن أنت اللي قولتلها: والله ما هعديها لك

- شعبان: تصدق بقي أنك زعلتني بالكلمة دي فعلا زعلتني، شكرا يا شيخ سعيد، شكرا

- أنا بز عيق: خلاص خلاصنا في قصة محكمة الأسرة دي روح اوضتك يا شيخ سعيد خلينا نخلص.

الشيخ سعيد مشى وشعبان بيقول بصوت واطي بيكلم نفسه: أعرج يا نباتي.. أعرج دة أنا ه****

وكيلو الموز دة هحطهولك في... في بؤك

أخلص يا شعبان يلا، وانا مش قادر امسك نفسي من الضحك.

شعبان قلع الراجل الهدوم كلها، ولسة المشرط هيلمس رقبتة ولقينا عضلاته كلها تشنجت، لدرجة أني فكرته عايش، شفت النبض لقيته منتهي، والعضلات اتشنجت كلها وبمجرد ما المشرط بدأ يتحرك جت عينه مفتحة، شعبان قالي: مش قولتلك: شمال ومش مطبوط ضحكنا، وشعبان بيقوله: اهدي يا سعاد، سيبي نفسك يا سعاد، الفتح بببدا من أسفل الذقن كدة لآخر الحوض وبمجرد ما وصلت عند نص البطن شفت موقف ما هنساه في حياتي، أنا شفت مثال ليه أثناء استخراج جن من واحد عايش وكان من صباعه لكن المرة دي مشفتش قبلها، أول ما وصلت عند البطن بدأت عضلات البطن تتشنج بشدة وتتقبض وتتبسط بشكل غريب، وشعبان واقف

يضحك ويقول: بيلعبك السكس باكس يا ريس، وفجأة لقيت يمين البطن بينبض كأن فيه قلب تحته ويبعلي كدة كأنه باللونة، وجه منفجر! الجلد اتفتح حوالي سم وطرطش الدم وجاب شعبان وهو بيضحك من فوق لتحت، شعبان فضل حاطط أيده على خده وييص عليه، ومبيتكلمش ووشه وهدومه كلها دم وأنا مش قادر أقف من الضحك، وقال: الشيخ سعيد دخل قرأ عليه عدية ياسين..

كملت تشريح سبب الوفاة هو الخنق وانسداد المجاري التنفسية العلوية، مش دة المهم، المهم إنني لقيت في المعدة كتلة من نسيج متعفن أسود اللون قذر الرائحة غير واضح المعالم وجواه خيوط رفيعة جداً زي خيط الفتلة لونها أسود وكانت منتهية بجدار المعدة والفحص الباثولوجي مقدرش يحدد إيه دي، لكن أنا كنت عارف من قبل حتى مفحصها باثولوجي، دة سحر مأكول، بالمناسبة ما اكلتش بطيخ عشان اكتشفت إن شعبان حاطط نص البطيخة في درج جثث جنب جثة عشان تسقع.

∞ ∞ ∞ ∞ ∞

الحكاية الحادية عشرة

الزمان: فبراير 2016.

المكان: مشرحة زينهم.

التوقيت: الواحدة ليلاً.

إشارة بوفاة رجل عُثر عليه ميتاً فى شقته بعد بلاغ من مجهول. بإجراء التحريات تبين أن المذكور توفى من يومين حيث كان يتعاطى الهيروين رفقة أصدقائه فى وجود بنات ليل، وعندما إنفرد بإحداهن داخل غرفة النوم فاجأته أعراض الأوفر دوز وبدأ فى التعرق والهذيان ثم تقول البنت إنه أصابه شلل أدى الى اعوجاج فمه، ثم بدأ يهذى بكلام غير مفهوم إلى أن سقط ميتاً عارِ الملابس من أسفل مرتديا جاكيت تريننج أحمر فقط من أعلى، فتركه أصحابه وغادروا المنزل. باستكمال التحريات واعترافات أصدقائه تبين أن أحدهم والمذكور حصلا على الأموال التى أقاما بها السهرة من بيع توكتوك لأحد التجار، وقد تبين أنهما سرق التوكتوك من طفل فى الرابعة عشرة من العمر بعد أن غافله المتوفى بمطواة فى عنقه من الخلف أدت إلى وفاته ثم قام بإلقائه فى إحدى الترع وقد عُثر على الطفل بعد يومين أيضاً.

يلا يا هشام جهز الحالة دي عشان نشغلها عشان أمشى، حاضر يا ريس بس يا ريس الحالة دي فيها حاجة غريبة جداً هما قايلين فى الورق إنه بقاله يومين، لكن الجثة كأنه بقالها شهر وإحنا الجو مش حر يعنى يمكن قصدهم عشرين يوم، اتصلت برئيس المباحث ألوووو، أحمد بيه، واحسنى والله.

- إزيك يا دكتور، كنت لسه هكلمك والله.

- أكيد على نفس الجثة، هي بقالها كام يوم؟

دنا اللي هسألك، دلوقتى الكاميرات بتاعة الشارع جايبية الواد وهو داخل هو وأصحابه والبنات البيت من يومين، وآخر ناس شافته من يومين وآخر مكالمة من تليفونه من يومين، وكمان واحد منهم مصوره وهو بيرقص مع بت قبل ما يموت بساعة وانا أكدنا من تاريخ الفيديو من يومين

ومصطفى بيه شاف الجثة وبيقولى دي بقالها يبجي شهر، أنا قلت إنت اللي هنتورني.

- طيب أنا لسه مشوفتهاش والله. بس سمعت نفس الكلام، فهنزل أشوف أهه بعدين نتكلم، حبيبي مع السلامة.

- فى حفظ الله.

نزلت.

(ريكوردينج)

«الجثة لذكر فى العقد الثالث من العمر، متوسط القامة والبنية بملامح وجه متغيرة وفم معوج، وتظهر عليه علامات تعفن رمي متقدمة تقارب العشرون يوماً، عارِ الملابس من أسفل وجاكت أحمر من أعلى، وتعذر أخذ عينة دم أو بول لإجراء الأبحاث بسبب التعفن المتقدم، لكن بعصر القلب تمكنا من استخراج بعض نقاط الدم المتجلط ثبت احتواءها على الهيروين والحشيش بجرعات كبيرة»

إيه المنظر القبيح ده، وبعدين يومين إيه، العيال دول بيشتغلوهم، لكن أسوأ ما فى المنظر هو العضو الذكري الذى رغم كل هذا التعفن لا زال منتصباً ومنتفخ بشكل كبير، وقد شمل التعفن جميع الجلد المحيط به، تم أخذ عينة (DNA) ثبت أنه نفس الشخص، مفيش أى شئ آخر يتعمل، وشيل يا هشام الأرف ده وأنا هطلع ألبس عشان ماشى، هشام خيط وقفل وحط الجثة فى درج، طلعت لبست ونازل عشان بخرج من الباب المصفح لأن عربيتى بتكون قدامه مباشرة، لقيت هشام وأحمد واقفين فى نص المشرحة وبيضحكوا، فيه إيه يا أهبل أنت وهو؟ قالولى: تعالى يا ريس اسمع، رحى عند الدرج اللي فيه الجثة، صوت فحيح أفاعى مقزز، نفتح باب الدرج يقف، نقفل الباب صوت الفحيح يشتغل، نفتح يقف، أكثر من (20 مرة) لدرجة إنى وقفت نص ساعة أسمع.

الصبح ولأن القسم اللي حصلت فيه الواقعة قريب مننا جداً، قابلت ظابط مباحث ورحى، كنت حابب أبص على البيت، فوجئت إن الجثة كانت على الأرض على البلاط جنب السرير فى أوضة مفيش فيها غير السرير أصلاً، الشباك بتاع أوضة النوم متوارب وفى آخر دور

وهو أعلى مبنى فى الجوار. الأوضة بتدخلها الشمس من ساعة ما تطلع لحد العصر تقريبا. الحيطه عليها مراية زينة محدبة شديدة التحديب، بتعكس الشمس بقوة رهيبه وكأنها عدسة مجمعة وبتعكس ضوءها على الأرض فى نفس المكان اللي كانت فيه الجثة بالظبط، المراية دي وأنا صغير كان عندي منها واحدة على هيئة عدسة، لو كنت حطيتها فى الشمس وتحتها ورقة الورقة دي كانت بتحترق من تجميع أشعة الشمس، وتجميع الأشعة وتساقطها عليه بالشكل ده هو اللي عفن الجثة بالسرعة الرهيبه دي وشبه تقحمت، حتى البلاط مكان تجمع الأشعة أسود جدا لأنه بيتعرض لتجمع الضوء ده من فترة، كده نهينا قصة التعفن، الظابط فضل يشكر كثير، باقى قصة الفحيح، رحت المشرحة وهشام واقف يسمع اللي الطالع واللى النازل، الجثة فضلت عندنا عشر أيام تقريبا الفحيح لم يتوقف، محدش من الأهل جه استلم، تقرر الدفن فى مقابر الصدقة، الشيخ سعيد يقسم إنه لما حط الجثة ولسه بيطلع نسي حاجة بيحبها لقي تعبان أسود جنب الجثة ويعمل نفس الصوت بالظبط اللي كان فى درج الجثث.

∞ ∞ ∞ ∞ ∞

أيام) وباقي الجسم في الحالة العادية تماماً لشخص مات من ساعات، تتخللوا ده؟ ما فيش كتاب أو مرجع طب شرعي في التاريخ ذكرها، كمان بعد الوفاة الدم بيتحرك بتأثير الجاذبية الأرضية نحو أقرب الأماكن للأرض، وبيعمل حاجة أسمها الرسوب الدموي ودي من أهم الأشياء بالنسبة للطبيب الشرعي في شغله، لأنه بيساعده في تحديد وضعية الوفاة، لو الميت مثلاً مشنوق بيتجمع الدم في الرجلين لو مات نايم على ظهره بتلاقيه في الظهر، ولو على بطنه بتلاقيه في البطن، على الجنب اليمين بتلاقيه وهكذا، وده بيبدأ يحصل بعد ساعتين من الوفاة ويستمر في الزيادة بالتدريج حتى (6 ساعات) طيب لو لقيته في البطن والظهر يبقى الجثة دي في حد غير وضعيتها بعد ساعتين من الوفاة، كمان لون الرسوب الدموي بيشير لسبب الوفاة، اللون الطبيعي بتاعه بنفسجي فاتح، لكن مثلاً لو أحمر غامق يبقى دي حالة أسفكسيا، أحمر قاني أحمر يعني بيشير لتسمم بأول أكسيد الكربون، بنفسجي غامق جداً بيشير لسموم، رسوب دموي باهت جداً بيشير لنزيفاً والمتوفي كان عنده أنيميا، ده باختصار، إذا في الحالة دي المتوقع إنني أشوف الرسوب الدموي في الرجلين ولونه أحمر قاتم، لكن إنني ألاقيه في الرأس والوجه ولونه أسود دي حاجة مشوقتهاش في حياتي كلها، لابس لبس السجن، بدأت أشوف الحز بتاع الشنق على الرقبة عميق واضح إنه اتعلق لفترة، بدأت أتابعه لحد ما سمعت صوت غريب جداً جداً صادر من الرأس، وبدون أدنى مبالغة، سمعت صوت المية وهي بتغلي، نفس الصوت كأن فيه حاجة بتغلي جوه رأسه والوجه عليه مظاهر ألم رهيب، أحاول أبعد وأرجع نفس الصوت، جبت المجنون، قولتله: اسمع كده، سمع الصوت، وقال: بلا مبالاة معتادة، طب حد يظفي عليه ليتحرق، وبعدين سألني هو مات ازاي؟ فحكيتله، قال: دنا هفشخ ميتين جمجمته دلوقت. وبدون أدنى مبالغة بحرك أيدي حسيت بسخونة طالعة من ودنه، قلعت الجوانتي عشان أحسها، شفت لو حظيت إيدك فوق شعلة بوتوجاز بخمسة سنتيمتر كده بدون مبالغة، شفت الصهد والحرارة اللي طالعة منها؟ نسخة طبق الأصل، والله طالعة من ودنه الاتنين. بدأنا التشريح وكل ده مستني فتح الجمجمة، اللي شعبان فشخها فعلياً، توقف الصوت بمجرد فتحها، وألقى درجة حرارة الدم جوه الرأس (70 درجة مئوية) ودي حاجة مستحيلة وباقي الدم بالبطن والأطراف درجة حرارته 31 وده الطبيعي بعد 6 ساعات وفاة لأنها بتنزل درجة كل ساعة، كان شئ غريب جداً، الشيخ سعيد غسله عادي، أهله أستلموه من فتحة الباب وحطوه في النعش ويحاولوا يطلعوا من النعش من البوابة النعش رافض تماماً. قبل كده، أخذوا خطوتين وبعدها النعش وقف تماماً، يحاولوا يحركوا فيه مفيش، الشيخ سعيد نده علياً أنا وشعبان

الحكاية الثالثة عشر

المكان: مشرحة زينهم.

الزمان: فبراير 2017.

التوقيت: الواحدة والنصف ليلاً.

إشارة بوفاة رجل في الخامسة والخمسين من العمر يعمل مؤذن وعامل في أحد المساجد بإحدى القرى التابعة للجيزة، بعد صلاة العشاء استمر في المسجد يقرأ القرآن ثم غادر المسجد وقام بإغلاق أبوابه ثم أتجه إلى منزله، وفي الطريق قام بعض الشباب بمحاولة سرقة بالأكراه، لكنه رفض ونهرهم ووعظهم فقام أحدهم بضربه بقطعة حديدية على رأسه ففقد الوعي، وقاموا بسرقة. وجده أحد المارة ملقى على الأرض فقام بنقله لأقرب مستشفى حيث تمت إسعافات أولية، لكنه لقي ربه بعد دقائق.

- شعبولاً، جهز الحالة يلا اللي لسه جاية حالاً.

- أوامر يا ريس. ده بسم الله ما شاء الله يا ريس، طالع منه نور والله مع إنه شبه الشيخ سعيد بس على مؤمن كده.

- يعنى الشيخ سعيد كافر؟ ماشي، عقبالك يا شعبان، يلا جهزه بسرعة جداً عشان مستعجل.

نزلت، الراجل فعلاً نسخة طبق الأصل من الشيخ سعيد لدرجة إن الشيخ سعيد لما شافه بكى، وشعبان قاعد يقوله: يا ريتك كنت أنت يا أخى.

الرجل ما شاء الله لا قوة إلا بالله، بدر التمام، نائم فى هدوء، يرتدي جلباباً أزرق، على رأسه ضمادة طبية ووجهه يشع نور ما شاء الله.

التشريح مر بشكل عادي جداً سبب الوفاة شرخ بعظام الجمجمة ونزيف فى المخ تعمدت مبهدهوش أوى وخيَّطت بنفسى، خياطة تجميل. بعد ما خلصنا تشريح الجثة اتحطت فى درج تلاجة لحين انهاء إجراءات الدفن، الشيخ سعيد اللي حطها ولقيته جاي ينادي عليا، وبيقولي: عاوزك فى موضوع، وأخذنى للتلاجة والذى نفسى بيده أذان الحرم المكي من داخلها، الصوت واطي لكن واضح جداً، أذان الحرم المكي كأن فيه كاسيت جوه شغال عليه، أفتح الباب الصوت يقف وبمجرد غلق الباب يشتغل، حاجة مذهلة والله عليه رحمة الله، غسلته بنفسى، وصليت عليه قبل ما أهله يستلموه لعلى أنال بعضاً من كراماته، منظر الراجل يجبر أى أحد فى الدنيا إنه يعمل كده، إحساسك إنك واقف وبتغسل وبتؤدي خدمة وتكرّم واحد هو دلوقتي فى جنات النعيم إحساس رائع ومريح، إحساس إنه هيسيبك دلوقتي ويمشي رايح جنة مخلد فيها إحساس رائع، {سِيمَاهُمْ فِي وُجُوهِهِمْ}، {يَوْمَ تَبْيَضُ وُجُوهٌُ وَتَسْوَدُ وُجُوهٌُ}،

{وأما الذين أبيضت وجوههم ففي رحمة الله هم فيها خالدون}، {للذين أحسنوا الحسنى وزيادة ولا يرهق وجوههم قتر ولا ذلة}. إيه اللي كان بينه وبين ربنا عشان يوصل لكده؟ دورت كالعادة وراه كثير، عرفت إن الرجل ده مقتدر ماديا جداً، وبالرغم من كده كان بيعمل فى المسجد تطوعاً بكل أعمال النظافة والأذان ولا يتقاضى أي مرتب، كمان بيعمل مسابقات رمضان لالأطفال في حفظ القرآن توزع جوائزها ليلة القدر كل عام على نفقته الشخصية، لكن ده مش كفاية، مش هيوصله لكده، اللي يوصله لكده قلب سليم نيته كلها في عمله لله لا نفاق ولا رياء، ده كان يعمل في مسجد والكلب اللي قلبه كان يتقاضى راتب، ده مجرد بيأذن وبنضف، والكلب اللي قبله كان بيحفظ الأطفال قرآن، شوفو ده مكانه فين دلوقتي! وده مكانه فين! الدنيا بتمر بسرعة أوي، اعملوا لأخرتكم والله، الموت بييجي في لحظة، أسهل طريق للجنة إنك تحط ربنا في قلبك، حتى اللي ميعرفش أي معلومات دينية، والله في أي حاجة اسأل قلبك هيجابك حلال ولا حرام بمنتهى السرعة، مش محتاج تسأل حد، ربنا خلق القلب على الفطرة، قلبك أعلم من أي شيخ أو قسيس أو رجل دين، اسأل قلبك هيجابك، اسأله في كل حاجة، الحاجة اللي تعملها وأنت مرتاح ومش مكسوف من حد ولا من نفسك وأنت بتعملها تبقى حلال، والحاجة اللي تعملها وأنت متوتر وحذر وقلق حد يشوفك أو مكسوف من الناس أو من نفسك تبقى حرام، هيا دي فطرة ربنا، فاسألوا قلوبكم في كل شئ، حتى في دينكم.

∞ ∞ ∞ ∞ ∞

الحكاية الرابعة عشر

حسناً، أنا طبيب شرعي ميداني. أنا لست فاسداً ولا مرتشياً ولا عميلاً لأحد.

إن أشخاصاً تعلموا الحق من مهنتهم الموت واستبدلوا الباطل الأبيض الناصع ببدايات رسمية أنيقة ارتدوا أسفلها أكفانهم البيضاء ليمارسوا حياتهم عابري موتي، مدركين أنهم حتماً سيلقون حتفهم بين جثتين لن يخافوا أبداً سوى الله وضمايرهم.

إن أشخاصاً يعبثون في مقبرة لإجراء صفة تشريحية لجثة همدت منذ أيام عشر مبعدين بمشارطهم ديدان الأرض أثناء التشريح وهم يسمعون أزيزها ولا يعبأون برائحة لا يقوى بشر على تحملها مدركين تماماً أنهم يوماً ما حتماً سيكونون هنا، لا بد أن يترفعوا عن ولائم الديدان البشرية المحيطة بهم، تاركين لهم نهم الدنيا وشغفها، وأكلهم حقوق الآخرين مشفقين عليهم من يوم ستلتهمهم ديدان الأرض لحماً ودماً، أشخاص حتماً لن يخيفهم سوى الله وضمايرهم.

إن أشخاصاً شاهدوا كرامات لجثث بيضاء كما القمر، وعذابات لجثث خضراء كما العفن، واستخرجوا جثثاً لا زالت تنزف جروحها بعد دفنها بشهور واستخرجوا جصاً تعفنت بعد دفنها بساعات، أشخاص يستحيل أن لا يخافوا إلا الله وضمايرهم.

إن أشخاصاً يحددون وقت الموت من طول الديدان بالجثة، ويعبثون بين الديدان والجثث في أفبح منظر قد يشاهده بشري على وجه الأرض، وفي لحظات تراهم استعدادوا بذلاتهم الأنيقة ورائحة "جيفينجي" تغرقهم، لم تعد تعنى لهم الحياة شيئاً سوى رب، ودين، وعدل، وضمير، وما تبقى من وطن.

الزمان: يناير 2017.

التوقيت: الحادية عشرة ليلاً.

بايت في الشغل زي جميع أيام الفترة دي، مدير علاقات عامة وإعلام وعندنا دايماً لقاءات وإجتماعات ومؤتمرات متتالية صباحاً، وأنا لو نمت في البيت أكيد أنتم عارفين، قاعد في المكتب بخلص شغل وجاتلي الإشارة التالية:

السيد/ مدير عام مشرحة زينهم.

نفيد سيادتكم علماً بوصول جنمان المتوفي إلى رحمة مولاه، وجنمان جنين في القضية أعلاه، وقد أفادت التحقيقات الأولية أن زوجة المتوفي وعشيقها قد تسببا في قتله.

الرجاء من سيادتكم إجراء الصفة التشريحية للجنمانين لبيان سبب الوفاة، وتاريخها وكيفية حدوثها، والأداة المستخدمة في إحداثها على أن نوافيكم لاحقاً بمذكرة نيابة عامة شارحة لظروف الواقعة.

بعض وجاب سكينه وحاول يقتلهم، الست بقا بتقولك إيه؟ بتقول: أول ما جوزها مسك السكينه الدجال سيطر عليه وخلاه ينام مكانه، بتقول: كان نايم على ظهره، والدجال قرب منه، حط إيده على راسه ومسك راسه وضغط عليها جامد. القتل فضل يتالم وبعدين نام على جنبه وحط إيده على وشه يحمي وشه بيها، وخرش إيد الدجال بايده، الدجال ضربه بايده على كتفه الشمال قطعوه، ومسك راسه تاني، وبعدين بتقول: إن الدجال خلع الجزء العلوي من جمجمة الراجل ومخه بايديه وفضل يتشنج وأخدهم ومشى. كلمة غير واضحة جالها انهيار عصبي، فضلت تصرخ وحصل ليها إجهاض، الجيران اتلما بلغوا الشرطة ونقلوها المستشفى وقفوا النزيف، ولسه الست في المستشفى وكانت حامل في الشهر التامن، هو ده ينفع يا دكتور؟.

والنبي يا أخويا مآنا عارف، أنا نازل أشوف أهه.

قفلت المكالمه ولبست ونزلت وبدأت أشوف الجثث وأنا مستعجل، بدأنا على طول شغلنا (الريكوردينج) وأنا بوصف من بعيد...

الجثة لذكر في العقد الخامس من العمر، متوسط القامة والبنية، في حالة التيبس الرمي المتداخل مع عوامل الحفظ بالثلاجة، والرسوب الدموي بلون باهت بخلفية الجثة والتعفن الرمي لم يتضح ظاهريا بعد، وكان على الجثة من الملابس بنطالا رصاصي اللون وتيشيرت ازرق اللون، وملابس داخلية بيضاء اللون، وقد تبينا به الإصابات التالية: إيه ده؟ وقفت الريكوردينج.

إصابة اول مرة أشوفها في حياتي، الجزء العلوي من الجمجمة مفقود وغير موجوده وكذلك تلت ارباع المخ والربع المتبقي موجود فوق عظام الجمجمة، كل ده مش مهم اهم مكان انفصال العضم بتاع الجمجمة نفسه، في أي حالة شبيهة مكان انفصال العضم يا إما يكون مستوى تماما فيبقى الفصل تم بألة حادة، زي ساطور، أو منشار، أو مشرط ليزر، يا إما العظام تلاقى غير مستوية وفيها كسور وشروخ كثير، ويبقى الجزء العلوي ده تم تحطيمه وإزالته بأداة رضية زي مثلا: قطعة حديدية ثقيلة، ولكن الموجود هو العجب بعينه زي ما هنتشوفو تحت، لا هو مستوي ولا فيه كسور ولا شروخ. مكان الفصل كله أجزاء طالعة وأجزاء نازلة، ومفیش فيها أي كسور ولا أي شروخ، شيء عجيب جدا، الأعجب بقا إن فيه أصابع معلمة على الجزء المتبقي من فروة الرأس، والوجه اصابع بشرية وعاملة تحت مكانها كدم واضح جدا، كمان جرح متهتك الحواف في الكتف الأيسر بطول (15 سم) باقي الجسم مفیش فيه أي معالم إصابية على الإطلاق، وطبيعي سبب الوفاة إصابة المخ وما احدثته من توقف المراكز الحيوية عن العمل وحدث الوفاة، تم أخذ عينات (DNA) وكمان أخذ عينات من الأظافر للبحث عن الخلايا البشرية..

خلصت وأنا كل شوية ببص لمكان الإصابة ومندهش تماما، سيبنا الجثة مفتوحة، قلت أشوف الطفل الأول بعدين شعبان يخيط، قلبت على جثة الطفل بسرعة.

(ريكوردينج)

(الجثة لجنين ذكر في الشهر الثامن من العمر متصل بالحبل السري والمشيمة، ولد ميتا خال من المعالم الإصابية). ولفت الريكوردنج، هو فيه إيه النهارده؟

الطفل شكله مثير للإنباض بشكل غير طبيعي، ملامحه نثير انقباض قلبك، لكنه قد يكون مقبول لطفل في الشهر الثامن لم يكتمل نموه، ولكن شفت اللي عمري لا أنا ولا طبيب زيي ولا طبيب نساء، ولا أي حد هيشوفه، الطفل اللي في الشهر الثامن اللي لسه متصل بالحبل السري بتاعه، عنده أسنان كاملة التكوين بحجم أسنان ذكر بالغ!

سنتين كبار موجودين في مقدمة أسنانه بشكل مذهل، غير طبيعي، باقي الجثة مفيش فيها أي شيء طبيعي، وسبب وفاته عدم اكتمال الرئة ووصول الأكسجين، أخذت عينة لل (DNA) وأنا لسه بقلب في الجثة، سمعت صوت حركة جاي من ورايا أنا وشعبان وحاجة واقعة على الأرض، التفتنا بسرعة، الجثة اتحركت من مكانها، الجثة في وضعها الطبيعي بتكون مستلقية على الترابيزة على الظهر، ايديها جنبها، ورجلها مستقيمة وبعيدة شوية عن بعضها، الجثة لقيناها مستلقية على جنبها الأيمن، ايديها خارج الترابيزة، ومغطية وشها، وايد المشروط واقعة على الأرض، جه في بالي على طول نفس الوضعية الي الست وصفتها، شعبان بيبصله في بلاهة كالعادة وبيقوله: خذ راحتك حادي وقام على الجنب اللي يريحك، وفجأة! صوت حاجة بتزن، أشبه بزن دبانة رخمة، وطاقة سلبية مهولة تملأ المكان كله من أوله لآخره، خنقة وانقباض رهيب وتشويش تفكير وصداع لدرجة إن طلعتنا قبل ما نخيط، فصلنا شوية ورجعنا تاني.

خلص اليوم عادي على حاجة مش مفهومة، وقررت أستنى التحقيقات وتشوف إيه اللي اتفصل بيه الرأس وإيه قصة الطفل، وفي اعتقادي إن التفسير كله حيكون بالقبض على الدجال.

يومين ثلاثة فعليا وتم القبض عليه، والست كانت حالتها استقرت، وتم ارسال الاتنين إلينا لتوقيع الكشف الطبي، الست لإثبات إنها كانت حامل وأجهضت إنها أم الطفل، والدجال لفحص مكان الخربشة، وتحديد هل هو أبو الطفل فعليا ولا لأ، وقعت الكشف على الست. واضح إنها غير متزنة نفسيا، وعندها خلل نفسي، وتم إثبات إنها كانت حامل فعليا وأجهضت من أيام، وثبت بال (DNA) إنها أم الطفل، وبعدها دخلت الدجال، قبل ميدخل قلت بعض الأذكار، وعندنا تيرم كده في الشغل إننا جهة محايدة، دايم بنحسس اللي جاي يكشف بده، عشان كده مبنحبش ابدأ أي متهم يدخل لينا بالكلايشات، خليت الشرطة فكت الكلايشات بره ودخل وحده خليته يفعد قدامي، لا مدخلش لوحده، دخل ومعاه طاقة سلبية غير طبيعية تملأ المكان، طاقة رهيبية، قعد قدامي وأنا قاعد على المكتب وبص ليا جامد ومش عارف إيه حصل، صداع رهيب، تشويش، ألم في جسمي، عدم تركيز، نقل، دوار، كل شيء. وأنا بقاوم، بدأت أردد أذكار، والصراع بيزيد جوه دماغي، احساسى إن فيه اتنين بيقاقلوا بعض جوه راسي احساس مमित، الأذكار بتحارب طاقة سلبية مهولة، الوقت ممرش بالسرعة اللي بحكي بيها دي، الوقت بتاع الصراع استمر ثلاث أو أربع دقائق، بدأت أكرر بسرعة الحي القيوم، وأكرر بسرعة ولا يئوده حفظهما وهو العلي العظيم. بدأ الصراع يهدأ، بدأت أفوق وأنتصر. اكيد ده الإسلوب اللي استخدمه مع الرجل

القتيل، نوع من أنواع السيطرة العقلية في السحر، بصيت على الورق اللي قدامي، والله والله بخط أيدي مكتوب إنه خال من أي إصابات، لا أعرف امتي كتبتها ولا ازاي؟! قمت رحت تجاهه، شديت إيديه الاثنين بعنف، رفعت كم القميص، آثار الخريشة كان واضح جدا في الساعد الأيمن، بصيئلته، كان يبدو عليه في حالة ذهول عن انتصاري.

قطعت الورقة الأولى وأنا بيصله، كتبت وصف الإصابة في الورقة الثانية، ورميت القلم على المكتب، قولتله: يلا يا دجال قوم، قال: هندمك، بصيئلته باحتقار، قام وهو بياخذ القلم من على المكتب، قولتله، سيب القلم، مسك القلم فركه بإيديه كذا مرة وسابه على المكتب، طلعت المعمل ياخذ عينة (DNA) ثبت فعليا منها إنه والد الطفل، وكمان ثبت إن الخلايا اللي في أظافر القتيل هيا خلاياه، اليوم ده حصلي فيه بعض الأشياء الغير مفهومة، والتي معرفش في صدفة ولا لا، وأنا راجع كنت العصر، بدأ التشويش في دماغي فجأة لقيت نقرة نزلت فيها كاوتش العربية قدامي بدون اي ميرر، عادي يتحصل، في الشارع بتاعي اللي عمره كان فيه أي مشكلة فجأة لقيت نقرة نزلت فيها كاوتش العربية فرقع بمعنى الكلمة، غيرته وعادي، صداع رهيب، الكهريا زادت جدا وانخفضت مرة واحدة حرقت ثلاجة وتليفزيون وكل الشواحن، برضه عادي، ومكونتش مهتم، لكن اللي قاتلني الصداع الرهيب، التشويش، وصورته اللي شبه التعلب بشعره الرمادي، واللي بقيت بشوفها حواليا في كل مكان، على كل الجدران. على كل حاجة، حاولت أنام مش عارف. الصداع رهيب، وصورته بتزداد وضوح، لكن عارف علاجها، قعت وكل خلية في جسمي بنتألم، رحت اتوضا، بفتح الحنفية، المية نازلة لونها أحمر! وودي حاجة غريبة نفسي أعرف تفسيرها العلمي أو الروحي، تقريبا في الفترة الأخيرة حكالي ناس كله جدا هنا موضوع إن المية تنزل حمرا من الحنفية، لكن مش عارف السبب، هل هو سحر بصري ولا إيه؟! كمان كانت أول مرة أشوفها، قفلت الحنفية، جبت إزازة مية معدنية اتوضيت بيها، دخلت أصلي وكل حنة فيا فيها ألم، سجدت وحسيتها واقف جنب راسي بالطبط، والضغط هيفجر راسي، وبدأت الدعاء، دعاء اليقين، اللي بتكلم فيه ربنا، وبنقوله إنه هو القادر وهو المقدر، هو القادر على جميع خلقه، وهو الحامي، وإنك في حمايته، وإنك لا حول لك ولا قوة إلا به، بتدعي بيقن، والألم بيخرج من كل خلية في جسمي، بيننزح منها نزع، مرفعتش راسي من السجود إلا ما كانت رجعت لطبيعتها، وحسيت تماما إنه اختفي من عند رأسي، تماما، قمت كويس جدا، وسيطر عليا إحساس رهيب بالانتصار، مبسوط.

صحيت ثاني يوم الصبح عرفت إنه انتحر في زنزانة السجن، وإنه كان انتقل زنزانة فردية بعد ما عمل مشاكل كثير مع المساحين، وقطع حنة من البطانية وشق نشه بيها في حمام الزنزانة، وراح معاه سر موت الزوج بالشكل ده، النيابة بعنته المشرحة، مكونتش موجود للأسف، لكن عرفت إن جثته كان عليها من الله ما تستحق، زرقة رهيبة، رائحة بشعة، وغضب الله ولعنته على وجهه، لكن الأمتح كان في شهادة الضابط اللي كان بامن الجنازة بتاعته، وهو صديق شخصي، ولأن الواقعة حصلت في منطقة عجيبة فيبقى لازم تتأمن الجنازات عشان يمنع الاحتكاك بين أسر

الحكاية الخامسة عشر

“صباح الفل عليك يا مخيف”. وصلتني هذه الرسالة من طبيبة رعاية مركزة فأجيبته نشرها كما هي:

(أه مخيف أنا بقيت أخاف أبص ف وشك، على فكرة من غير نظارة عيونك زي الموناليزا منين متبص للصورة تلاقبها باصالك) ماعلينا، أنا طبيب رعايه بقالي (9 سنين) وياما ناس ماتت تحت أيدي، قليل جدا اللي بينطق بالشهادتين، الدرجة حالات ال (MI) من كثر الألم العيان يفضل ينازع ويتفقط “ياالما” “يا أبويا” في مرة بقول لعيانه: اذكري الله، قول: لا إله إلا الله، بحلقت لي، نظرة عمري ما هنساها، سبحان الله هي ثقيلة فعلا مش أي حد بيقدر ينطقها فعلا، اللهم ثبتنا على قول: لا إله إلا الله في المحيا والممات وعند البعث.

فيه حاله عمري ما هنساها، هو وبيموت، وشه كانه حد بيخنقه وأسود خالص، عمري ماشوفت شكل حد بيموت بالمنظر ده!

دكتور زميلي مرة بيحكيلي عن حالة ماتت معاه، مجرد ما مات جسمه بدا يتنفخ لوحده كأنك بتنفخ بلونه ومش عارفين السبب لحد دلوقتي لدرجة إن الستاف صورة علشان يعرضه في سيمينار.

مرة حالة اتوفت عندي، الراجل كان قام صلى الفجر ونام، البنات بيقولوي: الحالة اريستد، رحت والك لقيت وشه منور كأنك جايب كشاف مسلطه عليه، أحط أيدي أقول: يمكن النور ده جي من الشباك بس الشباك معتم ومش معدي نور، اللهم بيض وجوهنا يوم تبيض وجوه وتسود وجوه، وارزقنا حسن الخاتمه نحن وأنت وجميع المسلمين. (ربنا يثبتك على اللي بتشوفه ويعينك).

انتهت رسالة هناء الجميلة لكنها فكرتني بلقطة من أجمل لقطات حياتي فرحا وبهجة، اللقطة دي شفتها في مشرحة مستشفى المنشاوي العام بطنطا، ولحالة لم تكن للتشريح.

دخلت مشرحة المستشفى، قابلت عامل المشرحة، اسمه (فتوح) بيحبني بشكل في طبيعي، سلمت عليه وفضل يحضن ويبوس، يلا يا فتوح طلع الحالة، فتح مكان لحالة أخرى بالخطأ، وأحيانا بيكون فيه خطأ بيبقي هو الحاجة الأجمل في حياتك، أحيانا الخطأ بيكون هو الحاجة الصح الوحيدة، فتوح فتح الباب وقال: مش دي وبيقفله وأنا مش قادر أبص من النور الطالع من جوه، فتوح بيقول: لا مش هو وبيقفل، وأنا بقوله: استنى، وما بصيت شفت وجهه كما القمر، مش بقا زي اللي شفته قبل كده وش عنور مش قادر تنزل عينك من عليه، لا ده المرة دي أنت مش قادر تفتح عينك فيه، من قوة وسطوع النور ورائحة المسك مش قادر تفتح عينك فيه، بصيت بسرعة بشكل عام. ملابس مهترئة تماما، بالية، عليها آثار تراب، بد مشققة أنهكت الحياة بشرتها، حذاء قديم تخرج منه الأصابع من القطوع، ومصحف صغير

باين من جيب قميصه، مين ده يا فتوح؟ قال: يا باشا ده راجل أرزقي على باب الله كان بيبيع مناديل وبسكويت، ووقع ميت في الشارع والإسعاف جابته على هنا، أرزقي؟ ده إحنا اللي أرزقية، على باب الله، هو فعلا على باب الله، على باب الجنة، لدرجة إن نورها وريحتها طبعت عليه، قعدت على كرسي وسرحت، فعلا ربنا ليه سنة غريبة في كونه. افرح بجد لو كنت في بلاء وحاجة، ويوم ربنا ما يديك كل اللي أنت علوزه ابدأ حاف، خاف على نفسك وعلى آخرتك، طول ما أنت عايش في بلاء أيا كان نوعه، سواء فقد أو وجع أو فقر أو مرض، احمد ربنا وافرح، أنت قطعت نص الطريق في أمان، قطعت بالابتلاء ده، حتى بذنوبك قطعت نص الطريق، وكلنا بذنوب، وباقي نص الطريق تقطعه بعملك، وطول مانت في رخاء وسعة وعلى ورفاهية، خاف، خاف لأن أنت أصبحت مطالب إنك تقطع الطريق كله وحدك، تقطع الطريق كله بعملك، بعملك وبس، مفيش وسائل مساعدة، وأنت ونصيبك.

حاولت اشوف اهله مفيش، معاه موبايل لا يتجاوز (50 جنيه) اتصلنا بحد طلع شريكه في السكن، لا مش سكن، شريكه في العشة، عشة من صفيح في أحد مناطق طنطا، چه، عرفت منه إنه لا اتجوز ولا ليه حد، وكان عايش معاه على حد تعبيره بينزلوا يسرحوا بالمناديل والبسكوت الصبح يجيبوا تمن أكلهم ويقسموا اللقمة سوا، وإن (عم محمود) وهو - لسم المتوفي - عمره مازعل حد ولا قطع فرض في المسجد، الراجل شافه واتفتح في البكاء، كلاهما ملابس وهيئة رئة وتحابا في الله، وصدق قول رسول الله صلى الله عليه وسلم: (كم من أشعث أغبر ذي طمرين لا يؤبه له، لو أقسم على الله لأبره)، حضرت غسله وتكفينه، ودفنه في إحدى مقابر الصدفة وليس على لساني سوي، (وَلَنَبَلُوَنَّكُمْ بِشَيْءٍ مِّنَ الْخَوْفِ وَالْجُوعِ وَنَقْصٍ مِّنَ الْأَمْوَالِ وَالْأَنْفُسِ وَالثَّمَرَاتِ وَبَشِّرِ الصَّابِرِينَ (155) الَّذِينَ إِذَا أَصَابَتْهُمُ مُصِيبَةٌ قَالُوا إِنَّا لِلَّهِ وَإِنَّا إِلَيْهِ رَاجِعُونَ (156) أُولَئِكَ عَلَيْهِمْ صَلَوَاتٌ مِّن رَّبِّهِمْ وَرَحْمَةٌ وَأُولَئِكَ هُمُ الْمُهْتَدُونَ (157)). سورة البقرة: (155 - 157)

∞ ∞ ∞ ∞ ∞

الحكاية السادسة عشر

حالة استخراج لجثتين، زوج وزوجة. الزوج كان يتعاطى أكثر من نوع من المخدرات ودائم الاعتداء على زوجته الصعيدية الأصل، عائلة الزوج عائلة ثرية ومرموقة، أما عات الزوجة فهي عائلة بسيطة من أقصى صعيد مصر، من على الزواج عامين دون أطفال، الزوجة تعمدت أخذ موانع الحمل حتى يعتدل حال زوجها ويتوقف عن تعاطي المخدرات، خافت أن تتجب طفلا فيشاهد أباه في موقف غير متزن فيسقط من نظره، الأب دائم الهالوس والكلام غير المفهوم، ويطلب من الزوجة طلبات شاذة؛ حتى إنه طلب منها يوما استقبال تاجر الهيروين بقميص النوم حتى يعطيه ما يريد، الزوجة كانت ترفض طلباته باستماتة؛ فينالها نصيب هائل من الاعتداء الجسدي كل مرة، تقابله حيناً بالصبر والدعاء، فلا يهتدي، وحيناً بطلب الطلاق، فلا يستجيب، وحيناً بالهجر، فلا يرتدع، عانت الأمرين معه كما تقول التحريات، حتى يوم الوفاة، حين علم البائس أنها تتناول حبوب منع الحمل وهذا سبب تأخر الانجاب، ودار شجار عنيف بينهما واجهنه بالقول له: أنها لن تتجب منه حتى ينصرف عن طريق المخدرات، وأن أي ابن لا يتشرف بكون هذا المسطول دائما أباه، اعتدى عليها بالضرب وصدم رأسها بالحائط فسقطت ميتة، لم يعرف ماذا يفعل! اتصل بأخيه ذي المنصب المرموق، حكى له ما حدث، وأخبره أنه سينتحرر. اشترى سم فئران، تناوله ومات.

العائلة الكبيرة ذي المناصب المرموقة، والتي تخشى على مظهرها أمام الناس، فكرت في طريقة لإخفاء الفضيحة، فزورت تصريح دفن، ودفنت الجثتين ليلا في الظلام، وأخبرت الجميع أنهم سافروا فجأة للخارج.

بعد خمسة أيام جاء أخو الزوجة المغدورة لزيارتها، بعد أن وجد هاتفها وهاتف زوجها مغلقا لأيام. شك في الحديث عن سفرها لأن اخته كانت تحادثه بشكل شبه يومي، وتحكي له كل أسرارها ومعاناتها، دخل شقة اخته بعد إلحاح فوجد آثار دماء في غرفة نومها، اتجه إلى أقرب قسم شرطة. وانفضحت القصة كاملة، طلبت النيابة الاستخراج للجثامين وتحديد سبب الوفاة، وتم تنفيذ المأمورية صبيحة اليوم السابع للدفن.

ركبت العربية أنا وشبل والسائق، أدوات التشريح في الشنطة ورا، وبدأت سيمفونية الصوت والضوء المعتادة، مابين "يا منجد على المرتبة واعمل حساب الشقلبة"، حتى " البنبت عاوزة الدلع والواد جبان خالص " تتخللها مقطوعات موسيقية وصوت شبل الرحيم يطرب " يا حاضرة العمدة ابنك حميدة صدقني بالسفندية، إيهي، وقعت على صدري ضحكوا عليا زملائه الأفندية، إيهي، يرضيك يا عمدة؟"، فنر أنا والسائق في خشوع " لا لا لا لا لا لا لا"

وصلنا المقابر، تم تحديد القبر بواسطة اعضاء النيابة والمباحث، وتم فتح أغرب قبر شاهدته في حياتي كلها، وكأنك على الخط الفاصل بين الجنة والنار.

الدفن فوق الأرض على الطريقة المصرية، الجثتين جنب بعض نائمين في أكفانهم، لا تعرف تحدد ريحته حلوة ولا وحشة لا تعرف تحدد هو مريح ولا مثير للكآبة، شيء غريب جدا أول مرة أشوفه، لا أنت عاوز المشي ولا أنت عاوز تقف. والله والله نص القبر حر أغسطس، ونصه برد يناير، نصه رائحة لا تطاق، ونصه من روائح الجثة، شيء مذهل التربى بدأ في اخراج جثة الزوج اللي كانت أقرب، حالة تعفن رمي متقدم ولكنها تفوق معدل الست أيام حتى في أيام الصيف بديان منتشرة بعموم الجسد ومنظر كئيب مثير للاشمئزاز بالرغم من تعودنا عليه، الوجه اللي لسه محتفظ ببعض ملامحه تظهر عليه علامات غصب زادها جحوظ العينين كآبة وإثارة للإشمئزاز، خلصنا بسرعة أخذنا العينات وتحركنا للنص الثاني الداخلي من القبر الي كان كبير وعالي على غير العادة، وكان أرض النص الثاني مغطاة بأوراق شجر ليس لها مصدر، جثة الزوجة في كفن أبيض تماما لم يتسخ إطلاقا عكس كفن الزوج، الرائحة وكأنك في مدخل عبد الصمد القرشي، مزيج من روائح عجيبه مثيره للهدوه بشكل خرافي وغير طبيعي، بينما على بعد نص متر بس النقيض تماما، ودون وجود أي فاصل بينهما، لحد كده شيء غريب وأول مرة أشوفه. لكنه لا زال مقبول، ثم فتح كفن الزوجة، والتي كأنها القمر في ليلة التمام، وما زادت الجروح في وجهها إلا جمالا، وشها أبيض زي الثلج، نائم في حشوع، لم يتغير أبدا عن حياتها، جرح الراس عليه دماء لم تجف بعد، منظر مبهر، مبهر، فضلت أبص ليها، تديك سكينه وراحة نفسية رهيبه، حسيت جرح الراس بايدي وتأكدت من وجود كسر بالجمجمة، قعدت في ركن القبر على الأرض، إيه ده!!! هيا الناس دي فيه إيه بينها وبين ربنا، هو ده فعلا جزاء الصبر على الأذى؟ (إنمَّا يُؤْفَى الصَّابِرُونَ أَجْرَهُمْ بِغَيْرِ حِسَابٍ).

وجنبها تماما نفس الرجل الي كان بيشاركها نفس السرير، في حالة مزرية، السرير اللي كانوا بيناموا عليه في الدنيا كان واحد، لكن القبر اللي نائمين فيه دلوقتي مبقاش واحد.

كل واحد فيهم ليه حدوده، بحد فاصل بين الجنة وبين النار، بعد فاصل بين الجمال وبين القبح، بين الطهارة وبين الدنس، بين نعيم الخلود وجحيم الخلود، كنت خرجت شبيل من فترة وقتله هشرح أنا، والفترة دي قعدت فيها وحدي، لا أجمل من التأمل داخل قبر، لا أصدق من التأمل في حضرة الموت، سمعت الأصوات بره بتتململ من الحر والشمس ومستعجلة، وأنا قاعد في حديقة ياسمين مكيفة بكل ما تحمله الكلمة من معنى، قفلت عليها الكفن وخرجت. في حالة شرود تام، قفلت الباب بايدي عشان محدش يبص جوه، حطوا القفل واسمنت واغلقوه تماما، سبب الوفاة مطابق للاعترافات، ركبنا العربية، وشبل بيغني، وأنا في عالم آخر، عالم برضه ليه حدود، بين الحزن وبين الفرح، بين الرغبة وبين الرهبة، بين الخوف من ربنا والطمع في رحمته، اعملوا لليوم ده، والله لو تحدث الموتى ونطقوا لقالوا (إن خير الزاد التقوى) اعملوا لليوم ده، ذنوبنا يا رب كبيرة، كبيرة أوي، أوي، ولكننا بنحب الصالحين، بنستمتع بقصصهم وينغبطهم ونتمنى نكون مكانهم ومعاهم، وأنت الرب الملك الرحيم، وحببيك الصادق الأمين قال: (المرء مع من أحب، متحرمش عبيدك عن

أمنيتهم، احشرونا معاهم، عرفنا وآمنا وصدقنا إن الحياة الدنيا لا تساوي جناح
بعوضة، وأن ما عندك يا رب خير وأبقى)، إنا ذنوبنا كثيرة اوي، اوي، أنقلت
ظهورنا، لكنك عز جاهك قلت: (كَتَبَ رَبُّكُمْ عَلَيَّ نَفْسِيهِ الرَّحْمَةَ) وقلت: (رَحْمَتِي
سَبَقَتْ غَضَبِي) وكتبتها على عرشك، ونحن نسألك بمقاعد العز في عرشك، ومنته
الرحمة في كتابك، ونسألك بأسمائك الحسنى وصفاتك العليا وكلماتك التامة، ونسألك
باسمك الأعظم وسره العظيم أن لا تحرمننا جمال هذا المثوى وخشوع هذا المآب
وسعادة هذا المصير، عن جاهك، وجل ثناؤك، وتقدست أسماؤك، ولا إله غيرك، لا
نحصى ثناء عليك، أنت كما أثنيت على نفسك.

يا رب هذا المطلب، وأنت الرب.

الصفحات التالية تحتو على صور قد لا تناسب الصغار وضعيفي القلوب...

لذا وجب التنويه!

∞ ∞ ∞ ∞ ∞

الحكاية السابعة عشر

مساء جثث جديدة.

مساء الرعب لا يعرف حقيقته إلا قاطني مشرحة زينهم.

مساء حكايتها الآثمة، تلك المثيرة للفوضى والرهب، لن يرويها إلابي، ولن يقرؤها غلاك.

مساء الغني والفقير، القوي والضعيف، الجنرال، كلهم هنا على التشريح سواء!!

مساء الجماجم المهشمة التي لم تعد تصلح للتفكير، والأرجل المتوردة التي لم تعد تصلح للمشي، والشرابين المثقوبة التي خانت أمانة نقل الدم للقلب!!!!

مساء الجروح لم يعد بالإمكان تضميدها إلا بالصبر فقد نفذ القطن والشاش منذ زمن!

مساء النسوة المنتخبات في الخارج والجثث الخرساء في الداخل!

مساء الجثث البيضاء كما الثلج الفواحة كما المسك المرنة كم طفل كأنهم يوم زفافهم!

مساء الجثث الخضراء كما العفن، كريهة الرائحة كما الرمم، المتييسة كلوح، كأنهم خشب مسندة!!

ومساء السكر على وجوهكم، عليكم اللهفة.

الزمان: يوليو 2016.

المكان: مشرحة زينهم.

التوقيت: الثالثة فجرا.

حفل زفاف تقليدي في إحدى قرى مركز البدرشين محافظة الجيزة بين محمود (39 عاما) ووفاء (26 عاما) بعد قصة حب عذرية بريئة استمرت لثلاث سنوات بسبب رفض تام لمحمود من أسرة وفاء.

بعد محاولات مضنية من محمود العامل البسيط اللي اتقدم لحبيبته أكثر من ست مرات ولكن كان أعمامها دائما يرفضوه بحجة إنه معاه إعدادية وهي معاه معهد عالي. قال يعنى معهد اكسفورد البدرشين.

وفاء والدها متوفي من (19 سنة)، وهي عندها سنتين بالظبط، وأخوها أحمد كان عنده شهور، ابوهم ساب أطفال رضع بنت وولد لأهمم. الست فاطمة. الست الطيبة اللي جوزها مات في حادثة وهي في عز شبابها فمفكرتش لحظة إنها تبص لنفسها، قفلت عليها باب بيتها، ربت الولد والبنت، اخوات زوجها المتوفي رفضوا يدولها أي ميراث بالحجة القدره بتاعة ملك العيلة منفرطش فيه.

(إِنَّمَا يَأْكُلُونَ فِي بُطُونِهِمْ نَارًا) (سورة النساء)

فتحت محل احذية صغير بفلوس ذهبها، مقلعتش الإسود طول عمرها. حتى في فرح بنتها يادوب شوية لمعة في الأسود برضه، بدأت تتاجر، علمت الولاد، جهزت البنت بجهاز عروسة كامل وبنت للولد شقة. ماخذتشن جنيه من حد، وهما أساسا معرضوش عليها، البنت أخذت معهد تكنولوجيا والولد في كلية هندسة، أعمامها واقفين في وش رغبة البنت اللي عاجبها محمود التي كان بيشتغل في ورشة بتورد الأحذية لمحل أمها وشايفاه راجل وربنا هيكرمه وهيقدر يسعدنا، وأعمامها شايفين إنه لا، ده مش عن مستوانا.

مع إنني لما سألت على وظائفهم بعد كده طلع انجح واحد فيهم شغال سباك، وكمان إزاي محدود معاه إعدادية وبنتنا معاها شهادة من كامبريدج البدرشين. ولما سألت اكتشفت إن اعمامها الثلاثة معاهومش محو أمية حتى.

سألت، سألت، سألت، اكيد طبعا بتسألوا أنا بسأل ليه، عشان اللي هيجصل دلوقتي شيء خارج نطاق العقل البشري، شيء مستحيل يصدقه عقل، مستحيل يكون خاضع لقوانين المنطق، شيء ما ورائي عجيب، سواء الأحداث، أو اللي شفته بعيني، وسمعتة بودني واللي هيفضل محفور في ذاكرتي طول عمري. عرفت كل حاجة تقريبا عن الأسرة دي، حتى بيتهم وشارعيم وقرابيهم روحلتهم. قدرت إلى أعرف كل حاجة، إلا حاجة واحدة هو إيه اللي كان بين الأسرة دي وربنا، إيه الرابط العجيب اللي كان بربط افرادها الثلاثة ببعض، وهل كل ده كان موجه ليا أنا ولا جزاء ليهم هما ولا عبرة ولا إيه بالظبط، أسئلة بقالها أكثر من ثلث سنين، تعبت عقلي من التفكير وملفيتهاش إجابة، قصة من آلاف القصص الغريبة والغير مفهومة اللي الواحد مر بيها، والتي خلت عقله تقريبا مبقاش يبص للأشياء بسطحية، ولا بعمق، بقى يبص للأشياء بالأبعاد الطبيعية للزمان والمكان والأحداث، بس بقي يضيفلهم بعد رابع غير واضح وغير مفهوم وغير منطقي ويمكن يقلب الأمور كلها رأس على عقب، البعد ده بيكون دائما محور من محاور تفكيري في أي قضية، وأنا يشوف دائما ان طريقة التفكير دي هيا اللي ساعدتني كتير في كشف الكثير جدا جدا من ألغاز القضايا، وبعد ده كله تيجي نورين تديني تعليمات وتقولني أعمل إيه ومعملش إيه، زمن.

نكمل....

تجارة الأم بدأت تكبر بشكل فيه توفيق وبركة كبيرة بشكل غير طبيعي، المحل الصغير بقي (4) محلات كبيرة جدا، وفي نفس الوقت محافظين على أسلوب معيشتهم البسيط جدا، نفس شقتهم الصغيرة، نفس طريقة لبسهم، نفس أكلهم وشربهم، عفيش أي تغيير.

الام بعد الحاج من البنت ومحمود وتعنت الأعمام، بلغت محمود واعمام البنت انها موافقة ومش هتقف قداء رغبة بنتها، وهتجوزها للي اختارته، الأعمام قاطعوا أي شيء يخصهم. الأم كملت مشروع الجواز، وقالت: مفيش حتى خطوبة. وحددت معاد للفرح فوراً يوم (20 يوليو 2016).

الفرح نفسه أصريت أجيب الفيديو بتاعه وأتفرج عليه، كان مبهج، كل حاجة فيه بسيطة وجميلة، مكانش فيه أي شيء محزن إلا منظر بكاء الأم المتواصل إن ابنتها هتبعد عنها وهيقوا اتنين بس في البيت، وأحمد ابنها وهو مدمع وبيطبطب عليها وبيحاول يضحكها، ووفاء كل ما يبجي عليها كادر نظراتها شاردة، ابتسامة متوترة، بتبص على أمي واخوها وتدمع وتحاول باستماته تسيطر على نفسها إنها متبكيش، ومحمود سعيد وفرحان بشكل لا يوصف، دي الصورة اللي انا اخدتها من الفرحة ككل.

الفرح خلص بدري. كان في قاعة بسيطة كده، تقريبا قبل (11) العريس أخذ عروسته ورايحين شقتهم ووراهم مامتها واخوها رايحين يوصلوهم مع عدد بسيط جدا من أسرة محمود، الست فاطمة كانت مجهز الهم الأكل وكل شيء. وصلوهم لحد باب البيت، حضنت بنتها كثير، وبكوا الاتنين مع بعض، وأحمد اختفى من المشهد عشان ميبكيش، ومشيو.

محمود قفل الباب عليه هو وعروسته اللي كان طاير بيها من الفرحة، وبدأت طقوس أجزائه اللي هتقضى مضجعه وتحزن قلبه العمر كله.

محمود بيحكلي وبيقول: بلهجة بسيطة اللي حصل يا بيه إن أنا قفلت علينا الباب، وكنت عاوز أفرجها الأول على الشقة لأن الأصول عندنا إن العروسة ميتشوفش شقتها غير يوم دخلتها. قالتلي: متن دلوقت أنا هبقى أشوفها بعدين، وإدانتى كيس فيه فلوس كثير تقريبا الناس كان منقطاها بيهم في الحنة والفرح لأن أمها مكانتش بتسيب أي حد في مناسبة من غير ما تنقطه، قولتلها: بس دي فلوسك انتي مش كفاية اللي عملتيه معايا؟ قالتله: أنا وأنت حاجة واحدة. وقالتله: استتى.

وفتحت شنطة كانت مامتها اداتها في إيديها وهي داخلة وطلعت منها عشرين ألف جنيه، وقالتله يا محمود خلي دول معاك لأي ظرف. فقالتله: ظرف إيه وأعمل بيهم إيه؟ اصرت إنه يخليهم معاه لأي حاجة تحصل.

يقول: كانت كويسة جدا، محمود قالها: ناكل الأول ولا نصلي ركعتين سنة الزواج الأول، قالتله: نصلي الأول، بس أنت خليك هنا وأنا هدخل أغير هدومي واتوضى وأصلي ركعتين شكر وبعدين اناديلك تصلي معايا، عاكسها زي أي عرسان وقالها: طيب. وضحكوا ودخلت اوضتها وقفلت الباب.

غيرت هدومها، وطلعت تتوضى محمود شافها بلبس عروسة ليلة دخلتها فضل يعاكسها. قالتله: لما تصلي الأول، اتوضت، وخرجت من الحمام لبست إسدال وقفلت باب الأوضة وبدأت تصلي.

اتأخرت كثير، محمود راح فتح الباب لقاها سجدة بتدعي بصوت غير واضح وببكاء شديد، فخرج وقفل الباب، فضل مستتي، ربع ساعة، نص ساعة. بيقول: أنا عارف إنها بتحب الصلاة والدعاء فحببت أسببها براحتها. ساعة إلا ربع مناديتش عليه، وهو قاعد في الأنترية شاف خيال كأنه رايح تجاه الأوضة، فكرها طلعت، راح لقي الباب لسا مقفول، فتح الباب وهو بيهزر بيقولها: ” إيه يا مولانا هو احنا هنقيم الليل

ليلة الدخلة! ” لقاها لسا ساجدة، لكن من غير صوت ومن غير بكاء، حاول يحركها وقعت على جنبها مبتتحر كرش ووشها مبتتسم، صرخ، فتح الباب وجري في الشارع يدور على دكتور مفيش، ناس جيرانه جم فضلوا يكبوا مية كتير جداً على وشها شالوها أخذوها في عربيتهم طلوعوا على المستشفى. قابلهم طبيب الطوارئ بكلمة محمود مش هينساها، البقاء لله.

ازااااااي، محمود في حالة انهيار وحلم عمره بيضيع منه، أو ضاع منه، البنات اللي حارب عشان تبقى في بيته وشاف الذل وداق الهزيمة تلت سنين، يوم ماينتصر وتبقى في بيته، تطلع منه متشالة على قبرها.

الدكتور لسا صغير، لما عرف إنها عروسة متجوزة من ساعتين قلق، بلغ الشرطة، جه ظابط صغير، معجبهوش شكل البنات اللي نايمة زي الملاك خاصة إن وشها مفيش عليه نقطة ماكياج واحدة، وقال: عروسة ازاي؟ فضلوا الجيران يقولوله: إنهم كبوا عليها مية كتير جداً عشان يفوقوها ومسحولها وشها بفوطة، مفيش فايدة، قلق، كلم النيابة، وقاله: يا باشا نبعث طب شرعي عشان مش مطمئن، أمين، انقل يا بني على مشرحة زينهم.

محمود مش مستوعب اللي بيحصل، وحاسس إنه في حلم، محمود لسه لابس بدلته مغيرش هدومه. يا دوب فك الكرافت وقلع الجاكييت، والمطلوب منه دلوقتي إن عروسته اللي مقلعهاش فستانها يشتريها كنفها.

عربية إسعاف نقلت الجثة للمشرحة. محمود راكب معاها، بيصلها في ذهول، والبنات ملاك نايم، مبتسمة، في هدوء وطمانينة غريبة.

مجاش في باله لحظة أنه يكلم أمها أو أخوها ولا أساساً مستوعب إنه يعمل حاجة زي دي. دمار قلبه أكبر من إن يخلي عقله يفكر في أي شيء، لكن الجيران كانوا قاموا بالواجب، الجثة وصلت، استلمها هشام فني التشريح، دخلها. والأم والأخ وصلوا بعدها بدقايق.

محمود بيحكلي، بيقول: اللي أنا مش مصدقه إن الحاجة فاطمة كانت متماسكة جداً وحت طبطبت عليا وواسيتني من غير متكلم ولا كلمة، وأحمد أخوها لما تأكد من الخبر راح قعد لوحده في الميكروباص اللي جايبهم، وكان السواق نزل وهو الوحيد في الميكروباص.

كل اللي حصل ده بالنسبة لشغلنا عادي، وفيه جزء من المنطق، عروسة بذلت مجهود كبير في الفترة اللي قبل فرحها عشان تجهيزات الفرحة ومبتتأمش ومجهود أكبر في الفرحة ولا أكل ولا شرب مع شوية توتر وضغط نفسي بيبقوا عند أي بنت بتتجوز، جالها هبوط وأزمة قلبية وماتت.

لكن اللي هيحصل ده، هو اللي لا يستوعبه عقل ولا يخضع لأي قانون من قوانين المنطق.

كنت بايت في المشرحة كالعادة، معظم أيام (2016) كنت بايتها هناك، قاعد بقلب على النت في المواقع الإخبارية وأنا بسمع الست، هشام اتصل بيا، يا ريس فيه حالة

جت، مش أنا قايلك: يا هشام محمد صلاح هيجي يشتغل الصبح، قالي: ما أنا قولتلهم: والله يا ريس الدكتور جاي الصبح، بس لما عرفت قصتها صعبت عليا، ليه يا حنين، ليه قصتها، قالي: دي عروسة متجوزة من ساعتين بس، اممممم، حاسة الشك ابتدت تشتغل عندي، عروسة يبقى حاجة من أربعة: يا هبوط عادي وأزمة قلبية، يا اختناق بغاز السخان في الحمام، يا نزيف بسبب إنها متجوزة حلوف في صورة إنسان، يا إما الحلوف اكتشف إنها (كلمة غير مفهومة) وإنها مش تمام فقرر إنها تدي للحياة تعظيم سلام.

وأنا أحب الحاجة اللي فيها اللغز، فيها التكة.

طيب أنا جاي إتش، جهزها يلا.

نزلت، ووقفت على الشباك الحديد طلبت جوزها جه، الولد في حالة توهان، بس مجرد إنه جاي معاها يبقى استبعدنا السبب الرابع على طول.

سألته ليه حصل؟ قالي: كانت بتصلي وحكالي القصة. كطبيب شرعي كل اللي محمود حكاه ده ميشغلنيش، أنا ميشغلنيش غير كلمة واحدة، شفت خيال، آه ليه الخيال ده بقى يا محمود؟ قال: خيال على الحيطه، اه خيال ليه يعني انسان حيوان ليه بالضبط؟ قالي: لا ده خيال زي انسان بس طويل جداً واصل للسقف.

امممم. يا أزمة قلبية يا محود بيلعب بيا... هنشوف.

يلا يا اتش. يا دوب همشي لقيت ست طيبة كده بوش بريء جداً بتقولي بتماسك لو سمحت يا دكتور، قبل ما تتطق كنت عارف إنها أمها وعاوزة تشوفها، وممنوع مخلوق يدخل جوهر. ساعات العيون الصادقة بتقول كل حاجة قبل الشفافيف، فما بالك بعيون أم فقدت بنتها ليلة فرحها، وما بالك بعيون ست أصلا زي الحاجة فاطمة.

الست وشها بريء بشكل يشدك، شكل غير طبيعي، قبل ما تكمل، قولتلها: أنتي أمها وعاوزة تشوفها، قالتلي: آه، قلت دخلها يا هشام، بص ليا باستغراب وفتح الباب المصفح ودخلها، وقفل.

طول الطريق للقاعة بحاول أواسيها والست صابرة ومؤمنة و متماسكة جداً، كل ده وأنا لسه مشوفتش البنت أساساً. وفتتها بره القاعة وقولتلها: استني.

ناديت على هشام، خليته دخل الأول شال أي أدوات زي المنشار، والسكاكين، والمشارط عشان الأم متشوفهاش وده شيء لواحد يقتلها، وكمان يغطي البنت ميظهرش غير وشها بس، عشان لو كان فيها حاجة الأم متعملش شوشرة على ما نخلص شغلنا.

دخلت معاها القاعة.

ببص على البنت لأول مرة، ملاك نايم مبتسم هادي رزين مطمئن سعيد مضيء كل حاجة حلوة، شكلها يفرح ويصبر ويواسي أي حد زعلان عليها.

الأم شافتها، ابتسمت بهدوء، باست جبينها، وقالت لها: "طبتي حية وميتة يا حبيبتى. إنا لله وإنا إليه راجعون. لا إله إلا الله" ولفت عشان تمشي بنفس الهدوء اللي دخلت بيه. إيه الجبروت ده؟! إيه الإيمان ده؟! إيه التماسك والصبر ده؟ وصلت عند باب القاعة وداخت كانت هتقع. سندها بسرعة، هشام جاب كرسي، قعدتها في الكوريديور اللي قدام الباب، الست داخه شوية، وصعبانة عليا بشكل رهيب. وفي نفس الوقت مش هشرح بنت وأمها قاعدة على الباب، مش هخلي أم تسمع صوت نشر جمجمة بنتها أو قص ضلوعها، مستحيل.

قولتلها: تعالي يا ماما، محبيتش أخرجها بره، سندها ووديتها غرفة الأشعة اللي في آخر الكوريديور تماماً.

ودي غرفة بعيدة عن القاعات فيها جهاز أشعة متحرك بنستخدمه في حالات الكسور أو البحث عن مقذوفات نارية داخل الجثث، وكمان فيها مكتب وأنتريه وبطبيعتها معزولة عن المشرحة، قعدتها في الأنتريه، طلبت مائة، طلعت جبتلها مائة وعصير من تلاجتي. رفصت العصير وأخذت المية شربت حاجة بسيطة جداً وطلبت سجادة صلاة لحد ما نخلص. جيبتلها سجادة صلاة فرشتها وبدأت تصلي.

سببتها في هدوءها الرهيب وخشوعها، ورجعت قاعة التشريح. مبهرة ابتسامتك يا وفاء، مربكة، وكأنها شمس تضيء وسط وجه القمر، أخذت كام صورة، هشام يحاول يشيل الإسدال والملابس، وأنا كل شوية أرجع أبص لابتسامتها التي لا تتغير، واضح تماماً إن البنت خالية من أي إصابات مشتبهة وواضح إنها ما زالت عذراء. وواضح إن مفيش أي سبب جنائي للوفاة وإن السكتة القلبية هي السبب الحقيقي للوفاة، في وسط الريكوردنج ومتابعة أدق التفاصيل لقطع أي شكوك، شفته.

باب القاعة باب خشبي بتدخل يقفل وراك ويبفتح في الاتجاهين. الجزء العلوي فيه إزاز.

وأنا شفته من خلال الإزاز، شفت الرؤية مشوشة من الإزاز المشغول لكن شفته، طويل جداً واصل للسقف على هيئة ضوء مجوف شفاف، ليه وراه جناحين. المشرحة عموماً إضائتها قوية جداً، ومطالية أرض وسقف وجدران باللون الأزرق وسقفها عالي جداً ومفيش فيها أي مخلوق غيري أنا، وهشام بيتحرك لكن هو كان واضح ليا جداً، رجليه بتتحرك ببطء.. وثقة وجسم واصل للسقف وبيتحرك في هدوء غريب تجاه غرفة الأشعة.

و فعلياً وقتها أنا ما كان في تفكيري غير محمود والخيال بتاعه، رميت المشروط، قلعت الجوانتي بسرعة البرق، هشام بيقول: فيه إيه؟ زقيت الباب برجلي واتحركت بسرعة لغرفة الأشعة.

وأنا في الطريق، شفت منظر لن أنساه ما حبيت، شفته بعيني خارج من الأوضة بنفس الهدوء والثقة. ضوء مجوف شفاف على هيئة بشر بجناحين جاي عليا، وقفت، عدى من جنبي، لمسني، حسيت برعشة عمري ما حسيتها في حياتي. اتكهرت قبل

كده مرتين ثلاثة، لكن ده إحساس لا يمكن وصفه، كل خلية في جسمك بتتنفض، كل خلية حاسة ببرودة لدرجة التجمد. كهربا رهيبه ماشية في الأعصاب. تشنج رهيب في العضلات، وكأن كل أجهزة جسمي وقفت عن العمل فجأة، مع إحساس مهول بالبرد. فضلت لمدة تلت ثواني في نفس الوضع. في حالة بين الوعي واللاوعي، بعدها انتبهت. حسيت كأنني كنت بجري بقالي عشرة كيلو متواصل. إرهاب رهيب، كملت بهدوء ورجل ثقيلة تجاه غرفة الأشعة.

ودخلت، هددووووووو رهيب.

الست فاطمة ساجدة على الأرض، مفيش صوت ولا حركة.

ناديت عليها مردتش. رحت أحركها مالت على جنبها، مفيش نبض ولا دقة قلب!

لا إله إلا الله!!!! نقلتها بهدوء لكنبة الأنترية، وبص على وشها، لا إله إلا الله!!!!

نفس الملاك المطمئن، نفس الابتسامة الهادئة الرزينة، ابتسامة حتى بنت ثناياها، ابتسامة حاولت أوصفها على مدى تلت سنين، ملقيتش غير وصف واحد، ابتسامة رضا، ابتسامة من رأى الراحة والنعيم أخيراً.

قعدت جنبها على الكرسي، سندات راسي لورا، غمضت عيني، يا الله، ماذا بينهم وبين الله!؟

أين نحن من هؤلاء؟

لا شيء يرعب هاتيك النوارس البيضاء عند موتها؟

وهل كان هو حقاً؟

هل وصلت كراماتهم لدرجة أن يظهر إليهم كطيف واثق هادئ لا يخيف؟ يا الله.

هل تعلم هذه الجدران أن جوارها يرقد جثمان أم في مرتبة شهيدة وابنة على درجة قديسة؟

يا الله، هي وابنتها؟ ذات الملاك المطمئن.

تماسكت، قمت، قبلت يدها وجبينها. و " طبتي حية وميتة يا حبيبتي، إنا لله وإنا إليه لراجعون. لا إله إلا الله. "

بدأت أستوعب اللي بيحصل، هو أنا هاقول إيه للناس اللي بره؟ المفروض ادي الأم جثة بنتها. فخرج أقولهم: تعالوا خدوا جثة الأم؟؟؟

يا إله رب.

رجعت القاعة. هشام واقف مستني، بصيت على وفاء والذي نفسي بيده لقد زادت ابتسامتها اتساعاً إلى الضعف تقريباً، الضعف بلا مبالغة! وازدادت عيناها انغلاقاً، كأنها طفل تداعبه أمه.

هشام: في إيه يا ريس!؟ فيه حاجة ولا إيه!؟

قولته بهدوء: الست ماتت.

الولد انتفض، سابني وراح بص عليها، وأنا عيني منزلتش من على ابتسامه وفاء.
رجع هشام كأنه أصابته صاعقة، افنكر إنه منطقتش كلمة إلى آخر الأحداث.
بصينته وقلت: هشام. بص، اطلع من غير متقول شيء اعرف لي مين أقرب حد
للست دي.

بص لي وفضل واقف!

خرجت انا عند الشباك، غير متزن وغير ثابت النظرات، ناديت محمود: احكي لي،
فين أهل حماتك؟

يا بيه ملهائش أهل؛ جوزها ميت أو هله مقاطعينها هيا وبنتها وابنها الصغير، فقط لا
غير.

وفين ابنها؟

من ساعة ما جه وهو قاعد في الميكروباص اللي هناك ده.

طيب ادخل.

فتحت الباب ودخلته، وأخذته بهدوء لغرفة الأشعة.

لما شاف حماته انهار، فضل يبوس إيديها. هديته، قعد يتكلم معايا، قاللي: دي أطيب
ست عرفتها في حياتي، دي كانت تديني فلوس تقولي روح هات شبكة لخطيبك بعد
ما تحلفني على المصحف إني مجييش سيرة لمخلوق ولا لبنتها، تديني فلوس تقولي
هات هدايا لخطيبك وتحلفني، حتى فلوس الفرح هيا اللي مديها لي. وانهار في
البكاء.

حاولت استغل الموقف: بص يا محمود، يبقى من واجبنا عليها إننا نخلص كل
الإجراءات في هدوء ومن غير أي شوشرة، أنا هجيب دكتور الصحة هنا وهخلص
الإجراءات كلها، إنت معاك ما يثبت إنك زوج بنتها؟

رد قال: لأ، أنا لسه ما أخذتش القسيمة.

طيب فين ابنها؟

بره في الميكروباص.

طيب أنا هطلع له، وإنت خليك هنا، هجيبه بهدوء عشان نعمل الإجراءات.

طيب.

طلعت، الناس حاسة إن فيه شيء غريب بيحصل، روحت بكل هدوء للميكروباص،
أحمد قاعد في آخر كرسي وساند راسه على الشباك، كنت خايف عليه من الصدمة،
فتحت الباب، طلعت أفعد جنبه، ملتفتش ليا أساساً!

قولته: إنت مؤمن؟

مردش عليا، حركت إيده، وقعت... أحمد مات!!

أنا عاوز حد بس يحط نفسه مكاني، الناس واقفة بعيد وبتبص، وطلع أقول للإين إن أمه اللي كانت جاية تاخد جثمان أخته ماتت... فألقيه ميت!

ياالله.....الله...

قمت أسنده وأنيمه على الكرسي، الناس بدأت تيجي، كلام كثير حواليا مش سامعه ولا عاوز أسمع.. أحمد مات.

وبنفس الابتسامة، نفس الابتسامة...

الناس بتصرخ وبتعيط وأنا راجع المشرحة مش عارف فعلياً إيه ده، هل حلم؟

طلعت مكتبي من غير أي كلمة. قفلت الباب من الداخل، ولم أنهر في حياتي زي اللحظة دي.

يا الله! إيه بين الثلاثة دول وبين ربنا؟ إيه العهد اللي أخذوه إنهم يعيشوا مع بعض ويرحلوا مع بعض؟ إيه البنت اللي ماتت أول يوم تبعد فيه عن أمها؟ وأمها وأخوها يموتوا في أول يوم تبعد فيه أختهم عنهم؟! إيه الابتسامات الثلاثة الهادية دي؟! وإيه اللي شوفته تحت ده؟! معقول! وهل لما كان خارج من الأوضة وكهرب جسمي كله كان رايح لأحمد وليه بيظهر لي أنا؟! وليه في المشرحة!؟

أسئلة أسئلة أسئلة..... إيه الرضا اللي باين على وشوشهم ده؟! إيه الملايكة الثلاثة اللي نايمين دول؟ وهل موت السجود ده سهل كده؟ احنا فين من الناس دي؟! إيه الهدوء والسكينة اللي ختموا بيه حياتهم ده؟!؟!!!

كل الأحداث دي مأخذتش نص ساعة تقريبا، نص ساعة اتغير فيها بالنسبة لي الكون كله!

غسلت وشي، قرآن الفجر في مسجد السيدة زينب القريب بدأ، وكانت هذه هي التلاوة:

إِنَّ
الَّذِينَ قَالُوا رَبُّنَا اللَّهُ ثُمَّ اسْتَقَامُوا تَتَنَزَّلُ عَلَيْهِمُ الْمَلَائِكَةُ أَلَّا تَخَافُوا وَلَا تَحْزَنُوا وَأَبْشِرُوا
بِالْجَنَّةِ الَّتِي كُنْتُمْ تُوعَدُونَ (٣٠) نَحْنُ أَوْلِيَائُكُمْ فِي الْحَيَاةِ الدُّنْيَا وَفِي الْآخِرَةِ وَلَكُمْ
فِيهَا مَا تَشْتَهِي أَنْفُسُكُمْ وَلَكُمْ فِيهَا مَا تَدَّعُونَ (٣١) نَزُلًا
مِنْ غُفُورٍ رَحِيمٍ (٣٢) (سورة فصلت: 30-32))

وختم التلاوة ب: وَمَا يُلَقَّاها إِلَّا الَّذِينَ صَبَرُوا وَمَا يُلَقَّاها إِلَّا ذُو حَظٍّ عَظِيمٍ (٣٥)

لا إله إلا الله!!!!

نزلت، الثلاثة جنب بعض على ترابيزات، في قداسة رهيبه، كأني واقف قدام ناس من زمن الصحابة، ناس لا ده زمانهم ولا ده مكانهم.

حاولت أدفع رسوم الغسل والأكفان للتلاتة، محمود رفض، قال لي: وفاء مدياني فلوس لكده وقالت لي هتحتاجهم.

أخذت العنوان، حضرت صلاة الجنازة والدفن، ظهر لي فيهم كرامات مهولة، قعدت مع محمود، حكالي كل اللي حكيتة فوق بالتفصيل، محمود النهارده من أعز أصدقائي، عشان حاجة وحدة بس، يحكي لي عن الحاجة فاطمة....

صلحوا اللي بينكم وبين ربنا، كل اللي فوق التراب تراب، مفيش حاجة مستاهلة.

∞ ∞ ∞ ∞ ∞

الحكاية الثامنة عشر

هل أنتم مستعدون؟ حسنًا، ها هي هناك، قريبة جدًا، عندها فقط تبدأ طقوس رعبكم، ليس أسهل من الوصول إليها، إن لم يكن بسؤال الصحفيين الواقفين والمجتمعين حولها، فسيكون من رائحة الموت التي تملأ منطقتها. والتي جعلت منها مكانا مرتبطا في أذهان الكثيرين بأنها بيت الرعب الحقيقي.

وغاب عنهم أنها سيف أخطر للقضاء يفصل بين الحقيقة والإدعاء، يبحث في منهجية الأحداث، وقد يقلب الأمر رأسًا على عقب؛ فيكشف عن أن المتهم بريء، أو أن المجني عليه مدان.

اقتربوا من أبوابها، أكثر، أكثر، هل شمتم رائحة الموت، الباب مفتوح، ادخلوا، ولكن لا تلموا بعدها إلا أنفسكم عندما تنتسمرون رعبًا في الأرض في صراخ طويل لا تعلمون أين أنتم، فتجيبكم أول جثة في أقرب ثلاجة: هنا مشرحة زينهم.

الزمان: يناير 2015.

المكان: مشرحة زينهم.

إخبارية مفاجئة بحودث انفجار بأحد الأحياء السكنية في مدينة من المدن الجديدة، تحركنا كجهات معينة في تمام الواحدة ليلا كل من مكانه في اتجاه المدينة، هناك لم يكن الوضع يندربشر ولا بخير.

لا يوجد أي آثار لإنفجار، لا نار، لا دخان، لا بنايات محطمة، ولا سيارات مهشمة، ولا نوافذ مخلوعة، ولا زجاج محطم، حسنًا لا يوجد انفجار.

ولكن في الطابق الثالث هناك خمس جثث لخمس سيدات!!!

استمعت لحوارات جانبية لسكان المنطقة مع ضباط المباحث. الجميع يقسم أن هذا المبنى شهد انفجارًا كبيرًا رج الأرض من تحتهم مع صوت رهيب يصم الأذان، الجميع مصمم على وجود انفجار دون أي أثر له، حتى صاحب السوبر ماركت الهادئ في المبنى القريب يقسم أنه لما سمع الصوت وشاهد ارتجاج الأرض تحت قدميه نطق الشهادتين وأيقن أنها النهاية وأن رائحة الدخان والحريق كانت تملأ المنطقة حينها ثم اختفت فجأة.

ما هذا العيب؟!!

قيادة تصرخ في حلق: يلا يا حسام بيه شغل املجانين ده، فض الليلة دي والطب الشرعي يشرف على نقل الجثث في عربيات الإسعاف يروحوا مشرحة زينهم. وحراسة تقف هنا على البيت للصباح.

يسلم فمك، أنا عاوز أنام.

عملت نفسي إن الفكرة مش عاجباني، وده سيستيم اتعلمته مع الزمن، فترد بضيق:
خلاص يا باشا، أنا بس كنت بقول إن ال..... خلاص يا باشا، يلي تشوفه.

وتسكت دقيقة كده وتعمل نفسك بتفكر بعمق.

وتيجي قايلة: تصدق يا باشا أنا قليتها في دماغي كده وطلع فعلا كلامك مطبوط،
الخبرة يا باشا مفيش كلام، المهم...

طلعنا عشان نتقل السيدات مع ضابط مباحث الرشوق وأفراد الإسعاف، 4 حثث
جميعهم في الريسبيشن الكبير جدًا، كل جثة في ركن من الأركان ملتصقة بالحائط،
والجثة الخامسة موجودة بالكوريدور الواصل بين الريسبيشن والغرف، والحثث
الخمس بملايس سهرة سوداء وملقاة على وجوها على الأرض، المظر من بعيد
يقول إنهم كانوا مجتمعين في منتصف الريسبيشن وحصل انفجار قوي جدًا، أطاح
بيهم كل واحدة في حثة، فأربعة اتخطبوا في الحوائط، وواحة اترمت بقوة الانفجار
في الكوريدور، لكن مفيش انفجار ولا أي أثر ليه، فين أثار الانفجار؟ مفيش كوباية
مكسورة، مفيش أزاز مشروخ، مفيش حريف، مفيش دخان، مفيش أي شيء، كل
حاجة هادية ومنظمة تمامًا.

الوضع مش مريح، اتقسمنا مجموعات الأدلة الجنائية بترفع البصمات، المباحث
بتدور على أي أوراق، وأحنا بنفحص الحثث ظاهريًا كده قبل ما تحطها في أكياس
السوق

عمرو بيه معاه ثلاثة جوازات سفر أجنبية لثلاثة سيدات عرفناهم فوراً من لون
شعرهم الأشقر ولا زالت الحثث على وجوها، أما الجثتان الباقيات فقد تبينا في
ملايس إحدهن وفي شنطة يد حريمي ملقاة على الأرض بطاقتان رقم قومي
السيدتين مصريتين من سكان أحد أرقى أحياء الجيزة، حي غالبًا بياخذ المركز
الثاني في الدوري.

حتى الآن الموضوع غامض لكن لم يصل بعد لدرجة التعقيد.

التعقيد بدأ لما بدأنا نقل كل جثة عشان نعدلها، أو مش التعقيد، الذهول.

بدأنا بالثلاثة جثث الأجنبيات، واللواتي ثبت أنهم مستأجرو الشقة مفروشة، منظر
بشع اثنان منهما وجههما مغطي بالكامل بسائل أحمر أكثر كثافة من الدم ولزج كأنه
دم بدأ في التجلط والجفاف، والغريب لا يوجد أي جرح لا في الوجه ولا في الرأس
ولا في الجسم كله، ولا أثار دماء على الأرض مكان وجوههم، ولا أثار دماء في
مناطق وقوعهم، ومنظر الوجه إنه تعرض لرعب مهول وإن الوفاة صدمة عصبية
بشعة، الجثة الثالثة ويبو أنها لأكبرهم سنا، متخيل لما قطر كهربائي مهول السرعة
يخبط وش واحد ممكن يعمل فيه إيه؟ أو مثلاً أتوبيس سياحي فاخر يدوس على وجه
واحد ممكن يعمل فيه إيه؟ ممكن تتخيل أي شيء ممكن يحصل، أي شيء، إلا اللي
أنا شفته وهتشوفوه في الصور، الوش ممكن يتحطم، يتكسر يتسلخ يتجلد، لكن إنك
تلاقي فم الجثة في مكانه بينما الأنف والعيون الأخرى في مكان ثاني ده يلي مش
ممكن، مش قادر أوصف الموقف بدقة أكثر من إن أنت جبت عجينة بليدو (صلصال

يعني يا نورين) وعملت منها وش بني آدم وانت بنتتسلى، بعدين زهقت فجيت فاعصها بايدك مضيع ملامحها ومخلي وشها مكان أفأها وعينها فوق حواجبها، هو ده يلي حصل ولكن بدون نقطة دم واحدة.

الجثتين الباقيتين لسيدتين المصريتين، واحدة سأنشرها معدلة، والثانية يصعب نشرها كلياً، الأولى بها إصابات غريبة جداً جداً بيمين العنق، أثار من عشرة جروح طبيعية بالطعنات، ولكن كل جرح بشكل مختلف تماماً.

الجثة الأخيرة في الكوريدور كانت مشوهة تماماً مقطعة الوجه والرقبة واليدين والأحشاء التناسلية.

انتهت عملية رفع البصمات وشغل الأدلة الجنائية تبين في الشقة أوراق تخص إحدى السيدات الأجانب أنها تستورد أجهزة طبية من الخارج وبالفعل تبينا في إحدى الغرف أكثر من 500 علبة جهاز ضغط طبي في كراتين مغلقة.

تم نقل الجثامين الخمسة إلى زينهم ووضع حراسة على الشقة ليبدأ الجزء الأكثر رعباً في القصة.

بمجرد وصول الجثامين وقيام شعبان باستقبالهم اشتكة أفراد سيارتي الإسعاف اللي نقلوا الجثث الخمسة من أشياء غريبة طول الطريق، سألت زي إيه؟ قالوا: إحنا أول مرة يحصل معنا زي كدة يا دكتور، إحنا بننقل جثث من عشرين سنة، لكن عمرنا ما حصل معنا كدة، إيه بس يلي حصل؟ قال: طول الطريق سامعين صوت صريخ رهيب وتصفير وعايط ونحن ماشيين ورا بعض بالعربيين، لدرجة وقفنا ونزلنا لقينا العربية اللي ورانا بيقولوا نفس الكلام، تقف العربية مفيش صوت، أول منتحرك الصوت بيشتغل، تقف سيكت، ده غير إن كل شوية العربية تتهدد هبدة كأنها أكلت مطب محترم من غير ميكون فيه أي حاجة في الأرض والصويت ده دمر أعصابنا، لدرجة إن واحد مننا نزل في الطريق وسابنا ومشى، أخذت الموضوع أنا وشعبولا بهزار وضحك، استلم الجثث، اتحطت في التلاجة مع جثث تانية مجهولة حوالي 10، موضوعين على ترايبيزات قريبة جداً من الأرض، واقفل الباب.

الساعة بقت 7 الصبح، يلا أنا همشي وهاجي أشتغل بالليل على ما يجي قرار النيابة، رد يا ريس طب متاخذني في طريقك لحد موقف السيدة عائشة وهشام جاي أهه هيسنلم مكاني، طيب هيجيب حاجة من فوق، شعبان غير لبسه، فضلت واقف معاه 5 دقائق، هشام جه وإحنا واقفين سلام وركبنا العربية ومشيت مع البيه بتهدد على شعبولا انه يجي عشرة بالليل عشان يدخلوهم معايا، لأن شعبان مش ملتزم وسيبنا اخش لوحده.

بالليل جيث في محادي بالحيط، حوالي الساعة وحدة الاربع بالليل.

فوجدت بشعبان وهشام والشيخ سعود وفرد أمن قاعدين على كراسي خارج المبنى قدام البوابة الرئيسية للمشرفة، وأنا محذر قبل كده بلاش القعدة دي خوفا من أي حد

يدخل يرمي حاجة من الشباك لجوه، أو مثلا يولع في المشرحة، وده محل أكل عيش.

دخلت عليهم بالعربية وهما قاعدين بدأت أشباهم بالكراسي على الكبوت، لحد ما جابوا على جوه.

نزلت، شعبان بيبصلي بنظرك استهانة: أنا هنا من الساعة عشرة على فكرة. عملت مسمعتش ومرديتش.

الشيخ سعيد رويترز المشرحة: معالي الرس شفت اللي حصل امبارح؟
إيه اللي حصل يا شيخ سعيد؟

شعبان: ما أنت سامع أهه أنا هنا من الساعة عشرة.

عملت نفسي بشوف حاجة على الموبايل، وقلت إيه يا شيخ سعيد اللي حصل؟ قاللي كله ساب المشرحة إمبارح وطلع معدا الدكتور حازم.

ليه؟

المشرحة طول النهار صويت وتصفير وخبط طالع من التلاجة الكبيرة نفتحها مفيش حاجة، نقفل وبعد نص ساعة بشتغل تاني لحد ما صدعنا كلنا والله يا ريس وكله طلع ما عدا دكتور حازم. اسأله حتى.

اتصلت بحازم: ازاي إيه الله يخرب بيتك على بيت مجاييك.

لييه؟

مش عارف أنام من الصداع من ولاد ال*** اللي أنت جاييهم مبارح صويت وتصفير وخبط وطبل، أنت جاييهم من شقة دعارة ولاد ال*** ولا إيه؟
فاصل ضحك، طيب أنا حدخل أشوف.

غيرت بسرعة، لبست الشغل، رايح أنا وشعبان للقاعة بحاول أفتح كلام أراضيه، بقوله: هو بجد الللي الشيخ سعيد بيقوله يا شعبولا؟

رد باستفسار: هو قالك إني جيت الساعة عشرة؟

يا أخي يلعن ميتينك آخر الليل خلاص سمعت المشرحة هادية وزى الفل.

قولتله: وهو فين الصريخ والخبط؟ رد باستهانة شوية وهتسمعه، قولتله: أنت سمعته بنفسك؟ قال أه سمعته كذا مرة من ساعة ما جيت الساعة عشرة.

امشي يا شعبان، أنا مش عاوزك تشتغل معايا، ووسط الضحك بدأت السيمفونية.

صراخ متواصل بدون توقيف بصوت عالي وبشع يوتر الأعصاب، مع صوت حد بيصفر بيؤه صفير متواصل وأشياء كأنها بتترزع على الأرض وتتكسر، الحاجات دي سمعناها كثير، لكن كنا مثلا نسمع صوت صرخة وحدة نص الليل، ساعات

ضحكة عالية، خبطتين ثلاثة ورا بعض، لكن إنه يستمر نص ساعة متواصلة بمستوى الصوت ده فعلا سيء ينفز ويجيب صداع، طب اعلمي قهوة بقا على ما يبطلوا، نص ساعة كده هدي الصوت ما عدا الخبطات، يلا يا شعبولا، روحنا فتحنا التلاجة، شعبان باستظراف، هااا مين عاوزة تيجي لعموا الأول؟

محدث بيرد.

طيب نهادا بقا، نهادااااا كده ونقول: إحن هاديانين أهه، وشد أول وحدة أجنبية بترابيزتها، ويلا بينا، لحظة ما قفلنا الباب، قبل ما يتقفل كله تقريبا الصوت اشتغل، بنفس التون، صريخ وزرع بصيت لشعبان اللي وقف مرة وحدة، فكرته هيقولي: نرجع الجثة وصويت وخبط في الخلفية، لقيته بص للجثة بنظرة متفحصة وقالها: يبقى إنتِ اللي كنتِ بتصفري يا بنت ال***.

هستيريا ضحك، وصلنا القاعة والصوت ينفز فعليا ومبيققش، كل نص ساعة تقريبا بقف كام دقيقة وبعدين يرجع بنفس البشاعة، شعبان حط الجثة على الطريزة وبدأنا نشتل.

الجثة الأولى:

” أنثى في قرابة الثلاثين من العمر، متوسطة القامة والبنية، ترتدي فستان سهرة أسود، يعلوه جاكيت خفيف وردي، شقراء وذات شعر قصير، الوطه والظهر عليهما سائل أحمر اللون، ثبت من الفحص أنها ليست دماء بشرية، وعموم الجثة خالية من أي إصابات كفيلة بإحداث الوفاة، وبها سحاجات خفيفة بالوجه، والفم مفتوح ومعوج بشكل يبدو عليه العنف، وداخل الفم مادة بنية اللون لزجة أشبه بالسكر المحروق، لم يستطع الفحص تحديد هويتها.

يخلع الملابس وإجراء الصفة التشريحية تبيناً وجود مظاهر عدم اهتمام تام بالعناية الشخصية، والتهابات فطرية بالمناطق التناسلية، وبالفحص الداخلي والتشريح تبينا أن سبب الوفاة سكتة قلبية مفاجئة ربما نتجت عم صدمة عصبية، وانهييار عصبي شديد أدى إلى حدوث الوفاة، ولا يودد أي شيء غير ذلك من إصابات خارجية أو داخلية أو أمراض، وبالفحص المعلمي تبيناً آثار كحول بالدم ولا توجد أي مواد أخرى سامة أو مواد مخدرة”.

أدي وحدة، طول التشريح ومع كل حركة مشرط الصراخ يزداد قوة وعنف لدرجة اننا حطينا قطن في ودانا عشان نقلل ضغط الصوت، خلصنا خيطنا، قلت لشعبان متدخلها التلاجة الكبيرة، حطها في درج من الأدراج لوحدها غلى ما نشوف الليلة السوداء، وهات الثانية اللي كانت جنبها على طول.

” الجثة لإنثى في منتصف الثلاثينيات من العمر، بدينة نوعا ما متوسطة القامة، شقراء والشعر متوسط الطول، ترتدي ملابس سهرة سوداء، والوجه مغطى بسائل أحمر لزج، ثبت من الفحص الطبي أنه ليس دماء بشرية ولا يمكن إزالته بسهولة، والفم مفتوح أيضا بشكل غير طبيعي، وبداخله ذات المادة بنية اللون لزجة، لم تستطع تحديد هويتها وإن كانت أشبه بالسكر المحروق.

عموم الجسد خالي من أي إصابات ظاهرية؛ إلا كدمة بيسار الوجه دائري الشكل بقطر 2 سم ربما نتجت عم ارتطامها بشيء، وباقي الجسد خالي من أي إصابة كفيفة بإحداث الوفاة.

وبإجراء الصفة التشريحية تبيّن آثار سكتة قلبية مفاجئة ربما تكون نتيجة انهيار عصبي شديد أدى إلى حدوث الوفاة، وبالفحص المعلمي تبيّن آثار كحول بالدم ولا يوجد أي مواد أخرى سامة أو مخدرة.

الصراخ بيزداد عنف في الخلفية والصداع والنرفزة بتزيد، يلا يا شعبان في درج لوحدها، وهات الأجنبية الثالثة.

” الجثة لإنثى في منتصف الأربعينيات من العمر متوسطة القامة والبنية شقراء، وطول الشعر متوسط، ترتدي ملابس سهرة سوداء دون ملابس داخلية، بها إصابات عبارة عن ” سحجتين بيسار العنق متوازيتين، وسحجتين بالساق اليسرى، وكسور بعظام الوجه والفكين، أدت إلى تغيير مواضع الفم والأنف والعينين، وكل هذه الكسور دون إصابات خارجية مقابلة لها!!

كما تبيّن على الوجه ذات المادة اللزجة حمراء اللون؛ ثبت أنها ليست لدماء بشرية، ولا يمكن إزالتها بالماء والغسيل، كما تبيّن الفم أيضا مفتوح ومعوج، وبداخله نفس المادة بنية اللون لزجة لا يمكن تحديدها تشبه السكر المحروق.

بالفحص التشريحي تبيّن سبب الوفاة سكتة قلبية مفاجئة نتجت عن انهيار عصبي، وصدمة عصبية شديدة ولا توجد إصابات كفيفة بإحداث الوفاة، حتى كسور الوجه لم يصاحبها أي نزيف داخلي، وبالفحص الكيميائي تبيّن بالدم آثار كحول مع ولا يوجد أي مواد أخرى سامة أو مخدرة.

خيّط وشيل يا شعبان وفي درج برضه على ما أشوف الشيخ سعيد يعمل قهوة، معدي من جنب الأدراج مفيش أي صوت منها، حتى من اللي انحطوا منهم، والصوت البشع كله طالع من التلاجة الكبيرة، أفتح بابها يسكت أفضله بيشتغل، مينفعش أسيب الباب مفتوح عشان حفظ الجثث، بقيت أسكت وأجي فاتحه مرة واحدة وأفلهم بخ، برضه مفيش فايدة، ميتين بصدمة عصبية يبقى عمر بخ ما هتجيب نتيجة معاهم.

طلعت لقيت الشيخ سعيد قاعد عن الباب وبيقرا قرآن، قالي: أنا قربت أخلص المصحف يا ريس وبرضه مش راضيين يسكتوا قولتله انت بقالك كام سنة هنا يا شيخ سعيد؟ قالي: (38 سنة) قولتله: مرت عليك حاجة زي دي؟ قال: أه تلت مرات ولسه هيحكي لقينا الصريخ زاد جدا. قولتله طيب اعلمي قهوة على ما أشوف شعبان بيضربهم جوة ولا إيه؟! رحت لقيت شعبان واقف في نص القاعة وبيضحك، قولتله: أنت عملت إيه؟ قالي: جبت الجثة الرابعة وضربت الخامسة بالقلم.

مبقيتش عارف أقوله إيه ده؟ معاه شهادة معاملة اطفال، وواقف سعيد جدا كأنه عمل مقلب في واحد صاحبه. بدأنا الجثة الرابعة.

«الجنة الأنثى في العقد الثالث من العمر، طويلة القامة، متوسطة البنية سوداء الشعر، والمادة الحمراء اللزجة مركزة كلها على العنق من الخلف، والشعر من الخلف وأعلى الظهر، حيث يبدو أنها كانت في حالة سجود. والفم يحتوي على ذات المادة البنية اللزجة الغير معروفة، وترتدي ملابس سهرة سوداء دون ملابس داخلية. وقد تبينا بها ما يلي عشرة جروح طعنبة بيمين العنق نافذة إلى الداخل، كل منها له، طول مختلف، وعرض مختلف، وعمق مختلف، وشكل مختلف بعضها خطي، وبعضها دائري، وبعضها بيضاوي، وبعضها مستطيل، من المؤكد أنها أحدثت بواسطة ادوات حادة مختلفة الأبعاد والأشكال والأطوال، وليست أداة واحدة، والمتوفاة كانت في حالة حيض وعثرنا بالدم على نسبة عالية جدا من الكحول. ولا يوجد أي مواد أخرى سامة او مخدرة. وسبب الوفاة تلك الطعنات، وما أحدثته من إصابة الأوعية الدموية الرئيسية بالعنق، وإصابة القصبة الهوائية والمريء مع نزيف داخلي أدى إلى الوفاة. خيط وشيل يا شعبولا في درج لوحدها وهات الأخيرة النهار هيطلع خيلنا نخلص.

الشيخ سعيد كان جه و إحنا شغالين ماسك القهوة في إيد، والمصحف بايد وبيقراً بصوت عالي ومفيش فايذة، قعدت أشرب القهوة في الكوريدور وشايف شعبان جاي جايب الجنة الخامسة. وبرضه بيضحك ومش عاوز يجيب عينه في عيني ومش عارف هو عمل إيه جوه! فضلت أضرب كف على كفه ودخلت وراه، الصوت وقف اما الشيخ سعيد قفل المصحف، وطلع وعلى وشه ابتسامه رضا وحاسس إنه انتصر عليهم بالتقوى والسلاح بتاعه، وانا قولتله، الله، ينور يا شيخ سعيد.. وابتسامته تزداد اتساعا وثقة. وماشي في خشوع ولا كأنه الشيخ ميزو ومو ماشى، ومرضيتش أقوله إن الصوت وقف أساسا في التلاجة عشان طلعاهم كلهم ومبقاش حد جوه، سيبته يطلع المسرح.

نكمل...

الجنة لأنثى قرابة العشرين من العمر، متوسطة القامة والبنية، ذات شعر اسود قصير بملابس سهرة سوداء دون ملابس داخلية، والمادة الحمراء مركزة أيضا على الشعر من الخلف، والظهر كونها كانت في حالة سجون، ونفس المادة البنية الغير معلومة موجودة في الفم، كما تبينا بها جرح ذبحي عميق ببسار الوجه والعنق يمتد من أسفل الأذن اليسرى مباشرة، وحتى أسفل العنق محدثا إصابات بالأوعية الدموية الرئيسية وهو سبب الوفاة، باقي الجثمان به إصابات عبارة عن قطع حاد في الأعضاء التناسلية أدى إلى تشويهها والمتوفاة في حالة حيض».

خيط وشيل بقا يا شعبان وفي درج وحدها لحد ما نشوف إيه القصة الجامدة وراهم الأدرج عندنا بيتحط كل جثة في درج، والدرج عويض عشان يسمح بدخول الحماله اللي عليها الجنة فبتدخل الجنة بالحماله بتاعتها وتطلع برضه بيها.

اتغسلوا واندفنوا على الطريقتين الإسلامية والمسيحية كل حسب ديانته. الشيخ سعيد بيقول إنه لما نزل الثلاثة الأجانب في مقبرة لوحدهم وقفل بالأسمنت الصريخ اشتغل ونفس الوضع حصل مع الجنئين التانيين، والخمس جثث موجودين في مقبرة صدقة

كبيرة بباب وأحد متقسمة جزئين: جزء على اليمين للأخوة المسيحيين في توابيتنا، وجزء على اليسار للمسلمين في الأكفان فقط والدفن فوق سطح الأرض.

وبعدها ابتدا البحث والتفكير وربط المعلومات، لحد ما وصلت لشيء لا هو علمي ولا منطقي ولا ينفع ينكتب في تقرير أساسا مش هضحك على نفسي وأبرر لنفسي أكثر من كده، واضح إن دي كانت جلسة بطقوس معينة، ربما تكون عبادة شيطان أو تحضير أرواح أو سحر كابالا أو شيء بهذا الشكل.

بدأت اقرأ وأبحث عن نوع السحر اللي بيستخدم الزئبق، لحد ما وصلته، مكتوب بالحرف الواحد ما يلي: السحر الأسود وهو أعنف درجات السحر يبدأ بسحر التهامم والتعويذات على عظام حيوانات، وهو سحر قوي يفوق كل درجات السحر السفلي.

يليه تمانم وتعويذات على عظام آدمية، وهو من أعنف أنواع السحر المعروفة في العالم ويملك صاحبه قوة خرافية مهولة. واقعي درجاته وهو السحر الزئبقي وهو نوع من السحر الداوودي، ويتم باستخدام الزئبق الأحمر النقي، أو الزئبق الفضي المخلوط حيث تكتب بها التمانم بعد الطقوس، وهو أعنف درجة سحره عرفها عالم السحر الأسود حتى اليوم، ويشترط أن يملكه شخصين معا وليس شخصا واحدا، ويكون لديها قدرات تمكنهما من هزيمة جيش بأكمله دون أن يتحركا من مكانهما، ولكن أي خطأ في الطقوس أو التمانم يؤدي فورا إلى موت الجميع دون رحمة، حاولت أبحث وجبت كتب كتير جدا، ومواقع كتير جدا عشان أوصل لإيه الخطأ اللي ممكن يحدث، ولو الخطأ ده حصل إزاي بييموتوا دون رحمة؟ وكنت دايمًا بلاقي باب مسدود ومفיש أي توضيح أو تفسير لحد النهارده. اللي وصلته بس إنه موجود في غينيا والنيجر في أفريقيا، وفي بعض دول أمريكا الجنوبية اللي منها البنات فعليا، وإن عدد من يمتلكوا طاقة على مستوى العام لا يتجاوز عشرة أفراد، ولا يمكن توريته بالعود.

التقرير اتكتب بعد كام شهر بنفس البيانات بتاعة الإصابات اللي فوق دي، دون تفسير أو توضيح لكيفية حدوث الواقعة، أو إجابة الأسئلة اللي ملقيتهاش إجابة، واتساب فيه الباب مفتوح لأي شيء يظهر بعد كده، وتم حفظ القضية والتقيدت ضد مجهول، وما زالت من كتر القضايا غموضا في تاريخ مصر، إن لم تكن أولهم، ومظهرش أي شيء جديد الحد النهارده. إلا شيء بسيط.

إن بعد شهور تقرب من السنة، جالنا استخراج جنمان اندفن في مقابر الصدقة من سنة ونص عشان بعد سنة ونص ظهرت أدلة إن ممانش طبيعي وممكن يكون اتسمم والسموم بنلاقيها ولو بعد عشر سنين، مقابر الصدقة كل فين وفين لما بيندفن فيها حله ويتفضل مقفولة بالشهور وساعات بالسنين، المهم أخذت شعبان والشيخ سعيد ورحنا تعمل الاستخراج. افكرتا القصة دي وإحنا في الطريق، وفضلنا نضحك شعبان أعترفلي إنه لما ضرب الجثة بالقلم كان عشان لقاهم حاضنين بعض، والشيخ سعيد قال إن مقابر الصدقة متفتحتش من يومها، وصلنا، مفيش صوت صريخ ولا أي شيء، فتح القفل، وكسر الأسمنت اللي حوالين الباب، نور كشاف ودخلنا، كل جثة بيبي محطوط جنبها كرتون عليه بياناتها ومربوطة بالكفن بتاعنا، طلعتنا الجثة

المطلوبة وكانت عبارة عن هيكل عظمي. أخذنا العينات من البقايا ومن الكفن ومن التراب اللي تحت الجثة عشان ندور على السموم المترسبة، رجعناها مكانها، هدوء رهيب، الفضول هيموتنا، دخلنا غرفة المسيحيين لقينا تابوت في هيكلين وتابوت فيه هيكل واحد متكوم كله في ركن، وتابوت فاضي المسلمين لقينا هيكلين حاضنين بعض وملفوفين بكفن واحد والكفن التانى فاضي بمنتهى الهدوء طلعنا، محطينا حتى غطيان التوابيت عليها، الشيخ سعيد قفل وحط الأسمنت. وينتحرك الصويت اشتغل، نفس الصويت بتاع أول مرة في المشرحة، مشيت سرحان أنا والشيخ سعيد وشعبان بيضحك.

بعد كده عرفنا من حارس المقبرة بالصدفة إن مقبرة الصدقة كل كام شهر بيطلع نفس الصوت بالليل، ويختفي فترة طويلة ويرجع، الجنت الخمسة موجودين بمقبرة الصدقة، مقابر الغفير، السيدة زينب، القاهرة.

الحكاية التاسعة عشر

أثارني نقاش عن تناسخ الأرواح وتلبس القرين لشخص، فقررت كتابة هذه الحكاية،
ربما

يزيد الأمر تعقيدا ظهور روح تبحث عن الجناة وتسلمك صك الإدانة وترحل.
الزمان: سبتمبر ٢٠١٦.

المكان: بين مدينة 6 أكتوبر ومشرفة زينهم.

التوقيت: الثانية صباحا بتوقيت مشرفة زينهم.

في الواحدة ليلا دار هذا الاتصال.

- ألوو، ازاي حضرتك يا معالي الدكتور.

- أهلا وسهلا مين معايا.

- أنا ***** عضو مجلس النواب عن دائرة 6 أكتوبر.

- أهلا بيك، خير.

- أنا بعنذر والله عن الاتصال متأخر بس عندنا (٣ حالات وفاة) ماتوا في حريق
طلعنا لهم مذكرة تشريح وعاوزين حضرتك عشان ندفنهم

- أولا البقاء لله، أنا مش هقدر أنزل غير الصبح وأوعدك هنشغلهم الصبح على
طول.

- يا دكتور عشان خاطري دول أقارب شخصيين.

- والله على راسي بس فعليا مش هقدر أتواجد غير الصبح.

- دول (3) إخوات وكانوا لوحدهم وأهمهم في الحج وأبوهم متوفي، والبيت ولع بيهم
والحالة مأساوية والله.

- امممم طيب حضرتك جبت رقمي منين؟

- قالي: من واحد عندكوا هنا في المشرفة معرفش اسمه.

- شكله إيه طيب؟

- والله شكله غريب كده متعرفش توصفه.

- عرفته، قوله بيقولك: دكتور محمد جهز الحالات علشان هبيجي يرفعك معاهم.

- رد: يعني إيه يا باشا؟

- قولتله قوله: بس كده وهو هيفهم دي حاجة عندنا في الشغل هو فاهمها.

- أشكرك يا معالي الباشا، في انتظار حضرتك.
- بإذن الله، مع السلامة.
- مع السلامة.
- متعرفش توصفه، هو شعبان ابن ***، وهروح أطلع ميتين أهله، أنا لسه هستنى لما أروح.
- ألو ازيك يا معالي الرئيس، صحيت ليه إنت مش قولت هتتام؟
- مين ادي رقمي لبتاع مجلس الشعب يا شعبان؟
- والله يا معالي الرئيس دنا جت حالات وقولت مش هكلمك عشان إنت هتتام، إيه صحاك بس!
- بصوت أعلى؛ مين ادي رقمي لبتاع مجلس الشعب يا شعبان؟
- أنا طبعاً ياري، بس قولتله: إنك هتتام.
- إنت ابن *** يا شعبان.
- صحيح يا معالي الرئيس.
- وهاجي أطلع ميتين أهلك.
- تسلم يا معالي الرئيس.
- بإنفعال أكثر، وهاجي أحولك للتحقيق يا شعبان.
- يعني هتيجي! في إنتظارك يا معالي الرئيس
- ققلت، وأنا بتتطط من برود أهله.
- لبست ونزلت طائر على الطريق، في ربع ساعة كنت هناك.
- شعبان بيفتح باب المشرحة الكبير الخارجي عشان أدخل العربية، دخلت بعنف وتعمدت أخبطه وأنا داخل بجنب العربية، ابتسم وقال: تسلم عربيتك يا معالي الرئيس.
- مش هنزل أفشخه قدام الناس أكيد، وكنت، راح جري فتح الباب المصفح، دخلت وقلتلته: دخل وقفل الباب ولف ليا، وقال: اضرب يا معالي الرئيس، أضرب عشان أعملك تقرير طبي وأوديك في ستين داهية، أضرب.
- فقدت السيطرة وهيستيريا ضحك، وهو بيقول: أضلك بتوحشني يا ريس.
- طلعت المكتب، غيرت هدومي، ونزلت، شعبان مقابلني بالقهوة وبيضحك!
- دخلنا القاعة، الجثث الثلاثة على ترابيزات

تلت جثث، بنت كبيرة وولدين صغيرين. واضح إن الولدين إخوات، وواضح إنهم ماتوا في مكان الواقعة؛ لكن مش بالحرق؛ بل بالاختناق! إنما البنت واضح إنها اتعرضت لحروق شديدة جداااا، أخذت جسمها بالكامل تقريباً، أوك، بصيت لشعبان اللي مش طايفه، وقولتله بأرف: يلا يا أخويا، رد بنفس البرود: شرف ليا معالي الرئيس.

بدأ شعبولا يجهز الجثث وأنا بقرأ مذكرة النيابة بسرعة، ملخص الحادثة إن جه إخبارية باشتعال النار في أحد المنازل، وإن سيارات الإطفاء بدأت بسرعة التعامل وبعد إنطفاء النيران تبين إن الأخت الكبيرة محروقة بالكامل وجثتها متواجدة على باب غرفة محترق، واضح إنها دخلت الطفلين للغرفة أثناء الحريق ووقفت عند الباب تحاول تطفي النيران ببطانية لكن النيران التهمتها، وتم إخماد النيران قبل وصولها لجثة الطفلين ولكن للأسف كانوا ماتوا بالاختناق. تقرير الأدلة الجنائية قال: إن السبب تسرب غاز وإشتعال نيران من المطبخ انتشر لعموم الشقة، وكمان واضح من الأبواب إنها مغلقة جيداً من الداخل وإن مكانش فيه أي دخول غير شرعي يشير إلى شبهة جنائية، وإنهم هيكملوا الفحص فيما بعد.

(وبدأنا الريكوردينج)

«الجثة الأنثى (16 سنة) متوسطة الطول زائدة الوزن بشكل نسبي جسدها مغطى بالحروق بدرجاتها الثلاث، وبعض الأجزاء واصله لدرجة التقحم، يظهر من الحروق أنها حيوية، أي تمت أثناء حياة المجني عليها. ولا توجد أي إصابات أخرى ظاهرة خارجياً. بإجراء الصفة التشريحية تبيننا آثار ترسب كربون في الجهاز التنفسي وهذا يؤكد استنشاقها الدخان الشديد قبل وفاتها، وأن الحروق على جسدها حيوية، عدا ذلك لم نتبين أي شيء غير طبيعي، إلا كدمة مستطيلة الشكل في مؤخرة الرأس، من الممكن أن تكون حدثت جراء سقوطها على الأرض، وكذلك لم تؤد إلى نزيف داخلي، ولا دخل لها بإحداث الوفاة. وتعزي الوفاة إلى صدمة عصبية شديدة نتجت عن إصابات حرارية بدرجاتها الثلاث واصله لدرجة التقحم في بعض الأجزاء، مما أدى إلى توقف المراكز الحيوية بالمخ عن العمل وحدثت الوفاة.»

- خبط يا زفت.

- أو امرك يا معالي الرئيس.

- قولي يا شعبان: هو إنت مبتحسش؟

- هو أنا مش قايلك أنا شعبان هروح أنا ومنتصحينيش أبداااا إلا لما أصحى!

قالي: حصل، وأنا فعلا عملت اللي قولتلي عليه يا معالي الرئيس.

- قولتله: حلو، ليه بقى ادبت رقمي للراجل؟ قالي بابتسامه عريضة: مش عارف.

- بس يمكن يكون عندي نقص في الإحساس يا معالي الرئيس.

- قولتله باستكأى: يمكن؟

- قالي: أمي الله يرحمها كانت دايمًا تقولي: إنت جبلة. أه والله يا معالي الرئيس.

- طب يلا، الجثة الثانية يا جبلة، أبدا.

(ريكوردينج الجثة الثانية)

«الجثة لذكر يبلغ من العمر حوالي (7 أعوام) متوسط القامة والبنية لمن في مثل سنه، يبدو على وجهه مظاهر الاختناق بأول أكسيد الكربون مع زرقة سيانوزية بالشفاء والأظافر، والرسوب الدموي بلون أحمر في خلفية الجثة والتعفن الرمي لم يتضح ظاهرياً بعد، بإجراء الصفة التشريحية، تبيّن آثاراً للكربون والفحام مترسبة في ممرات الجهاز التنفسي، ويعمل الفحص الكيميائي تبيناً حالة التسمم بأول أكسيد الكربون، وتعزى الوفاة إلى التسمم بأول أكسيد الكربون مما أدى إلى توقف المراكز الحيوية بالمخ عن العمل وحدوث الوفاة.

- خيط يا بيه، عنيا يا معالي الرئيس.»

(الجثة الثالثة)

كيوت خالص، لا حول ولا قوة إلا بالله.

(ريكوردينج)

«الجثة لذكر يبلغ من العمر (عاماً وبضعة أشهر) عار الملابس، يرتدي فقط حفاضة طبية للأطفال ويظهر عليه آثار الاختناق بأول أكسيد الكربون، والرسوب الدموي بلون أحمر بخلفية الجثة وبالصفة التشريحية تبيناً آثار ترسب الكربون والفحام بالجهاز التنفسي، وتعزى الوفاة إلى التسمم بأول أكسيد الكربون مما أدى إلى توقف المراكز الحيوية بالمخ عن العمل وحدوث الوفاة»

تمام، خيط.

كده كله تمام، ثلاث حالات في ساعة إالرربع وبارك الله فيما رزق.

غيرت هدومي وركبت عربيتي، بصيت لشعبان وابتسامته العريضة بأرف، لحد ما طلعت من المشرحة واتفحت في الضحك وهو ماشي ورا العربية يقول: أحلام سعيدة يا معالي الرئيس.

لحد كده أحداث عادية جدًا، وحالة منتهية تماما.

(3 إخوات) أمهم في الحج. حصل حريق في بيتهم، ماتت أخت محروقة، والأتنين الصغيرين اختناق، الأدلة الجنائية قالت: مبدئياً إن مفيش شبهة إنها هتستكمل التقرير، والموضوع منتهي.

لحد بعد الواقعة بيومين تقريبا، الواقعة كانت ليلة الجمعة ودلوقتي الأحد العصر، أنا في المكتب، والأمن بتاع البوابة الرئيسية بيتصل بيقول: إن فيه ست تحت منتقبة ومصرة تقابلني. سألتهم مين؟ قالت: أم الأولاد اللي ماتوا في حريق من يومين، قتلهم: دخلوها وحد يجيبهالي.

الباب خبط، ودخلت الست، مش منتقبة ولا حاجة، متوسطة القامة قمحية البشرة محجبة وأكثر شيء كان مميز فيها إن فيه عين ثابتة مبتحر كش وبالتدقيق اكتشفت إنها عين زجاجية، محطيتش في بالي.

قولتلها: اولا البقاء لله وحمد لله على السلامة حضرتك، رجعتي مكملتيش الحج؟

قالت: اه مقدرتش أكمل. أنا كنت بحج عن زوجي المتوفي من كام شهر في حادثة، كانت متماسكة نوعا، قولتلها: طيب أومريني فيه أي حاجة ممكن أقدمها لحضرتك؟ قالت: أه، كثير، قولتلها: تحت أمرك، عاوزة إيه؟ قالت: تصدقني! بصيتلها باستغراب وقولتلها: وهو واحدة في ظروف حضرتك هتكذب ليه أساسا! قوليلي بس اللي عاوزاه، لسه هنتكلم؛ دخلت أم عاطف تشوفها هتشرّب إيه، بإلحاح طلبت مية بس، قولتلها: قولي أنا سامعك، ردت بكل هدوء، ولادي ماتوا مقتولين! كلمة ببقى غالباً متعود أسمعها في الحالات المشابهة، فقولتلها بكل هدوء: طيب حضرتك عندك دليل على كدة؟ قالتلي: أه، حلمت بيهم وأنا في مدينة رسول الله، قولتلها: عليه الصلاة والسلام، مش عارف أفولك فيلم إيه بس؟؟ إيمانك شيء، والأدلة الحقيقية شيء. وبدأت محاولة إنهاء اللقاء، فقلتلها عموما أنا لسه بجهاز التقارير ولسه الأدلة الجنائية مكملتش تقريرها وربنا يسهل، شربت من كوباية المية اللي قدامها، وقالتلي بكل هدوء. وبالعينين ثابتين المرة دي وبصوت عميق: حق ولادي في رقبته، وأنا هرجعك تاني لما أعرف إيه اللي حصل بالظبط لأنّي جاية من المطار عليك، وسابنتي ومشيت من غير ولا كلمة.

فضلت ساكت شوية وأنا بتخيل كم المعاناة الرهيبة اللي بتمر بها الست دي زوج متوفي من شهور، راحت تعمله حج، فرجعت ولادها الثلاثة ميّتين، حاجة صعبة، حاجة تجنن، مشغلنيش الموضوع كثير. خلصت شغل، ورايا شغل كثير لازم يخلص عشان مسافر، وهيات في الشغل النهاردة.

الساعة تسعة بالليل، اتصال تاني عن أمن البوابة بأن فيه ست مصرة إن فيه معاد معاها دلوقتي، وهما بيكلموني أخذت السماعة وقالت: يا دكتور انا مامت الأولاد اللي ماتو محروقين وجيتلك النهارده. قولتلها: أهلا بحضرتك بس هستأذنك تجيلي الصبح. قالت: أنا جاية من سفر النهارده زي ما قولتلك وتعبانة مش هاخذ من وقتك غير دقيقة واحدة، طيب، اديني الأمن، أيوه يا محمود، مين عندك من الستات؟ قال: مدام منى قولتلها: طيب خليها تطلع معاها.

دقايق وأنا في المكتب لابس ترينج سبور الباب بيخبط مدام منى، دخلتها واستنتت بره، من غير ما أتكلم قعدت وقالت: عرفت اتقتلوا ازاي! قولتلها بهدوء ازاي؟ قالت: للأسف أخويا اللي قتلهم، حسيت إنها بقيت مريضة نفسية والموضوع بدأ يوسع منها، وفي الحالات دي مينفعش تهاجمهم أبدا، لازم تططب عليهم، قولتلها: ممكن تهدي بس، إنتي عارفة إن بعد أي حادثة كبيرة أو صدمة بنتعرض ليها بيبقى بعدها فيه اختلال عصبي لجسمنا بيخلينا نتخيل حاجات مش حقيقية، وحاولت أقنعها أكثر قولتلها: أنا نفسي تعرضت لحالات زي كده وكمان، قطعت كلامي بكل ثقة وبنفس الصوت العميق، والعينين ثابتين تماما مبيرمشوش مش العين الزجاجية بس وقالت:

بقولك: أخويا اللي قتلهم، ووقفت بحركات تمثيلية. وقالت: كان واخذ مخدرات، راح قالهم: إنه جاي يطمئن عليهم، وبعدين قالهم: هبات معاكم، وحاول يسرق المجوهرات من أوضة نومي، بنتي الكبيرة شافته، قالتله: إنها هتقولي: خيطها على راسها من ورا بفازة وقعت على الارض. وحاولت تزحف عشان تزوح عند إخوانها، وهو مش عارف يعمل إيه!! راح قطع خرطوم الغاز وولع كبريت ورماه وخرج من شباك المنور اللي على السلم الخلفي وقفله وراه ومشى، البننت حاولت تحمي إخوانها النار مسكت فيها، ماتت محروقة، وأخوانها ماتوا مخنوقين، أنا قولتلك وحقهم في رقبتك، وجت ماشية، مدام مني أخذتها ونزلت.

سكتت، وعندي يقين إنها مقتنعة بالهلاوس اللي شايفها، رغم إنها رواية منطقية جداً تفسر الغاز اللي جاي من المطبخ. وإن الباب مقفول من جوه، بس مجرد هلاوس طلعت ملف القضية أقراه، قعدت أقلب في الورق، فضلت أقلب في الورق ورقة بعد ورقة لحد ما عيني اتسمرت مكانها، من كلمة أنا اللي كاتبها بخط أيدي في ورقة التشريح، "كدمة دائرية الشكل بقطر 3 سم بخلفية الرأس لم تؤد إلى حدوث كسور بالجمجمة أو نزيف داخلي، ويرجح لأنها بسبب السقوط على الأرض".

فضلت أبص للجمجمة وافتكر كلام الست الهادي الواثق عن أخوها اللي ضرب بنتها بفازة في راسها من ورا، معقول؟

رجعت لورا في الكرسي وأنا بضحك، هتشتغل بالأحلام ولا إيه يا أبو حميد، وهتكتبلهم إيه في التقرير!
(بحلم بيك أنا بحلم بيك)

آآآآآآآآآآآآ، كملت كتابة، دخلت الاستراحة نمت ومفكرتش في شيء، لكن الست كلامها مبيروحش من بالي، قمت الصبح، كلمت نيابة أكتوبر، سألت القضية دي مع مين من البهوات؟

قال: مع إسلام بيه، تمام، كلمت إسلام بيه، إيه يا باشا اخبار القضية دي؟ قالي: متريحش خالص يا دكتور والله، قلبي بدأ يدق، ليه بس؟ قال: الأدلة الجنائية جابت تقرير تكميلي بتقول: (إن خرطوم الغاز مقطوع بألة حادة، وإن الحادث بفعل فاعل). كأن صاعقة نزلت على راسي! كمل الكلام، وكمان فيه درج مكسور في دولاب غرفة النوم وعلية مجوهرات فاضية وفازة مكسورة، فيه قلق كده، هو بيتكلم وأنا في عالم تاني، تفتكر يا دكتور حد من الأولاد اللي قطع الخرطوم؟! رديت بسرعة لأ، الأولاد الصغيرين قوتهم أضعف والكبيرة أعقل من إنها تعمل كده. قالي: عموما هنستنى لما أمهم نيجي من الحج ومتحل كل اللغز ده، قولتله: أمهم جت امبارح وجاتلي المكتب. قالي: مجاتش عندنا، يبقي غالباً هيجيبوها النهارده. قولتله: طيب انا هروح أبص بصة على البيت كده، أنتو سايبين عليه حراسة؟ قال: آه طبعاً، سلام.

قفلت ومعدل دقات قلبي فعلياً وصل 150، الست دي عرفت منين؟ هل راحت الشقة مثلاً وتخيلت اللي حصل؟ هل أخوها اعترف لها؟ ولا إيه بالظبط!! نزلت ركبت

عربيّتي وطلعت على 6 أكتوبر، أخذت العنوان في الطريق من المباحث وعرفتهم إنّي رايح، على باب الشقة اللي في الدور الأول علوي، قابلت طقم الحراسة، كان أول سؤال سألته، فيه حد جه دخل الشقة. قال: لا يا ريس محدش دخل غير المباحث والنيابة، متأكد؟ طبعاً يا ريس ممنوع حد من الأهالي يدخلها أصلاً ولسه بالشمع الأحمر أهه، اتأكدت من الختم على الشمع. فكيتّه ودخلت، ريحة الدخان واللحم المحترق لسه في كل مكان، دخلت أول غرفة متفحمة. الغرفة الثانية نصها بس المتفحم، واضح إن دي اللي كان فيها الأطفال، واضح من اللعب الموجودة على الأرض. الغرفة الثالثة غرفة نوم الأم، الدولاب مفتوح، واضح إن فيه درج مكسور، وأمين الشرطة قالي: إنهم أخذوا علبة المجوهرات والفازة يمكن يلاقو بصمات رغم إن تلت أرباعهم محروق. دخلت المطبخ تفحم كامل، تركيزي على حاجة واحدة بس، شباك المنور، لقيته متفحم، وقفت على حاجة فتحته، ببص على المنور المسافة للأرض حوالي 6 متر، صعب شوية النط منها لكن ممكن والشباك واسع يخرج حد بمنتهى السهولة، مشيت أكثر ارتباكاً من قبل ما آجي، ازاي واحدة تشوف في حلم طريقة قتل أولادها وبالذقة دي!!! بالتفصيل ده!!!

رجعت المكتب، طلبت غدا وأكلت، الساعة اربعة العصر تقريباً لقيت اتصال من إسلام بيه، قالي بسخرية: أم مين يا دكتور اللي جاتلك. قولتله: (أم 44) ليه؟ قالي: كنا بعنتا خطاب لبعثة الحج عشان يهتموا اهتمام مضاعف بالست دي للظروف اللي بتمر بيها، وإخطارنا بموعد رجوعها، جالنا فاكس حالا، إن الست دخلت في انهيار عصبي ليلة الجمعة فور علمها بالخبر، ودخلت مستشفى سعودي وتوفيت الجمعة بعد الظهر، وتم إنهاء الإجراءات وحجز شحن الجثمان اللي هيوصل للمطار النهارده الساعة (12) بالليل، وهيطلع عندكوا على المشرحة عشان تعملولها شهادة وفاة، سكت، وبعدين قولتله: أكيد حد قريبتهم وقال: إنه أمهم، قفلت وأنا في حالة صدمة، وبحاول أفنع نفسي باستماتة إن اللي جت قريبتهم. شوية تفكير، اتصلت تاني بإسلام بيه، قولتله: معلش اديني الاسم والرقم القومي بتاع الأم كده، قالي: يا عم بقولك: ماننت في السعودية، قتلته معلش. أداني الرقم والاسم، اتحركت على الأمن قابلوني بترحاب جميل، نورت الإدارة با ريس، سألت مين كان هنا لما الست جاتلي امبارح الساعة 9 بالليل؟ قالوا: محمود وعصام، طب هاتوا كشف الدخول.

دورت في كشف الدخول على المعادين اللي الست جت فيهم، أي حد بيدخل بيتاخذ إثبات شخصيته ويتثبت بياناته، الأحد عصرًا، الاسم والرقم القومي متاخذين من جواز سفرها ومتطابقين تمامًا، الأحد ليلاً، الاسم والرقم القومي متاخذين من نفس الجواز متطابقين تمامًا، مشيت مش مركز إطلاقاً، وبحاول أفنع نفسي إن حد قريبتها هو اللي كان معاه باسبورها ودخل بيه، بس باسبورها ازاي وهي مسافرة وأكد جواز سفرها معاه، هتجنن!

طلعت على المكتب، طلبت قهوة، أم عاطف الست الجميلة جاية بتضحك، وبتقول: إيه يا دكتور محمد هي الست اللي كانت عندك دي بتحط إيه؟ ماية نار! قولتالها: وأنا مش مركز ست مين؟ قالت: اللي جاتلك امبارح ومرضيتش تشرب غير مية، انتبهت

فجأة قولتلها ليه بتقولي كده يا أم عاطف؟ قالتلي: يص، وطلعتلي الكوباية، مكان شفايفها معلم مكان الشرب بشكل أبيض تام كأنه لبن.

وام عاطف بتكمل وتقول: غسلتها (100) مرة بكل حاجة مش راضية تطلع أبدا!! شكلها فعلا كأنه دهان أبيض، اديتهاها بذهول وأنا بقولها كانت ناقصاكي يا أم عاطف ضحكت وخرجت، وهي على الباب سمعت صوت حاجة بتتكسر، طلعت بسرعة لقيت أم عاطف بتلم إزاز، وتقوللي: أسفه والله يا دكتور الكوباية انكسرت، وكملت وهيا بتضحك، كده كده مكانتش نافعة أساسًا، دخلت شربت قهوة، دماغني هتشت من التفكير.

دخلت الاستراحة، حاولت أنام ساعتين معرفتش، (3 ساعات) بتقلب على السرير مش عارف أنام من التفكير، ومنظر الست مبيروحش من بالي إطلاقا. الساعة بقيت تمانية وشوية بالليل، لبست ونزلت المشرحة استنى الجثمان، وقلبي بيدق، لقيت إشارة فعلا من النيابة إن الجثمان هيوصل الساعة اتنين بالليل، فضلت مستني، قهوة ورا قهوة شعبان بيرغي وأنا مش فايق ليه، والشيخ سعيد قدام بيقتع واحدة اسمها مدام هدى إنه بيحط على الأكفان مسك الرسول، رغم إن إزاز كولونيا خمس خمسات مالية الأوضة بتاعته، مكانش ليا نفس أضحك، الساعة اتنين وربيع، جه الجثمان، ومع الجثة أخوها، أخوها؟!!!!! دخلوا الجثمان، أخوها جه على الشباك، أداني جواز سفره وجواز سفرها، سألته إنت كنت معاها في الحج؟ قال: أه، لكن رجعت قبل عرفة أجيب جثمانها، ملناش نصيب، قولتلها: انتوا ليكوا إخوان ثانيين؟ رد قال: أخ واحد ربنا يهديه عنده (19 سنة) ومطلع عنينا، قولتلها: مكانش معاكوا في الحج؟ قال: لا، سيبناه هنا، دقات قلبي بنزيد. قولتلها: ليكو أي قراب ثانيين؟ قال: إحنا التلاقة مالناش غير بعض مقطوعين من شجرة لا أب، ولا أم، ولا خال، ولا عم، واهو بقينا اتنين، سيبنه ودخلت أناظر الجثمان قبل ما أوقع شهادة الوفاة، بقرب من القاعة ودقات قلبي بتزيد بعنف، دخلت، الجثمان ملفوف في أكياس وقماش، ومجمد، فتحت الأكياس، شيلت القماش وبصيت على وشها، ياااااااا الله، هيا الست اللي جاتلي!!! لابسة إسدال صلاة ونايمة في خشوع، ملامحها هادية رغم إنها مجمدة من 3 أيام!! حسيت إني داخ، سندات على الترابيزة، مديت أيدي، فتحت عليها، بهدوء. دقات قلبي تجاوزت الـ (200) من اللي حصل، وفجأة لقيتها ابتسمت ابتسامه عريضة جدا جدا حتى بانك كل أسنانها لحظة ما فتحت عليها، لقيت واحدة فيهم عين زجاجية ومكان عملية قديم، والثانية سليمة، أخذت خطوتين، شديت كرسي، وقعدت، خليت شعبان صورها، دقايق وطلعت لأخوها، قولتلها بكلام متقطع عنيا، قالي: أه كان فيه عين فيها كانسر ومتشالة من 5 سنين ومكانها عين إزاز، حركت راسي ومشيت، مضيت شهادة الوفاة وطلعت.

منمش طول الليل، وصوتها في ودني، حق ولادي في رقبتك، وهتبت إزاي إن أخوها اللي قتلهم؟ هقولهم إيه؟ جاتلي في المنام، ولا جالي الإلهام؟! الساعة بقت سبعة الصبح، اتطرت فجأة، افكرت حاجة، عندنا كاميرا واحدة مسلطة على بوابة المبنى الرئيسية من الداخل. بتصور بس اللي داخل واللي خارج، مفيش أي كاميرات ثانية، عشان مينفعش يكون فيه أي كاميرا داخل المبنى، لبست ونزلت

بسرعة، سألت مين مسئول عن الكاميرا؟ قالوا: مهندس ياسر، اتصلت جييته في نص ساعة، فتح تسجيل الكاميرا، شفت معادين دخولها المسجلين في دفتر الدخول يوم الأحد، المعاد الأول البوابة بتتفتح محدش بيدخل، بعدين البوابة بتتقفل، بعد ربع ساعة البوابة بتتفتح تاني وتتقفل من غير مخلوق ما يظهر، المعاد الثاني البوابة بتتفتح، بتدخل (منى) لوحدها، وبعد عشر دقائق بتخرج (منى) لوحدها، مفيش مخلوق دخل معاها ولا خرج، حبت (منى) سألتها فاكرة الست اللي طلعتيها لي بالليل؟

قالت: آه دي ست غريبة، قولتلها: غريبة ليه؟ قالت: بكلمها مبتردش عليا ولا بتبصلي حتى!! وريتها الفيديو. بلمت قدامه، قالت: ازاي ده!! واتفتحت في العياط. واضح من الفيديو إن منى بتحاول تكلم فراغ موجود جنبها، هديتها. وهي بتقولي يعني دي كانت شبح؟ هديتها، فهمتها إن تقفل الموضوع ومش عاوز أسمع تاني، طلعت المكتب الساعة عشرة اتصلت بإسلام بيه، قالي: كنت لسه هكلمك، تقرير الأدلة الجنائية جه بالليل، إن بصمات خال العيال على علبة المجوهرات والفازة واعترف في المباحث إنه هو اللي ولع في البيت، وضرب بنت أخته بالفازة على دماغها، قولتله تمام وقفلت، دخلت الاستراحة، قفلت، وحالة انهيار على السرير، حالة ما بين الإيمان واليقين والثقة في الله والحمد والشكر والفرح والحزن والبكاء والضحك، حالة لا يمكن تفسيرها، بس كانت مريحة جداااا. مريحة بجد.

«وتبقى مشرحة زينهم مكان خارج الإطار الطبيعي للحياة، بأبعاد استثنائية للزمان والمكان والأشخاص، بوقائع لم يشهدها البشر العاديين يوما، ولن يشهدها أبدا».

الحكاية الحادية والعشرون

قبل كل شيء، أود أن أخبركم أن تحتفظوا بكتاباتي هذه، أنا سأموت خلال خمس سنوات على الأكثر. كل الحقائق تقول ذلك، وربما تكون حكاياتي وقتها كرسومات (دافنشي) تباع في مزادات (كريستي) بلندن لكل الموجهين والمحزونين، وبآلاف الدولارات.

طبيب القصة حصلت في قرية تابعة لطنطا برضه، اسمها محلة مرحوم وكانت يوم الوقفة بعد المغرب وصباح العيد.

قبل ما أبدأ فيها، أكيد طبعا كلكوا شفتو فيلم (أدرينالين) وأكيد شدتكو الحطة بتاعة إن الجثث بتكلم الطبيب الشرعي وبتوجهه لسبب الوفاة. الكلام ده كلام فاضي، أو بمعنى أصح كنت بعنبره كلام فاضي لحد الحالة دي، إخبارية عادية جدا من رئيس مباحث مركز طنطا؛ إن فيه جثة بدون رأس وجدت في الماء وتم نقلها لمشرفة مستشفى الجامعة بطنطا، رحتم المشرفة مع الفريق بتاعي اللي مكون من اثنين، السواق ومساعد التشريح.

المهم، بدأت (الريكوردينج) بتاعي كالتالي:

«جثة لأنثى في العقد الثالث من العمر؛ مفصولة الرأس على مستوى الفقرة العنقية الثالثة، والرأس غير موجودة، ترتدي حمالة صدر برتقالية اللون، وبنطال جينز أزرق اللون، وسليب حريمي برتقالي اللون، ولا توجد أي ملابس أخرى، والملابس جميعها خالية من القطوع والتمزقات، والجثة في حالة تيبس رمي وبدائيات تحلل، وأثار غمر في الماء لفترة تقارب يومين».

بدأنا الشغل.

طعنة في أسفل يسار الصدر واصله للرئة اليسرى محدثة نزيف داخلي، غالبا هي سبب الوفاة. لكن استنتي، بفحص الجرح غير المستوى بالرقبة تبين أنه حيوي، يعني بدأت عملية فصل الرأس عن الجسد أثناء حياة البنت. مكانتش لسه ماتت.

عصبي الإيدين في حالة اسمها توتر رمي، ودي حالة بتحصل مع الوفاة اللي تحت ضغط عصبي رهيب زي الخنق أو الغرق. ضوافر البنت مقصوصة كويس جدا وبالتالي صعب نلاقي فيها أي أنسجة بشرية أثناء المقاومة. الإيدين في حالة تخشب، والأصابع محيطية بجرح الرقبة بشكل غريب، وكأنها كانت بتحاول تحمي نفسها وتخشب بعد الوفاة على الوضع ده. التخشب ده شيء طبيعي وعلامة من العلامات التي يتحدث بعد الوفاة، وبنقدر نفكه عن طريق الشد القوي للذراع من عند المرفق وتحريكه في أكثر من اتجاه، لكن ده الطبيعي.

غير الطبيعي بقى، إن أنا والمساعد أخذنا مجهود رهيب عشان تبعد إيديها عن رقبته وكأنها مصرة إن فيه حاجة هنا، وقتها الصراحة ملتفتتش لكده واعتبرته

تخشب عادي مع التوتر الرمي فزيادة شوية.

كملت التشريح، البننت غير عذراء، من فترة قصيرة، تقريبا شهر، وبفتح الرحم تبين أن فيه حمل في نهاية الشهر الثاني.

أوك. كده حددنا سبب الوفاة، أخذنا عينات لـ (DNA) من البننت والجنين أخذنا عينات تانية عشان تدور عن السموم والمخدرات؛ لو كان تم تخديرها قبل الجريمة لقينا كل ده سلبي.

لحد كده القصة بالنسبة لي كطبيب شرعي منتهية، والباقي شغل مباحث.

روح عادي جدا. وكنت وقتها مقيم في فندق اسمه (بانوراما) في طنطا، في شارع النحاس أخذت شاوور وقلت: هنام شوية وأقوم انزل البلد عشان العيد.

أنا بطبيعتي مبلمش، نادر جدا لما أحلم بشيء وبعتر ده نعمة من ربنا خاصة مع طبيعة شغلي، لكن حلمت بالبننت دي، وده كان في حد ذاته شيء مبهر، ولابسة فستان زفاف لكن بسيط جدا، وعليه بقع دم كبيرة وجسمها كامل بالرأس وبتشاوري على رقبتها، قمت مستغرب جدا. حاجة بالنسبة لي غريبة إني أحلم أساسا، واشمعني الحالة دي؟ وقصدها إيه بمشاورتها على رقبتها؟ هل عاوزة تعرفني إنها اندبحت وهيا عايشة؟ ما أنا عارف! مفهمتش! كملت نوم. علمت نفس الحلم وقمت، كملت نوم حلمت نفس الحلم، قمت متكرر جدا كوني بحلم أساسا، ده شيء مكدرني. نزلت اللوبي شربت قهوتي وقررت أنزل البلد، وفي نفس الوقت صورة البننت مش بتفارقني وده خائفتني؛ لأن عمرها ما حصلت، وبعدين بالنسبة لي الجثة انتشرت وانتهت، وحددت سبب الوفاة، وتاريخها، والموضوع انتهى.

ركبت عربيتي وبدأت أتحرك والموضوع مسيطر على دماغي. وفي نص الطريق قررت أرجع أبص على الجثة دي تاني، كده كده الجثة هتفضل في التلاجة فترة لحد ما نعرف بتاعة مين، قعدت أقنع نفسي إني بعد العيد أروح، لكن إحساسي إني عاوز أتخلص من القصة دي خلاني أرجع المشرحة.

دخلت.

عم مصطفى طلعي جثة البننت بتاعة النهارده اللي من غير راس.

- خير يا باشا ما نما شرحتها!

- لا عاوز أبص عليها تاني.

الراجل استغرب وراح طلعتها وحطها على ترابيزة التشريح، رايح أبص عليها وأنا دماغي كلها في صورة البننت، وإشارتها لرقبتها، ودي بس اللي أنا جاي أبص عليها، بصيت على الرقبة بتركيز أوي المرة دي، لقيت شيء غريب جدا!!!

الجلد عند موضع الذبح مشرشر تماما بشكل دقيق أوي، وكأنه مقطوع بسكينة مشرشرة مش سكينة عادية، بدأت أركز مع الجرح وأصوره من كل الاتجاهات. وطلعت برضه مش فاهم حاجة، فكلمت رئيس المباحث.

- سامي بيه إزيك؟
- حبيبي يا دكتور كل سنة وانت طيب.
- البنبت بتاعة النهارده ظروفها إيه؟
- والله عندنا من يومين محضر تغيب لبنبت، بتتطبق عليها نفس المواصفات، وبعتنا نجيب أمها عشان تحاول تتعرف عليها من لبسها.
- طيب عرفنى ضروري وصلت لإيه.
- استنى خليك معايا، تمام يا باشا هي البنبت بتاعة محضر التغيب. كده عرفنا هي مين وهنبداً تشتغل بقا.
- هتبدأ امتى؟
- بكرة الضهر.
- طيب أنا جاي
- تنورني: بس اشمعنى الجثة دي يعني؟
- لا عادي بفكر في كام حاجة بس.
- تمام في انتظارك.
- تاني يوم نمت شوية بعد صلاة العيد. محلمتش.
- كنت قايم مبسوط جدا موضوع إنى أعلم أساسا موترني جدا.
- قمت بعد الظهر، رحمت قسم الشرطة، قابلت رئيس المباحث.
- احكي يا شهرزاد.
- قالي دي بنت مخطوبة والمفروض هنتجوز بعد (7 شهور) نزلت من البيت العصر من (3 أيام) قالتهم، هشتري حاجة، والأم قالت: إنها كانت لابسة كل ذهبها، وبما إنك بتقول: إنها حامل فإحنا شاكين في أبوها، أو واحد من إخوانها الاتنين يكون قتلها بداعي الشرف
- طيب، سألته وأنا محدد أنا عاوز إيه بالضبط، عاوز أعرف إخوانها وأبوها بيشتغلوا إيه.
- كلهم بيشتغلوا في مصنع مواد غذائية صغير بتاع حد قريبيهم، اممم.
- وخطيبها بيشتغل إيه، قالي: خدليها مستبعد جدا لأنه منهار من ساعة ما عرف تماما وكمان مكانش موجود وقت اختفاءها، ده شغال في القاهرة.
- تمام، بس هو شغال إيه؟
- نجار مسلح.

حبيبي ابعث بقى هاته عشان هو القائل، قالي: از ااااى؟ قولتله: هتشوف دلوقت.

بعث جاب الولد من تحت، كانوا محجوزين كلهم، دخل في حالة انهيار مش قادر يقف، قولتله: اقعد، وطلبته لمون يهدي أعصابه

منظر الولد فعلا كان بدأ يخدعني، قولتله: أنت شغال إيه؟

قالي: نجار مسلح، وهو بيتشحتف.

قولتله: كويس، وإيه الادوات اللي بتشتغل بيها؟

قالي: أسماء أدوات كتير جدا وأنا مستني يقولي: المنشار، مبيقولش.

أسأله وإيه كمان؟ قالي أي حاجة ثانية، وميقولش المنشار.

قولتله: والمنشار!!

ارتبك، وقالي: آه والمنشار.

قولتله: ودي حاجة تتنسي حلو جدا المنشار بتاعك فين بقى؟

قالي: أنا سيبته في الشغل في القاهرة.

فرد سامي بيه قاله: أنت مش جاي ياد ومعاك شنطة الشغل بتاعتك على كتفك؟ بدأ يعرق، وبيقول: آه بس المنشار سيبته هناك، قاله: طيب إحنا هنطلع على هناك دلوقتي يا روح أمك نجيب المنشار من هناك.

- فين اللمون يا سامي بيه؟

جه اللمون حاطه ندامه، وأنا فتحت صورة رقبة البننت على الموبايل، وروحت للولد وقولتله بصوت واطي: أنا عاوزك تفهمني أنت ازاي قدرت تنشر فقرة يا مفتري!! الواد انهار تماما، قلم كده على قفاه من معاون المباحث، قال: يا باشا انا هقول كل حاجة قاله: طب اهدي بس واشرب اللمون واحنا معاك متخافش، وبدأ الكلب يحكي: خطيبته كانت حامل منه، ولما اكتشفت الحمل طالبته بإنه يتجوزها بسرعة ومينفعش تستنى كل ده، بطنها هنكبر وأهلها هيموتوها.

يوم اتصل بيها، قالها: أنا هاجي بس متقوليش لمخلوق إن أنا جاي عشان همشي على طول: ولو أهلي عرفوا إلى جيت ومشيت من غير ما أروح لهم هيزعلوا، وهاتي الشبكة بتاعتك معاكي: عشان أنا معايا شبكة، واحد صاحبي كان خاطب وفرکش، وشبكته جميلة أوي، وأكثر من بتاعتك فلو عجبك خديها واديله بتاعتك المهم نتقابل في الأرض اللي بنتقابل فيها، أرض زراعية مقطوعة كده، البننت راحت قابلته. مارس معاها الجنس الأول، وبعدين والبننت بتلبس ملابسها طلع مطواة وطعتها في صدرها، البننت وقعت وفضلت تستعطفه بسببها، فضل بكل برود واقف وهي بتنزف وولع سيجارة ومستنيها تموت، لحد ما البننت اغمى عليها، فكرها ماتت، طلع المنشار من شنطته وبدأ يفصل راسها عن جسمها، فضلت تتحرك و حاولت تقاوم لكنه كمل الدبح لحد ما سكتت وفصل الراس وحطها في كيس بلاستيك، وقله

وبعدين حطها في شوال، وخط معاها المنشار وباقي لبسها، ورماهم في مجرى مائي اسمه (الملاحات) ورجع بالليل شال الجثة في شوال ورماهم في الملاحات , الجثة ظهرت لكن الراس مظهرتش، قالوله: وأنت عارف المكان اللي رميت فيه الراس؟ قال: آه. طلب قوم يا اين *** (وشوية شتايم كده مصحوبة باصوات غريبة والفاظ أكثر غرابة).

اتحركنا للملاحات، شاور على المكان، نزل ناس، طلعو الشوال، وكان فيه نفس اللي قاله. والرأس موجودة في كيس بلاستيك مقفول. نقلنا الرأس واللبس للمشرحة والمنشار للنيابة، فحصت اللبس عباية سوداء وبودي وحداء، وبعدين فتحت الكيس بتاع الرأس وطلعتها. كل ده عادي وبتقابله كل يوم.

اللي مش عادي إن وش البنت يطلع نفس البنت اللي شفتها في الحلم، وبنفس الابتسامة.

∞ ∞ ∞ ∞ ∞

الحكاية الثانية والعشرون

أما أنت أيها الموت

لي اثني عشرة عاما م أفعل شيئا مهما سوى البحث عنك بين الجثث و المشارح، في
النهارات والليالي، في الضوء وفي العتمة، وحتى اليوم لا جديد يذكر فيشكر اين
انت ايها الغادر!!!!

فكرت أن انسحب من بين الجثث قليلا، كي تطمئن لي، التمكن من رؤيتي بوضوح
أكثر، فقد تعبت من اللاجدوى ولم يبق لي ما أقوله لحياة قلقة، لا أنا أبه لها كثيرا ولا
هي تناكرني الا بمزيد من المأسى. تعالى، تقدم، أنا صدقا توأمك لمشيمة واحدة، توأم
ملتصق لا تستطيع كل كتائب الجراحين في العالم فصله دون فاجعة الرحيل،
فاقترب، لقد نفذ صبري في انتظار كبرياء النفس الأخير.

أما أنت. دعيني أقول لك: أولا وانت غائبة عني منذ سنوات، أحبك بحجم السماء،
أحبك يا حبيبتي، دمت للفرح والسعادة، اعذريني على موتك، أنا السبب، دائما أنا
هكذا، الحياة معي متأخرة دائما عندما يتعلق الأمر بالمواعيد الحاسمة.

المكان: مشرحة زينهم.

الزمان: يناير 2016.

التوقيت: الثانية عشرة ليلا

” إشارة بوجود بقايا جثة آدمية عثر عليها بشقة مهجورة، بأحد تجمعات المقطم
السكنية ذات الكثافة السكانية المنخفضة، وقد قالت التحريات الأولية: إن الشقة مغلقة
منذ شهور، وقد اشتكى الجيران مرارا من وجود أصوات صراخ وشجار بالشقة ليلا
باستمرار. ومع تعدد الشكاوى تم استصدار إذن من النيابة العامة وفتح الشقة، فتبين
وجود فوضى عارمة بالمكان وتكسير بالأثاث، ووجود بقايا محترقة يشتهب أنها لجنة
آدمية “.

- شعبااااان، شعبو لاااا، يا شعبو لاااا.

(داخل وماسك في إيده كتاب صغير مفتوح)، نعم يا سيدتي.. قصدي يا سيدي.

- سيدي! كتاب إيه اللي معاك ده يا شعبان؟

- ده روائع الشاعر نزار قباني) يا معالي الرئيس.

- (نزار قباني)!! وأنت مالك ومال الكلام ده يا شعبان؟

- أهه يا ريس بنتسلي أنا والشيخ سعيد بحفظه كلمتين ينفعوه، طب والله لاسمعك
حاجة يا ريس، اسمع يا كبير. بيقولك: ” إذا ما صرخت أحبك جدا، فلا تسكتيني “.

- اممم.

- " إذا ما ضربت شبابيك نهديك كالبرق كل مساء فلا تطفئني " .

- أحيه .

- " إذا ما نرقت كديك جريح على ساعدك فلا تسعفيني " .

- ديك أمك يا أخي

- اسمع دي بقا يا معالي الرئيس، " إذا ما تصرفت كغلام شقي وغطست حلمة نهديك بالخمير فلا تضربيني "

- اطلع بره يلاااا .

- ياريس اسسس .

- (مقاوما الضحك بعنف) الطططططط .

- طب اصبلنا كاسين طاه .

- انفجار ضحك .

اسمع، سيب الكتاب ده هناع سيبيب، وانزل بلا فيه جثة جاية من المقطم بيقلوا أشلاء، جهزها أما نشوف إيه قصتها، قال: دول اتنين يا معالي الرئيس، قولته: يا بني المذكورة بتقول: أشلاء في شقة، قال: لقيو أشلاء ثانية في الشقة اللي قصاها على طول هما بعد ما فتحوا الشقة الأولى، ادولها رقم قضية وبعثوها، وبعدين فتحوا الثانية لقيوا أشلاء برضه ادوها رقم ولسه جاية كنت هجيبها لك معايا .

اممم، ياما جاب الغراب لأمه يا أخويا، طب جهزهم يلا وأنا جاي وراك أهه، بيسحب ايده ياخذ الكتاب سيبيب الكتابااا .

طلع أرفان مقابل الشيخ سعيد جاي جايب قهوة بيقوله: اهه خد الكتاب يا بومة، دنا يا دوب لسه بقوله قصيدة لا تضربيني دي خده، أمال لو كنت قولته قصيدة ثورة نهد كان خدني أنا بقا ورا مصنع الكراسي، وبيعلي صوته كالعادة يسمعني ويقول: ربنا على الظالم يا ريس، طلعت بسرعة قولته: بتقول إيه يا شعبان؟ قالي: لا يا ريس ده الشيخ سعيد بيسألني عامل إيه؟ بقوله أنا تمام. كويسسس .

شربت القهوة، ليست، ونزلت، الجنتين كل واحدة في كيس، جثث ومحطوطة على ترابيزة، فتحنا أول كيس، وبدأنا، وده أي يا شعبان؟ قال: مكانش في الكتاب يا معالي الرئيس، بصينته بزغرة كده .

(ريكوردينج)

«أشلاء بشرية محترفة واصلة لدرجة التقم، عبارة عن عظام الحوض والجزء العلوي من عظام الفخذين، محاطة بعضلات متقمة ولا يمكن الجرم بهويتها، عما إذا كانت لذكر، أم أنثى، ولكن يشير شكل عظام الحوض أنها لذكر بالغ كبير السن، وعظام الفخذ محطمة، ومقطوعة على مستوى أسفل رأس عظمة الفخذ بحوالي

(25 سم) على الناحيتين بينما عظام الحوض سليمة، حيث تم أخذ عينة عظمية لإجراء أبحاث الـ (DNA) للتأكد من الجنس وغمهيدا لإجراء أبحاث المقارنة»

ليه ده ان شاء الله؟ أين بقية الرجل ده يا شعبان؟ والله يا معالي الرئيس ما أخذت حاجة، انا لسه واكل حتى، طلب هات الثانية، بقيته.

(ريكوردينج)

«أشلاء بشرية محترقة واصلة لدرجة التحم، عبارة عن عظام القفص الصدري والترقوة محاطة ببعضلات محترقة ومتفحمة، ولا يمكن الجزم بهويتها عما إذا كانت لذكر، أم أنثى، ولكن يشير شكل عظام القفص الصدري أنها لأنثى بالغة كبيرة السن، والأشلاء مقطوعة أسفل مستوى الضلع الأخير، وجميع العظام سليمة وخالية من الكسور، حيث تم أخذ عينة عظمية لإجراء أبحاث الـ (DNA) للتأكد من الجنس وتمهيدا لإجراء أبحاث المقارنة».

فين بقية الست يا شعبان؟ بص على الأشلاء الثانية وقالي: مش عارف ليه حاسس إن ده هو اللي ورا المصابيح دهى كلها، قولتله: يعني إيه؟ يعني إحنا خلصنا كده؟ فين. التشريح؟ فين المتعة؟ فين الساسبينس؟ قال: وفين كتاب نزار يا ريس؟ سييته ومشيت وهو بيحط الأشلاء في الكيس بالراحة ويقولها: بر اااااااا، فلا تكسريني.

طلعت فوق، لاء أنا مش مرتاح، مبحش الغموض أنا. لازم أفهم.

- الووو، أحمد بيه، مساء الفل. تمت ولا إيه؟ - هو إحنا بنتام يا دكتور؟

- هو إحنا بننام يا دكتور؟ مساء العنب.

- إيه بقا يا ريس قصة الأشلاء دي؟

- والله يا دكتور ما فاهم حاجة، إحنا بقالنا فترة كام شهر بيجيلنا بلاغات إن فيه أصوات خبط، ورزح وصويت في الشفتين دول طول الليل، والشفتين مقفولين ودي ملكية خاصة أنت فاهم، لما الموضوع زاد أخذنا إذن نيابة ورحنا فتحنا لقينا دول، ومش فاهم حاجة، هما جثة واحدة؟

- لا هو لسه الـ (DNA) هيقول بس بالخبرة كده دول راجل وست. مش جثة واحدة

- يا اااااا دي الوش، دنا قلت هيطلعوا جثة واحدة، وحد قتله وقطعه وولع فيه ورماه كده، خاصة إن الشفتين الأثاث كله متكسر، يعني كان فيه خناقة.

- والتحريات بنقول إيه يا ريس؟

- الشفتين دول كانوا من سنتين مركز علاج إدمان، وبعدين اتشمع من سنة لأنه كان مخالف، بعدين فيه راجل وست جم شالوا الشمع وقالوا: إنهم اشتروا الشفتين. وكان فيه ناس كتير بتيجي تزورهم، وبعدين الراجل والست دول اختفوا من كام شهر والشفق مقفولة من يومها.

- طب بقولك إيه، أنا عاوز أشوف الشفق جدعنة كده

- أوامر يا ريس، بس أنا بنام على نفسي، يا تخليك للصبح يا شبعت معاك بهاء لو عاوز دلوقت.

- لا ابعت بهاء، أنا جاي، نص ساعة وهكون عند القسم، سلام.

- ماشي، سلام.

شعبااااااااااااا، شعبااااااااااااا، أووووف، يااااااا زفت

جاي بيعتذر وبيقول: كنت في الحمام فلا تضربيني.

قولتله: أنا رايح مشوار مهم وجاي بعد ساعة، قال: تمام يا ريس لا ازعجك ولا ترعجيني.

ركبت عربيتي ومشيت، قابلت الأمين بهاء عند بوابة القسم، اتحركنا على الشقتين. منطقة مقطوعة، فيها (4 عمارات) جنب بعض، واضح إن الشقق الساكنة تقريبا لا تتجاوز (15 شقة) من بين (80 شقة) في الأربع عمارات، الشارع ساكت تماما، مفيش أدنى حركة أيا كانت، عسكري وغفير واقفين قدام باب العمارة ومولعين نار عشان يتدفو طلعنا، العسكري بيقول لبهاء يا عم أنا دمي نشف، ومرعوب، كل شوية نسمع صرخة جاية من جوه شعر راسي بيقف، ارحمني يا عم بهاء ومشيني من هنا، بهاء فضل يزعله ويقول استرجل ياد، أنا طبعنا بسمع حاجة زي دي ببقى في قمة السعادة والانبساط طلعنا الدور الخامس اللي فيه الشقتين، وهو آخر دور مسكون في العمارة، مفيش نور على السلم. والأسانسير كان عطلان، منور كشاف الموبايل والدنيا ضلمة كحل، وفوق (5 أدوار) فاضيين، بهاء بدأ يقدم رجل ويأخر رجل، فحببت انكشه واحنا على آخر درج سلم، قولتله: بس انت عجبتي يا بهاء لما زعقت للواد وقولتله: استرجال، عجبتي بجد.

رد بتردد وقال: آااه ما هو لازم، وبدأت خطوته تبقى أتقل، وأنا مستتبه يعترف ويقول أنا خايف، وأنا طالع خبطت غصب عني في خشبة على الأرض عملت صوت جامد وسط السكون ده لقيت بهاء، حاضن فيا، ضحكت جامد، قال: يقولك ايه يا دكتور، امسك كده المفاتيح دي يا دوب جبت الكشاف على المفاتيح ومسكتها من إيدته، ملقنيش بهاء كملت، واضح ان مفيش أصوات صرخات ولا شيء، وصلت لأول باب جربت في المفاتيح لحد ما فتحته، بمجرد ما الباب تفتح سمعت صوت صرخة قوية جدا كأن حد بيتعذب طالعة من آخر الشقة، وقبضة قلب لا أخطئها، بتعرفني إن ثمة شيء ما ورائي شيء هنا، قرأت آية الكرسي ودخلت، الصراخ بقا أعلى، كل نص دقيقة صرخة ومن أماكن مختلفة في الشقة، حاولت أشغل النور، واضح إن الكهرباء مفصولة عن الشقة، الحوكبه ازداد شاعرية، كنت مبسوط لكن ندمان إني مجيبتش شعبان معايا بدأت ألف في الشقة معتمد على كشاف الموبايل، الأثاث كله محطم. بس دي مش آثار معركة ده حد تعدد يحطمه بالشكل ده، لأن فيه أجزاء منشورة بالكامل نشر حاد. كمان الكنب مشقوق ومطلع القطن اللي جوه، وكمان المراتب، مش معركة خالص دي، الصراخ شغال وبمعدل أعلى، ويقو صوتين مختلفين مش صوت، وواضح إنهم جايين من المطبخ والحمام، بدأت

أتحرك ناحيتهم وأنا بردد (ولا يؤوده حفظهما وهو العلي العظيم) الصراخ بيزيد كل ما أقرب، لكن مش دي المشكلة الأكبر، المشكلة في رائحة لا تخطئها أنف طبيب شرعي أبدا، أبدا، جثة متعفنة، بدأت أتحرك جوه الحمام، اضطريت أوقف الآيات، ومبقاش شاغلني الصراخ اللي حسيته جاي من قاعدة الحمام نفسها، إنما شاغلني ريحة التعفن اللي زادت جدا جدا أول ما قربت، وكل ما أقرب بتزيد أكثر، بدأت ألف بالكشاف في المكان يكون فيه فار ميت أو شيء. مفيش حاجة. والبانيو واضح إن هو اللي تم فيه حرق الأشلاء اللي جاتلنا، آثار الحريق واضحة فيه، والرائحة البشعة جاية من القعدة، بصيت جواها، مفيش مية، لكن الرائحة مقبحة، وحسيتها متحركة من مكانها، والصراخ بيضعف شوية ويقوى شوية، لكن الغريب لما أقرب من مصدره يقف ويشتغل من مكان تاني، يعني أول ما قربت من قاعدة الحمام، مبقاش فيه صوت في الحمام والصوت أصبح جاي من المطبخ، حسبت قاعدة الحمام مخلوطة أساسا مش ثابتة، بزقها برجلي اتحركت، وإذا برائحة لا يمكن لبشر تحملها على الإطلاق، أسوأ رائحة لا يمكن أساسا إنك تكون اتعرضتلها في يوم، زقيتها برجلي أكثر وصراخ المطبخ بيزيد، ولقيت الماسورة الكبيرة فيها شيء غريب جدا، شيء عمر ما حد يتخيله أجزاء من رجل بني آدم، منقوعة في المية جوة الماسورة، أو بمعنى أدق هيا سدت الماسورة ففضلت المية محجوزة فيها، ومحاطة بالفضلات ورائحة لا يمكن وصفها الفضول هيموتني، نفسي أشوف إيه ده؟ طلعت البلكونة. ناديت على بهاء، فتحت العربية بالريموت وقولته: في جوانتيات في شنطة العربية حد يطلعني واحد، أنا بتكلم وصوت الصريخ شغال ورايا، وكمان تخبيط، بهاء طلع جونتني من العربية وفي لهجة حازمة قال العسكري، يلا طلع ده للدكتور بسرعة. العسكري مرضيش، بهاء فضل يهدده بأنه هيديله جزاء تلت أيام، والواد يقوله: إنشالله (3 سنين) حتى، اطلع ألت، ربع ساعة مناقشات وصلوا الحل، إن الغفير يطلع لحد الدور الثالث بس، وأنا اقبله وياخد (200 جنيه) من بهاء، قابلته وأخذت الجوانتي، لبست ورحت، وشديت، لقيت المنظر هتشفوه تحت ده أجزاء من رجل بني آدم، تلت أجزاء، ورا بعض محشورين جوه الماسورة، مهترتين بفعل المية. طلعتهم كده مش صلاحياتي، اتصلت بأحمد بيه، قولته: لازم تجيلي حالا. قالي: بقولك إيه أنا لا كنت هنام ولا روحت ولا هدخل الشقق دي من الآخر كده. بعد الحاج قالي: أما النور يطلع، الساعة كانت بقيت أربعة الفجر. فضلت مستني في البلكونة، شعبان اتصل، قال: إن فيه (3 جثث وصلوا من العياط) فولته: أنا لسه قدامي شوية، وهجيب الخير معايا، قالي: ماشي بس اذا جيت لقيتني نمت لا توقظيني، الساعة بقيت سنة، جه أحمد بيه ومعاه عضو نيابة صديق ليه، بدأنا وطلعت القطع، ثلاثة كبار وحتت صغيرة، حنت الرجل طالعة بحتت البنطلون بتاعها والصراخ شغال في المطبخ، والراجل بتاع النيابة قلبه جامد للأمانة، فضل واقف بس من غير ما يبص، و (50 منديل) على مناخيره، وأحمد بيه على باب الشقة، والصريخ شغال في المطبخ، طلعت كل اللي قدرت عليه، رحمت المطبخ. عارف أنا رايح فين تحت الحوض شفت الماسورة. نفس الوضع، ايدين وقطع تانية، بسرعة رحنا على الشقة الثانية اللي كان صراخها بدأ يهدى كثير، مع طلوع النور. كنت عارف رايحين فين، الحمام، والبانيو كمان واضح إن هو اللي تم فيه الحريق، وبنفس الطريقة، زقيت

القاعدة، طلعت بقايا الست. رجلين وقطع، ومن ماسورة المطبخ طلعت الباقي، النيابة استدعت الأدلة الجنائية، بدأوا يدوروا كويس جدا، لقيو آثار دم على كرسي، أخذوا منها عينات، وتم نقل البقايا للمشرحة، داخل على شعبولا والأشلاء في عريبة إسعاف ورايا. كل دقيقة تقف وينزل السواق والمسعف يرجعوا من الرائحة، ويكملوا ثاني، دخلت قدام باب المشرحة، الإسعاف جاية ورايا والريحة قلبت المنطقة كلها، شغلت السارينه، شعبان طلع وقف قدام الباب، وأنا ببصله وبيتسم وهو بيكلم الشيخ سعيد، ويقول: أنا قولتله لا توقطيني فقرر يطلع ميتيني، أخذنا القطع، ركبناها زي الـ (puzzle) على أد ما قدرنا، وشعبان قاعد ينقل القطع اللي ليها رائحة محصلتش عندنا قبل كده وبيقولها: أرجوكي لا تقرفيني، إنما الرأس بتاعة الجنتين فين؟ مش عارفين، خلصنا وحتينا كل جثة في كيس ودخلوا التلاجة الكبيرة، كانوا هاديين ومؤدبين طول النهار، ومع بداية الليل قلبوها مدعكة، دار الأوبرا، بس على فترات طويلة، تقريبا كل ما يفتكروا اللي حصل، فضولي قاتلني، عاوز أعرف، نتيجة الـ (DNA). أثبتت فعلا إن ده راجل ودي ست، لكن مفيش حد من أهل نقارن معاه عشان تعرف مين دول، الأدلة قدرت تطلع عينة (DNA) من الدم الناشف على الكرسي بكفاءة للأمانة، كان مقرر إن القضية دي تفضل غامضة للأبد جنتين مجهولين بدون رأس، مفيش أي أوراق، أو أي موبايلات، أو أي حاجة تثبت أي شخصية في الشفتين، عملنا مقارنة للـ (DNA). طلعت عينة الدم الناشف، لشخص ثالث تماما، لا هو الراجل ولا الست، لحسن الحظ الرهيب. العينة كانت متسجلة في الأدلة لشخص من بلبس كان متهم قبل كده في جريمة قتل فاتعمله (DNA) قبل كده، لكن طلع منها براءة، لكن كان قدر رباني تام إنه يتهم في قضية سابقة عشان تتحفظ نتيجة الـ (DNA) بتاعته على الجهاز، وتكشفه لما لقيوها نفس الدم الناشف، طبعا في ساعات الشرطة جابته، وقعد يحكي:

الراجل والست كانوا بيعملوا بالسحر والدجل والأعمال، والبيه كان بيتعامل معاهم وكان بيروحهم لما يحب يأذي حد، البيه قرر يتجوز، أقرب صاحب ليه حب يديله تذكارات الصداقة، فراح للراجل والست وخلاهم يعملوله سحر بالربط، البيه في ليلة الدخلة طلع مبيعرفش، صاحب تالت ليهم راح قاله: إن صاحبه الثاني هو اللي عمل فيه كده عند نفس الراجل والست، فقرر ينتقم منهم، عشان إزاي يعملوا سحر للزبون بتاعهم، دي مش أصول دجل ولا أصول كفر دي، راح البيت غافلهم وقتلهم بطعنات سكين في الرقبة، خد جثة الراجل الأول قطعها بساطور، حط اللي حطه في الماسورة، منطقة الحوض مرضيتش تدخل ومعرفش يقطعها، حرقها في البانيو، بعدين نقل جثة الست الشقة الثانية، وعمل نفس الطريقة، لكن قدر يقطع الحوض ويدخله، الصدر كان تعب، فحرقه برضه، بدأ يدور على الأسحار. هو عارف إنهم بيحطوها عندهم، دور في كل مكان داخل البيت حتى الكتب فتحه والمراتب، كان كل سحر محطوط في كيس عليه اسم صاحبه لقي أكياس بالألاف لكن ملقيش أبدا أبدا الكيس بتاعه اللي عليه اسمه، أخذ كل الأسحار وكل الورق اللي في الشقة حرقهم في البانيو، وأخذ الرأسين في شنطة رماهم في منطقة جبلية غير معروفة، السحر بتاعه بالذات مقدرش يوصل ليه، وفضل مبيعرفش لحد يوم ما اتقبض عليه، يعني إعدام ومبيعرفش، الاتنين مع بعض.

الجثتين فضلوا مجهولين فترة طويلة، قرابة 8 شهور محدش عارف مين دول، وورقهم اتحرق، والواد اعترف اعتراف كامل بالقتل مش محتاج يكذب في أي تفصييلة صغيرة، بعد (8 شهور) كاملين الراسين اتلقوا في كيس مشمع أسود مش شنطة، ولقيوهم في مصرف صحي، مصرف مياه مجاري، وفين، في أسوان. رغم إن الولد عمره ما سافر في حياته أسوان ولا جاب حتى أول خط الصعيد، اتأكدنا إن الراسين بتوع الجثتين، لكن للأسف فضلوا مجهولين حتى اليوم، بكل الغموض مين دول؟ وازاي وصلوا مصرف صحي من منطقة جبلية، وفي أسوان؟

سورة وَ يَوْمَ يَخْشَرُهُمْ جَمِيعاً يَا مَعْشَرَ الْجِنَّ قَدِ اسْتَكْثَرْتُمْ مِنَ الْإِنْسِ وَقَالَ أَوْلِيَاؤُهُمْ مِنَ الْإِنْسِ رَبَّنَا اسْتَمْتَعَ بَعْضُنَا بِبَعْضٍ وَ بَلَّغْنَا آجَلَنَا الَّذِي أَجَلْتَ لَنَا قَالَ النَّارُ مَثْوَاكُمْ خَالِدِينَ فِيهَا إِلَّا مَا شَاءَ اللَّهُ إِنَّ رَبَّكَ حَكِيمٌ عَلِيمٌ

[الأنعام، آية 128]

إِنَّ الَّذِينَ كَفَرُوا وَ صَدُّوا عَنْ سَبِيلِ اللَّهِ قَدْ ضَلُّوا ضَلَالًا بَعِيدًا (167) إِنَّ الَّذِينَ كَفَرُوا وَ ظَلَمُوا لَمْ يَكُنِ اللَّهُ لِيُغْفِرَ لَهُمْ وَ لَا لِيَهْدِيَهُمْ طَرِيقًا (168) إِلَّا طَرِيقَ جَهَنَّمَ خَالِدِينَ فِيهَا أَبَدًا وَ كَانَ ذَلِكَ عَلَى اللَّهِ يَسِيرًا (169)

[سورة النساء]

أما بخصوص حسن الخاتمة لمحبيها، فهاكم صورة ليد جثة مستخرجة من القبر بعد دفنها بخمس أيام ترفع إصبعها بسلامة التوحيد. لا إله إلا الله.

لمثل هذا اليوم فأعدوا، والله لا مال ولا بنون الا من الله بقلب سليم، أصلحوا قلوبكم من الداخل، طهروها، انزعوا منها الغل والحقد نزعا، والله إنهما آفة القلوب، يحول بينك وبين أن تأتي الله بقلب سليم، قد تكون عاصيا، أو مذنبا، أو مقصرا، لكن ربما وحده قلبك السليم الخاشع لله والموحد له، ينجيك.

أخيراً، كل هذا الذي شاهدته من مواقف قد ترعب البعض، وأخرى تدهشهم، لم يكن نتاج قوة إيمان وصبر وخشوع مني، لا والله، إني أعصاكم الله، وأكثركم هنا ذنبا بأوزار كالجبال، ولكن قذف الله في القلب بعض محبة له ويقين فيه، فحماتي منهم ونجاني.

وسبحان من خرت لهيئة ملكه * * * جن البرابر وانجلى احزانيه

فكأنني بالرمح أضرب قاتلا * * * الأرض أرضي والزمان زمانيه

ناصر الفراغة

الحكاية الثالثة والعشرون.

ورحلت سيدتي كما يرحل كل الموتى.

في حضرتها كان الأمان يبدو جميلاً، أسطورياً، وكنت لجماليتها أريد أن أحتفظ بتفاصيله عنقدة في ذاكرتي.

كان رحيلها يشبهني، يشبه قصاص حياتي، قليل الاستعمال جدا ومهياً دائماً الزوار لن يأتوا، قلبي، قلبي الذي يذكرني بابه كلما أفتحه أن الرفاق من حولي انفضوا، قلبي الذي به رائحة وجع توقظ زمن الموتى، وتفسد عليك زمانك.

حتمًا ثمة من ينال منك دون أن يقصد ابداءك، إنما باستحواذه عليك حد الإيذاء دائماً هو أقرب الناس إليك، من يمتلك سعادتك يملك كامل الحقوق في أن يجعلك تعيشاً، بحكم أنه شريك حياتك، والراعي الرسمي لك، ولن أغضب أبداً من شخص لم يؤذني، لم يخني، ولكنه اغتالني ببطء، ببطء.

المكان: مشرحة زينهم.

الزمان: نوفمبر 2014.

التوقيت: العاشرة ليلاً.

قاعد في المكتب بخلص شوية حاجات وناوي أسهر ومزاجي رايق، شعبان جي وساسك ورقة في إيده ودار بيني وبينه الحوار التالي:

- ياريس فيه إشارة جت

- طب سيبك من الإشارة، واقعد يا شعبان أنا عاوز اسألك في حاجة، إيه رأيك يا شعبان في الستات؟

- بص يا ريس الستات دول عاملين زي الموبايلات، في منهم زي الايفون كدة بمجرد لمسة منك تعملك اللي إنت عاوزه، وفي ستات زي مراتي كدة عاملة زي الثلاثة تلتمية وعشرة كدة لازم تخبطها في أي حيطه عشان تشتغل، بس يا ويالك يا معالي الريس لو طلع حظك في ست بقا (antenna) هتطلع ميتين حضرة معاليك والله يا معالي الريس.

فاصل من الضحك وبعدين كملت كلام.

- قولي بقا إيه الإشارة اللي جت؟

- قال: دا طلب للانتقال لمستشفى خاص ياريس لتشريح حالة وفاة المريض إيدز مننحر.

- طيب قولهم: إن إحنا مبنشرحش حالات الإيدز بنكتفي بمناظرة الجثة بس.

- قلت: والله ياريس هو أنا مستجد، هو أنا سعاد قاعدة تحت، ردوا وقالوا: ماشي بس هو تناظروها.

- طيب شوفلي يا شعبان ياسر وخليه يجهز العربية، وتيجي إنت معايا متجيبش حد تاني.

- أجي فين ياريس؟ بقولك حالة إيدز، تصحبك السلامة.

- بغضب زعقت، شعبان قلت إنت اللي هتيجي مش أي حد تاني.

- حسبي الله ونعم الوكيل في كل ظالم والله، لو حصلي حاجة لأعور نفسي وأجي الغوص المشرحة كلها دم، هنزل ياريس أجهز، وأجهز ياسر.

ادالي الإشارة وكان نصها كالتالي:

السيد مدير عام مشرحة زينهم.

«نفيد سيادتكم علما برغبتنا في انتقال أحد الأطباء الشرعيين إلى مشرحة مستشفى (...). في مصر الجديدة لمناظرة جثمان المتوفى الى رحمة مولاه (...). وقد أفادت التحريات الأولية إلى أنه كان يعاني من حالة نفسية سيئة، دفعته جراء ذلك إلى الانتحار بواسطة قطع شرايين يديه ولكن تم إنقاذه، وادعى حينها أن انتحاره له علاقة بالجن، ولكن هذه المرة انتحر بالقاء نفسه من فوق سطح أحد العمارات، وتم نقله ميئاً إلى المستشفى وتم إيداعه مشرحة المستشفى، الرجاء من سيادتكم تحديد سبب، وتاريخ، وكيفية حدوث الوفاة، وعماً إذا كانت الوفاة تطابق هذه الواقعة من عدمه.

استعنا على الشقا بالله، لبست الجاكت ونزلت، ياسر جاهز وشعبان قالب وشه فتوجهنا إلى إحدى المستشفيات الخاصة في مصر الجديدة، واضح إن الأهل موجودين بالخارج في حالة حزن عميق فسألتهم كالعادة: هو إيه اللي حصل؟ أخته تبرعت بالحديث وقالت: إنه كان مسافر للعمل في إحدى دول الجنوب الإفريقي، وهناك تمت إصابته بمرض الإيدز بسبب علاقة مع فتاة، فرجع ومن يومها وهو بيقول حاجات غريبة وأشياء غريبة وتصرفات أغرب، سألتها تصرفات زي إيه؟ قالت: إنه بيقول: إن معاه جنية عاشقة وكان بيعمل حاجات غريبة، كان بيقدر يولع ورق عن بعد، كان بيقف بعيد ويبص لورقة لحد ما تولع وبيقول إن الجنية دي هي بتاعة البنات اللي كان على علاقة معاها في الدولة الإفريقية؛ لأنها ساحرة وإن نفسه يتخلص منها، بس هي قالتله: إنها مش متسيبه غير بالموت، فكان لما بينطق بس إنه عاوز يتخلص منها كان بيقتد يتلوى من الألم على الأرض. أخذناه لكذا طبيب نفسي وكل أنواع العلاجات فشلت، والناس كانت بتهرب منه لما عرفت اللي كان عنده؛ لحد ما صحينا على خبط الجيران إنه رمي نفسه من فوق العمارة.

دخلت المشرحة، الولد نايم في هدوء وشكله شاب ملامحه معقوله ومفيش أي حاجة غريبة، نفيت حوالين الجثة كالعادة ومفيش أي حاجة والأمر طبيعي تماماً.

(بدأت الريكوردينج)

«جثة لشاب في العقد الثالث من العمر، متوسط القامة والبنية، يرتدي بنطال تريننج أسود اللون، وتيشرت أزرق اللون، وملابس داخلية رمادية اللون، والملابس جميعها عليها آثار أتربة وقطوع تتماشى مع تلك المشاهدة من جراء السقوط من علو، والرسوب الدموي بلون بنفسجي داكن بخلفية الجثة؛ عدا مواضع الاتكاء والتعفن الرمي، لم يتضح ظاهريا بعد، والجثة في حالة تيبس رمي متداخل عوامل الحفظ بالثلاجة، وقد تبينا مع به الإصابات التالية.

وقفت الركوردينج وبدأت ألبس جواني وشعبان واقف عند الباب فبقوله: أنت مكسوف تدخل يا بيه ولا إيه. قالي: لا، عشان النفس بس ياريس وأسيبك تاخذ راحتك، بصيته البصة اللي بيخاف منها قلبس جوانتي فورا وجه، بدأت أقلب في الجثة بحرص مش عاوز ألمس أي حاجة، وواضح إن الإصابات كلها إصابات رضية وكسور تتماشى تماما مع واقعة السقوط من علو، ولكن في مشكلة كبيرة جدا إن الإصابات دي ليست حيوية!! الإصابات دي حدثت بعد الوفاة ومن المعروف إن البعض حين يسقطون من ارتفاعات شاهقة قد يموتون بسكتات قلبية أثناء السقوط، لكن تظل إصاباتهم محتقظة بحيويتها، أما الحالة دي لأ. كان في فاصل زمني مؤكد بين الوفاة والسقوط، لاتخطئه أبدا عين طبيب شرعي، ودي في حد ذاتها مشكلة كبيرة جدا، مشكلة لأن الجثة دي لازم تنتشرح رغم إنها جثة مصابة بالإيدز، ورغم إن معقدناش التجهيزات الكافية للتعامل مع الإيدز، وبالتالي أنا أصبحت أمام اختيارين، يا أكتب الكلمتين دول وأقول للنيابة تطلب من المباحث تعمل التحريات، وغالبا النيابة هتبعتهالي المشرحة. يا إما نجيب من الآخر وتطلب إحنا التشريح، وقد كان وطلبنا نقل الجثمان إلى مشرحة زينهم وتشريح الجثمان لبيان حقيقة الوفاة.

رجعنا المشرحة وطول الطريق بنتناقش أنا وشعبولا عن الإيدز؛ مناقشة علمية لاتخلوا من بلاهة شعبان المصر إن أعراض الإيدز اللي أنا قلتهاها كلها موجودة عند الشيخ سعيد، ولازم تطلع قرار بحجزه في أي مصحة حجز الفرادي.

ساعة تقريبا من إرسال الإشارة للنيابة وفعلا بعث الجثمان وانقلب الوضع رأسا على عقب، مش عارف ليه لو شفت ميت في أي مكان بيكون عادي وطبيعي؛ لحد ما. المشرحة، تقريبا وجود الجثث جنبه بيقوي قلبه ولا إيه؟ مش عارف فيبدأ يأكدلي إن العجائب لن تتوقف (وان الموتى يتحدثون أيضا) ليست لبس مختلف تماما، جوانتي جلد وحاولت أخذ كل الإحتياطات اللازمة المتعارف عليها عالميا وفرشت الأرض وترابيزة التشريح مشمع، جهزت أدوات تعقيم ما بعد التشريح، وبدأت أشغل بنفسي بدون مساعدة شعبان اللي كان واقف بس بيناولني أدوات، كمان الأدوات اللي بتستخدم مع حالة إيدز لازم يتم التخلص منها تماما بعدها.

واضح من التشريح إن مفيش إصابة قاتلة في حد ذاتها، وواضح أكثر إن الحالة دي ماتت بنوع من أنواع السموم دا مؤكد من واقع الخبرة بالنسبالي كطبيب شرعي، ولكن للأسف شرائط كشف المخدرات والسموم مش لاقية أي شيء في البول غير أوية الإكتئاب، كتبت مسودة تقرير باللي عندي، وأنا واقف قدام الجثة وأنا عارف إن لو أجهزة المعمل ملقطتش سموم الأمر هينثر بلبله كبيرة سواء في النيابة، أو في المحكمة لأن في مناقشات مستمرة ليا في الاتنين؛ لأن من الطبيعي أن الطبيب

الشرعي بيحسم القضية، وبيقول سبب الوفاة بكل وضوح، ومحصلش قبل كدة إن الطبيب الشرعي هو اللي يضيف للقضية الغاز، مش يحل الألباز بتاعتها. طلعت مكتبي بعد انتهاء التشريع، وأخذت شور وفكرت في الحالة كثير.

بعد بساعة شعبان طالع يخطب على الباب وبيضحك، بقوله:

- في إيه يا مجنون؟

= قالي مريض الإيدز عاوزك قاعد ينادي ويقول يا دكتور.

فكرته بيهرج قالي: والله بينادي عليك، ومن مميزات شعبان فعلا إنه مستحيل يحلف كذب.

نزلت مع شعبان تحت وإحنا بنضحك في الطريق مفيش أي صوت إطلاقا، المشرحة هادية النهارده جدا على غير العادة، لكن شعبان بيقسم إن هو والشيخ سعيد سمعوا الجثة بتنادي وتقول: يا دكتور، وراحوا وقفوا قدام التلاجة وسمعوا الجثة بتقول: يا دكتور.

أنا كنت لاف الجثة في مشمع قبل الاستعداد للغسل على ما يبجي أهلها ياخدوها، فتحت باب التلاجة ودخلت بصيت على الجثة، لكن عين الولد اللي كانت مغمضة في المستشفى، وكانت مغمضة على ترابيزة التشريح أصبحت مفتوحة تماما!! مفتوحة ومبرقة بشكل غير طبيعي؛ بالرغم إن عدى على الوفاة وقت انتهت فيه مراحل التيبس الرمي اللي ممكن تفتح العين، انتهى الوقت دا من زمان، لكن العين كانت مفتوحة مش بشكل عادي، لا دي كانت مبرقة ومبرقة بشكل يثير جواك الرعب، دخلت جوا التلاجة الكبيرة قربت من الجثة، عارف لما يجيلك إحساس إن حد بيبصلك بكل قوة، ومثبت عينه عليك وعاوز يلفت نظرك لشي»، بس إنت مش عارف هو عاوز يقول إيه بالظبط! العين مركزة فيا بكل قوة وفجأة كأن دبت فيها حياة غريبة، حياة دبت فيها مرة واحدة؛ رغم إن قبل التشريح عادة بفتح العين بايدي، وأبص عليها خاصة في الحالات الجاية من المستشفيات، ودا لسببين الأول: إن ممكن يكون فيها أي إصابة، والثاني: إن ممكن تكون القرنية مسروقة وغير موجودة ودا بيحصل كثير في المستشفيات فلازم أثبت حاجة زي كدة. لما شفت العين وقتها سواء في المستشفى، أو على ترابيزة التشريح كانت عين ميت طبيعية بقاله عدد من الساعات تجاوز (12 ساعة) ومتأكد إنني بعد التشريح قفلت العين بايدي، لكن المرادي العين مش مفتوحة لأ دي مبرقة وكأن فيها لمحة حياة غامضة وغريبة.

من شغلي عارف إن الجثث أحيانا بتدبك إشارات، وأحيانا الإشارات دي متكونش الهام بس ممكن تكون حركة معينة أو أصوات معينة، تماما زي جثة البنت اللي كان عندها تمن سنين. وجاية بتسمم غذائي عشان يتاخذ ليها عينات، وعمرى ما فكرت لحظة إنني أكشف على عذريتها بسبب سنها، وملابسها وفاتها، لكن حركة رجليها غير الطبيعية والغير مفهومة أجبرتني أكشف عليها، وكانت الصدمة اللي كشفت الجريمة الكاملة. المهم بصيت لعنيه تاني من بعيد وخرجت، قلت: لشعبان والشيخ

سعيد إن مؤكّد إن حد بينادي من برا، وسمعتوه على إنه صوت جاي من هنا فأقسموا إنهم وقفوا قدام التلاجة وسمعوا الصوت دا بودنهم.

كانت الساعة بقت ثلاثة الفجر تقريبا. سيبتهم ومشيت لوحدي بين تلاجات الجثث رايح المكتب لكن المرادي أنا اللي سمعت بودني كلمة " دكتور " رغم إنها جاية من مكان بعيد سحيق خربت ودني، التقت بسرعة لقيت شعبان والشيخ سعيد بيقولولي سمعت؟! رجعت تاني رجعت لأنني سمعت فعلا ورجعت المرادي فتحت التلاجة بتصميم المرادي أجزم بإن العين كانت مبرقة بشكل أكبر كثير من المرة اللي كانت من دقيقة بس مبرقة لدرجة إن مفيش جفون أسانا والعين بارزة تماما في حالة جحوظ غير طبيعية لكن أنا مش فاهم هو عاوز يقول إيه؟ خمس دقائق واقف قدامه وهو معايا مركز جدا، وباصص في عينيه، إحساس إن ميت بيبصلك بكل قوة، ومركز معاك تماما مع لمحة حياة غريبة في عينه حلت محل برود وعمّة الميتة. إحساس عجيب لدرجة إلى لحد النهارده معرفش فعليا أنا كنت واقف جوه عشان بفكر، ولا كنت واقف منبهر برهبة موقف بين حي، وميت مركزين تماما في عيون بعض، وواحد فيهم مش بيرمش أبدا، لكنه عاوز يقول حاجة مش قادر ينطقها، إحساس إن عينه خلاص هنتكلم وتقول كان إحساس غريب أول مرة أحسه عمري ما ركزت جوه عين ميت بالشكل ده عمري ما قرئت شيفرة الموت جوه العيون. بردت جدا من التلاجة خرجت جبت كرسي وقعدت في أوضة شعبان أشرب قهوة وأفكر وفجأة انتفضت!!

شعبان روح هاتلي سرنجة من أي صيدلية خمسة سنتي، شعبان راح جاب السرنجة وجه. ليست جونتي جلد ودخلت، العين مبرقة بشكل غير طبيعي لكن راحت منها لمحة الحياة وتحس إن في جواها حالة رضا، مش وهم ولا تخيل، العين فعليا المرة دي راحت منها الحياة، ولمحة القوة اللي كانت فيها، وبقي جواها حالة رضا وكأن شيفرة الموت اتحلت خلاص. هما بيحسوا للدرجة دي؟ دخلت الابرة جوا العين بتكنيك معين واخذت عينة من سائل العين وقفلت العين بإيدي، لكن العين كان جواها رضا غير طبيعي احتفظت بالعينة في تلاجة مكتبي، وبعث عينات الجثة من دم، ومحتويات معدة وكبد وكلى ومثانة للمعمل، ولسبب غريب احتفظت بعينة السائل الزجاجي للعين. بعد ما طلعت العينات فوق كام يوم النتيجة جت، الأجهزة مش لاقطة أي سموم، أجهزة كشف السموم عامة لازم تكون محدد لها المرجع اللي على أساسه بتحددك نوع السموم، وتقولك دا السم الفلاني، ولو المرجع دا مش موجود البيانات بتاعته جوه الجهاز، فالجهاز مستحيل يكتشف نوع السم، تماما زي المخدرات زي مؤخرا ما احتجنا مراجع للفودو والاستروكس وكل البلاوي اللي ملت البلد، دلوقتي أصبحت في معضلة رهيبية. الفحص الإكلينيكي والتشريحي بيقول: إن الإصابات دي كلها غير حيوية وإن الوفاة دي من نوع سم غير معروف؛ بينما الأجهزة بتقول: مفيش سم (تخلوا العينات من السموم المعروفة). أول ما جت عينات الاجهزة بالسلبية أرسلت عينة سائل العين، وقد كان وجود آثار مركزة من الأتروبيين، والهيوسيومين، وقلويات سامة مركزة في السائل الزجاجي في العين، ويبحث سريع التركيبية دي متواجدة في نبات اسمه " بيلادونا " أو ببسموه " اتروبا

بيلادونا ” ودا نبات سام كان بيستخدم زمان في القتلق وأشهر من كانت بتستخدمه في العصر الروماني هي زوجة الإمبراطور ” أغسطس ” وأحياناً كانوا بيحطوه على السهام للقتل السريع، ومن أهم أعراضه الهلوسة والهذيان والأرق.

كتبت تقريرى وبدأت التحقيقات واشتغلت المباحث الجنائية.

الولد كان شغال فعلاً في مجال طبي في أفريقيا، وعلم بوفاة والده رجع واكتشف هنا في مصر إصابته بالإيدز عن طريق انتقال من شكة إبرة أثناء عمله، وليس عن طريق الجنس، والده كان رجل أعمال ثري للغاية، وكان ليه أخت واحدة من الأب، وأخته دي للأسف طبية نفسية طمعت في الثروة ليهها كلها لوحدها، وبحكم عملها كان عندها المعلومة دي، بدأت تحطه في الأكل على مدار أربع شهور بنات البيلادونا بجرعات قليلة جداً، فالولد كان بيهلوس ويهذي باستمرار وهي اللي زرعت جواه موضوع الجن داء، اللي كان بيهذي بيه في كل مكان، الولد فعلاً حاول الانتحار قبل كدة بقطع شرايين يديه، والجيران لحقوه في آخر لحظة، بعد آخر أكلة الولد مات بعد ما كان تقريباً بقى هيكل عظمي فشالته ورمته من فوق العمارة ودخلت شقتها وقلت الباب.

أكثر تركيز للبيلادونا بيكون في السائل الزجاجي للعين.

اوعى تسدق لحظة إن الموت نهاية، وإن الموت سكون، كل ميت بيموت وهو جواه سر مبيرتاحش غير لما بيكشفه، و(هادي) وهو اسمه بالمناسبة كشف السر، كشفه تماماً، واضح إن بمجرد موتهم بيطلعوا على الأسرار كل الأسرار، واضح إن الحياه هناك مكشوفة وعنوانها الحقيقة، وبس مفيش هناك تلاعب، ولا تزييف ولا كذب ولا غش ولا خداع فيه وضوح تام لا مرأء فيه، حتى الحقيقة في عالمانا نسبية وليها أكثر من وجه، لكن واضح إنها هناك ليهها وجه واحد بس، الحقيقة المطلقة لما بموت ليكم حد بصوا أوي في عنيه، ولما تموتوا ركزوا بعنيكم مع أكثر حد بتحبوه، قولوا أسراركم حتى وانتو موتى، منكمتموش سر جواكم، انقلولنا الحقيقة من هناك، وأوعوا تتخيلوا إن الموت نهاية.

الموتى يشيرون ويتحركون و... ويتحدثون أيضاً!

∞ ∞ ∞ ∞ ∞

الحكاية الرابعة والعشرون

ترحلين، وأنا كما أنا، بحياتي المرتبة بفوضوية، وقيمص المتمرد الذي لم يتعود يوماً على ربطة عنق، مفتوحاً دائماً بزرر أو زررين، وصوتي المميز دفناً وحرناً، يوهمك أنه يقرأ شعراً، حتى عندما يقول أشياء عادية. فيبدو وكأنه شعر أضع طريقه وأنه يوجد خطأ حيث هو.

في كل مدينة قابلتها قبلك، كنت على يقين أنني لم أصل بعد إلى وجهتي النهائية وأني لازلت على أهبة سفر. حتى عندما كنت أجلس على محطات بعينها أشعر وكأنني جالس على حقائبي. لم أكن يوماً قبلك مرتاحاً حيث كنت، وكأن المدن التي كنت أسكنها محطات أنتظر فيها قطاراً لا أدري متى يأتي.

يا ميناء العشق الطاغي، والحنان الطاغي، والعينان التي لم يدقق فيهما رجل قبلي قط وإلا سقط صريع عشق.

امرأة كمدينة فيها شيء من غزّة، من عمان، ومن بيروت، وموسكو، ومن الجزائر، وأثينا، مضافاً إليهم في لمسة ساحرة روعة باريس، ورجل كمستكشف. فيه شيء من ميغلان، من بوشكين، من السيّاب. من الحلاج، من نزار، من غسان كنفاني، ومن لوركا وتيودورا كيس.

باعدت بيننا البلاد والأعمار والأقدار. ووحده الحلم الساكن فينا رغماً عنا ظلّ يجمعنا. ولذلك سيأتي حتمي يوماً ولم تنزل لك في القلب مكانتك الأولى. حيث بدأت ذات يوم، ذات جنون.

الزمان: يونيو 2016.

المكان: مشرحة زينهم.

التوقيت: التاسعة ليلاً.

نايم فالبيت وجالي الإتصال التالي من شعبان

- مساء الفل، يا معالي الرئيس، دكتور هشام قالي: إن إنت إللي معايا النهاردة.

- آه يا شعبان، لو في حاجة كلمني.

- أمال أنا متصل ببيك نزاهاة يعني يا ريس، أنا وقتي ثمين.

- طب قول يا أبو وقت ثمين، عندك إيه؟

- أنا عندي جثة يا رياسة، محدش ينفع يشتغلها غيرك.

- اشمعنى بقا؟

- علشان من الجثث، إللي بتقول، بخخ وعوو وكدهون.

-ليه، إيه اللي حصل؟

- من ساعة ما الجثة جات، وهي عاملة قلق في المشرحة، والجثث بدأت، تضايق من الدوشة، وخايف يعملوا علينا ثورة. ويحلفوا ماهم بايتين في التلاجات، وانت يا رياسة اللي بتتعرف تتعامل مع الأنواع دي كويس.

- طيب. أنا نص ساعة وجاي، جهزها على ماجي، وبكرر عليك يا شعبان، وبأكد لآخر مرة متقعدش برا المشرحة، يا شعبان، مكانك في أوضتك، مش بره المشرحة، دي مشرحة مش قهوة، أقعد في أوضتك، أنت والشيخ سعيد.

- تعليماتك يا رياسة.

قومت لبست هدومي ونزلت داخل الشارع بتاع المشرحة شايف شعبولا من بعيد قاعد برا هو والشيخ سعيد ولا كإني قولت شيء.

صفحة 260

دخلت بالعربية بعنف ركنت ونزلت رزعت الباب بتاع العربية ونازل أزعق لقيت شعبان في وشي وقال: والله ما انت مزعق إدخل شوف الدوشة إلهي جوه الأول، وبعدين إبقى زعق برحتك. بصيئله بقرف ودخلت وأنا داخل في صيوت خبط في التلاجة الكبيرة، ودا غالباً بيحصل عادة، لكن مش هي دي الأزمة اللي تخليه يطلع يقعد برا يعني.

مريت من جنبها علشان أطلع المكتب أغير هدومي، وعند آخر الكوريدور سمعت صوت حد بيصفر صفارة قوية جداً وطالعة من التلاجة، رجعت تاني، فضلت واقف عند التلاجة مفيش أي جديد وأول ما أبعد يطلع صفارة من التلاجة تاني.

أحيانا الجثث بتحب تلعب، زي التصريح الشهير للشيخ سعيد في أشهر جريدة مصرية حالياً، واللي عمل ضجة كبيرة جداً وقتها لما قال: إنه لما بيكون رايق الجثث بتنادي عليه وهو بيروح يز عقلهم ويقولهم متشتغلونيش والتصريح دا حقيقي بالمناسبة.

طلعت المكتب شعبان طلع ورايا ومعاه إشارة التصريح قريتها بسرعة وكانت الإشارة مضمونها كالتالي:

السيد/ مدير عام مشرحة زينهم.

«نفيد سيادتكم، بوصل جثمان المتوفى إلى رحمة مولاه (...) في القضية رقم (...)» وقد أفادت التحقيقات الأولية أن المذكور يعاني حالة نفسية، وقد سبق أن قام أهله بإدخاله مستشفى الأمراض النفسية، ولكنه خرج منها بعد فترة، وكان يتعاطى العديد من المواد المخدرة، وقد لقي حتفه جراء جرعة زائدة. رجاء من سيادتكم، إجراء الصفة التشريحية لجثمان المتوفى لبيان سبب، وكيفية، تاريخ حدوث الوفاة، وعمّا إذا كانت ناجمة عن جرعة زائدة من المخدرات من عدمه، وموافاتنا بالتقرير اللازم.»

قولت لشعبان جهز الحالة على التراييزة تحت لحد ما أنزل. لبست لبس التشريح ونزلت. الجثة على تراييزة التشريح وشعبان واقف يغني أغاني أطفال ذي نامي ننه هوووه. مفهمتش بدأت (الريكوردينج)

> الجثة لذكر في أوائل العقد الرابع من العمر، طويل القامة، متوسط البني، يرتدي بنطال جينز أزرق اللون، وتيشرت أحمر اللون، وسليب داخلي أحمر اللون، والملابس جميعها خالية من التمزقات والقطوع والتلوثات المشتبهة. والجثة في حالة التيبس الرمي المتداخل مع عوامل الحفظ بالتلاجة، والرسوب الدموي باللون الباهت بخلفية الجثة عدا مواضع الإتكاء، والتعفن الرمي لم يتضح ظاهرياً بعد. وقد تبين أن الجثة خالية من أي آثار إصابية حيوية ظاهرة. وقفت الريكوردينج.

وبدأ شعبان يشيل الملابس، شفت تحتها لوحة فنية، الجسد كله تقريباً مغطى بوشوم مختلفة باللونين الأخضر والأحمر، تملأ عموم الجسم أشكال غريبة وعجيبة، صور لثعابين، وصور لطيور جارحة وكتابات بالعربية، والإنجليزية، وأشكال غير مفهومة، أو واضحة. كل دا مش مهم، ماعدا وشم معين أو بمعنى أدق طلسم معين مكتوب بأعلى الصدر بلغة غير مفهومة أشبه بالفارسية، لكن لما عرضتها على حد متخصص قال: إنها شبيهة فعلاً بالفارسية، لكن مش فارسية. مكتوبة على هيئة (3سطور) فوق بض. الغريب فيها إنك بمجرد ما تبصلها عنيك تزغلل وتحس بصداع رهيب وطاقة سلبية غير طبيعية، وخنقة، ولو دقت أكثر تحس بدوار وكإنك مش قادر تقف، حتى صور الكاميرا بتكون مزغلة زي ما هتشوفها في الصور ودا شيء غريب جداً. سببت كل الوشوم الباقية وركزت مع الوشم دا لكن للأسف لا عارف أركز فيه، ولا عارف أقرأه أخذته كذا صورته وحسيت إنه بارز شوية، وبمجرد ما لمستته بالجوانتي إتكهربت، بالظبط نفس إحساس الكهرباء اللي بيخلي جسمك ينتفض من مكانه، ونور المشرحة كله اهتز بشكل غير طبيعي. يقل ويزيد أكثر من مرة لحد ما ثبت. وشعبان واقف يضحك وباصص للراجل وبيقوله: الله ينور عليك إنت منور لوحدك مش محتاجين نور والله.

فضلت أضحك وأهزر مع شعبان فترة بعدها كنت أنا مُصرّ إن الموضوع صدفة، وإن الاحساس اللي أنا حسيته دا بسبب تغير المجال الكهربائي فالمكان بقوة، وقاعد أوهم نفسي وأوهم شعبان بكدا وقولت أجرب تاني جربت تاني وحصل نفس اللي حصل فالمرّة الأولى، ويمكن أعنف كمان من المرّة الأولى، أنا إتأكدت إن الموضوع مش مجرد وشم وإنه طلسم لشيء غريب جداً، موجود أعلى الصدر. بدأت التشريح بالشكل المعتاد. الأعضاء الداخلية كلها سليمة، مفيش فيها أي مشاكل. المعدة تحتوي على سائل أصفر اللون أعتقد أنه المشروب. بفحصه تبين أنه مشروب كحولي. تم أخذ عينه بول من المثانة. وبفحصها وإجراء تحليل سريع للمخدرات تبين إحتوائها على أكثر من أربع أنواع من المخدرات، منها الحشيش، والترمادول، والهروين، والأفيون، وأنواع أخرى غير معروفة مع كمية كبيرة من أدوية المسكنات، وبجرعات عالية جداً. قلعت الجوانتي وروحت فجنب أكتب فورق كل الملاحظات اللي انا شوفتها فورق القضية. فوجئت بشعبان بيصرخ جامد جداً وبيقول آه آه آه. بصنله بسرعة وروحته وقلنته: في إيه يا شعبان إيه اللي حصل؟

قالي: أنا حسيت إني إتكهربت وأنا واقف بعيد عن الجثة، قربت فعلا من الجثة واضح إنها عمله حواليتها مجال كهربائي، تقرب إيدك من شاشة التلفزيون تحس بحاجة زي كدة، فمكانش غريب جداً، شعبان بدأ يخيّط الجثة بحرص وبعدين بعد ما انتهى من تخطيط الجثة، وأكثر من مرة يحس بكهربة خفيفة. حطينا الجثة بالتلاجة الكبيرة وروحنا أوضة شعبان نضحك ونهزر. واضح تماما إن سبب الوفاة هبوط عام وحاد بالدورة الدموية، وتوقف المراكز الحيوية بالمخ عن العمل ومن ثم حدوث الوفاة.

بمجرد دخول الجثمان للتلاجة بدأ وجود الخبط بالغرفة زي ما كان، ولكن بإستمرار الوقت الخبط كان بيزيد بشكل ملحوظ، لحد ما زاد بشكل مبالغ فيه وقررت أروح أبص في التلاجة فتحت باب التلاجة فوجئت بدم موجود في كل مكان، منتشر على الحيطان، وعلى الاستلستين بتاع التلاجات، وعلى الأرض وموجود في كل مكان دم. خليت الشيخ سعيد ينضف الدم الموجود في التلاجة كنت لسه حاسس بالصداع مكان تركيزي في الطلسم اللي شفته دا.

ركبت عربيتي ومشيت طول الطريق عندي زغلة لحد ما وصلت البيت، طلعت البيت نمت نص ساعة تقريبا صحيت متضايق ومخنوق جداً وفجأة أي مكان أبص فيه الأقي الطلسم موجود قدامي، موجود على الجدران، على التلفزيون، على الانترية، على السرير، على التسريحة، أي مكان أبص فيه الأقي الطلسم موجود، أي مكان أو أي إتجاه الأقي الطلسم موجود قدام عيني. وفي نفس الوقت عيني مزغلة جداً ومش قادر أركز في الكلام المكتوب بأي شكل واضح. وإلني مررت بحالات شبيهه قبل كذا كنت عارف بالضبط أنا هعمل إيه. دخلت الحمام اتوضيت بصعوبة والزغلة والصداع مخلي دماغي هينفجر. فرشت سجادة الصلاة وبدأت أصلي- أول ما قولت الله أكبر لقيت الطلسم موجود ومكتوب قدامي على سجادة الصلاة وبدأت أصلي، وبقا بشكل أوضح قدرت أشوف خطوطه لغة غير مفهومة إطلاقاً، وإتأكدت إنها مش لغة فارسية؛ لأنني كنت شوفت حاجات مكتوبة قبل كذا بالفارسية، وإتأكدت إن اللغة المكتوب بيها مش لغة فارسية. لكنها لغة غير مفهومة. الطلسم موجود الطلسم موجود قدامي في سجادة الصلاة. وعلمي صداع غير طبيعي.

بدأت الصلاة بدأت أقرأ الفاتحة، وبعدها (وَاتَّبَعُوا مَا تَتْلُو الشَّيَاطِينُ عَلَىٰ مُلْكٍ سُلَيْمَانَ)، ودي كانت طقوس معتادة بالنسبالي لما بتعرض لأي حاجة بالشكل دا. مش قادر أركز في أي كلمة أنا بقولها الصداع رهيب بيفجر دماغي. حاولت أتماسك كملت صلاة وعند السجود وبمجرد ما راسي لمست المكان اللي كان موجود فيه الطلسم؛ حسيت نفس الإحساس لما لمست الطلسم في المشرحة. جسمي بيتنفض كأنه متكهرب، والنور عمل نفس الشكل اللي كان موجود في المشرحة، بدأ يزيد ويضعف بقوة رهيبية، ولكن كان لازم أكمل، كنت عارف إن مفيش حل ثاني، وإني لو استسلمت وخرجت من الصلاة هتعب جداً. كملت سجودي جسمي بيتنفض، بدأت أكلم ربنا وأدعي دعيت كثير وقولت جميع الأذكار اللي ممكن تفيد في الحالة دي. قولت: ربنا إن أنت الخالق، وإن أنا في حمايتك، إنت اللي هتحميني من أي شر،

ومن أي أذى، احميني من شر جميع خلقك إنس وجن، احميني من إبليس، واحميني من الحسد، أنا في حمايتك ومفيش حد يقدر يحميني غيرك، وأنا لا حول ولا قوة إلا بك. فضلت أردد كذا مرة الأذكار وآية الكرسي أكثر من مرة، لحد ما جسمي بدأ يهدأ، لكن كنت حاسس بتعب رهيب عضلات جسمي كلها بتوجعني. رفعت راسي من السجود لقيته مش موجود قدامي عرفت إنه الحمد لله قدرت أتخلص منه.

رغم إن القصة هذه المرة قد تبدو عادية، ولكن بالنسبالي المرة دي خطيرة جداً لأن أنا اللي كنت هتاذي مش أي حد ثاني برغم جميع الأذكار، وبرغم جميع التحصينات اللي عملتها، ولكن محاولتي لقراءة الطلسم، ومحاولتي للمسح ممنوعش إنه يحصلي كل اللي حصل، الخطر المرة دي كان كبير جداً. كبير جداً علياً أنا شخصياً يمكن أنا اتغاضيت عن حاجات كثير في وصفها حصلتلي؛ علشان الناس متتاثرش كثير، لكن أنا كنت حاسس بألم ووجع غير طبيعي؛ برغم إن أنا بعتمد إن أنا قوي بما فيه الكفاية إن أنا أتحمّل حاجات كثير. لكن لو أي حد ثاني كان اتعرض لجزء من اللي اتعرضتله مكانش هيقدر يتجاوز بسهولة.

اللي عاوز أقوله هنا اوعى تحاول تقرأ أي ورقة إنت مش عارف، أو شاكك فيها طلسم موجود، اوعى تحاول تدخل على أي صفحة من صفحات السحر وتحاول تقرأ أي حاجة مكتوبة، و اوعى أي حد يحاول يعرض عليك كتاب زي شمس المعارف. مثلاً أو غيره وتحاول تقرأ المكتوب فيه، الأذى بيكون عنيف جداً، قراءتك للحاجات دي أخطر مليون مرة من إن يتعملك سحر، أي سحر، أو أذى الأذكار بتحميك منه، لكن كونك مُصرّ إنك تقرأ حاجة من دول، أو تلمسها إنت اللي فتحت جواك بوابة، وإنت اللي ادبت القدرة والطاقة للكائنات الما- ورائية إن هي تاذيك! اوعى تحاول تقرأ أي حاجة من دول حتى لو كان الكلام في بدايته قرآن.

حتى لو لقيت أول الكلام المكتوب قرآن حتى لو لقيت السطور مكتوبة بالمقلوب وحد بيقولك حاول تقرأها، متحاولش إنك تقرأها اوعى الفضول يخدك لإن صدقني لو عملت أي حاجة من دول هنتعب جداً، وممكن الأمر يتطور بشكل مش ممكن تتخيله، اوعى تاخدها بهزار، أو تهريج لإن الفضول فالوقت دا بيكون فضول قاتل والأذى ممكن يستمر طول العمر، وفي طلسم بجد ملهاش حل خاصة لو كان الطلسم دا مع حد ضعيف، أو حد مش قارئ الأذكار، يمكن الأذكار دي مش شوية، ولكن الطلسم كان قوي بما فيه الكفاية الطلسم دي بتبقى عبارة عن استعانه بالجن كونك تحاول تقرأها، أو تلمسها بيعتبرها تدخل منك في شؤونه، وبيحاول ياذيك بأي شكل، فابعدوا الله يخليكوا عن أي شكل من الطلسم دي، اللي بتبقى موجودة على السوشيال ميديا لأن لما تابعتها اكتشفت إن فعلاً منها طلسم حقيقية!

(تم الكتاب بحمد الله وتوفيقه)

عن الكتاب:

على مدار عشر سنوات من استنطاق الجثث، هناك جثث تحب البوح وكشف أسرارها، وهناك جثث تفضل الصمت مؤمنة أن دورها انتهى في هذه الحياة، وأن أي طبق شهى للبوح لا يخلو من توابل الرياء، وأن الصمت عن الموت هو أكثر حديثنا صدقاً.

أربع وعشرون حكاية مبنية على أحداث حقيقية، تدور داخل مشرحة "زينهم" أقدم مشارح مصر وأشهرها. يروي الطبيب الشرعي محمد الشيخ حكاياته بأسلوب ساخر حيناً وأسلوب متأمل حيناً آخر. للموت جلاله وعبرته، له أسرارته وحكمته وفلسفته ودروسه القاسية، لكنه مثير وغامض وقد يحمل الرعب المفاجئ لأصحاب القلوب الضعيفة أيضاً!

متميزون للكتب النصية



لينك الانضمام الى الجروب - Group Link

لينك القتاة - Link

الفهرس

إهداء..

مقدمة..

الحكاية الأولى

الحكاية الثانية

الحكاية الثالثة

الحكاية الرابعة

الحكاية الخامسة

الحكاية السادسة

الحكاية السابعة

الحكاية الثامنة

الحكاية التاسعة

الحكاية العاشرة

الحكاية الحادية عشرة

الحكاية الثانية عشرة

الحكاية الثالثة عشر

الحكاية الرابعة عشر

الحكاية الخامسة عشر

الحكاية السادسة عشر

الحكاية السابعة عشر

الحكاية الثامنة عشر

الحكاية التاسعة عشر

الحكاية الحادية والعشرون

الحكاية الثانية والعشرون

الحكاية الثالثة والعشرون

الحكاية الرابعة والعشرون

عن الكتاب:

الفهرس